

6


38-b

32

16

16


17



17.5.37

~~17.5.37~~

6.38.5.32




M. TULLII
CICERONIS
EPISTOLARUM

A D
FAMILIARES
LIBRI XVI.



AD USUM
UNIVERSITATIS BRAYDENSIS
SOCIETATIS JESU.



MEDIOLANI MDCCLIV. +

APUD JOSEPH MARELLUM.

1. The first part of the document is a list of names and addresses, which appears to be a directory or a list of subscribers. The names are written in a cursive script, and the addresses are listed below them.

2. The second part of the document is a list of names and addresses, which appears to be a directory or a list of subscribers. The names are written in a cursive script, and the addresses are listed below them.

3. The third part of the document is a list of names and addresses, which appears to be a directory or a list of subscribers. The names are written in a cursive script, and the addresses are listed below them.

4. The fourth part of the document is a list of names and addresses, which appears to be a directory or a list of subscribers. The names are written in a cursive script, and the addresses are listed below them.

5. The fifth part of the document is a list of names and addresses, which appears to be a directory or a list of subscribers. The names are written in a cursive script, and the addresses are listed below them.

6. The sixth part of the document is a list of names and addresses, which appears to be a directory or a list of subscribers. The names are written in a cursive script, and the addresses are listed below them.

7. The seventh part of the document is a list of names and addresses, which appears to be a directory or a list of subscribers. The names are written in a cursive script, and the addresses are listed below them.

8. The eighth part of the document is a list of names and addresses, which appears to be a directory or a list of subscribers. The names are written in a cursive script, and the addresses are listed below them.

9. The ninth part of the document is a list of names and addresses, which appears to be a directory or a list of subscribers. The names are written in a cursive script, and the addresses are listed below them.

10. The tenth part of the document is a list of names and addresses, which appears to be a directory or a list of subscribers. The names are written in a cursive script, and the addresses are listed below them.

The following information was obtained from the records of the [redacted] Department of the Interior, Bureau of Land Management, regarding the [redacted] land grant.

[The remainder of the page contains extremely faint, illegible text.]

M. TULLII CICERONIS VITA



EDITA A PAULO MANUTIO.

Quia ad Epistolarum Primi Libri cognitionem non parum conduxerit vita & casuum auctoris cognitio, eam complectar paucissimis. M. T. C. Arpini natus, Romæ, quo puer perductus fuerat, tantum in discendo profecit, ut in causis dicendis primum locum consecutus sit; tantumque veritatis & Reipub. studio potuit, ut omnes honores suo ordine obtinuerit. In consulatu autem sic sese gessit, ut non minus veræ gloriæ in toga meruerit, quam alius quispiam in armis: liberavit enim urbem ab incendio, & civitatem a cæde conjuratorum, Catilina duce: in quos cum animadvertisset, & Catilina jam in prælio cecidisset, primus in Toga triumphavit, primusque parens patriæ appellatus est, erectis ejus gloriæ perpetuis monumentis. Quæ res illi invidiæ non parum peperit: præsertim apud Cæsarem, & paullo post apud Clodium virum apprime nobilem: qui captus amore Pompejæ, uxoris Cæsaris, in domo ejus in veste muliebri, deprehensus est temerasse festa Bonæ (maribus non adeunda) Deæ: ob quam rem in jus vocatus negavit, se tunc in urbe fuisse. Citatus autem Cicero in eum testis adseruit, Clodium eo die secum Romæ fuisse; quod idem & alii præclari viri testati sunt. Clodius tamen, Judicibus corruptis pecunia, absolutus est. Cæsar autem uxorem repudiavit, quod diceret, domum Cæsaris non solum crimine,

mine, sed etiam suspicione criminis vacare debere. In Clodium, ut Ciceroni incommoder, nihil gravius egit. At Clodius ultionis aviditate, a patribus ad plebem per adoptionem transiit; factusque Tribunus plebis Ciceroni diem dixit, quod nobilissimos cives necasset, indicta causa. Erant autem tunc Consules L. Piso Caesaris socer, & P. Gabinius, qui, provinciarum spe, Clodii conatibus favebant. Quod intelligens Cicero, cum neque a Pompejo, neque ab aliis amicis satis tutaretur, aufugit: absensque damnatus est a Clodio, ut, bonis ejus publicatis, quadringentis millibus passuum ab Italia igni & aqua illi interdiceretur: qui vero hospitio eum suscepisset, exul esset, & sua amitteret omnia: additumque rogationi est, ne quis de eo reducendo referret, disputaretve, aut pedibus in sententiam iret. Quae omnia populus scivit atque approbavit, maxima (ut semper fuit) animorum mutabilitate. Clodius ita exulis villas diripuit, incendit; domum in Palatio a fundamentis demolitus est, & in area templum Libertatis constituit: fortunas omnes haste subiecit: nec tamen in tota illa auctione sector quispiam repertus est. Cicero in Macedoniam aufugit, ubi a Planco benigne exceptus est. Clodius autem ob victoriam insolentior factus, etiam Pompejum in publica concione contumeliis proscidit, querens, ut populus, Pompejum eum esse, responderet: Quis uno digito caput scaberet? quis vir virum quaereret? & similia. Qua contumelia irritatus Pompejus, fretusque Lentuli auctoritate, ad quem proximae sunt epistolae, & qui Ciceroni amicissimus fuit, auctor fuit T. Annio Tribuno plebis, ut rogationem ad populum ferret de Cicerone revocando. Quae res ingentes turbas concitavit: Clodius enim cum factione sua tribunitiae obstitit rogationi, eoque obnitente, aliquamdiu nihil agi potuit: certatumque est interim in publico armis, tribuniciaque potestas violata est: multi quoque interfecti; adeo ut Q. Cicero, Marci

fra-

frater, inter cadavera latitans, sit servatus. Postremo Pompejus, ingenti bonorum manu ad hoc ipsum ex tota Italia collecta, Clodium foro expulit, auxilioque fuit, ut populus sine aliquo majore motu rogaretur. Numquam major populi Romani de aliqua re consensus fuisse dicitur: neque tam magnum alias totius Italiae studium, quæ ad hoc ipsum Romam confluxerat; ut non magis eleganter, quam vere Cicero postea gloriatus sit, Italiae se humeris ab exilio reportatum. Senatus caritate & benevolentia cum populo certavit, decrevitque, ut publice laudarentur civitates, quæ Ciceronem humaniter acceperant; ut domus & ville ejus publico instaurarentur sumptu. Rediit XVI. mense, postquam urbe ejectus fuerat, in Senatuque aliquantulum floruit, quo tempore ad Lentulum Primi libri Epistolas scripsit: deinde Cili-
ciam post Lentulum & Appium Claudium Pulchrum provinciam obtinuit, unde reversus bella civilia inter Cæsarem & Pompejum offendit orta: quæ res effecit, ut triumphare non potuerit: diu autem ad concordiam utrumque frustra hortatus, Pompejum tandem secutus est: quo victo & occiso, per Dolabellam generum suum Cæsari reconciliatus, cum in foro locus non esset, ad philosophiam se contulit. Tandem, Cæsare occiso, cum libertatis publicæ gratia ejus percussores tutaretur, & in M. Antonium Cæsaris vindicem Philippicas habuisset, postquam Antonius, Lepidus, & Augustus Triumviratum iniissent, ab Antonio, aliis conniventibus, proscriptus est, & in fuga deprehensus, capite & manu, qua Philippicas scripserat, truncatus est.

HISTORIA

DE PTOLEMÆO REGE ÆGYPTIORUM

*Ad intelligentiam eorum, quæ ad ejus
restitutionem in Regnum spectant.*

R Ex Ægypti Ptolemæus, cognomento Auletes, Populi Rom. amicus fuit. Is, cum quia tibiis canere præter regiam dignitatem solitus erat; tum ob acerbam tributorum exactionem regno pulsus Romam confugit, Consulibus Metello & Lentulo, anno urbis conditæ sexcentesimo nonagesimo sexto. Acceptam ab Ægyptiis injuriam questus petiit, ut restitueretur; obtinuitque, Pompeji præsertim opera, quem dudum sibi devinxerat: quare factum est, referente Lentulo, Senatusconsultum de Ptolemæo in regnum restituendo. Is honor spectabat Lentulum, cui Cilicia non procul ab Ægypto distans sortito obtigerat: eidemque favebat Cicero, quod ejus in primis auctoritate ab exilio se revocatum agnosceret. Sed cum mallet Ptolemæus a Pompejo reduci, summæ præter ceteros auctoritatis viro; eamque ob rem, apertis largitionibus, Senatorum animos per legatum corrumperet (ipse enim jam Ephesum se contulerat) universi ordinis invidiam collegit: divulgato deinde per Catonem Tribunum plebis commentitio Sibyllæ oraculo reductionem Regis in speciem ventante, eo redacta res est, ut nulla amplius Ptolemæo spes esset Ægyptum recuperandi: ægre tandem obtinuit, ut a Gabinio Syriæ Proconsule restitueretur.

P. MA-

P. MANUTIUS.

E Pistolæ, quas Familiæres vocant, scriptæ sunt omnes post consulatum, ante exilium, in exilio, post exilium. Ante exilium quinque. Prima omnium, quæ Pompejo Magno inscribitur: altera Q. Metelli Celeris ad Ciceronem: tertia Ciceronis ad eum: quarta ad C. Antonium: quinta ad P. Sextium: quæ in Libro quinto omnes leguntur. In exilio, ad Terentiam uxorem quinque Lib. XIV. Post exilium reliquæ omnes. Ad Lentulum Lib. 1. diversis temporibus, idest toto triennio, scriptæ sunt: sex quidem primæ, gerentibus consulatum Marcellino, & Philippo: septima & octava, Pompejo & Crasso: nona, Domitio & Appio: quod ex earum argumentis, & observatione cognoscitur historiæ.

Die 22. Junii 1754.

R E I M P R I M A T U R.

Fr. Joseph Maria Lugani Vic. Gen. S. Officii
Mediolani.

J. A. Vismara Pœn. Major pro Eminentiss. &
Reverendiss. D. D. Card. Archiepiscopo.

Vidit Julius Cæsar Bersanus pro Excellentiss.
Senatu.

M. TULLII
CICERONIS
EPISTOLARUM
AD FAMILIARES
LIBER PRIMUS.



ARGUMENTUM.

P. Cornelio Lentulo Spintheri, gentis patriciae, Ciliciam proconsulari imperio administranti, scribit Cicero de officio suo erga ipsum, in curanda Regis Ptolemæi reductione: deinde quia rem non perficiat, excusationem affert. Est autem excusatio multiplex; & quia Rex ipse a Pompejo restitui cupiat, & quia Pompejus idem cupere videatur, & quia Consulares totam rem odio habeant; postremo quia ipse auctoritatis in causa Regis non satis habeat, cum omnes intelligant, ipsum Lentulo nimis debere.

M. T. C. P. LENTULO PROCOS.
S. D.

EGo omni officio, ac potius pietate erga te, ceteris satisfacio omnibus, mihi ipse numquam satisfacio: tanta enim magnitudo est tuorum erga me meritorum, ut, quoniam tu, nisi perfecta re, de me non conquiesci, ego, quia non idem in tua causa efficio, vitam mihi esse acerbam putem. In causa hæc sunt: Ammonius Regis legatus aperte pecunia nos oppugnat; res agitur per eosdem creditores, per quos, cum tu aderas, agebatur. Regis causa, si qui sunt, qui velint (qui pauci sunt) omnes rem ad Pompejum deferri volunt. Senatus religionis calumniam, non religione, sed malevolentia, & illius regiae largitionis invidia,

A

com-

comprobat. Pompejum & hortari, & orare, etiam liberius accusare, & monere, ut magnam infamiam fugiat, non desistimus; sed plane nec precibus nostris, nec admonitionibus reliquit locum. Nam cum in sermone quotidiano, tum in senatu, palam sic egit causam tuam, ut neque eloquentia maiore quisquam, neque gravitate, nec studio, nec contentione agere potuerit, cum summa testificatione tuorum in se officiorum, & amoris erga te sui. Marcellinum tibi esse iratum scis. Is, hac regia causa excepta, ceteris in rebus se acerrimum tui defensorem fore ostendit. Quod dat, accepimus: quod instituit referre de religione, & sæpe jam retulit, ab eo deduci non potest. Res ante Idus acta sic est, nam hæc Idibus mane scripsi. Hortensii, & mea, & Luculli sententia cedit religioni de exercitu; (teneri enim res aliter non potest) sed ex illo S. C. quod te referente factum est, tibi decernit, ut Regem reducas: quod commodò Reipubl. facere possis, ut exercitum religio tollat, te auctorem senatus retineat. Crassus tres legatos decernit, nec excludit Pompejum: censet enim etiam ex iis, qui cum imperio sunt; Bibulus tres legatos ex iis, qui privati sunt: huic assentiuntur reliqui consulares, præter Servilium, qui omnino reduci negat oportere, & Volcatium, qui, Lupo referente, Pompejum decernit, & Afranium, qui assentitur Volcatio: quæ res auget suspicionem Pompeji voluntatis; nam advertebatur, Pompeji familiares assentire Volcatio. Laboratur vehementer: inclinata res est. Libonis, & Hypsæi non obscura concursatio & contentio, omniumque Pompeji familiarium studium in eam opinionem rem adduxerunt, ut Pompejus cupere videatur; cui qui nolunt, iidem tibi, quod eum ornasti, non sunt amici. Nos in causa auctoritatem eo minorem habemus, quod tibi debemus.

Gra-

Gratiam autem nostram extinguit hominum suspicio, quod Pompejo se gratificari putant. Ut in rebus multo ante, quam profectus es, ab ipso rege, & ab intimis ac domesticis Pompeji clam exulceratis, deinde palam a consularibus exagitatis, & in summam invidiam adductis, ita verfamur. Nostram fidem omnes, amorem tui absentis præsentisque cognoscent. Si esset in iis fides, in quibus summa esse debebat, non laboraremus. Vale.

ARGUMENTUM.

Scribit, quid actum sit in Senatu de causa regia, ostendit de Pompejo se bene sperare, ab ejus familiaribus timere, Tribuni pl. ne quid moliri contra possint provisum esse.

M. T. C. P. LENTULO S. D.

2

IDibus Januariis in senatu nihil est confectum: propterea quod dies magna ex parte consumptus est altercatione Lentuli consulis, & Caninii tribuni pl. Eo die nos quoque multa verba fecimus, maximeque visi sumus senatum commemoratione tuæ voluntatis erga illum ordinem commovere. Itaque postridie placuit, ut breviter sententias diceremus; videbatur enim reconciliata nobis voluntas senatus esse: quod tum dicendo, tum singulis appellandis, rogandisque perspexeram. Itaque, cum sententia prima Bibuli pronuntiata esset, ut tres legati Regem reducerent; secunda Hortensii, ut tu sine exercitu reduceres; tertia Volcatii, ut Pompejus reduceret: postulatum est, ut Bibuli sententia divideretur: quatenus de religione dicebat, cuique rei jam obfisti non poterat, Bibulo assensum est: de tribus legatis, frequentes ierunt in alia omnia. Proxima erat Hortensii sententia, cum Lupus tribunus pleb. quod ipse de Pompejo retulisset, con-

tendere cœpit, ante se oportere discessionem facere, quam Consules: ejus orationi vehementer ab omnibus reclamatum est: erat enim & iniqua, & nova. Consules neque concedebant, neque valde pugnabant: diem consumi volebant, id quod est factum: perspiciebant enim, in Hortensii sententiam multis partibus plures ituros: quamquam aperte Volcatio assentirentur: multi rogabantur, atque idipsum Consulibus invitis; nam Bibuli sententiam valere cupierunt. Hac controversia usque ad noctem ducta, senatus est dimissus, & ego eo die casu apud Pompejum cœnavi: nactusque tempus hoc magis idoneum, quam umquam antea, quod post tuum discessum, is dies primus honestissimus nobis fuerat in senatu, ita sum cum illo locutus, ut mihi viderer animum hominis ab omni alia cogitatione ad tuam dignitatem tuendam traducere: quem ego ipsum cum audio, prorsus eum libero omni suspitione cupiditatis: cum autem ejus familiares omnium ordinum video, perspicio id, quod jam omnibus est apertum, totam rem istam jampridem a certis hominibus, non invito Rege ipso, consiliariisque ejus esse corruptam. Hæc scripsi ad xvi. Kal. Febr. ante lucem, eo die senatus erat futurus: nos in senatu (quemadmodum spero) dignitatem nostram, ut potest in tanta hominum perfidia & iniquitate retinebimus. Quod ad popularem rationem attinet, hoc videmur esse consecuti, ut nequid agi cum populo aut salvis auspiciis, aut salvis legibus, aut denique sine vi possit. De his rebus, pridie quam hæc scripsi, senatus auctoritas gravissima intercessit: cui cum Cato, & Caninius intercessissent, tamen est per-scripta: eam ad te missam esse arbitror. De ceteris rebus, quidquid erit actum, scribam ad te: &, ut quam rectissime agantur, omni mea cura, opera, diligentia, gratia providebo. Vale.

ARGUMENTUM.

Commendat A. Trebonium amicum suum splendidum Equitem Romanum. Hujus autem generis epistolarum quatuor partes solent esse: ut amicum nostrum ostendamus eum, quem commendamus; ut bonum virum, & dignum, qui commendetur; ut æquitatem rei, de qua scribimus; denique ut beneficii memorem futurum, simulque nos ipsos significemus: quæ in hac epistola non plane omnia sunt expressa.

M. T. C. P. LENTULO S. D. 3

AULO Trebonio, qui in tua provincia magna negotia, & ampla, & expedita habet, multos annos utor valde familiariter. Is cum antea semper & suo splendore, & nostra, ceterorumque amicorum commendatione, gratissimus in provincia fuit; tum hoc tempore propter tuum in me amorem, nostramque necessitudinem, vehementer confidit his meis litteris, se apud te gratiosum fore. Quæ ne spes eum fallat, vehementer te rogo: commendoque tibi ejus omnia negotia, libertos, procuratores, familiam; in primisque, ut, quæ T. Appius de ejus re decrevit, ea comprobes, omnibusque rebus eum ita tractes, ut intelligat nostram commendationem non vulgarem fuisse. Vale.

ARGUMENTUM.

Laudat officium suum, tum subjungit de calumniis adversariorum, per quos steterit, quo minus res conficeretur. A Senatu ostendit se bene sperare: sed eum habitum iri non nisi post multos dies: vim timet: postremo loco, Senatum, & populum bene sentire de Lentulo significat.

M. T. C. P. LENTULO S. D. 4

AD XVI. Kalend. Febr. cum in senatu pulcherrime starem, quod jam illam sententiam

Bibuli de tribus legatis pridie ejus diei fregeramus, unumque certamen esset relictum, sententia Volcatii; res ab adversariis nostris extracta est variis calumniis: causam enim frequenti senatu, in magna varietate, magnaue invidia eorum, qui a te causam regiam alio transferebant, obtinebamus. Eo die acerbum habuimus Curionem; Bibulum multo justiolem, pæne etiam amicum. Caninius, & Cato negarunt se legem ullam ante comitia esse laturus. Senatus haberi ante Kalend. Febr. per legem Pupiam (id quod scis) non potest: neque mense Febr. toto, nisi perfectis, aut rejectis legationibus. Hæc tamen opinio est pop. Rom. a tuis invidis, atque obtrectatoribus nomen inductum fictæ religionis, non tam ut te impedirent, quam ut ne quis propter exercitus cupiditatem Alexandriam vellet ire: dignitatis autem tuæ, nemo est quin existimet habitam esse rationem ab senatu. Nemo est enim qui nesciat, quo minus discessio fieret, per adversarios tuos esse factum, qui nunc populi Rom. nomine, re autem vera sceleratissimo latrocinio, si qua conabuntur agere, fatis provisum est, ut ne quid salvis auspiciis, aut legibus, aut etiam sine vi agere possint. Ego neque de meo studio, neque de nonnullorum injuria scribendum mihi esse arbitror. Quid enim aut me ostentem, qui, si vitam pro tua dignitate profundam, nullam partem videar tuorum meritorum assecutus? aut de aliorum injuriis querar, quod sine summo dolore facere non possum? Ego tibi a vi, hac præsertim imbecillitate magistratum præstare nihil possum: vi excepta, possum confirmare, te & senatus, & populi Rom. summo studio amplitudinem tuam retenturum. Vale.



ARGUMENTUM.

Semper exorditur a commemoratione officii sui. Subjungit de Catonis Tribuni pl. lege promulgata, ut Lentulus de Cilicia revocaretur. Causam regiam a Pompejo depositam significat, quo majorem spem habere Lentulus debeat.

M. T. C. P. LENTULO S. D. 3

TAmetsi mihi nihil fuit optatius, quam ut primum abs te ipso, deinde a ceteris omnibus quam gratissimus erga te esse cognoscerer: tamen afficior summo dolore, ejusmodi tempora post tuam profectionem esse consecuta, ut & meam, & ceterorum erga te fidem, & benevolentiam absens experirere. Te videre, & sentire eandem fidem esse hominum in tua dignitate, quam ego in mea salute sum expertus, ex tuis litteris intellexi. Nos cum maxime consilio, studio, labore, gratia, de causa regia nitermur, subito exorta est nefaria Catonis promulgatio, quæ nostra studia impediret, & animos a minore cura ad summum timorem traduceret. Sed tamen in hujusmodi rerum perturbatione, quamquam omnia sunt metuenda, nihil magis quam perfidiam timemus: & Catoni quidem, quoquo modo se res habet, profecto resistimus. De Alexandrina re, causaque regia tantum habeo polliceri, me tibi absenti, tuisque præsentibus cumulate satisfacturum: sed vereor, ne aut eripiat nobis, aut deferatur: quorum utrum minus velim, non facile possum existimare. Sed, si res coget, est quiddam tertium, quod neque Selicio, nec mihi displicebat, ut neque jacere Regem pateremur, nec nobis repugnantibus, ad eum deferri, ad quem prope jam delatum esse existimatur. A nobis agentur omnia diligenter: ut neque, si quid obtineri poterit, non contendamus:

damus : neque , si quid non obtinuerimus , repulsi esse videamur . Tuæ sapientiæ , magnitudinisque animi est , omnem amplitudinem , & dignitatem tuam in virtute , atque in rebus gestis tuis , atque in tua gravitate positam existimare ; si quid ex iis rebus , quas tibi fortuna elargita est , nonnullorum hominum perfidia detraxerit , id majori illis fraudi , quam tibi futurum . A me nullum tempus pretermittitur de tuis rebus & agendi , & cogitandi , utorque ad omnia Q. Selicio ; neque enim prudentiorem quemquam ex tuis , neque fide majore esse judico , neque amantiorem tui . Hic quæ agantur , quæque acta sint , ea te & literis multorum , & nuntiis cognoscere arbitror : quæ autem posita sunt in conjectura , quæque mihi videntur fore , ea puto tibi a me scribi oportere . Posteaquam Pompejus ad populum ad VIII. Idus Februar. cum pro Milone diceret , clamore , convitioque jactatus est , in senatuque a Catone asperere & acerbe , omnium magno silentio , est accusatus , visus est mihi vehementer esse perturbatus . Itaque Alexandrina causa , quæ nobis adhuc integra est , (nihil enim tibi detraxit senatus , nisi id , quod per eandem religionem dari alteri non potest) videtur ab illo plane esse deposita . Nunc id speramus , idque molimur , ut cum Rex intelligat sese , id quod cogitabat , ut a Pompejo reducat , assequi non posse , & , nisi per te sit restitutus , desertum se , atque abjectum fore , proficiscatur ad te : quod sine ulla dubitatione , si Pompejus paullum modo ostenderit sibi placere , faciet . Sed nosti hominis tarditatem , & taciturnitatem : nos tamen nihil , quod ad eam rem pertineat , prætermittimus . Ceteris injuriis , quæ propositæ sunt a Catone , facile , ut spero , resistemus . Amicum ex consularibus neminem tibi esse video , præter Hortensium , & Lucillum : ceteri sunt partim obscurius iniqui , partim non
dissimu-

diffimulanter irati. Tu fac animo forti, magnoque sis, speresque fore, ut fracto impetu levissimi hominis, tuam pristinam dignitatem, & gloriam consequare. Vale.

ARGUMENTUM.

Tota videtur esse consolatoria epistola: consolatur enim Lentulum ex comparatione temporum suorum; cum in exsilium pulsus, brevi tamen, & patriam, & dignitatem recuperavit. Brevis est epistola, quia Pollio ad Lentulum ibat, omnia narraturus.

M. T. C. P. LENTULO S. D. 6

QUæ gerantur, accipies ex Pollione, qui omnibus negotiis non interfuit solum, sed præfuit. Me in summo dolore, quem in tuis rebus capio, maxime scilicet consolatur spes, quod valde suspicor fore, ut infringatur hominum improbitas, & consiliis tuorum amicorum, & ipsa die, qua debilitantur cogitationes & inimicorum, & proditorum. Facile secundo loco me consolatur recordatio meorum temporum, quorum imaginem video in rebus tuis: nam, etsi minore in re violatur tua dignitas, quam mea salus afflicta sit; tamen est tanta similitudo, ut sperem, te mihi ignoscere; si ea non timuerim, quæ ne tu quidem umquam timenda duxisti. Sed præsta te eum, qui mihi a teneris (ut Græci dicunt) unguiculis es cognitus: illustrabit (mihi crede) tuam amplitudinem hominum injuria. A me omnia summa in te studia, officiaque expecta; non fallam opinionem tuam. Vale.



ARGUMENTUM.

Lentuli litteris respondet, de Alexandrina re scribit, quia Pompejo, ipsique videatur, ut tamen totum illud consilium Lentuli sapientiæ permittat. Adjungit de Milone, & Clodio, de statu Reipublicæ, de filiae nuptiis.

M. T. C. P. LENTULO PROCOS. S. D. 7

LEgi tuas litteras, quibus ad me scribis, gratum tibi esse, quod crebro certior per me fias de omnibus rebus, & meam erga te benevolentiam facile perspicias. Quorum alterum mihi, ut te plurimum diligam, facere necesse est, si volo is esse, quem tu me esse voluisti; alterum facio libenter, ut, quoniam intervallo locorum, & temporum disjuncti sumus, per litteras tecum quam sæpissime colloquar. Quod si rarius fiet quam tu exspectabis, id erit causæ, quod non ejus generis meæ litteræ sunt, ut eas audeam temere committere: quoties mihi certorum hominum potestas erit, quibus recte dem, non prætermittam. Quod scire vis qua quisque in te fide sit, & voluntate; difficile dictum est de singulis. Unum illud audeo, quod antea tibi sæpe significavi, nunc quoque, re perspecta & cognita, scribere: vehementer quosdam homines, & eos maxime, qui te & maxime debuerunt, & plurimum juvare potuerunt, invidisse dignitati tuæ: simillimamque in re dissimili, tui temporis nunc, & nostri quondam fuisse rationem, ut, quos tu reipubl. causa læseras, palam te oppugnarent: quorum auctoritatem, dignitatem, voluntatemque defenderas, non tam memores essent virtutis tuæ, quam laudis inimici. Quo quidem tempore, ut perscripsi ad te antea, cognovi Hortensium percupidum tui, studiosum Lucillum, ex magistratibus autem L. Racilius
&

& fide, & animo in te singulari. Nam nostra propugnatio, ac defensio dignitatis tuæ, propter magnitudinem beneficii tui, fortasse plerisque officii maiorem auctoritatem habere videatur, quam sententiæ. Præterea quidem de consularibus nemini possum aut studii erga te, aut officii, aut amici animi esse testis. Etenim Pompejum, qui mecum sæpissime, non solum a me provocatus, sed etiam sua sponte, de te communicare solet, scis temporibus illis non sæpe in senatu fuisse. Cui quidem litteræ tuæ, quas proxime miseras, quod facile intellexerim, perjucundæ fuerunt. Mihi quidem humanitas tua, vel summa potius sapientia, non jucunda solum, sed etiam admirabilis visa est. Virum enim excellentem, & tibi tua præstanti in eum liberalitate devinctum, non nihil suspicantem, propter aliquorum opinionem suæ cupiditatis, te ab se abalienatum, illa epistola retinuisti. Qui mihi cum semper tuæ laudi favere visus est, etiam ipso suspiciosissimo tempore Caniniano, tum vero lectis tuis litteris perspectus est a me, toto animo de te, ac de tuis ornamentis, & commodis cogitare. Quare ea, quæ scribam, sic habeto, me, cum illo re sæpe communicata, de illius ad te sententia, atque auctoritate scribere: quoniam S. C. nullum exstat, quo reductio Regis Alexandrini tibi adempta sit, eaque, quæ de ea scripta est, auctoritas, cui scis intercessum esse, ut ne quis omnino Regem reduceret, tantam vim habet, ut magis iratorum hominum studium, quam constantis senatus consilium, esse videatur, te posse perspicere, qui Ciliciam, Cyprumque teneas, quid efficere & quid consequi possis, & si res facultatem habituræ videatur, ut Alexandriam, atque Ægyptum tenere possis, esse & tuæ, & nostri imperii dignitatis, Ptolemaide, aut aliquo propinquo loco Rege collocato, te cum

classe, atque exercitu proficisci Alexandriam; ut, cum eam pace, præfidiisque firmaris, Ptolemæus redeat in regnum: ita fore, ut per te restituatur, quemadmodum senatus initio censuit, & sine multitudine reducatur, quemadmodum homines religiosi Sibyllæ placere dixerunt. Sed hæc sententia sic & illi, & nobis probabatur, ut ex eventu homines de tuo consilio existimatu-
ros videre-
mus: si cecidisset, ut volumus, & optamus, omnes te & sapienter, & fortiter; sin aliquid esset offensum, eosdem illos & cupide, & temere fecisse, dicturos. Quare quid assequi possis, non tam facile est nobis quam tibi, cui prope in conspectu Ægyptus est, judicare: nos quidem hoc sentimus: si exploratum tibi sit, posse te illius regni potiri, non esse cunctandum; sin dubium, non esse conandum. Illud tibi affirmo, si rem istam ex sententia gesseris; fore, ut absens a multis, cum redieris, ab omnibus collaudere: offensionem esse periculosam propter interpositam auctoritatem, religionemque video, sed ego te ut ad certam laudem adhortor, sic a dimicatione deterreo, redeoque ad illud, quod initio scripsi, totius facti tui iudicium non tam ex consilio tuo, quam ex eventu homines esse facturos. Quod si hæc ratio rei gerendæ periculosa tibi videbitur, placebat illud, ut, si Rex amicis tuis, qui per provinciam imperii tui pecunias ei credidissent, fidem suam præstitisset, & auxiliis eum tuis, & copiis adjuvares: eam esse naturam, & rationem provinciæ tuæ, ut illius redditum vel adjuvando confirmares, vel negligendo impedires. In hac ratione quid res, quid causa, quid tempus ferat; tu facillime, optimeque perspicies; quid nobis placuisset, ex me potissimum putavi te scire oportere. Quod mihi de nostro statu, de Milonis familiaritate, de levitate, & imbecillitate Clodii gratularis; minime miramur, te
tuis,

tuis, ut egregium artificem, præclaris operibus lætari. Quamquam est incredibilis hominum perversitas, (graviori enim verbo uti non libet) qui nos, quos favendo in communi causa retinere potuerunt, invidendo abalienaverunt: quorum malevolentissimis obtreccionibus nos scito de veteri illa nostra, diuturnaue sententia prope jam esse depulso: non nos quidem, ut nostræ dignitatis simus obliti, sed ut habeamus rationem aliquando etiam salutis. Poterat utrumque præclare si esset fides, si gravitas in hominibus consularibus: sed tanta est in plerisque levitas, ut eos non tam constantia in republ. nostra delectet, quam splendor offendat. Quod eo liberius ad te scribo, quod tu non solum temporibus iis, quæ per te sum adeptus; sed jam olim nascenti prope nostræ laudi, dignitati, virtutique præfuisi: simul quod video, non, ut antehac putabam, novitati esse invisum meæ: in te enim, homine omnium nobilissimo, similia invidorum vitia perspexi: quem tamen illi esse in principibus facile passi sunt, evolare altius certe noluerint. Gaudeo tuam dissimilem fuisse fortunam: multum enim interest, utrum laus imminuatur, an salus deferatur: me meæ tamen ne nimis poeniteret, tua virtute perfectum est; curasti enim, ut plus additum ad memoriam nominis nostri, quam ademptum de fortuna videretur. Te vero moneo, cum beneficiis tuis, tum amore incitatus meo, ut omnem gloriam, ad quam a pueritia inflammatus fuisti, omni cura, atque industria consequare, magnitudinemque animi tui, quam ego semper sum admiratus, semperque amavi, ne unquam inflectas cuiusquam injuria. Magna est hominum opinio de te, magna commendatio liberalitatis, magna memoria consulatus tui: hæc profecto vides, quanto expressiora, quantoque illustriora futura sint, cum

cum aliquantum ex provincia, atque ex imperio laudis accesserit. Quamquam te ita gerere volo, quæ per exercitum, atque imperium gerenda sunt, ut hæc multo ante meditare: huc te pares, hæc cogites, ad hæc te exerceas, sentiasque id, quod quia semper sperasti, non dubito quin adeptus intelligas, te facillime posse obtinere summum, atque altissimum gradum civitatis. Quæ quidem mea cohortatio, ne tibi inanis, aut sine causa suscepta videatur, illa me ratio movit, ut te ex nostris eventis communibus admonendum putarem, ut considerares in omni reliqua tua vita, quibus crederes, quos caveres. Quod scribis, te velle scire, qui sit reipubl. status: summa defensio est, sed contentio dispar. Nam qui plus opibus, armis, potentia valent, profecisse tantum mihi videntur stultitia, & inconstantia adversariorum, ut jam etiam auctoritate plus valerent. Itaque, perpaucis adversantibus, omnia, quæ ne per populum quidem sine seditione se assequi posse arbitrabantur, per senatum consecuti sunt: nam & stipendium Cæsari decretum est, & decem legati: &, ne lege Sempronia succederetur, facile perfectum est. Quod ego ad te brevius scribo, quia me status hic reipublicæ non delectat: scribo tamen, ut te admoneam, quod ipse litteris omnibus a pueritia deditus, experiendo tamen magis, quam discendo, cognovi, id ut tu rebus tuis integris discas, neque salutis nostræ rationem nobis habendum esse sine dignitate, neque dignitatis sine salute. Quod mihi de filia, & de Crassipede gratularis, agnosco humanitatem tuam, speroque, & opto nobis hanc conjunctionem voluptati fore. Lentulum nostrum, eximia spe, summæ virtutis adolescentem, cum ceteris artibus, quibus studuisti semper ipse, tum in primis imitatione tui fac erudias: nulla enim erit hac præstantior disciplina. Quem nos, & quia tuus, &
quia

quia te dignus est filius, & quia nos diligit, in primis amamus, carumque habemus. Vale.

ARGUMENTUM.

Tota est epistola contra mores immutatos, & hoc non sine artificio, ut intelligat Lentulus, jam sibi nihil sperandum de Rege reducendo.

M. T. C. P. LENTULO PROCOS. S. D. 8

DE omnibus rebus, quæ ad te pertinent, quid actum, quid constitutum sit, quid Pompejus susceperit, optime ex Emplatorio cognosces, qui non solum interfuit his rebus, sed etiam præfuit, neque ullum officium erga te hominis amantissimi, prudentissimi, diligentissimi prætermisit. Ex eodem de toto statu rerum communium cognosces, quæ quales sint, non facile est scribere: sunt quidem certe in amicorum nostrorum potestate, atque ita, ut nullam mutationem umquam hac hominum ætate habitura res esse videatur. Ego quidem, ut debeo, & ut tute mihi præcepisti, & ut me dignitas, utilitasque cogit, me ad ejus rationes adjungo, quem tu in meis rationibus tibi esse adjungendum putasti: sed te non præterit, quam sit difficile sensum in republica præsertim rectum, & confirmatum deponere. Verumtamen ipse me conformo ad ejus voluntatem, a quo honeste dissentire non possum: neque id facio, ut forsitan quibusdam videor, simulatione. Tantum enim animi inductio, & mehercule amor erga Pompejum, apud me valet, ut quæ illi utilia sunt, & quæ ille vult, ea mihi omnia jam & recta, & vera videantur. Neque, ut ego arbitror, errarent ne adversarii quidem ejus, si, cum pares esse non possent, pugnare desisterent. Me quidem etiam illa res consolatur, quod ego is sum, cui vel maxime concedant omnes, ut vel ea defendam, quæ Pompejus velit, vel taceam, vel etiam (id quod mihi maxime

xime lubet) ad nostra me studia referam litterarum: quod profecto faciam, si mihi per ejusdem amicitiam licebit. Quæ enim proposita fuerant nobis, cum & honoribus amplissimis, & laboribus maximis perfuncti essemus, dignitas in sententiis dicendis, libertas in republica capeffenda, ea sublata tota; sed nec mihi magis, quam omnibus: nam aut assentiendum est nulla cum gravitate paucis, aut frustra dissentiendum. Hæc ego ad te ob eam causam maxime scribo, ut jam de tua quoque ratione meditare, commutata tota ratio est Senatus, judiciorum, rei totius publicæ: otium nobis exoptandum est, quod ii, qui potiuntur rerum, præstaturi videntur, si quidam homines patientes eorum potentiam ferre potuerint. Dignitatem quidem illam consularem fortis, & constantis Senatoris, nihil est quod cogitemus: amissa est culpa eorum, qui a Senatu & ordinem conjunctissimum, & hominem clarissimum abalienarunt. Sed ut ad ea, quæ conjunctiora rebus tuis sunt, revertar: Pompejum tibi valde amicum esse cognovi, & eo te consule, quantum ego perspicio, omnia, quæ voles, obtinebis, quibus in rebus me ille sibi affixum habebit; neque a me ulla res, quæ ad te pertineat, negligetur: neque enim verebor, ne sim ei molestus, cui jucundum erit etiam propter id ipsum, quod me esse gratum videbit. Tu velim tibi ita persuadeas, nullam rem esse minimam, quæ ad te pertineat, quæ mihi non carior sit, quam meæ res omnes, idque cum sentiam, sedulitate mihi met ipse satisfacere possum; re quidem ipsa ideo mihi non satisfacio, quod nullam partem tuorum meritorum non modo referenda, sed ne cogitanda quidem gratia consequi possum. Rem te valde bene gessisse rumor erat, expectabantur litteræ tuæ, de quibus eramus jam cum Pompejo locuti, quæ si erunt allatæ, nostrum studium exstabit in conveniendis magistratibus.

stratibus, & Senatoribus. Cetera, quæ ad te pertinebunt, cum etiam plus contenderimus, quam possumus, minus tamen faciemus, quam debemus. Vale.

ARGUMENTUM.

Quærenti Lentulo, cur cum inimicis in gratiam redierit, causas exponit consilii sui: & ostendit, velle se rationem tam salutis habere, quam dignitatis, & eorum obsequi voluntati, a quibus de se optime meritis honeste dissentire non potest: Pompejum autem maxime significat.

M. T. C. P. LENTULO IMP. S. D. 9

PErjucundæ mihi fuerunt litteræ tuæ, quibus intellexi, te perspicere meam in te pietatem; quid enim dicam, benevolentiam? cum illud ipsum gravissimum, & sanctissimum nomen pietatis levius mihi meritis erga me tuis esse videatur. Quod autem grata tibi mea erga te studia scribis esse, facis tu quidem abundantia quadam amoris, ut etiam grata sint ea, quæ prætermitti sine nefario scelere non possunt: tibi autem multo notior, atque illustrior meus in te animus esset, si hoc tempore omni, quo sejuncti fuimus, & una & Romæ fuissetus. Nam in eo ipso, quod te ostendis esse facturum, quodque & in primis potes, & ego a te vehementer exspecto, in sententiis senatoriis, & omni actione, atque administratione reipubl. floruissemus: de qua ostendam equidem paullo post, qui sit meus sensus, & status, & rescribam tibi ad ea, quæ quæris: sed certe & ego te auctore amicissimo, ac sapientissimo, & tu me consiliario fortasse non imperitissimo, fideli quidem, & benevolo certe usus es. Quamquam tuâ quidem causa, te esse imperatorem, provinciamque bene gestis rebus cum exercitû victore obtinere, ut debeo, lætor; sed
certe,

certe, qui tibi ex me fructus debentur, eos uberiores, & præstantiores præsens capere potuisses: in eis vero ulciscendis, quos tibi partim inimicos esse intelligis propter tuam propugnationem salutis meæ, partim invidere propter illius actionis amplitudinem, & gloriam, mirificum me tibi comitem præbuissem. Quamquam ille perennis inimicus amicorum suorum, qui tuis maximis beneficiis ornatus, in te potissimum fractam illam, & debilitatam vim suam contulit, nostram vicem ultus est ipse sese: ea est enim conatus, quibus patefactis, nullam sibi in posterum non modo dignitatis, sed ne libertatis quidem partem reliquit. Te autem, etsi mallet in meis rebus experiri, quam etiam in tuis, tamen in molestia gaudeo, eandem fidem cognoscere hominum, non ita magna mercede, quam ego maximo dolore cognoram; de qua ratione tota jam videtur mihi exponendi tempus dari, ut tibi rescribam ad ea, quæ quæris. Certiorem te per litteras scribis esse factum, me cum Cæsare, & cum Appio esse in gratia, reque id non reprehendere adscribis. Vatinium autem scire te velle ostendis, quibus rebus adductus defenderim, & laudarim. Quod tibi ut planius exponam, altius paullo rationem meorum consiliorum repetam necesse est. Ego me, Lentule, initio rerum, atque actionum tuarum non solum meis, sed etiam reipubl. restitutum putabam: &, quoniam tibi incredibilem quendam amorem, & omnia in te ipsum summa, ac singularia studia deberem, reipubl. quæ te in me restituendo multum adjuvisset, eum certe me animum merito ipsius debere arbitrabar, quem antea tantummodo communi officio civium, non aliquo erga me singulari beneficio, debitum præstitissem. Hac me mente fuisse, & senatus ex me, te consule, audivit, & tu in nostris sermonibus, colloctionibusque, ipse vidisti; etsi
jam

jam primis temporibus illis, multis rebus meus offende-
batur animus; cum te agente de reliqua nostra dignitate, aut occulta nonnullorum odia, aut obscura in me studia cernebam. Nam neque de monumentis meis ab iis adjutus es, a quibus debuisti: neque de vi nefaria, qua cum fratre eram domo expulsus: neque hercule in iis ipsis rebus, quæ quamquam erant mihi propter rei familiaris naufragia necessaria, tamen a me minimi putabantur, in meis damnis ex auctoritate senatus resarciendis eam voluntatem, quam expectaram, præstiterunt. Quæ cum viderem, (neque enim erant obscura) non tamen acerba mihi hæc accidebant, quam erant illa grata, quæ fecerant. Itaque, quamquam & Pompejo plurimum, te quidem ipso prædicatore ac teste, debebam, & eum non solum beneficio, sed amore etiam, & perpetuo quodam judicio meo diligebam; tamen non reputans quid ille veller, in omnibus meis sententiis de republ. pristinis permanebam. Ego, sedente Cn. Pompejo, cum, ut laudaret P. Sextium, introisset in urbem, dixissetque testis Vatinius, me, fortuna, & felicitate C. Cæsaris commotum, illi amicum esse cœpisse, dixi, me eam Bibuli fortunam, quam ille afflictam putaret, omnium triumphis, victoriisque anteferre, dixique eodem teste alio loco, eosdem esse, qui Bibulum exire domo prohibuissent, & qui me coegissent. Tota vero interrogatio mea nihil habuit aliud, nisi reprehensionem illius tribunatus, in quo omnia dicta sunt libertate, animoque maximo de vi, de auspiciis, de donatione regnorum; neque vero hac in causa modo, sed constanter sæpe in senatu, quin etiam, Marcellino & Philippo Coss. nonis April. mihi est senatus assensus, ut de agro Campano, frequenti senatu, idibus Ma. referretur. Num potui magis in arcem illius causæ invadere? aut magis obli-

oblivisci temporum meorum, & meminisse actio-
num? hac a me sententia dicta, magnus animo-
rum motus est factus, cum eorum, quorum oportuit, tum illorum etiam, quorum nunquam putaram. Nam, hoc S. C. in meam sententiam facto, Pompejus, cum nihil mihi ostendisset se esse offensum, in Sardiniam, & in Africam profectus est, eoque itinere Lucam ad Cæsarem venit, ubi multa de mea sententia questus est Cæsar: quippe, qui etiam Ravennæ Crassum ante vidisset, ab eoque in me esset incensus, sane moleste Pompejum id ferre constabat. Quod ego cum audissem ex aliis, maxime ex meo fratre cognovi; quem cum in Sardinia Pompejum paucis post diebus, quam Luca discefferat, convenisset: Te, inquit, ipsum cupio: nihil opportunius potuit accidere. Nisi cum Marco fratre diligenter egeris, dependendum tibi est, quod mihi pro illo spondidisti. Quid multa? questus est graviter; sua merita commemoravit, quid egisset sapissime de actis Cæsaris cum ipso meo fratre; quidque sibi is de me recepisset, in memoriam redegit: seque, quæ de mea salute egisset, voluntate Cæsaris egisse, ipsum meum fratrem testatus est: cujus causam, dignitatemque mihi ut commendaret, rogavit, ut eam ne oppugnarem, si nollem, aut non possem tueri. Hæc cum ad me frater pertulisset, & cum ante tamen Pompejus ad me cum mandatis Vibullium misisset, ut integrum mihi de causa Campana ad suum reditum reservarem: collegi ipse me, & cum ipsa quasi republ. sum collocutus, ut mihi tam multa pro se perpesso, atque perfuncto, concederet, ut officium meum, memoremque in benemeritos animum, fidemque fratris mei præstarem; eumque, quem bonum civem semper habuisset, bonum virum esse pateretur: in illis autem meis actionibus, sententiisque omnibus, quæ

quæ Pompejum videbantur offendere, certorum hominum, quos jam debes suspicari, sermones referebantur ad me: qui cum illa sentirent in rep. quæ ego agebam, semperque sensissent, me tamen non satisfacere Pompejo, Cæsaremque inimicissimum mihi futurum, gaudere se dicebant. Erat hoc mihi dolendum, sed multo magis illud, quod inimicum meum (meum autem? immo vero legum, judiciorum, otii, patriæ, bonorum omnium) sic amplexabantur, sic in manibus habebant, sic fovebant, sic, me præsentem, osculabantur, non illi quidem ut mihi stomachum facerent (quem ego funditus perdi) sed certe ut facere se arbitrarentur. Hic ego quantum humano consilio efficere potui, circumspēctis rebus omnibus, rationibusque subductis, summam feci cogitationum mearum omnium, quam tibi, si potero, breviter exponam. Ego si ab improbis, & perditis civibus rempub. teneri viderem, sicut & meis temporibus scimus, & nonnullis aliis accidisse accepimus, non modo præmiis, (quæ apud me minimum valent) sed ne periculis quidem compulsus ullis, (quibus tamen moventur etiam fortissimi viri) ad eorum causam me adjungerem, ne si summa quidem eorum in me merita constarent. Cum autem in repub. Cn. Pompejus princeps esset (viris, qui hanc potentiam, & gloriam maximis in rempub. meritis, præstantissimisque rebus gestis esset consecutus, cujusque ego dignitatis ab adolescentia fautor, in prætura autem, & in consulatu adjutor etiam exstitissem) cumque idem auctoritate, & sententia per se, consiliis, & studiis tecum me adjuvisset, meumque inimicum, unum in civitate haberet inimicum; non putavi famam inconstantia mihi pertimescendam, si quibusdam in sententiis paullum me immutassem, meamque voluntatem ad summi viri, de meque optime meriti



meriti dignitatem aggregassem. In hac sententia complectendus erat mihi Cæsar, ut vides, in conjuncta & causa, & dignitate. Hic multum valuit cum vetus amicitia, quam tu non ignoras mihi, & Quinto fratri cum Cæsare fuisse, tum humanitas ejus, ac liberalitas, brevi tempore, & litteris, & officiis perspecta nobis, & cognita. Vehementer etiam res ipsa publica me movit; quæ mihi videbatur contentionem (præsertim maximis rebus a Cæsare gestis) cum illis viris nolle fieri, & ne fieret, vehementer recusare. Gravissime autem me in hanc mentem impulit & Pompeji fides, quam de me Cæsari dederat, & fratris mei, quam Pompejo. Erant præterea hæc animadvertenda in civitate, quæ sunt apud Platonem nostrum scripta divinitus. **QUALES** in repub. principes essent, tales reliquos solere esse cives. Tenebam memoria, nobis consulibus ea fundamenta jacta ex Kalend. Jan. confirmandi senatus, ut neminem mirari oporteret, nonis Decemb. tantum vel animi fuisse in illo ordine, vel auctoritatis. Idemque memineram, nobis privatis usque ad Cæsarem, & Bibulum Coss. cum sententiæ nostræ magnum in senatu pondus haberent, unum sensum fuisse bonorum omnium. Postea, cum tu Hispaniam citeriorem cum imperio obtineres, neque resp. Consules haberet, sed mercatores provinciarum, & seditionem servos, ac ministros, jecit quidem casus caput meum, quasi certaminis causa, in mediam contentionem; dissensionemque civilem. Quo in discrimine, cum mirifica senatus, incredibilis Italiæ totius, singularibus bonorum omnium consensus in me tuendo exstiteret, non dicam, quid acciderit, (multorum est enim, & varia culpa) tantum dicam brevi, non mihi exercitum, sed duces defuisse. In quo, ut iam sit in iis culpa, qui me non defenderunt, non

non minor est in iis, qui reliquerunt: & si accusandi sunt, qui pertimuerunt, magis etiam reprehendendi, qui se timere simularunt. Illud quidem certe nostrum consilium jure laudandum est, quod meos cives, & a me servatos, & me servare cupientes, spoliatos ducibus, servis armatis objici noluerim, declararique maluerim, quanta vis esse potuisset in consensu bonorum, si iis pro me stante pugnare licuisset, cum afflictum excitare potuissent: quorum quidem animum tu non perspexisti solum, cum de me ageres, sed etiam confirmasti, atque tenuisti. Qua in causa (non modo non negabo, sed etiam semper & meminero, & prædicabo libenter) usus es quibusdam nobilissimis hominibus fortioribus in me restituendo, quam fuerant iidem in tenendo. Qua in sententia si constare voluissent, suam auctoritatem simul cum salute mea recuperassent; recreatis enim bonis viris consulatu tuo, & constantissimis atque optimis actionibus tuis excitatis, (Cn. Pompejo præsertim ad causam adjuncto, cum etiam Cæsar rebus maximis gestis, singularibus ornatus & novis honoribus, ac judiciis senatus, ad auctoritatem ejus ordinis adjungeretur) nulli improbo civi locus ad republ. violandam esse potuisset. Sed attende, quæso, quæ sint consecuta. Primum illa furia muliebrium religionum, qui non plaris fecerat Bonam deam, quam tres sorores, impunitatem est eorum sententiis assecutus, qui cum tribunus pleb. pœnas a seditioso cive per bonos viros judicio persequi veller, exemplum præclarissimum in posterum vindicandæ seditionis de republ. sustulerunt; iidemque postea non meum monumentum; (non enim illæ manubiæ meæ, sed operis locatio mea fuerat) monumentum vero senatus hostili nomine, & cruentis inustum litteris esse passi sunt. Qui me homines quod salvum esse voluerunt, est mihi gratissimum: sed vellem, non solum salutis meæ, quem-

quemadmodum medici, sed etiam, ut aliptæ, virium & coloris rationem habere voluissent. Nunc, ut Apelles Veneris caput, & summa pectoris politissima arte perfecit, reliquam partem corporis inchoatam reliquit: sic quidam homines in capite meo solum elaborarunt, reliquum corpus imperfectum, ac rude reliquerunt. In quo ego spem fefelli, non modo invidorum, sed etiam inimicorum meorum, qui de uno acerrimo, & fortissimo viro, meoque iudicio, omnium magnitudine animi, & constantia præstantissimo, Q. Metello L. F. quondam falsam opinionem acceperunt, quem post reditum distitant fracto animo, & demisso fuisse. Est vero probandum, qui & summa voluntate cesserit, & egregia animi alacritate abfuerit, neque sane redire curarit eum ob id ipsum fractum fuisse animo, in quo cum omnes homines, tum M. illum Scaurum, singularem virum, constantia & gravitate superasset. Sed, quod de illo acceperant, aut etiam suspicabantur, de me idem cogitabant, abiectione animo me futurum: cum resp. majorem etiam mihi animum, quam unquam habuissem, daret: quæ jam declarasset, sese non potuisse me uno ciye carere, cumque Metellum unius tribuni pl. rogatio, me universa resp. duce senatu, comitante Italia, promulgantibus omnibus, referente consule, comitiis centuriatis, cunctis ordinibus hominibusque incumbentibus, omnibus denique suis viribus recuperasset. Nec vero ego mihi postea quidquam assumpsi, neque hodie assumo, quod quemquam malevolentissimum jure possit offendere: tantum enitor, ut neque amicis, neque etiam alienioribus opera, consilio, labore desim. Hic meæ vitæ cursus offendit eos fortasse, qui splendorem, & speciem hujus vitæ intuentur, sollicitudinem autem, & laborem perspicere non possunt. Illud vero non obscure queruntur in meis sententiis, quibus ornem Cæsarem, quasi desciverim a
pristi-

pristina caussa . Ego autem cum illa sequor , quæ paullo ante proposui , tum hoc non in postremis , de quo cœperam exponere . Non offendes eundem bonorum sensum , Lentule , quem reliquisti : qui confirmatus consulatu nostro , nonnumquam postea interruptus , & afflictus ante te consulem , recreatus abs te totus est , nunc ab iis , a quibus tuendus fuerat , derelictus : idque non solum fronte , atque vultu , quibus simulatio facillime sustinetur , ii declarant , qui tum nostro illo statu optimates nominabantur , sed etiam sententia sæpe jam tabellæque docuerunt . Itaque tota jam sapientium civium (qualem me & esse , & numerari volo) & sententia , & voluntas mutata esse debet . Id enim jubet idem ille Plato , quem ego auctorem vehementer sequor : **TANTUM** contendere in republ. quantum probare tuis civibus possis : vim neque parenti , neque patriæ asferre oportere . Atque hanc quidem ille causam sibi ait non attingendæ reip. fuisse , quod cum offendisset populum Atheniensem prope jam desipientem senectute , cumque eum nec persuadendo , nec cogendo regi posse vidisset , cum persuaderi posse diffideret , cogi fas esse non arbitraretur . Mea ratio fuit alia , quod neque desiciente populo , neque integra re mihi ad consulendum , capefferemne rempubl. implicatus tenebar : sed lætatus tamen sum , quod mihi liceret in eadem caussa utilia , & cuivis bono recta , defendere . Huc accessit commemoranda quædam , & divina Cæsaris in me , fratremque meum liberalitas , qui mihi , quasculque res gereret , tuendus esset ; nunc in tanta felicitate , tantisque victoriis , etiam si in nos non is esset , qui est , tamen ornandus videtur . Sic enim te existimare velim , cum a vobis , meæ salutis auctoribus discesserim , neminem esse , cujus officiis me tam esse devinctum non solum confitear , sed etiam gaudeam . Quod quoniam tibi exposui , facilia sunt ea , quæ a me de Vatiniō , &

de Crasso requiris. Nam de Appio, quod scribis, sicut de Cæsare, te non reprehendere, gaudeo tibi consilium probari meum. De Vatiniio autem, primum reditus intercesserat in gratiam per Pompejum, statim ut ille prætor est factus, cum quidem ego ejus peritionem gravissimis in senatu sententiis oppugnassem; neque tam illius lædendi causa, quam defendendi, atque ornandi Catonis: post autem Cæsaris, ut illum defenderem, mira contentio est consecuta. Cur autem laudarim, peto a te, ut id a me neve in hoc reo, neve in aliis requiras: ne tibi ego idem reponam, cum veneris, tametsi possum vel absenti. Recordare enim, quibus laudationem ex ultimis terris miseris, nec hoc pertimueris, nam a me ipso laudantur & laudabuntur iidem. Sed tamen defendendi Vatiniï fuit etiam ille stimulus, de quo in judicio, cum illum defenderem, dixi me facere quiddam, quod in Eunuchio parasitus suaderet militi.

Ubi nominabit Phædriam, tu Pamphilam

Continuo: si quando illa dicet, Phædriam

Comeßatum intronittamus, tu, Pamphilam

Cantatum provocemus: si laudabit hæc

Illius formam, tu hujus contra: denique

Par pro pari referto, quod eam mordeat:

Sic petivi a iudicibus, ut, quoniam quidem nobiles homines, & de me optime meriti, nimis amarent inimicum meum; meque inspectante sæpe eum in senatu modo severe seducerent, modo familiariter, atque hilare amplexarentur; quoniamque illi haberent suum Publium, darent mihi ipsi alium Publium, in quo possem eorum animos mediocriter lacesitus leviter repungere. Neque solum dixi, sed etiam sæpe facio, diis hominibusque approbantibus. Habes de Vatiniio: cognosce de Crasso. Ego, cum mihi cum illo magna jam gratia esset, quod ejus omnes gravissimas injurias, communis concordiae causa, voluntaria quadam obli-

vione

vione contriveram, repentinam ejus defensionem Gabinii, quem proximis superioribus diebus acerrime oppugnasset, tamen, si sine ulla mea contumelia suscepisset, tulissem: sed cum me disputantem, non laceissentem læsisset, exarsi, non solum præsentem, credo, iracundia, (nam ea tam vehementem fortasse non fuisset) sed cum inclusum illud odium multarum ejus in me injuriarum, quod ego effudisse me omne arbitrabar, residuum tamen insciente me fuisset, omne repente apparuit. Quo quidem tempore ipso quidam homines, & iidem illi, quos sæpe nutu, significationeque appello, cum se maximum fructum cepisse dicerent ex libertate mea, meque tum denique sibi esse visum rei publ. qualis fuisset, restitutum; cumque ea contentio mihi magnum etiam foris fructum tulisset: gaudere se dicebant, mihi & illum inimicum, & eos, qui in eadem causa essent, numquam amicos futuros. Quorum iniqui sermones cum ad me per homines honestissimos perferrentur; cumque Pompejus ita contendisset, ut nihil umquam magis, ut cum Crasso redirem in gratiam, Cæsarque per litteras maxima se molestia ex illa contentione affectum ostenderet: habui non temporum solum rationem meorum, sed etiam naturæ: Crassusque, ut quasi testata populo Rom. esset nostra gratia, pæne a meis laribus in provinciam est profectus: nam cum mihi condixisset, cœnavit apud me in mei generi Crassipedis hortis. Quamobrem ejus causam, quod te scribis audisse, magna illius commendatione susceptam, defendi in senatu, sicut mea fides postulabat. Accepisti, quibus rebus adductus, quamque rem, causamque defenderim, quique meus in republ. sit pro mea parte capeffenda status. De quo sic velim statuas, me hæc eadem sensurum fuisse; si mihi integra omnia, ac libera fuissent. Nam neque pugnandum arbitrarer contra tantas opes, neque delendum, etiam si id fieri

posset, summorum civium principatum, neque permanendum in una sententia, conversis rebus, ac bonorum voluntatibus immutatis, sed temporibus assentiendum. Numquam enim præstantibus in republ. gubernanda viris laudata est in una sententia perpetua permanſio; sed ut in navigando tempeſtati obſequi artis eſt, etiamſi portum tenere non queas; cum vero id poſſis, mutata velificatione aſſequi, ſtultum eſt eum tenere cum periculo curſum, quem ceperis, potius quam, eo commutato, quo velis tandem pervenire: ſic, cum omnibus nobis in adminiſtranda republ. propoſitum eſſe debeat (id quod a me ſæpiſſime dictum eſt) cum dignitate otium, non idem ſemper dicere, ſed idem ſemper ſpectare debemus. Quamobrem, ut paullo ante poſui, ſi eſſent omnia mihi ſolutiſſima; tamen in republ. non alius eſſem, atque nunc ſum. Cum vero in hunc ſenſum, & alliciar beneficiis hominum, & compellar injuriis: facile patior ea me de republ. ſentire, ac dicere, quæ maxime cum mihi, tum etiam reipubl. rationibus putem conducere. Apertius autem hæc ago, ac ſæpius, quod & Quintus frater meus legatus eſt Cæſaris, & nullum meum minimum dictum, non modo factum, pro Cæſare interceſſit, quod ille non ita illuſtri gratia exceperit, ut ego eum mihi devinctum putarem. Itaque ejus omni & gratia, quæ ſumma eſt, & opibus, quas intelligis eſſe maximas, ſic fruor ut meis. Nec mihi aliter potuiſſe videor hominum perditorum de me conſilia frangere, niſi cum præſidiis iis, quæ ſemper habui, nunc etiam potentium benevolentiam conjunxiſſem. His ego conſiliis, ſi te præſentem habuiſſem, ut opinio mea fert, eſſem uſus eiſdem. Novi enim temperantiam, & moderationem naturæ tuæ; novi animum cum mihi amiçiſſimum, tum nulla in ceteros inalevolentia ſuffuſum, contraque cum magnum & excelſum, tum etiam apertum & ſimplicem. Vidi
ego

ego quosdam in te tales, quales tu eosdem in me videre potuisti. Quæ me moverunt, movissent eadem te profecto. Sed, quocumque tempore mihi potestas præsentis tui fuerit, tu eris omnium moderator consiliorum meorum: tibi erit eidem, cui salus mea fuit, etiam dignitas curæ. Me quidem certe tuarum actionum, sententiarum, voluntatum, rerum denique omnium socium, comitemque habebis: neque mihi in omni vita res tam erit ulla proposita, quam ut quotidie vehementius te de me optime meritum esse lætere. Quod rogas, ut mea tibi scripta mittam, quæ post discessum tuum scripserim; sunt orationes quædam, quas Menocrito dabo, neque ita multæ, ut pertimescas. Scripsi etiam (nam etiam ab orationibus disjungo me ferre, referoque ad mansuetiores Musas, quæ me maxime, sicut jam a prima adolescentia delectarunt) scripsi igitur Aristotelico more, quemadmodum quidem volui, tres libros in disputatione ac dialogo de Oratore, quos arbitror Lentulo tuo fore non inutiles; abhorrent enim a communibus præceptis, & omnem antiquorum & Aristotelicam, & Isocraticam rationem oratoriam complectuntur. Scripsi etiam versibus tres libros de temporibus meis, quos jam pridem ad te misissem, si esse edendos putassem; sunt enim testes, & erunt sempiterni meritorum tuorum erga me, meæque in te pietatis: sed quia verebar, non eos qui se læsos arbitrarentur, (etenim id feci parce & molliter) sed eos, quos erat infinitum bene de me meritis omnes nominare. Quos tamen ipsos libros, si quem, cui recte committam, invenero, curabo ad te perferendos. Atque istam quidem partem vitæ, consuetudinisque nostræ totam ad te defero. Quantum litteris, quantum studiis, veteribus nostris delectationibus, consequi poterimus, id omne ad arbitrium tuum, qui hæc semper amasti, libentissime conferemus. Quæ ad me de tuis rebus domesti-

cis scribis , quæque mihi commendas , ea tantæ mihi curæ sunt , ut me nolim admoneri , rogari vero sine magno dolore vix possim . Quod de Quinti fratris negotio scribis , te priore ætate , quod morbo impeditus in Ciliciam non transferis , conficere non potuisse ; nunc autem omnia facturum , ut conficias , id scito esse ejusmodi , ut frater meus vere existimet , adjuncto isto fundo , patrimonium fore suum per te constitutum . Tu me de tuis rebus omnibus , & de Lentuli tui , nostrique studiis & exercitationibus , velim quam familiarissime certio-rem , & quam sæpissime facias , existimesque neminem cuiquam neque cariorum , neque jucundiorum umquam fuisse , quam te mihi : idque me , non modo ut tu sentias , sed ut omnes gentes , etiam ut posteritas omnis intelligat , esse facturum . Appius in sermonibus antea dictitabat , postea dixit etiam in senatu palam , sese , si licitum esset , legem curiatam ferre , sortiturum esse cum collega provinciam : si curiata lex non esset , se paraturum cum collega , tibi-que successurum : legem curiatam consuli ferri opus esse , necesse non esse : se , quoniam ex S. C. provinciam haberet , lege Cornelia imperium habiturum , quoad in urbem introisset . Ego quid ad te tuorum quisque necessariorum scribat ; nescio , varias esse opiniones intelligo . Sunt , qui putent , posse , te non decedere , quod sine lege curiata tibi succedatur , sunt etiam qui , si decedas , a te relinqui posse , qui provinciæ præsit . Mihi non tam de jure certum est (quamquam ne id quidem valde dubium est) quam illud , ad tuam summam amplitudinem , dignitatem , liberalitatem , qua te scio libentissime solere frui , pertinere , te sine ulla mora provinciam successorum concedere ; præsertim cum sine suspitione tuæ cupiditatis non possis illius cupiditatem refutare . Ego utrumque puto meum esse , & quod sentiam , ostendere , & quod feceris , defendere .

Scripta

Scripta jam epistola superiore, accepi tuas litteras de publicanis; quibus æquitatem tuam non potui non probare. Felicitate autem, quod vellem, consequi potuisses, ne ejus ordinis, quem semper ornasti, rem aut voluntatem offenderes. Equidem non desinam tua decreta defendere. Sed nostri consuetudinem hominum; scis quam graviter inimici illi ipsi Q. Scævola fuerint. Tibi tamen sum auctor, ut, quibus rebus possis, eum tibi ordinem aut reconcilies, aut mitiges. Id etsi difficile est, tamen mihi videtur esse prudentiæ tuæ. Vale.

ARGUMENTUM.

Jocosa est epistola, & salibus referta. Extra jocum ait se egisse gratias Lentulo, Ciliciam administranti: hortatur etiam, ut Romam redeat.

M. T. C. L. VALERIO JURISCONSULTO
S. D. 10

CUr enim tibi hoc non gratificer, nescio; præsertim cum his temporibus, audacia pro sapientia libeat uti. Lentulo nostro egi per litteras tuo nomine gratias diligenter. Sed tu velim desinas jam nostris litteris uti, & nos aliquando revisas, & ibi malis esse, ubi aliquo numero sis, quam istic, ubi solus sapere videare. Quamquam qui istinc veniunt, partim te superbum esse dicunt, quod nihil respondeas, partim contumeliosum, quod male respondeas. Sed jam cupio tecum coramolari. Quare fac, ut quamprimum venias: neque in Apuliam tuam accedas, ut possimus saluum venisse gaudere; nam, illo si veneris, tamquam Ulysses, cognosces tuorum neminem. Vale.



LIBER II.

ARGUMENTUM.

Quatuor partes habet hac epistola . Primum , accusatus a Curione , quod minus sæpe scriberet , excusationem affert , cum officii sui commemoratione : deinde dolorem suum ex illius absentia , & ex ejusdem dignitate lætitiā narrat . Tertio loco ad laudem , & virtutem hortatur . Postremo commendat illi suam senectutem . Misit autem Cicero in Asiam has omnes epistolas ad Curionem Questorem , præter ultimam , quæ incipit , Sera gratulatio , quam scripsit in Provincia Romana ad Curionem Tribunum plebis .

M. T. C. C. CURIONI S. D.

I

QUamquam me nomine negligentiae suspectum tibi esse doleo , tamen non tam mihi molestum fuit accusari abs te officium meum , quam jucundum requiri : præsertim cum , in quo accusabar , culpa vacarem : in quo autem desiderare te significabas meas litteras , præ te ferres , perspectum mihi quidem , sed tamen dulcem & optatum amorem tuum . Equidem neminem prætermisi , quem quidem ad te perventurum putarem , cui litteras non dederim . Etenim quis est tam in scribendo impiger , quam ego ? a te vero , bis terve ad summum , & eas perbreves accepi . Quare si iniquus es in me iudex , condemnabo eodem ego te crimine : sin me id facere noles , te mihi æquum præbere debebis . Sed de litteris hætenus : non enim vereor , ne non scribendo te expleam ; præsertim si eo genere studium meum non aspernabere . Ego , te absuisse tamdiu a nobis , & doleo , quod carui fructu jucundissimæ consuetudinis tuæ , & lætor , quod absens omnia cum maxima dignitate es consecutus ; quodque in omni-

omnibus tuis rebus, meis optatis fortuna respondit. Breve est, quod me tibi præcipere meus incredibilis in te amor cogit. Tanta est expectatio vel animi, vel ingenii tui, ut ego te obsecrare, obtestarique non dubitem, sic ad nos confirmatus revertare, ut, quam expectationem tui concitasti, hanc sustinere, ac tueri possis. Et, quoniam meam tuorum erga me meritorum memoriam nulla umquam delebit oblivio, te rogo, ut memineris, quantæcumque tibi accessiones fient & fortunæ, & dignitatis, eas te non potuisse consequi, nisi meis puer olim fidelissimis, atque amantissimis consiliis paruisses. Quare hoc animo in nos esse debetis, ut ætas nostra jam ingravescens in amore, atque in adolescentia conquiescat tua. Vale.

ARGUMENTUM.

Consolatur Curionem in obitu patris, seque illi parentis futurum loco pollicetur.

M. T. C. CURIONI S. D.

2

GRavi teste privatus sum amoris summi erga te mei, patre tuo, clarissimo viro: qui, cum suis laudibus, tum vero te filio, superasset omnium fortunam, si ei contigisset, ut te ante videret, quam e vita discederet. Sed spero nostram amicitiam non egere testibus. Tibi patrimonium Dii fortunent: me certe habebis, cui carus æque sis, & perjucundus, ac fuisti patri. Vale.

ARGUMENTUM.

Dissuadet a muneribus dandis in funere patris: dari autem populo solebat gladiatorium munus.

M. T. C. CURIONI S. D.

3

RUpæ studium non defuit declarandorum munerum tuo nomine, sed nec mihi placuit, nec cuiquam tuorum, quidquam te absente fieri, quod

B v

tibi,

tibi, cum venisses, non esset integrum. Meam quidem sententiam aut scribam ad te postea pluribus, aut, ne ad eam meditare, imparatum te offendam, coramque contra istam rationem, meam dicam; ut aut te in meam sententiam adducam, aut certe testatum apud animum tuum relinquam; quid senserim; ut, si quando (quod nolim) displicere tibi tuum consilium cœperit, possis meum recordari. Brevi tamen sic habeto, in eum statum temporum tuum reditum incidere, ut iis bonis, quæ tibi natura, studio, fortuna data sunt, facilius omnia, quæ sunt in republica amplissima, consequi possis, quam muneribus, quorum neque facultatem quisquam admiratur, (est enim copiarum, non virtutis) neque quisquam est, quin satietate jam defessus sit. Sed aliter atque ostenderam, facio, qui ingrediar ad explicandam rationem sententiæ meæ. Quare omnem hanc disputationem in adventum tuum differo. Summa scito in expectatione te esse, eaque a te expectari, quæ a summa virtute, summoque ingenio expectanda sunt. Ad quæ si es, ut debes paratus (quod ita esse confido) plurimis, maximisque muneribus & nos amicos, & cives tuos universos & rempublicam afficies. Illud profecto cognosces, mihi te neque cariorum, neque jucundiorum esse quemquam. Vale.

A R G U M E N T U M .

Hortatur Curionem ad studium summæ laudis, quod, exoriente jam bello civili, timeat, ne se ad improbos cives desertæ Rep. conferat, quod evenit: grandi etiam ære alieno a Cæsare liberatus, a Senatu ad populum transit.

M. T. C. CURIONI S. D. 4

Epistolarum genera multa esse non ignoras: sed unum illud certissimum, cujus causa inventa
res

res ipsa est, ut certiores faceremus absentes, si quid esset quod eos scire, aut nostra, aut ipsorum interesset. Huius generis litteras a me profecto non expectas: tuarum enim rerum domesticarum habes & scriptores & nuntios: in meis autem rebus nihil est sane novi. Reliqua sunt epistolarum genera duo, quæ me magnopere delectant: unum, familiare & jocosum: alterum, severum & grave. Utro me minus deceat uti, non intelligo. Jocerne tecum per litteras? civem mehercule non puto esse, qui temporibus his ridere possit. An gravius aliquid scribam? quid est quod possit graviter a Cicerone scribi ad Curionem, nisi de republica? atque in hoc genere hæc mea causa est, ut neque ea, quæ nunc sentio, velim scribere. Quamobrem, quoniam mihi nullum scribendi argumentum relictum est, utar ea clausula, qua soleo, teque ad studium summæ laudis cohortabor. Est enim tibi gravis adversaria constituta, & parata, incredibilis quædam expectatio, quam tu una re facillime vinctes, si hoc statueris, quarum laudum gloriam adamaris, quibus artibus eæ laudes comparantur, in iis esse elaborandum. In hanc sententiam scriberem plura: nisi te tua sponte satis incitatum esse considerem; & hoc quidquid attigi, non feci inflammandi tui causa, sed testificandi amoris mei. Vale.

ARGUMENTUM.

Gratulatur Curioni, quod & Romæ non sit, ubi multa contra Remp. committuntur; & ibi sit, ubi ex recte factis magnam laudem consequatur: postremo eum ad suscipiendam Remp. hortatur.

M. T. C. CURIONI S. D.

5

HÆc negotia quomodo se habeant, ne epistola quidem narrare audeo tibi, etsi ubicumque es (ut scripsi ad te antea) in eadem es navis:

tamen, quod abes gratulor, vel quia non vides ea, quæ nos, vel quod excelfo, & illustri loco sita sit laus tua in plurimorum & sociorum, & civium conspectu: quæ ad nos nec obscuro, nec vario sermone, sed & clarissima, & una omnium voce perfertur. Unum illud nescio, gratulerne tibi, an timeam, quod, mirabilis est expectatio redditus tui; non quod verear, ne tua virtus opinionum hominum non respondeat, sed mehercule, ne, cum veneris, non habeas jam quod cures, ita sunt omnia debilitata, jam prope & extincta. Sed hæc ipsa, nescio, rectene sint litteris commissa; quare cetera cognosces ex aliis. Tu tamen, sive habes aliquam spem de repub. sive desperas; ea para, meditare, cogita, quæ esse in eo cive, ac viro debent, qui sit rempublicam afflictam, oppressam miseris temporibus, ac perditis moribus in veterem libertatem, ac dignitatem vindicaturus. Vale.

A R G U M E N T U M.

Commendat summo studio T. Annium Milonem ad petitionem consulatus: & ut impetret quod vult, nihil omittit, quod in genere commendatio requiri possit.

M. T. C. C U R I O N I S. D.

6

Nondum erat auditum te ad Italiam adventare, cum Sex. Villium, Milonis mei familiarem, cum his ad te litteris misi. Sed tamen, eum appropinquare tuus adventus putaretur, & te jam ex Asia Romam versus, profectum esse constaret, magnitudo rei fecit, ut non vereremur, ne nimis cito mitteremus, cum has ad te quamprimum perferri litteras magnopere vellemus. Ego, si mea in te essent officia solum, Curio, tanta, quanta magis a te ipso prædicari, quam a me ponderari solent; verecundius a te, si qua magna res mihi petenda esset, contenderem.

derem. GRAVE est enim homini prudenti petere aliquid magnum ab eo, de quo se bene meritum putet; ne id quod petat, exigere magis quam rogare, & in mercedis potius quam beneficii loco numerare videatur. Sed quia tua in me, vel nota omnibus, vel ipsa novitate meorum temporum clarissima, & maxima exstiterunt; ESTQUE animi ingenui, cui multum debeas, eisdem plurimum velle debere, non dubitavi id a te per litteras petere, quod mihi omnium esset maximum, maximeque necessarium. Neque enim sum veritus, ne sustinere tua in me vel innumerabilia beneficia non possem; cum præsertim considerem nullam esse gratiam tantam, quam non vel capere animus meus in accipiendo, vel in remunerando, cumulandoque illustrare possit. Ergo omnia mea studia, omnem operam, curam, industriam, cogitationem, mentem denique omnem in Milonis consulatu fixi, & locavi, statuique in eo me non officii solum fructum, sed etiam pietatis laudem debere quærere. Neque vero cupiam salutem ac fortunas suas tantæ curæ fuisse umquam puto, quantæ mihi sit honor ejus, in quo omnia mea posita esse decrevi. Huic te unum tantum adjumento esse, si volueris, posse intelligo, ut nihil sit præterea nobis requirendum. Habemus hæc omnia: bonorum studium conciliatum ex tribunatu propter nostram (ut spero te intelligere) causam; vulgi, ac multitudinis propter magnificentiam munerum, liberalitatemque naturæ; juventuris, & gratiosorum in suffragiis propter ipsius excellentem in eo genere vel gratiam, vel diligentiam; nostram suffragationem si minus potentem, at probatam tamen, & justam, & debitam, & propterea fortasse etiam grariosam. Dux nobis, & auctor opus est, & eorum ventorum, quos proposui, moderator quidam, & quasi gubernator; qui

qui si ex omnibus unus optandus esset, quem tecum conferre possemus, non haberemus. Quamobrem si me memorem, si gratum, si bonum virum, vel ex hoc ipso, quod tam vehementer de Milone laborem, existimare potes, si dignum denique tuis beneficiis judicas, hoc a te peto, ut subvenias huic meæ sollicitudini, ut huic meæ laudi, vel (ut verius dicam) prope salutem tuum studium dices. De ipso T. Annio tantum tibi polliceor, te majoris animi, gravitatis, constantiæ, benevolentiae erga te, si complecti hominem volueris, habiturum esse neminem. Mihi vero tantum decoris, tantum dignitatis adjunxeris, ut eundem te facile agnoscam fuisse in laude mea, qui fueris in salute. Ego, ni te videre scirem, cum hæc ad te scriberem, quantum officii sustinerem, quantopere mihi esset in hac petitione Milonis omni non modo contentione, sed etiam dimicatione elaborandum plura scriberem. Nunc tibi omnem rem, atque causam, meque totum commendo, atque trado. Unum hoc sic habeto: si a te hanc rem impetraro, me pæne plus tibi, quam ipsi Miloni, debiturum. Non enim mihi tam mea salus cara fuit, in qua præcipue sum ab illo adjutus, quam pietas erit in referenda gratia jucunda: eam autem unius tui studio me assequi posse confido. Vale.

A R G U M E N T U M .

Hanc epistolam scripsit in Cilicia Proconsul. Gratulatur Curioni de Tribunatu pl. Hortatur ad boni civis officium. De sacerdotio Curionis quidam interserit. Postremo rogat, ne quid sibi temporis prorogari ad Provinciæ administrationem patiatur.

M. T. C. PROCOS. CURIONI TRIB. PLEB.

S. D.

7

SEra gratulatio reprehendi non solet, præsertim si nulla negligentia prætermissa est: longe

ge enim absum : audio sero . Sed & tibi gratulor ,
& ut sempiternæ laudi tibi sit iste tribunatus , exopto ; teque hortor , ut omnia gubernes , & moderare prudentia tua ; ne te auferant aliorum consilia . Nemo est qui sapientius tibi suadere possit te ipso , numquam labere , si te audies . Non scribo hoc temere ; cui scribam , video : novi animum ; novi consilium tuum , non vereor ne quid timide , & stulte facias ; si ea defendes , quæ ipse recta essenties . Quod in id reipublicæ tempus non incideris , sed veneris , (iudicio enim tuo , non casu , in ipsum discrimen rerum contulisti tribunatum tuum) profecto vides quanta vis in repub. temporum sit , quanta varietas rerum , quam incerti exitus , quam flexibiles hominum voluntates : quid insidiarum , quid vanitatis in vita , non dubito , quin cogites . Sed , amabo te , cura , & cogita nihil novi ; sed illud idem , quod initio scripsi , tecum loquere ; te adhibe in consilium , te audi ; tibi obtempera . Alter , qui melius dare consilium possit quam tu , non facile inveniri potest , tibi vero ipse certe nemo melius dabit . Dii immortales , cur ego non adsum ; vel spectator laudum tuarum , vel particeps , vel socius , vel minister consiliorum ? tamen hoc minime tibi deest , sed tamen efficeret magnitudo , & vis amoris mei , consilio te ut possem juvare . Scribam ad te plura alias , paucis enim diebus eram missurus domesticos tabellarios , ut , quoniam sane feliciter , & ex mea sententia rempub. gessimus unis litteris totius æstatis res gestas ad Senatum perscriberem . De sacerdotio tuo quantam curam adhibuerim , quamque difficili in re atque causa , cognoscas ex iis litteris , quas Thrasoni liberto tuo dedi . Te , mi Curio , pro tua incredibile in me benevolentia , meaque item in te singulari , rogo atque oro , ne patiari mihi quidquam ad hanc provincialem molestiam temporis prorogari . Præsens tecum
egi ,

egi, cum te tribunum plebis isto anno fore non putarem: itemque petivi sapius per litteras: sed tum quasi a senatore nobilissimo, & adolescente gratiosissimo, nunc a tribuno pl. & a Curione tribuno, non ut decernatur aliquid novi (quod solet esse difficilius) sed ut ne quid novi decernatur, & ut S. C. & leges defendas: eaque mihi conditio maneat, qua profectus sum. Hoc te vehementer etiam atque etiam rogo. Vale.

A R G U M E N T U M.

Leviter Caelium objurgat, qui commentarium misisset refertum levissimis rebus. Tum hortatur ad amicitiam Pompeji emergente belli civilis initio. Addit de suo in provinciam itinere; in extremo, ne sibi Provinciae tempus prorogetur.

M. T. C. PROCOS. M. CÆLIO RUFO S. D. 8

Quid? tu me hoc tibi mandasse existimas, ut mihi gladiatorum compositiones, ut vadi-
monia dilata, & Chresti compilationem mitteres, & ea quæ nobis, cum Romæ sumus, narrare nemo audeat: Vide, quantum tibi meo iudicio tribuam (nec mehercule injuria; πολιτικῶτερον: enim te adhuc neminem cognovi) ne illa quidem curo mihi scribas, quæ maximis in rebus reipub. geruntur quotidie, nisi quid ad me ipsum pertinebit: scribebant alii, mihi nunciabunt: perferet multa etiam ipse rumor. Quare ego nec præterita, nec præsentia abs te, sed, ut ab homine longe in posterum prospiciente, futura exspecto; ut ex tuis litteris cum formam reipubl. viderim, quale ædificium futurum sit, scire possim; neque tamen adhuc habeo, quod te accusem; neque enim fuit, quod tu plus providere possis, quam quivis nostrum, in primisque ego, qui cum Pompejo complures dies nullis in aliis nisi de reipub. sermonibus versatus sum, quæ nec possunt scribi, nec scribenda

benda sunt. Tantum habeto, civem egregium esse Pompejum, & ad omnia, quæ providenda sunt in republ. & animo, & consilio paratum. Quare da te homini: complectetur, mihi crede: jam iidem illi & boni, & mali cives videntur, qui nobis videri solent: Ego, cum Athenis decem ipsos dies fuisset, multumque mecum Gallus noster Caninius, proficiscebar inde pridie nonas Quint. cum hoc ad te, litterarum dedi. Tibi cum omnia mea commendatissima esse cupio, tum nihil magis, quam ne tempus nobis provinciæ prorogetur: in eo mihi sunt omnia. Quid, quando, & quomodo, & per quos agendum sit, tu optime constitues. Vale.

ARGUMENTUM.

*Gratulatur Cælio, quod superatis competitoribus
Ædilis Curulis designatus sit.*

M. T. C. PROCOS. M. CÆLIO RUFO

ÆDILI CUR. DES. S. D. 9

Primum tibi, ut debeo, gratulor, lætorque tum præsentī, tum etiam sperata tua dignitate, serius, non negligentia mea, sed ignorantia rerum omnium. In his enim sum locis, quo, & propter longinquitatem, & propter latrocinia tardissime omnia perferuntur. Et cum gratulor, tum vero quibus verbis tibi gratias agam, non reperio, quod ita factus sis, ut dederis nobis, quemadmodum scripseras ad me, quem semper ridere possemus. Itaque cum primum audiui, ego ille ipse factus sum, (scis quem dicam) egique omnes illos adolescentes, quos ille jactitat. Difficile est loqui. Te autem contemplans absentem, & quasi tecum coram loquerer. Non ædepol quantam egeris rem, neque quantum facinus feceris. Quod quia præter opinionem mihi acciderat, referebam me ad illud; Incredibile hoc factu objicitur. Repente vero inaccessi omnibus lætitiis; in quo cum objurgarer, quod
ni-

nimio gaudio pæne desiperem, ita me defendebam: habeo voluptatem animi nimiam. Quid quæris? dum illum rideo, pæne sum factus ille. Sed hæc pluribus, multaque alia, & de te, & ad te, cum primum ero aliquid nactus otii. Te vero, mi Rufe, diligo, quem mihi fortuna dedit amplificatorem dignitatis meæ, ultorem non modo inimicorum, sed etiam invidorum meorum, ut eos partim scelerum suorum, partim etiam ineptiarum pœniteret. Vale.

A R G U M E N T U M.

Queri videtur de tabellariis epistolas non reddentibus: revera Cælium negligentia accusat, tum sua gesta magnifice narrat.

M. T. C. IMP. CÆLIO RUFO ÆDILI
CUR. DES. S. D. IO

TU vide, quam ad me litteræ non perferantur; non enim adduci possum, ut abs te posteaquam ædilis factus es, nullas putem datas, præsertim cum esset tanta res, tantæ gratulationis; de te, quia, quod sperabam, de Hillo (balbus enim sum) quod non putaram. Atqui sic habeto, nullam me epistolam accepisse tuam post comitia ista præclara, quæ me lætitia extulerunt: ex quo vereor, ne idem eveniat in meas litteras. Equidem numquam domum misi unam epistolam, quin esset ad te altera: nec mihi est de te jucundius quidquam nec carius. Sed balbi non sumus: ad rem redeamus. Ut optasti, ita est: velles enim, ais, tantummodo ut haberem negotii, quod esset ad laureolam satis. Parthos times, quia diffidis copiis: ergo ita accidit. Nam, Parthico bello nunciato locorum quibusdam angustis, & natura montium fretus, ad Amanum exercitum adduxi, satis probe ornatum auxiliis, & quadam auctoritate apud eos, qui me non norant, nominis nostri: multum est enim in his locis: Hiccine est ille,

ille, qui urbem? quem senatus? nosti cetera. Cum venissem ad Amanum, qui mons mihi cum Bibulo communis est, divisus aquarum divortiis, Cassius noster, quod mihi magnæ voluptati fuit feliciter ab Antiochia hostem rejecerat. Bibulus provinciam acceperat: interea cum meis copiis omnibus vexavi Amanienſes, hostes sempiternos. Multi occisi, capti; reliqui dissipati, castella munita, improvise adventu capta, & incensa. Ita victoria iusta imperator appellatus apud Issum (quo in loco sæpe, ut ex te audiui, Clitarchus tibi narravit Darium ab Alexandro esse superatum) adduxi exercitum ad infestissimam Ciliciæ partem. Ibi quintum, & vigesimum jam diem aggeribus, vineis, turribus oppugnabam oppidum munitissimum Pindenissum, tantis opibus, tantoque negotio, ut mihi ad summam gloriam nihil desit, nisi nomen oppidi. Quod si, ut spero, cepero, tum vero litteras publice mittam. Hæc ad te in præſenti scripsi, ut speres te assequi id, quod optasti. Sed, ut redeam ad Parthos, hæc æſtas habuit hunc exitum satis felicem: ea, quæ sequitur, magno est in timore. Quare, mi Rufe, vigila, primum, ut mihi succedatur: sin id erit, ut scribis, &, ut ego arbitror, spissius, illud quod facile est, ne quid mihi temporis prorogetur. De Repub. ex tuis litteris, ut antea scripsi, cum præſentia, tum etiam futura magis exspecto. Quare, ut ad me omnia, quam diligentissime perſcribas, te vehementer rogo. Vale.

ARGUMENTUM.

Suum declarat Urbis desiderium, & pantheras ait non posse capi, quas Cælius Ædilis petierat, ut in suis ludis populo ostenderet.

M. T. C. CÆLIO ÆDILI CUR. S. D. II

PUtasne unquam accidere posse, ut mihi verba decissent? neque solum ista vestra oratoria, sed

sed hæc etiam levia nostratia? desunt autem propter hanc causam, quod mirifice sum sollicitus quidnam de provinciis decernatur. Mirum me desiderium tenet urbis; incredibile meorum atque in primis tui; satietas autem provinciæ: vel quia videmur eam famam consecuti, ut non tam accessio quærenda, quam fortuna metuenda sit; vel quia totum negotium non est dignum viribus nostris, qui majora in republica onera sustinere & possimus, & soleamus; vel quia belli magni timor impendet, quod videmur effugere, si ad constitutam diem decedemus. De pantheris, per eos, qui venari solent, agitur mandato meo diligenter, sed mira paucitas est, & eas, quæ sunt, valde ajunt quæri, quod nihil cuiquam insidiarum in mea provincia, nisi sibi, fiat. Itaque constitui se dicuntur in Cariam ex nostra provincia decedere; sed tamen sedulo fit, & in primis a Patisco. Quidquid erit, tibi erit, sed quid esset, plane nesciebamus. Mihi mehercule magnæ curæ est ædilitas tua; ipse dies me admonebat; scripsi enim hæc ipsis Megalensibus. Tu velim ad me de omni reipublicæ statu, quam diligentissime perscribas, ea enim certissima putabo, quæ ex te cognovero. Vale.

A R G U M E N T U M.

Litteras a Cælio requirit de rebus urbanis, & hortatur eum, ut urbanos potius magistratus sequatur, quam provinciales.

M. T. C. IMP. CÆLIO ÆDILI CUR. S. D. 12

Sollicitus equidem eram de rebus urbanis: ita tumultuosæ conciones, ita molestæ quinquatrus afferebantur; nam citeriora nondum audiebamus: sed tamen nihil me magis sollicitabat, quam in his molestiis non me, si qua ridenda essent, ridere tecum; sunt enim multa, sed ea non audeo

deo scribere. Illud moleste fero, nihil me adhuc his de rebus habere tuarum litterarum. Quare, etsi, cum tu hæc leges, ego jam annum munus confecero; tamen obviam mihi velim sint litteræ tuæ, quæ me erudiant de omni repub. ne spes plane veniam: hoc melius, quam tu facere nemo potest. Diogenes tuus, homo modestus, a me cum Philone Pessinunte discessit: iter habebant ad Dejotarum Regem, quamquam omnia nec benigna, nec copiosa cognorant. Urbem mi Rufe cole, & in ista luce vive: omnis enim peregrinatio (quod ego ab adolescentia judicavi) obscura, & sordida est iis, quorum industria Romæ potest illustris esse. Quod cum probe scirem, utinam in sententiam permanissem, cum una mehercule ambulariuncula, atque uno sermone nostro, omnes fructus provinciæ non confere. Spero me integritatis laudem consecutum: non erat minor ex contemnenda, quam ex conservata provincia spes triumphi? inquis: satis gloriose triumpharem, si non essem tamdiu quidem in desiderio rerum mihi carissimarum. Sed, ut spero, propediem te videbo: tu mihi obviam mitte epistolas te dignas. Vale.

ARGUMENTUM.

Respondet epistolæ Cælii, quæ nona est, l. 8. Eam lege, si hujus argumentum, atque etiam interpretationem quæris.

M. T. C. IMP. CÆLIO ÆDILI CUR. S. D. 13

Raras quidem, (fortasse enim non perferuntur) sed suaves accipio litteras: vel quas proxime acceperam, quam prudentes, quam multi & officii, & consilii! Etsi omnia sic constitueram mihi agenda, ut tu admonebas, tamen confirmantur nostra consilia, cum sentimus, prudentibus, fideliterque suadentibus idem videri.

Ego

Ego Appium (ut sæpe tecum locutus sum) valde diligo: meque ab eo diligi statim cœptum esse, ut simultatem deposuimus sensi. Nam & honorificus in me consul fuit, & suavis amicus, & studiosus studiorum etiam meorum. Mea vero officia ei non defuisse, tu es testis, quoniam *καρμικὸς μάρτυς*, ut opinor, accidit Phaniæ, & mehercule etiam pluris eum feci, quod te amari ab eo sensi. Jam me Pompeji totum esse scis: Brutum a me amari intelligis. Quid est causæ, cur mihi non sit in optatis, complecti hominem florentem ætate, opibus, honoribus, ingenio, liberis, propinquis, affinibus, amicis, collegam meum præsertim, & in ipsa collegii laude, & scientia studiosum mei? Hæc eo pluribus scripsi, quod mihi significabant tuæ litteræ subdubitare te, quæ essem erga illum voluntate. Credo te audisse aliquid, falsum est, mihi crede, si quid audisti. Genus institutorum, & rationum mearum, dissimilitudinem nonnullam habet cum illius administratione provinciæ. Ex eo quidam suspicati fortasse sunt, animorum contentione, non opinionum dissensione, me ab eo discrepare: nihil autem feci umquam, neque dixi, quod contra illius existimationem esse vellem. Post hoc negotium autem, & temeritatem nostri Dolabellæ, deprecatorem me pro illius periculo præbeo. Erat in eadem epistola veteranus civitatis. Gauderam sane, & congelasse nostrum amicum lætabar otio. Extrema pagella pupugit me tuo chirographo. Quid ais? Cæsarem nunc defendit Curio: quis hoc putaret præter me? nam, ita vivam, putavi. Dii immortales, quam ego risum nostrum desidero! Mihi erat in animo, quoniam jurisdictionem confeceram, civitates locupletatam, publicanis etiam superioris lustris, reliqua sine sociorum ulla querela conservaram, privatis, summis, infimis fueram jucundus, proficisci in Cili-

Ciliciam nonis Maji: & , cum primum æstiva attigissem, militaremque rem collocassem, decedere ex S. C. Cupio te ædilem videre, miroque desiderio me urbs afficit, & omnes mei, tuque in primis. Vale.

ARGUMENTUM.

Commendat Fabium a quinque rebus, bonitate, doctrina, ingenio, modestia, amicitia sua.

M. T. C. IMP. CÆLIO ÆDILI CUR. S. D. 14

Marco Fabio, viro optimo, & homine doctissimo, familiarissime utor, mirificeque eum diligo, cum propter summum ejus ingenium, summamque doctrinam, tum propter singularem modestiam. Ejus negotium sic velim suscipias, ut si esset res mea. Novi ego vos magnos patronos: hominem occidat oportet, qui vestra opera uti velit: sed in hoc homine nullam accipio excusationem: omnia relinques, si me amabis, cum tua opera Fabius uti volet. Ego res Romanas vehementer exspecto, & desidero, in primisque quid agas, scire cupio, nam jamdiu propter hiemis magnitudinem nihil novi ad nos afferebatur. Vale.

ARGUMENTUM.

Scribit de supplicationibus suis, de nuptiis filiae, & P. Cornelii Dolabellæ, de civilibus discordiis, de rationibus, quibus adductus C. Cælium, Quæstorem suum, Provinciæ præposuerit. Respondet Cælii tribus epistolis, quæ sunt in libro octavo.

M. T. C. IMP. CÆLIO ÆDILI CUR. S. D. 15

Non potuit accuratius agi, neque prudentius, quam actum est a te cum Curione de supplicatione; & mehercule confecta res est ex mea sententia, cum celeritate, tum quod is, qui erat iratus

iratus competitor tuus, & idem meus assensus est ei, qui ornavit res nostras divinis laudibus. Quare scito, me sperare ea, quæ sequuntur, ad quæ tu te para. Dolabellam a te gaudeo primum laudari, deinde etiam amari. Nam ea, quæ speras Tulliæ meæ prudentia temperari posse, scio cui epistolæ tuæ respondeant. Quid si meam leges, quam ego tum ex tuis litteris misi ad Appium? sed quid agas? sic vivitur. Quod actum est, Dii approbent: spero fore jucundum generum nobis. Multum in eo tua nos humanitas adjuvabit. Respublica me valde sollicitat, faveo Curioni, Cæsarem honestum esse cupio, pro Pompejo emori possum: sed tamen ipsa república nihil mihi est carius, in qua tu non valde te iactas; districtus enim mihi videris esse, quod & bonus civis, & bonus amicus es. Ego, de provincia decedens, quæstorem Cælium præposui provinciæ. Puerum, inquis? at quæstorem, at nobilem adolescentem, at omnium fere exemplo: neque erat superiore honore usus, quem præficerem. Pontinius multo ante discesserat. A Q. fratre impetrari non poterat: quem tamen si reliquisset, dicerent iniqui, non me plane post annum, ut senatus voluit ex provincia decessisse, quoniam alterum me reliquisset. Fortasse & illud adderent, senatum eos voluisse provinciis præesse, qui antea non præfuissent; fratrem meum triennium Asiæ præfuisse. Denique nunc sollicitus non sum: si fratrem reliquisset, omnia timerem. Postremo, non tam mea sponte, quam potentissimorum duorum exemplo, qui omnes Cassios, Antoniosque complexi sunt, hominem adolescentem non tam allicere volui, quam alienare nolui. Hoc tu meum consilium laudes necesse est; mutari enim non potest. De Ocella parum plane ad me scripseras, & in actis non erat. Tuæ res gestæ ita notæ sunt, ut trans-

mon-

montem Taurum etiam de Matrino sit auditum .
Ego , nisi quid me Etesiae morabuntur , celeriter , ut spero , vos videbo . Vale .

ARGUMENTUM .

Hujus epistolae apertum erit argumentum , si legas epistolam Caelii , quae ante ultimam est lib. 8. cui haec respondet .

M. T. C. IMP. CÆLIO ÆDILI CUR. S. D. 16

Magno dolore me affecissent tuae litterae , nisi jam & ratio ipsa depulisset omnes molestias , & diuturna desperatione rerum obdurisset animus ad dolorem novum . Sed tamen quare acciderit , ut ex meis superioribus litteris id suspicari , quod scribis , nescio . Quid enim fuit in illis , præter querelam temporum , quæ non animum meum magis sollicitum haberet , quam tuum ? nam non eam cognovi aciem ingenii tui , quod ipse videam , te id ut non putem videre . Illud miror , adduci potuisse te , qui me penitus nosse deberes , ut me existimares , aut tam improvidum , qui ab excitata fortuna ad inclinatam , & prope jacentem desciscerem ; aut tam inconstantem , ut collectam gratiam florentissimi hominis effunderem , a meque ipso deficerem , & , quod initio , semperque fugi , civili bello interessem . Quod est igitur meum triste consilium ? ut discederem fortasse in aliquas solitudines ? nosti enim non modo stomachi mei , cujus tu similem quondam habebas , sed etiam oculorum in hominum insolentium indignitate fastidium . Accedit etiam molesta hæc pompa lictorum meorum , nomenque Imperii , quo appellor . Eo si onere carem , quamvis parvis Italiae latebris contentus essem . Sed incurrit hæc nostra laurus non solum in oculos , sed jam etiam in vuculas malevolorum . Quod cum ita esset , nihil tamen unquam

de profectiōe, nisi vobis approbantibus, cogitavi. Sed mea prædiola tibi nota sunt: in his mihi necesse est esse, ne amicis molestus sim. Quod autem in maritimis facillime sum, moveo nonnullis suspicionem, velle me navigare; quod tamen fortasse non nollem, si possem ad otium: nam ad bellum quidem, qui convenit? præsertim contra eum, cui spero me satisfacisse, ab eo, cui tamen satisfieri nullo modo potest. Deinde sententiam meam tu facillime prospicere potuisti jam ab illo tempore, cum in Cumanum mihi obviam venisti; non enim te celavi: sed nonne tum prævidisti, quam abhorream ab urbe relinquenda? quod cum audissem, nonne tibi affirmavi, quidvis me potius perpeffurum, quam ex Italia ad bellum civile exiturum? quid ergo accidit, cur consilium mutarem? nonne omnia potius, ut in sententia permanerem? Credas hoc mihi velim (quod puto te existimare) ex his miseriis nihil aliud me quærere, nisi ut homines aliquando intelligant, me nihil maluisse, quam pacem: ea desperata, nihil tam fugisse, quam arma civilia. Hujus me constantiæ puto fore, ut numquam pœniteat. Etenim memini in hoc genere gloriari solitum esse familiarem nostrum Q. Hortensium, quod numquam bello civili interfuisset: hoc nostra laus erit illustrior, quod illi tribuebatur ignaviæ, de nobis id existimari posse non arbitror. Nec me ista terrent, quæ mihi a te ad timorem fidissime, atque amantissime proponuntur. Nulla est enim acerbitas, quæ non omnibus, hac orbis terrarum perturbatione impendere videatur: quam quidem ego a republica meis privatis, & domesticis incommodis libentissime, vel ipsis istis, quæ tu me mones, ut caveam, remissem. Filio meo, quem tibi carum esse gaudeo, si erit ulla respublica, satis amplum patrimonium relinquam in memoriâ nominis mei: sin au-

tem

tem nulla erit, nihil accidet ei separatim a reliquis civibus. Nam quod rogas, ut respiciam generum meum, adolescentem optimum, mihi que carissimum, an dubitas, cum scias quanti cum illum, tum vero Tulliam meam faciam, quin ea me cura vehementissime sollicitet? & eo magis, quod in communibus miseriis hac tamen oblectabar specula, Dolabellam meum, vel potius nostrum, fore ab iis molestiis, quas liberalitate sua contraxerat, liberum. Velim quæras, quos ille dies sustinuerit, in urbe dum fuit, quam acerbos sibi, quam mihi ipsi socero non honestos. Itaque neque ego hunc Hispaniensem casum exspecto, de quo mihi exploratum est ita esse, ut tu scribis: nec quidquam astute cogito. Si quando erit civitas, erit profecto nobis locus: sin autem non erit, in easdem solitudines tu ipse (ut arbitror) venies, in quibus nos confedissee audies. Sed ego fortasse vaticinor, & hæc omnia meliores habebunt exitus. Recordor enim desperationes eorum, qui senes erant adolescente me. Eos ego fortasse nunc imitor, & utor ætatis vitio. Velim ita sit. Sed tamen togam prætextam texi Oppio, puto, te audisse. Nam Curtius noster dibaphum cogitat; sed eum infector moratur. Hæc aspersi, ut scires, me tamen in stomacho solere ridere. De Dolabella quod scripsi, suadeo videas, tamquam si res tua agatur. Extremum illud erit: nos nihil turbulenter, nihil temere faciemus. Te tamen oramus, quibuscumque erimus in terris, ut nos, liberosque nostros ita tueare, ut amicitia nostra, & tua fides postulabit. Vale.



ARGUMENTUM.

Respondet ad omnes partes epistolæ Caninii ; deinde altera epistola roganti , ut se Bibulo commendet , causas affert , quare id facere non debeat ; se tamen illi morem gessisse significat .

M. T. C. IMP. CANINIO SALLUSTIO
PROQUÆST. S. D. 17

Litteras a te mihi stator tuus reddidit Tarfi , ad xvi. Kal. Sextiles . His ego ordine , ut videris velle , respondebo . De successore meo nihil audiui : nec quemquam fore arbitror . Quin ad diem decedam , nulla causa est , præsertim sublato metu Parthico . Commoraturum me nusquam sane arbitror . Rhodum , Ciceronum causa puorum , accessorum puto ; neque id tamen certum . Ad urbem velim quam primum venire ; sed tamen iter meum reipublicæ , & rerum urbanarum ratio gubernabit . Successor tuus non potest ita maturare ullo modo , ut tu me in Asia possis convenire . De rationibus referendis non erat incommodum , te nullam referre , quam tibi scribis a Bibulo fieri potestatem . Sed id vix mihi videris per legem Juliam facere posse : quam Bibulus certa quadam ratione non servat , tibi magnopere servandam censeo . Quod scribis , Apamea præsidium deduci non oportuisse , videbam idem ceteros existimare , molestæque ferebam de ea re minus commodos sermones malevolorum fuisse . Parthi transferint , necne , præter te , video dubitare neminem : itaque omnia præsidia , quæ magna , & firma paraveram commotus hominum non dubio sermone , dimisi . Rationes mei quæstoris nec verum fuit me tibi mittere , nec tum erant confectæ : eas nos Apameæ deponere cogitabamus . De præda mea , præter quæstores urbanos , id est populum Romanum , teruncium

cium nec attigit, nec tacturus est quisquam. Laodiceæ me prædes accepturum arbitror omnis pecuniæ publicæ, ut & mihi, & populo cautum sit sine vecturæ periculo. Quod scribis ad me de drachmis cccccc nihil est, quod in isto genere cuiquam possim commodare: omnis enim pecunia ita tractatur, ut præda a præfectis; quæ autem mihi attributa est, a quæstore curetur. Quod quæris, quid existimem de legionibus, quæ decretæ sunt in Syriam, antea dubitabam venturæ ne essent; nunc mihi non est dubium, quin, si antea auditum erit, orium esse in Syria, venturæ non sint. Marium quidem successorem tarde video esse venturum, propterea quod senatus ita decrevit, ut cum legionibus iret. Uni epistolæ respondi; venio ad alteram. Petis a me, ut Bibulo, te quam diligentissime commendem; in quo mihi voluntas non deest: sed locus videtur esse tecum expositulandi. Solus enim tu ex omnibus, qui cum Bibulo sunt, certior me numquam fecisti, quam valde Bibuli voluntas a me sine causa abhorreret. Permulti enim ad me detulerunt, cum magnus Antiochiæ metus esset, & magna spes in me, atque in exercitu meo, solitum dicere, quidvis se perpeti malle, quam videri eguisse auxilio meo. Quod ego officio quæstorio te adductum, reticere de prætore tuo non moleste ferebam: quamquam quemadmodum tractare, audiebam. Ille autem, cum ad Thermum de Parthico bello scriberet, ad me litteram numquam misit, ad quem intelligebat ejus belli periculum pertinere: tantum de auguratu filii sui scripsit ad me. In quo ego misericordia commotus, & quod semper amicissimus Bibulo fui, dedi operam, ut ei quam humanissime scriberem. Ille, si omnibus est malevolus (quod numquam existimavi) minus offendor in me: sin autem a me est alienior; nihil tibi litteræ meæ

proderunt. Nam, ad senatum quas Bibulus litteras misit, in iis, quod mihi cum illo erat commune, sibi soli attribuit: se ait curasse, ut cum quæstu populi pecunia permutaretur. Quod autem meum erat proprium, ut alariis transpadanis uti negarem, id etiam populo se remisisse scribit: Quod vero illius erat solius, id mecum communicat: Equitibus auxiliariis, inquit, cum amplius frumenti postularem. Illud vero pusilli animi, & ipsa malevolentia jejuni, atque inanis, quod Ariobarzanem, quem senatus per me Regem appellavit, mihiq; commendavit, iste in litteris non Regem, sed Regis Ariobarzanis filium appellat. Hoc animo qui sunt, deteriores fiunt rogati: Sed tibi morem gessi: litteras ad eum scripsi, quas cum acceperis, facies quod voles. Vale.

A R G U M E N T U M.

Suadet, ut decedens præponat provincie questorem potius, quam legatos, quod ipse quoque postea fecit, vide Ep. 15.

M.T.C. IMP. Q. THERMO PROPRÆT. S. D. 18

Officium meum erga Rhodonem, ceteraque mea studia, quæ tibi ac tuis præstiti, tibi homini gratissimo, grata esse vehementer gaudeo: mihiq; scito in dies majori curæ esse dignitatem tuam, quæ quidem a te ipso integritate, & clementia tua sic amplificata est, ut nihil addi posse videatur. Sed mihi, magisque quotidie de rationibus tuis cogitanti, placet illud meum consilium, quod initio Aristoni nostro, ut ad me venit, ostendi: graves te suscepturum inimicitias, si adolescens potens, & nobilis a te ignominia affectus esset, & hercle sine dubio est ignominia. Habes enim neminem honoris gradu superiorem. Ille autem, ut omittam nobilitatem, hoc ipso vincit viros optimos, hominesque innocentissimos
lega-

legatos tuos, quod & quæstor est, & quæstor tuus. Nocere tibi iratum neminem posse perspicio: sed tamen tres fratres, summo loco natos, promptos, non indifertos, te nolo habere iratos; jure præsertim, quos video deinceps tribunos plebis per triennium fore. Tempora autem reipub. qualia futura sint, quis scit? mihi quidem turbulenta videntur fore. Cur ergo te velim incidere in terrores tribunitios; præsertim cum sine cujusquam reprehensione quæstoriis legatis quæstorem possis anteferre? qui si dignum se majoribus suis præbuerit, ut spero, & opto, tua laus ex aliqua parte fuerit: sin quid offenderit, sibi totum, nihil tibi offenderit. Quæ mihi veniebant in mentem, quæ ad te pertinere arbitrabar, quod in Ciliciam proficiscebam, existimavi me ad te oportere scribere. Tu quod egeris, id velim Dii approbent. Sed, si me audies, vitabis inimicitias, & posteritatis otio consules. Vale.

A R G U M E N T U M.

Ostendit aptiorem sibi quæstorem obtingere neminem potuisse: & hortatur, ut maturet in provinciam venire, antequam ipse decedat.

M. T. C. IMP. CÆLIO CALDO, L. F. C. N.

QUÆST. DES. S. D.

19

CUM optatissimum nuncium accepiſſem, te mihi quæstorem obtigisse, eo jucundiorē mihi eam sortem sperabam fore, quo diutius in provincia mecum fuisses. Magni enim videbatur interesse; ad eam necessitudinem, quam nobis fors tribuisset, consuetudinem quoque accedere. Postea cum mihi nihil neque a te ipso, neque ab ullo alio de adventu tuo scriberetur; verebar, ne id ita caderet (quod etiam nunc vereor) ne antequam tu in provinciam venisses, ego de provincia decederem. Accepi autem a te missas litteras in Cilicia, cum essem in castris, ad x. Kal. Quintil. scriptas humanissime, quibus facile & officium, & ingenium tuum per-

spici possit : sed neque unde , neque qua die datæ essent , aut quo tempore te exspectarem , significabant : nec is , qui attulerat , a te acceperat ; ut ex eo scirem , quo ex loco , aut quo tempore essent datæ . Quæ cum essent incerta , existimavi tamen esse faciendum , ut ad te statores meos , & lictores cum litteris mitterem : quas si satis opportuno tempore accepisti , gratissimum mihi feceris , si ad me in Ciliciam quamprimum veneris . Nam quod ad me Curius , consobrinus tuus , mihi , ut scis , maxime necessarius ; quod item C. Virgilius , propinquus tuus familiarissimus noster , de te accuratissime scripsit ; valet id quidem apud me multum , sicuti debet hominum amicissimorum diligens commendatio : sed tuæ litteræ , de tua præsertim dignitate , & de nostra conjunctione , maximi sunt apud me ponderis . Mihi quæstor optatior obtinere nemo potuit . Quamobrem quæcumque a me ornamenta in te proficiscuntur , ut omnes intelligant , a me habitam esse rationem tuæ , majorumque tuorum dignitatis . Sed id jam facilius consequar , si ad me in Ciliciam veneris : quod ego & mea , & reipub. & maxime tua interesse arbitror .

LIBER III.

ARGUMENTUM.

Totus est hic liber ad Appium P. Clodii fratrem , cum quo post inimicitias , in gratiam redierat . In hac autem epistola scribit de duobus Appii liberis , Phania , & Cilice : inserit quædam de sua benevolentia . In extremo commendat Valerium jurisconsultum cum joco familiari .

M. T. C. APPIO PULCHRO IMP. S. D. I

SI ipsa resp. tibi narrare posset, quomodo sese haberet, non facilius ex ea cognoscere posses, quam

quam ex liberto tuo Phania : ita est homo non modo prudens, verum etiam, quod vidi, curiosus. Quapropter ille tibi omnia explanabit : id enim mihi & ad brevitatem est aptius, & ad reliquas res providentius. De mea autem benevolentia erga te, etsi potes ex eodem Phania cognoscere, tamen videntur etiam aliquæ meæ partes. Sic enim tibi persuade, carissimum te mihi esse, cum propter multas suavitates ingenii, officii, humanitatis tuæ, tum quod ex litteris tuis, & ex multorum sermonibus intelligo, omnia, quæ a me profecta sunt in te, tibi accidisse gratissima. Quod cum ita sit, perficiam profecto, ut longi temporis usuram, qua caruimus, intermissa nostra consuetudine, & gratia, crebritate, & magnitudine officiorum meorum sarciam : idque me (quoniam tu ita vis) puto non invita Minerva esse facturum : quam quidem ego si forte de tuis sumpsero, non solum Pallada, sed etiam Appiada nominabo. Cilix, libertus tuus, antea mihi minus fuit notus, sed ut mihi reddidit a te litteras plenas & amoris, & officii, mirifice ipso suo sermone subsecutus est humanitatem litterarum tuarum. Jucunda mihi ejus oratio fuit, cum de animo tuo, cum de sermonibus, quos de me haberes quotidie, mihi narraret. Quid quæris ? biduo factus est mihi familiaris ; ita tamen, ut Phaniam valde sim desideraturus : quem cum Romam remittes, quod (ut putabamus) celeriter eras facturum, omnibus ei de rebus, quas agi, quas curari a me voles, mandata des velim. L. Valerium jurisconsultum valde tibi commendo, sed id ita etiam, si non est jurisconsultus : melius enim ei cavere volo, quam ipse aliis solet. Valde hominem diligo, est ex meis domesticis, atque intimis familiaribus. Omnino tibi agit gratias, sed idem scribit, meas litteras maximum apud te pondus habituras : id eum ne fallat, te etiam atque etiam rogo. Vale.

ARGUMENTUM.

Cum esset Appio successor in Cilicie administratione creatus, rogat eum, ut provinciam sibi quam maxime aptam, explicatamque tradat, quo sit ei facilius administrandi ratio.

M. T. C. PROCOS. APPIO PULCHRO
IMP. S. D.

2

CUM & contra voluntatem meam, & præter opinionem accidisset, ut, mihi cum imperio in provinciam proficisci necesse esset; in multis & variis molestiis, cogitationibusque meis hæc una consolatio occurrebat, quod neque tibi amicior, quam ego sum, quisquam posset succedere: neque ego ab ullo provinciam accipere, qui mallet eam mihi quam maxime aptam, explicatamque tradere. Quod si tu quoque eandem de mea voluntate erga te spem habes, ea te profecto numquam faller. A te maximopere pro nostra summa conjunctione, tuaque singulari humanitate, etiam atque etiam peto, & quæso, ut quibuscumque rebus potes (potes autem plurimis) prospicias, & consulas rationibus meis. Vides ex S. C. provinciam esse habendam: si eam (quoad ejus facere potueris) quam expeditissimam mihi tradideris, facilius erit mihi quasi decursus mei temporis. Quid in eo genere efficere possis, tui consilii est. Ego te, quod tibi veniet in mentem mea interesse, valde rogo. Pluribus verbis ad te scriberem, si aut humanitas longiorem orationem exspectaret; aut id fieri nostra amicitia pateretur; aut res verba desideraret, ac non pro se ipsa loqueretur. Hoc velim tibi persuadeas, si rationibus meis a te provisum esse intellexero, magnam te ex eo, & perpetuam voluntatem esse capturum. Vale.

ARGU-

ARGUMENTUM.

Petit, quod in proxima superiori epistola, ut in tradenda provincia commodet sibi quam maxime potest, præcipue ne numerum militum imminuat.

M. T. C. PROCOS. APPIO PULCHRO
IMP. S. D.

3

AD XI. Jun. Brundisium cum venissem, Q. Fabius legatus tuus mihi præsto fuit, eaque me ex tuis mandatis monuit, quæ non modo mihi, ad quem pertinebant, sed universo senatui venerant in mentem, præsidio firmiori opus esse ad istam provinciam. Censebant enim omnes fere, ut in Italia supplementum meis, & Bibuli legionibus scriberetur. Id cum Sulpitius Cos. passurum se negaret, multa nos quidem questi sumus; sed tantus consensus senatus fuit, ut mature proficisceremur, parendum ut fuerit: itaque fecimus. Nunc, quod a te petii litteris iis, quas Romæ tabellariis tuis dedi, velim tibi curæ sit, ut, quæ successoris conjunctissimo, & amicissimo commodare potest is, qui provinciam tradit, ea, pro nostra constantissima voluntate erga te, cura, ac diligentia tua complectare, ut omnes intelligant, nec me benevolentiori cuiquam succedere, nec te amicali potuisse provinciam tradere. Ex iis litteris, quarum exemplum ad me misisti, quas in senatu recitari voluisti, sic intellexeram, permultos a te milites esse dimissos: sed mihi Fabius idem demonstravit, id te cogitasse facere, sed cum ipse a te discederet, integrum militum numerum fuisse. Id si ita est, pergratum mihi feceris, si istas exiguas copias, quas habuisti, quam minimum imminueris, qua de re S. C. quæ facta sunt, ad te missa esse arbitror. Equidem pro eo, quanti te facio, quidquid feceris, approbabo: sed te quoque confido ea esse facturum, quæ mihi intelliges maxime esse accommodata. Ego

C VI

C. Pon-

C. Pontinium, legatum meum Brundisii expectabam, eumque ante Kal. Jun. Brundisium venturum arbitror. Qui cum venerit, quæ primum navigandi nobis facultas data erit, ea utemur. Vale.

A R G U M E N T U M.

Expectari a se scribit P. Clodium cum Appii mandatis, mutuam benevolentiam, ejusque caussas commemorat.

M. T. C. PROCOS. APPIO PULCHRO
IMP. S. D.

4

PRidie Non. Jun. cum essem Brundisii, litteras tuas accepi, quibus erat scriptum, P. Clodio mandasse, quæ illum mecum loqui velles. Eum sane expectabam, ut ea, quæ a te desiderantur, quamprimum cognoscerem. Meum studium erga te, & officium, tametsi multis jam rebus spero tibi cognitum, tamen in iis maxime declarabo, quibus plurimum significare potuero, tuam mihi existimationem, & dignitatem carissimam esse. Mihi & Q. Fabius Virgilianus, & C. Flaccus L.F. & diligentissime M. Octavius Cn. F. demonstravit, me a te plurimi fieri, quod egomet multis argumentis jam antea judicaram, maximeque illo libro augurali, quem ad me amantissime scriptum, suavissimum misisti. Mea in te omnia summa necessitudinis officia constabunt. Nam cum te ipsum, ex quo tempore tu me diligere cœpisti, quotidie pluris feci: tum accesserunt etiam conjunctiones necessariorum tuorum. Duos enim duarum ætatum plurimi facio, Cn. Pompejum, filiaæ tuæ forcerum, & M. Brutum generum tuum. Collegii quoque conjunctio, præsertim tam honorifice a te approbata, non mediocre vinculum mihi quidem, attulisse videtur ad voluntates nostras copulandas. Sed, si Clodium convenero, ex illius sermone ad
te

te scribam plura, & ipse operam dabo, ut te quamprimum videam. Quod scribis manendi tibi causam eam fuisse, ut me convenires, id mihi, ne mentiar gratum est. Vale.

ARGUMENTUM.

Agit Appio gratias, quod operam dederit, ut expeditissimam provinciam traderet. Deinde rationem exponit itineris sui, quo certius de congressu statuere Appius possit.

M. T. C. PROCOS. APPIO PULCHRO
IMP. S. D.

TRalles veni ad VI. Kal. Sex. Ibi mihi præsto fuit L. Lucilius cum litteris, mandatisque tuis: quo quidem homine neminem potuisti nec mihi amiciores, nec, ut arbitror, ad ea cognoscenda, quæ scire volebam, aptiores, prudentioresve mittere. Ego autem & tuas litteras legi libenter, & audiavi Lucilium diligenter. Nunc, quoniam & tu ita sentis (scribis enim, quæ de nostris officiis ego ad te scripserim, etsi ea jucunda fuerunt, tamen quoniam ex alto repetita sint, non necessaria te putasse) & revera confirmata amicitia, & perspecta fide, commemoratio officiorum supervacanea est, eam partem orationis prætermittam. Tibi tamen agam, ut debeo, gratias: animadverti enim & didici ex tuis litteris, te omnibus in rebus habuisse rationem, ut mihi consuleres, restitueresque, & præparares quodammodo omnia, quo mea ratio faciliior, & solutior esse posset. Hoc tuum officium cum mihi gratissimum esse dicam, sequitur illud, ut te existimare velim mihi magnæ curæ fore, atque esse jam, primum, ut ipse tu, tuique omnes, deinde etiam ut reliqui scire possint, me tibi esse amicissimum; quod quibus adhuc non satis est perspectum, ii mihi nolle magis hoc animo nos esse, quam non intel-

intelligere videntur : sed profecto intelligent . Neque enim obscuris personis, nec parvis in causis res agetur : sed hoc fieri melius, quam dici, aut scribi , volo . Quod itinerum meorum ratio te nonnullam in dubitationem videtur adducere , visurusne me sis in provincia : ea res sic se habet . Brundisii cum loquerer cum Phania , liberto tuo, veni in eum sermonem , ut dicerem , me libenter ad eam partem provinciæ primum esse venturum, quo te maxime velle arbitrarer . Tunc mihi ille dixit , quod classe tu velles decedere , per fore accommodatum tibi, si ad Sidam, maritimam partem provinciæ , navibus accessissem . Dixi me esse facturum : itaque fecissem , nisi mihi L. Clodius noster Corcyræ dixisset, minime id esse faciendum : te Laodiceæ fore ad meum adventum . Erat id mihi multo brevius, atque commodius , cum præfertim te ita malle arbitrarer . Tua ratio postea est commutata : nunc quid fieri possit , tu facillime statues : ego tibi meum consilium exponam . Prope Kal. Sex. puto me Laodiceæ fore : ubi perpaucos dies , dum pecunia accipitur , quæ mihi ex publica permutatione debetur , commorabor . Deinde iter faciam ad exercitum , ut circiter Id. Sext. putem me ad Iconium fore . Sed si quid nunc me fallit in scribendo , (procul enim aberam ab re ipsa , & locis) simul ac progredi cœpero , quam celerrimis potero , & quam creberrimis litteris faciam , ut tibi nota sit omnis ratio dierum , atque itinerum meorum . Oneris tibi imponere nec audeo quidquam , nec debeo : sed quod tuo commodo fieri possit , utriusque nostrum magni interest , prius ut te conveniam quam decedas : quam facultatem si quis casus eripuerit , mea tamen in te omnia officia constabunt , non secus , ac si te vidissem . Tibi de nostris rebus nihil sum ante mandaturus per litteras , quam desperaro coram me tecum agere posse .

Quod

Quod te a Scævola petiisse dicis, ut, dum tu abesses, ante adventum meum provinciæ præesset; eum ego Ephesi vidi: fuitque mecum familiariter triduum illud, quo ego Ephesi commoratus sum: nec ex eo quidquam audiui, quod sibi a te mandatum diceret. Sane vellem potuisse obsequi voluntati tuæ, non enim arbitror noluisse. Vale.

ARGUMENTUM.

Ostendit non per se, sed per Appium, stetisse, quominus congredierentur: nihil tamen de sua erga illum benevolentia detractum.

M. T. C. PROCOS. APPIO PULCHRO
IMP. S. D.

6

Cum meum factum cum tuo comparo, etsi non magis mihi faveo in nostra amicitia tuenda, quam tibi: tamen multo magis meo facto delector, quam tuo. Ego enim Brundisii quæsi ex Phania, cujus mihi videbar & fidelitatem erga te perspexisse, & nosse locum, quem apud te is teneret; quam in partem provinciæ putaret te velle, ut in succedendo primum venirem. Cum ille mihi respondisset, nihil me tibi gratius facere posse, quam si ad Sidam navigassem: etsi minus dignitatis habebat ille adventus, & ad multas res mihi minus erat aptus; tamen me ita dixi esse facturum. Idem ego cum L. Clodium Corcyræ convenissem, hominem ita tibi conjunctum, ut mihi, cum illo cum loquerer tecum loqui viderer; dixi ei me ita facturum esse, ut in eam partem, quam Phania rogasset, primum venirem. Tunc mihi ille cum gratias egisset, magnopere a me petivit, ut Laodicæam protinus irem: te in prima provincia velle esse, ut quamprimum decederes: quin, nisi ego successor essem, quem tu cuperes videre, te antea quam tibi successum esset, decessurum fuisse: quod quidem erat consentaneum

taneum cum iis litteris, quas ego Romæ acceperam, ex quibus perspexisse mihi videbar, quam festinares decedere. Respondi Clodio, me ita esse facturum, ac multo quidem libentius, quam si illud esset faciendum quod promiseram Phaniæ. Itaque & consilium mutavi, & ad te statim meas manu scriptas litteras misi; quas quidem ex tuis litteris intellexi, satis mature ad te esse perlatas. Hoc ego meo facto valde delector: nihil enim potuit fieri amantius. Considera nunc vicissim tuum. Non modo ibi non fuisti, ubi me quamprimum videre posses; sed eo discessisti, quo ego te ne persequi quidem possem triginta diebus, qui tibi ad decedendum lege (ut opinor) Cornelia, constituti essent: ut tuum factum illis, qui quo animo inter nos simus, ignorant, alieni hominis, (ut levissime dicam) & fugientis congressum, meum vero conjunctissimi & amicissimi esse videatur. Ac mihi tamen antequam in provinciam venirem redditæ sunt a te litteræ, quibus etsi te Tharsum proficisci demonstrabas, tamen mihi non dubiam spem mei conveniendi afferebas: cum interea, credo equidem, malevoli homines (late enim patet hoc vitium, & est in multis) sed tamen probabilem materiem nacti sermonis, ignari meæ constantiæ, conabantur alienare a te voluntatem meam: qui te forum Tharsi agere, statuere multa, decernere, judicare dicerent, cum posses jam suspicari, tibi esse successum: quæ ne ab iis quidem fieri solerent, qui brevi tempore sibi succedi putarent. Horum ego fermone non movebar: quin etiam (credas mihi velim) si quid tu ageres, levare me putabam molestia: & ex annua provincia, quæ mihi longa videretur, prope jam undecim mensium provinciam factam esse gaudebam, si absenti mihi unius mensis labor detractus esset. Illud (vere dicam) me movet in tanta militum paucitate abesse

esse tres cohortes, quæ sint plenissimæ, nec me scire ubi sint. Molestissime autem fero, quod te ubi visurus sim, nescio: eoque ad te tardius scripsi, quod quotidie te ipsum exspectabam: cum interea ne litteras quidem ullas accepi, quæ me docerent quid ageres, aut ubi te visurus essem. Itaque virum fortem, mihiq; in primis probatum, Antonium præfectum evocatorum, misi ad te, cui, si tibi videretur, cohortes traderes; ut dum tempus anni esset idoneum, aliquid negotii gerere possem: in quo, tuo consilio ut me sperare esse usurum, & amicitia nostra, & litteræ tuæ fecerant: quod ne nunc quidem despero. Sed plane quando, aut ubi te visurus sim, nisi ad me scripseris, ne suspicari quidem possum. Ego, ut me tibi amicissimum esse, & æqui, & iniqui intelligant, curabo. De tuo in me animo iniquis secus existimandi videris nonnihil loci dedisse: id, si correxeris, mihi valde gratum erit. Et, ut habere rationem possis, quo loco me, salva lege Cornelia, convenias: ego in provinciam veni pridie Kal. Sex. Iter in Ciliciam facio per Cappadociam: castra movi ab Iconio pridie Kal. Sep. Nunc tu & ex diebus, & ex ratione itineris, si putabis me esse conveniendum, constitues, quo loco id commodissime fieri possit, & quo die. Vale.

ARGUMENTUM.

Querelam Appii refellit, contraque ipse queritur, & ostendit, se juste queri, virtutem extollens contra inanem arrogantiam nobilitatis.

M. T. C. IMP. APPIO PULCHRO S. D. 7

PLuribus verbis ad te scribam, cum plus otii natius ero. Hæc scripsi subito, cum Bruti pueri Laodiceæ me convenissent, & se Romam propere dixissent. Itaque nullas iis, præterquam ad te, & ad Brutum dedi litteras. Legati Appia-
ni

ni mihi volumen a te plenum querelæ iniquissimæ reddiderunt, quod eorum ædificationem litteris meis impedissem. Eadem epistola petebas, ut eos quamprimum, ne in hiemem inciderent, ad facultatem ædificandi liberarem: & sintul peracute querebare, quod eos tributa exigere vetarem prius, quam ego re cognita permissem: genus enim quoddam fuisse impediendi, cum ego cognoscere non possem, nisi cum ad hiemem me ex Cilicia recepissem. Ad omnia accipe, & cognosce æquitatem expostulationis tuæ. Primum cum ad me aditum esset ab iis, qui dicerent, a se intolerabilia tributa exigere: quid habuit iniquitatis, me scribere, ne facerent antequam ego rem, causamque cognoscerem? Non poteram (credo) ante hiemem: sic enim scribis. Quasi vero ad cognoscendum ego ad illos, non illi ad me venire debuerint. Tam longe? inquis. Quid? cum dabis iis litteras, per quas mecum agebas, ne eos impedirem, quominus ante hiemem ædificarent, non eos ad me venturos arbitrabare? Tametsi id quidem fecerunt ridicule: quas enim litteras afferebant, ut opus æstate facere possent, eas mihi post brumam reddiderunt. Sed scito, & multo plures esse, qui de tributis recusent, quam qui exigere velint, & me tamen, quod te velle existimem, esse facturum. De Appianis hætenus. A Pausania, Lentuli liberto, accenso meo, audiui, cum diceret, te secum esse questum, quod tibi obviam non prodiissem. Scilicet contempsisti te; nec potest fieri me quidquam superbius. Cum puer tuus ad me secunda fere vigilia venisset, isque te ante lucem Iconium mihi venturum nunciasset, incertumque, utra via, cum essent duæ: altera Varronem, tuum familiarissimum, altera Q. Leptam præfectum fabrum meum, tibi obviam misi: mandavi utrique eorum, ut antea ad me excurrebant, ut tibi obviam prodire possem. Currrens
Lepta

Lepta venit, mihiq̄ue nunciavit, te jam castra prætergressum esse: confestim Iconium veni: cetera jam tibi nota sunt. An ego tibi obviam non prodirem? primum, Appio Claudio? deinde Imperatori? deinde more majorum? deinde quod caput est, amico? præsertim cum in isto genere multo etiam ambitiosius facere soleam, quam honos meus, & dignitas postulat. Sed hæc hætenus. Illud idem Pausania dicebat te dixisse: Quid? Appius Lentulo, Lentulus Appio processit obviam: Cicero Appio noluit? Quæso, etiamne tu has ineptias? homo (mea sententia) summa prudentia, multa etiam doctrina, plurimo rerum usu: addo urbanitatem, quæ est virtus, ut Stoici rectissime putant: ullam Appietatem, aut Lentulitatem valere apud me plus, quam ornamenta virtutis existimas? Cum ea consecutus nondum eram, quæ sunt hominum opinionibus amplissima: tamen ista vestra nomina numquam sum admiratus: viros eos, qui ea vobis reliquissent, magnos arbitrabar. Postea vero quam ita, & cepi, & gessi maxima imperia, ut mihi nihil neque ad honorem, neque ad gloriam acquirendum putarem: superiorem quidem numquam, sed parem vobis me speravi esse factum. Nec, mehercule, aliter vidi existimare, vel Cn. Pompejum, quem omnibus, qui umquam fuerunt, vel P. Lentulum, quem mihi ipsi antepono. Tu si aliter existimas, nihil errabis, si paullo diligentius (ut quid sit *ἔξοχῆ*, quid sit *συγγένεια* intelligas) Athenodorus Sandonis filius quid de his rebus dicat, attenderis. Sed ut ad rem redeam, me tibi non amicum modo, verum etiam amicissimum existimes velim: profecto omnibus meis officiis efficiam, ut ita esse vere possis judicare. Tu autem si id agis, ut minus mea causa, dum ego absum, debere videaris, quam ego tua laborarim: libero te ista cura.

παρ' ἐμοῖσιν ἄλλοι ,

Οὐκ μετρίσωσι , μάλιστα δὲ μετρίετα ζεύς .

Sin autem natura es φιλαίτιος, illud non perficies, quominus tua causa velim: hoc assequere, ut quam in partem accipias, minus laborem. Hæc ad te scripsi liberius, fretus conscientia officii mei, benevolentiaque, quam a me certo iudicio susceptam, quoad tu voles, conservabo. Vale.

ARGUMENTUM.

Querulis Appii litteris respondet, cum excusatione sui facti: ipsumque Appium aut imprudentem significat, qui sermonibus iniquorum crediderit, aut nimis astutum, qui ea, quæ ipsi in mentem veniant, aliis attribuat.

M. T. C. PROCOS. APPIO PULCHRO
IMP. S. D.

8

ET si, quantum ex litteris tuis intelligere potui, videbam te hanc epistolam, cum ad urbem esses, esse lecturum, refrigerato jam levissimo sermone hominum provincialium: tamen, cum tu tam multis verbis ad me de improborum oratione scripisses, faciendum mihi putavi, ut tuis litteris breviter responderem. Sed prima duo capita epistolæ tuæ, tacita mihi quodammodo relinquenda sunt. Nihil enim habent, quod aut definitum sit, aut certum, nisi, me vultu, & taciturnitate significasset tibi non esse amicum, idque pro tribunali, cum aliquid ageretur, & nonnullis in conviviis intelligi potuisse. Hoc totum nihil esse, possum intelligere: sed cum sit nihil, ne quid dicatur quidem intelligo. Illud quidem scio, meos multos, & illustres, & ex superiore, & ex æquo loco sermones habitos cum tua summa laude, & cum magna significatione nostræ familiaritatis, ad te vere potuisse deferri. Nam quod ad legatos attinet, quid a me fieri

fieri potuit aut elegantius, aut justius, quam ut sumptus egentissimarum civitatum minuerim sine ulla imminutione dignitatis tuæ, præsertim ipsis civitatibus postulantis? Nam mihi totum genus legationum, tuo nomine proficiscentium, notum non erat. Apameæ cum essem, multarum civitatum principes ad me detulerunt, sumptus decerni legatis nimis magnos, cum solvendo civitates non essent. Hic ego multa simul cogitavi, primum, te hominem non solum sapientem, verum etiam (ut nunc loquimur) urbanum, non arbitrabar genere isto legationum delectari: idque me arbitror Synnadis pro tribunali multis verbis disputavisse: primum, Appium Clodium senatui, Populoque Romano, non Myndesium testimonio, (in ea enim civitate mentio facta est) sed sponte, esse laudatum. Deinde me ista vidisse multis accidere, ut eorum causa legationes Romam venirent; sed his legationibus non meminisse ullum tempus laudandi, aut locum dari: studia mihi eorum placere, quod in te benemerito grati essent; consilium totum videri minime necessarium. Si autem vellent declarare in eo officium suum, laudaturum me, si qui suo sumptu functus esset officio, concessurum, si legitimo, non permissurum, si infinito. Quid enim reprehendi potest? nisi quod addis, visum esse quibusdam edictum meum, quasi consulto ad istas legationes impediendas esse accommodatum. Jam non tam mihi videntur injuriam facere ii, qui hæc disputant, quam si civium aures ad hanc disputationem patent: Romæ composui edictum: nihil addidi, nisi quod publicani me rogarunt, cum Samum ad me venissent, ut de tuo edicto totidem verbis transferrem in meum. Diligentissime scriptum caput est, quod pertinet ad minuendos sumptus civitatum: quo in capite sunt quædam nova, salutaria civitatibus, quibus ego magnopere delector.

etor. Hoc vero, ex quo suspicio nata est, me exquisivisse aliquid, in quo te offenderem, translatitium est: neque enim eram tam desipiens, ut privatæ rei causa legari putarem; qui, & tibi non privato, & pro re non privata sua, sed publica, non in privato, sed in publico orbis terræ consilio, id est in senatu, ut gratias agerent, mittebantur: neque, cum edixi, nequis injussu meo proficisceretur, exclusi eos, qui me in castra, & qui trans Taurum persequi non possent. Nam id est maxime in tuis litteris irridendum. Quid enim erat, quod me persequerentur in castra? Taurum ne transirent, cum ego Laodicea usque ad Iconium iter ita fecerim, ut me omnium illarum diœcesium, quæ cis Taurum sunt, omniumque earum civitatum magistratus, legationesque convenirent? Nisi forte postea cœperunt legare, quam ego Taurum transgressus sum, quod certe non ita est. Cum enim Laodiceæ, cum Apameæ, cum Synnadis, cum Philomeli, cum Iconii essem, quibus in oppidis omnibus commoratus sum, omnes jam istius generis legationes erant constitutæ. Atque hoc tamen te scire volo, me de ipso sumptu legationum aut minuendo, aut remittendo decrevisse nihil, nisi quod principes civitatum a me postulassent, ne in venditionem tributorum, & illam acerbissimam exactionem, quam tu non ignoras, capitum, atque ostiorum, inducerentur sumptus minime necessarii. Ego autem, cum hoc suscepissem, non solum justitia, sed etiam misericordia adductus, ut levarem miseris perditas civitates, & perditas maxime per magistratus suos, non potui in illo sumptu non necessario negligens esse. Tu, cum istiusmodi sermones ad te delati de me sunt, non debuisti credere: si autem eo genere delectaris, ut quæ tibi in mentem veniant, aliis attribuas, genus sermonis inducis in amicitiam minime liberale.

Ego,

Ego, si in provincia de tua fama detrahere umquam cogitassem, non ad generum tuum Lentulum, neque ad libertum tuum Brundisii, neque ad præfectum fabrum Corcyrae, quem in locum me venire velles, retulissem. Quare potes, doctissimis hominibus auctoribus, quorum sunt de amicitia gerenda præclarissime scripti libri, genus hoc totum orationis tollere: Disputabant, ego contra differebam: Dicebant, ego negabam. An mihi de te nihil esse dictum umquam putas? ne hoc quidem, quod, cum me Laodiceam venire voluisses, Taurum ipse transisti? quod iisdem diebus meus conventus erat Apameæ, Synnadis, Philomeli: tuus Tarsi? Non dicam plura, ne in quo te objurgem, id ipsum videar imitari. Illud dicam, ut sentio: si ista, quæ alios loqui dicis, ipse sentis, tua summa culpa est: sin alii tecum hæc loquuntur, tua tamen, quod audis, culpa nonnulla est. Mea ratio in tota amicitia nostra constans, & gravis reperietur. Quod si quis me astutiorē fingit, quid potest esse callidius, quam cum te absentem semper defenderim, cum præsertim mihi usu venturum non arbitrarer, ut ego quoque absens a te defendendus essem, nunc committere, ut tu jure optimo me absentem deferere posses? Unum genus excipio sermonis, in quo persæpe aliquid dicitur, quod te putem nolle dici: si aut legatorum tuorum cuipiam, aut præfectorum, aut tribunorum militum male dicitur: quod tamen ipsum non mehercule adhuc accidit me audiente, ut aut gravius diceretur, aut in plures, quam mecum Corcyrae Clodius est locutus: cum in eo genere maxime quereretur, te aliorum improbitate minus felicem fuisse: Hos ego sermones, quod & multi sunt, & tuam estimationem (ut ego sentio) non offendunt, laceravi numquam, sed non valde repressi. Si quis est qui neminem bona fide in gratiam putet redire

dire posse, non nostram is perfidiam coarguit, sed indicat suam; simulque non de me is pejus, quam de te; existimat: sin autem aliquem mea instituta in provincia non delectant, & quadam dissimilitudine institutorum meorum, ac tuorum lædi se putat, cum uterque nostrum recte fecerit, sed non idem uterque secutus sit: hunc ego amicum habere non curo. Liberalitas tua, ut hominis nobilissimi, latius in provincia patuit: nostra si angustior est (etsi de tua prolixa, beneficaque natura limavit aliquid posterior annus propter quamdam tristitiam temporum.) non debent mirari homines, cum & natura semper ad largiendum ex alieno fuerim restrictior, & temporibus, quibus alii moventur, iisdem ego movear, me esse acerbum sibi, ut sim dulcis mihi. De rebus urbanis quod me certiores fecisti, cum per se mihi gratum fuit, tum quod significasti, tibi omnia mea mandata curæ fore. In quibus unum illud te præcipue rogo, ut cures, ne quid mihi ad hoc negotii aut oneris accedat, aut temporis: Hortensiumque nostrum collegam, & familiarem roges, ut, si umquam mea causa quidquam aut sensit, aut fecit, de hac quoque sententia bima decedat: qua mihi nihil potest esse inimicius. De nostris rebus quod scire vis, Tarso nonis Oct. Amanum versus profecti sumus. Hæc scripsi postridie ejus diei, cum castra haberem in agro Mopsuestiæ. Si quid egero, scribam ad te, neque domum umquam ad meos litteras mittam, quin adjungam eas, quas tibi reddi velim. De Parthis quod quæris, fuisse nullos puto. Arabes qui fuerunt admisso Parthico ornatu, dicuntur omnes revertisse: hostem esse in Syria negant ullum. Tu velim ad me quam sæpissime, & de tuis rebus scribas, & de meis, & de omni reipublicæ statu, de quo sum sollicitus eo magis, quod ex tuis litteris cognovi, Pompejum nostrum in Hispaniam iturum. Vale.

AR-

ARGUMENTUM.

Appii litteris humanissime scriptis humanissime respondet : gratulatur de triumphi spe : hortatur ad absolutionem librorum auguralium : supplicationes petit .

M. T. C. IMP. APPIO PULCHRO S. D. 9

Vix tandem legi litteras dignas Appio Clodio, plenas humanitatis, officii, diligentiae. Adspectus videlicet urbis tibi tuam pristinam urbanitatem reddidit. Nam quas ex itinere, antequam ex Asia egressus es, ad me litteras misisti, unas de legatis a me prohibitis proficisci, alteras de Apamæorum ædificatione impedita, legi perinvitus. Itaque conscientia meæ constantis erga te voluntatis rescripsi tibi subiratus. Iis vero litteris lectis, quas Philotimo liberto meo dedisti, cognovi, intellexique, in provincia multos fuisse, qui nos, quo animo inter nos sumus, esse nollent: ad urbem vero ut accesseris, vel potius ut primum tuos videris, cognosces ex iis, qua in te absentem fide, qua in omnibus officiis tuendis erga te observantia, & constantia fuisset. Itaque quanti illud me æstimare putas, quod est in tuis litteris scriptum: si quid acciderit, quod ad meam dignitatem pertineat, etsi vix fieri possit, tamen te parem mihi gratiam relaturum? tu vero facile facies. NIHIL est enim, quod studio, & benevolentia, vel amore potius, effici non possit. Ego, etsi & ipse ita judicabam, & fiebam crebro a meis per litteras certior: tamen maximam lætitiā cepi ex tuis litteris de spe minime dubia, & plane explorata triumphi tui; neque vero ob eam causam, quo ipse facilius consequerer, (nam id quidem. *Επιτυχιστο* est) sed, mehercule, quod tua dignitas atque amplitudo mihi est ipsa cara per se. Quare, quoniam plures tu

D

habes,

habes, quam ceteri, quos scias in hanc provinciam proficisci, quod te adeunt fere omnes, si quid velis, gratissimum mihi feceris; si ad me, simulatque adeptus eris, quod & tu confidis, & ego opto, litteras miseris. Longi subsellii (ut noster Pompejus appellat) judicatio, & mora, si quem tibi item unum, alterumve diem abstulerit (quid enim potest amplius?) tua tamen dignitas suum locum obtinebit. Sed si me diligis, si a me diligere vis, ad me litteras, ut quam primum lætitia afficiar, mitto: & velim, reliquum quod est promissi, ac muneris tui, mihi persolvas. Cum ipsam cognitionem juris auguralis consequi cupio, tum, mehercule, tuis incredibiliter studiis erga me, muneribusque delector. Quod autem a me tale quiddam desideras, sane mihi considerandum est, quonam te remunerer potissimum genere: nam profecto non est meum, qui in scribendo, ut soles admirari, tantum industriæ ponam, committere, ut in scribendo negligens fuisse videar: præsertim cum id non modo negligentis, sed etiam ingrati animi crimen futurum sit. Verum hæc videbimus. Illud, quod polliceris, velim pro tua fide diligentiaque, & pro nostra non instituta, sed jam inveterata amicitia, cures, & enitare, ut supplicatio nobis quam honorificentissime, quamprimumque decernatur. Omnino serius misi litteras, quam vellem: in quo cum difficultas navigandi fuit odiosa, tum in ipsum discessum senatus incidisse credo meas litteras: sed id feci adductus auctoritate, & consilio tuo; idque a me recte factum puto, quod non statim, ut imperator appellatus sim, sed aliis rebus additis, æstivisque confectis, litteras miserim. Hæc igitur tibi erunt curæ, quemadmodum ostendis, meque totum, & mea, & meos commendatos habebis. Vale.

ARGUMENTUM.

Dolabella Appium accusaverat, eoque ipso tempore Ciceronis filiam duxerat uxorem: id factum a suis, se insciente conatur Cicero probare, & in hanc sententiam multa colligit.

M. T. C. PROCOS. APPIO PULCHRO IMP.

S. D.

10

CUM est ad nos allatum de temeritate eorum, qui tibi negotium facerent, etsi graviter primo nuntio commotus sum, quod nihil tam præter opinionem meam accidere potuit: tamen, ut me collegi, cetera mihi facillima videbantur, quod & in te ipso maximam spem, & in tuis magnam habebam: multaque mihi veniebant in mentem, quamobrem istum laborem tibi etiam honori putarem fore. Illud plane moleste tuli, quod certissimum, & iustissimum triumphum hoc invidorum consilio esse tibi ereptum videbam. Quod tu si tanti facies, quanti ego semper judicavi faciendum esse, facies sapienter, & ages victor ex inimicorum dolore triumphum iustissimum. Ego enim plane video fore nervis, opibus, sapientiaque tua, vehementer ut inimicos tuos poeniteat intemperantiæ suæ. De me tibi sic, confessans omnes deos, promitto, atque confirmo, me pro tua dignitate (malo enim dicere, quam pro salute) in hac provincia, cui tu præfuisti, rogando, deprecatoris; laborando, propinqui; auctoritate, cari hominis, ut spero, apud civitates; gravitate, imperatoris suscepturum officia, atque partes. Omnia volo a me & postules, & exspectes: vincam meis officiis cogitationes tuas. Q. Servilius perbreves a te mihi litteras reddidit, quæ mihi tamen nimis longæ sunt: injuriam enim mihi fieri putabam, cum rogabar. Nollem accidisset tempus, in quo perspicere posses, quanti ego te, quanti Pompejum, quem

unum ex omnibus facio, ut debeo, plurimi, quanti Brutum facerem: quamquam in consuetudine quotidiana perspexisses, sicuti perspicies: sed, quoniam accidit, si quid a me prætermisum fuerit, commissum facinus, & admissum dedecus confitebor. Pontinius, qui a te tractatus est præstanti, ac singulari fide, cujus tui beneficii sum ego testis, præstat tibi memoriam, benevolentiamque quam debet: qui cum maximis rebus suis coactus, a me invitissime decessisset; tamen ut vidit tua interesse, conscendens jam navem, Epheso Laodiceam revertit. Talia cum te studia videam habiturum esse innumerabilia, plane dubitare non possum, quin tibi amplitudo ista sollicitudo futura sit. Si vero efficis, ut censores creentur, & si ita gesseris censuram, ut & debes, & potes: non tibi solum, sed tuis omnibus video in perpetuum summo te præsidio futurum. Illud pugna, & enitere, ne quid nobis temporis prorogetur: ut, cum hic tibi satisfecerimus, isthic quoque nostram in te benevolentiam navare possimus. Quæ de hominum, atque ordinum omnium erga te studiis scribis ad me, minime mihi miranda, & maxime jucunda acciderunt: eademque ad me præscripta sunt a familiaribus meis. Itaque capio magnam voluptatem, cum tibi, cujus mihi amicitia non solum ampla, sed etiam jucunda est, ea tribui, quæ debeantur: tum vero etiamnum remanere in civitate nostra studia, prope omnium consensu, erga fortes, & industrios viros: quæ mihi ipsi una semper tributa merces est laborum, & vigiliarum mearum. Illud vero mihi permirum accidit, tantam temeritatem fuisse in eo adolescente, cujus ego salutem duobus capitis judiciis summa contentione defendi, ut, tuis inimiciis suscipiendis, obvisceretur patroni omnium fortunarum, ac rationum suarum: præsertim cum tu omnibus vel ornamentis, vel præsidiis redundares; illi (ut levissime dicam)

dicam) multa deessent: cujus sermo stultus, & puerilis erat jam antea ad me a M. Cælio familiari nostro perscriptus, de quo item sermone multa scripta sunt abs te. Ego autem citius cum eo, qui tuas inimicitias suscepisset, veterem conjunctionem diremissem, quam novam conciliaissem. Neque enim de meo erga te studio dubitare debes: neque id est obscurum cuiquam in provincia, nec Romæ fuit. Sed tamen significatur in tuis litteris suspicio quædam, & dubitatio tua, de qua alienum tempus est mihi tecum expostulandi; purgandi autem mei necessarium. Ubi enim ego cuiquam legationi fui impedimento, quominus Romam ad laudem tuam mitteretur? aut in quo potui, si te palam odissem, minus, quod tibi obesset, facere? si clam, magis aperte inimicus esse? Quod si essem ex perfidia, qua sunt ii, qui in nos hæc conferunt; tamen ea stultitia certe non fuisset, ut aut in obscuro odio apertas inimicitias, aut, in quo tibi nihil nocerem, summam ostenderem voluntatem nocendi. Ad me adire quosdam memini, qui dicerent, nimis magnos sumptus legatis decerni: quibus ego non tam imperavi, quam censui, sumptus legatis quam maxime ad Legem Corneliam decernendos: atque in eo ipso me non perseverasse, testes sunt rationes civitatum, in quibus, quantum quæque voluit, legatis tuis datum induxit. Te autem quibus mendaciis homines lævissimi onerarunt? non modo sublatos sumptus, sed etiam a procuratoribus eorum, qui jam profecti essent, repetitos, & ablatos, eamque causam multis omnino non eundi fuisse. Quererer tecum, atque expostularem, nisi, ut supra scripsi, purgare me tibi hoc tuo tempore, quam accusare te, mallet, idque putarem esse rectius. Itaque nihil de te, quod credideris de me; quamobrem non debueris credere, pauca dicam. Nam si me virum bonum, si dignum tuis studiis, eaque doctrina,

cui me a pueritia dedi, si satis magni animi, non minimi consilii in maximis rebus perspectum habes: nihil in me, non modo perfidiosum, & insidiosum, & fallax in amicitia, sed ne humile quidem, aut jejenum debes agnoscere: sin autem me astutum, & occultum lubet fingere: quid est, quod minus cadere in ejusmodi naturam possit, quam aut florentissimi hominis aspernari benevolentiam, aut ejus existimationem oppugnare in provincia, cujus laudem domi defenderis? aut in ea re animum ostendere inimicum, in qua nihil obsis, aut id eligere ad perfidiam, quod ad indicandum odium apertissimum sit, ad nocendum levissimum? Quid erat autem, cur ego in te tam implacabilis essem, cum te ex fratre meo, ne tunc quidem, cum tibi prope necesse esset eas agere partes, inimicum mihi fuisse cognovissem? Cum vero redditum nostrum in gratiam uterque expetisset: quid in consulatu tuo frustra mecum egisti, quod me aut facere, aut sentire voluisses? quid mihi mandasti, cum te Puteolis prosequerer, in quo non expectationem tuam diligentia mea vicerim? Quod si id est maxime astuti, omnia ad suam utilitatem referre: quid mihi tandem erat utilius, quid commodis meis aptius, quam hominis nobilissimi, atque honoratissimi conjunctio, cujus opes, ingenium, liberi, affines, propinqui mihi magno vel ornamento, vel præsidio esse possent? Quæ tamen ego omnia, in expetenda amicitia tua, non astutia quadam, sed aliqua potius sapientia secutus sum. Quid illa vincula, quibus quidem libentissime adstringor, quanta sunt? studiorum similitudo, suavitas consuetudinis, delectatio vitæ, atque victus, sermonis societas, litteræ interiores. Atque hæc domestica. Quid illa tandem popularia? redditus illustribus in gratiam? in quo ne per imprudentiam quidem errari potest sine suspitione perfidiæ: amplissimi sacerdotii collegium? in quo non modo
ami-

amicitiam violari apud majores nostros fas non erat, sed ne cooptari quidem sacerdotem licebat, qui cuiquam ex collegio esset inimicus. Quæ ut omittam tam multa, atque tanta: quis umquam tanti quemquam fecit, aut facere potuit, aut debuit, quanti ego Cn. Pompejum, focerum filiæ tuæ? Etenim, si merita valent, patriam, liberos, salutem, dignitatem, memetipsum mihi per illum restitutum puto: si consuetudinis jucunditas: quæ fuit umquam amicitia consularium in nostra civitate conjunctior? si ulla amoris, atque officii signa: quid mihi ille non commisit? quid non mecum communicavit? quid de se in senatu, cum ipse abesset, per quemquam agi maluit? quibus ille me rebus non ornatissimum voluit amplissime? qua denique ille facilitate, qua humanitate tulit contentionem meam pro Milone adversante interdum actionibus suis? quo studio providit, ne qua me illius temporis invidia attingeret, cum me consilio, cum auctoritate, cum armis denique texit suis? quibus quidem temporibus hæc in eo gravitas, hæc animi altitudo fuit, non modo ut Phrygi alicui, aut Lycaoni, quod tu in legatis fecisti; sed ne summorum quidem hominum malevolis de me sermonibus crederet. Hujus igitur filius cum sit gener tuus, cumque, præter hanc conjunctionem affinitatis, quam sis Cn. Pompejo charus, quamque jucundus, intelligam: quo tandem animo in te esse debeo? cum præsertim eas ad me is litteras miserit, quibus etiam si tibi, cui sum amicissimus, hostis essem, placarer tamen, totumque me ad ejus viri ita de me meriti, voluntatem, nutumque converterem. Sed hæc hætenus: pluribus enim etiam fortasse verbis, quam necesse fuit, scripta sunt. Nunc ea, quæ a me perfecta, quæque instituta sunt, cognosce.

** Non pauca hic desiderantur **

Atque hæc agimus, & agemus magis pro digni-

tate, quam pro periculo tuo. Te enim, ut spero, propediem censorem audiemus: cujus magistratus officia, quæ sunt maximi animi, summique consilii, tibi diligentius, & accuratius quam hæc, quæ nos de te agimus, cogitanda esse censeo. Vale.

A R G U M E N T U M.

Acceptis ab Appio litteris de absolutione Majestatis gratulatur majorem in modum, & de Ambitus judicio bene illi sperandum significat.

M. T. C. IMP. APPIO PULCHRO,
UT SPERO, CENSORI S. D.

II

Cum essem in castris ad fluvium Pyramum, redditæ mihi sunt uno tempore a te epistolæ duæ, quas ad me Q. Servilius Tarso miserat. Earum in altera dies erat adscripta nonarum Aprilium; in altera, quæ mihi recentior videbatur, dies non erat. Respondebo igitur superiori prius, in qua scribis ad me de absolutione majestatis: de qua etsi per multo ante certior factus eram litteris, nuntiis, fama denique ipsa (nihil enim fuit clarius: non quo quisquam aliter putasset, sed nihil de insignibus ad laudem viris obscure nuntiari solet) tamen eadem illa lætiora fecerunt mihi tuæ litteræ: non solum quia planius loquebantur, & uberius, quam vulgi sermo; sed etiam quia magis tibi videbar gratulari, cum de te ex te ipso audiebam. Complexus igitur sum cogitatione te absentem: epistolam vero osculatus, etiam ipse mihi gratulatus sum. Quæ enim a cuncto populo, a senatu, a iudicibus, ingenio, industriæ, virtuti tribuuntur: quia mihi ipse assentor fortasse, cum ea esse in me fingo: mihi quoque ipsi tribui puto: nec tam gloriosum exitum tui iudicii extitisse, sed tam pravam inimicorum tuorum mentem fuisse mirabar. De ambitu vero quid interest, inquires, an de majestate? Ad rem nihil: alterum enim non
atti-

attigisti, alteram auxisti. Verumtamen est majestas (ut Sylla voluit) ne in quemvis impune declamare liceret. Ambitus vero ita apertam vim habet, ut aut accusetur improbe, aut defendatur: cui enim facta, aut non facta largitio ignorari potest? Tuorum autem honorum cursus, cui suspectus umquam fuit? Me miserum, qui non affuerim! quos ego risus excitassem! Sed de majestatis judicio duo mihi illa ex tuis litteris jucundissima fuerunt: unum, quod te ab ipsa republica defensum scribis: quæ quidem, etiam in summa bonorum, & fortium civium copia, tueri tales viros deberet: nunc vero eo magis, quod tanta penuria est in omni, vel honoris, vel ætatis gradu, ut tam orba civitas tales tutores complecti debeat: alterum, quod Pompeji, & Bruti fidem, benevolentiamque mirifice laudes. Lætor virtute & officio, cum tuorum necessariorum, meorum amicissimorum, tum maxime alterius, omnium sæculorum, & gentium principis, alterius, jampridem juventutis, celeriter (ut spero) civitatis. De mercenariis testibus a suis civitatibus notandis, nisi jam factum aliquid est per Flaccum, fiet a me, cum per Asiam decedam. Nunc ad alteram epistolam venio. Quod ad me quasi formam communium temporum, & totius reipublicæ misisti expressam, prudentia litterarum tuarum valde est mihi grata. Video enim & pericula leviora, quam timebam, & majora præsidia, siquidem, ut scribis, omnes vires civitatis se ad Pompeji ductum applicaverunt: tuumque simul promptum animum, & alacrem perspexi ad defendendam remp. mirificamque cepi voluptatem ex hac tua diligentia, quod in summis tuis occupationibus mihi tamen reipublicæ statum per te notum esse voluisti. Nam augurales libros ad commune utriusque nostrum otium serva. Ego enim, a te cum tua promissa per litteras flagitabam, ad urbem te otiosissimum esse arbitrabar: nunc ta-

men, ut ipse polliceris, pro auguralibus libris, orationes tuas confectas omnes expectabo. Tullius, cui mandata ad me dederas, non convenerat me; nec erat jam quisquam mecum tuorum, præter omnes meos, qui sunt omnes tui. Stomachosiores meas litteras quas dicas esse, non intelligo. Bis ad te scripsi me purgans diligenter, te leviter accusans in eo, quod de me cito credidisses: quod genus querelæ mihi quidem videbatur esse amici: si tibi displicet, non utar eo posthac. Sed si, ut scribis, eæ litteræ non fuerunt disertæ, scito meas non fuisse. Ut enim Aristarchus Homeri versum negat, quem non probat: sic tu, (libet enim mihi jocari) quod disertum non erit, ne putaris meum. Vale, & in censura si jam es censor (ut spero) de proavo multum cogitato tuo.

A R G U M E N T U M.

Gratulatur de absolutione Ambitus: & querente Appio, quod accusatori suo Dolabella filiam collocavit, ostendit, id, se insciente, per suos factum.

M. T. C. IMP. APPIO PULCHRO S. D. 12

GRatulabor tibi prius: (ita enim rerum ordo postulat) deinde ad me convertar. Ego vero vehementer gratulor de iudicio ambitus: neque id, quod nemini dubium fuit, absolutum te esse; sed illud, quod, quo melior civis, quo vir clarior, quo fortior amicus es, quoque plura virtutis & industriæ ornamenta in te sunt, eo mirandum est magis, nullam ne in tabellæ quidem latebra fuisse absconditam malevolentiam, quæ te impugnare auderet. Non horum temporum, non horum hominum, atque morum negotium! nihil jam sum pridem admiratus magis. De me autem suscipe paulisper meas partes, & eum te esse finge, qui ego sum: si facile inveneris quod dicas, noli ignoscere hæsitati meæ. Ego vero

ve-

velim mihi, Tulliaque meæ (sicut tu amicissime, & suavissime optas) prospere evenire ea, quæ, me insciente, facta sunt a meis: sed ita cecidisse, ut ageretur eo tempore, spero omnino cum aliqua felicitate, & opto. Veruntamen plus me in hac spe, tua sapientia, & humanitas consolatur, quam opportunitas temporis. Itaque, quemadmodum expediam exitum hujus institutæ orationis, non reperio: neque enim tristius dicere quidquam debeo ea de re, quam tu ipse omnibus optimis prosequeris: neque non me tamen mordet aliquid: in quo unum vereor, ne tu parum perspicias ea, quæ gesta sunt, ab aliis esse gesta, quibus ego ita mandaram, ut, cum tam longe abfuturus essem, ad me ne refefrent: agerent, quod probassent. In hoc autem mihi illud occurrit. Quid tu igitur, si affuisses? Rem probassem: de tempore, nihil te invito, nihil sine consilio egissem tuo. Vides sudare me, jamdudum laborantem, quomodo ea tuear, quæ mihi tuenda sunt, & te non offendam. Leva me igitur hoc onere: numquam enim mihi videor tractasse causam difficiliorem. Sed tamen sic habeto: nisi jam tunc omnia negotia cum summa tua dignitate diligentissime confecissem, tamen si nihil videbatur ad meum erga te pristinum studium addi posse: tamen, hac mihi affinitate renunciata, non majore equidem studio, sed acrius, apertius, significantius dignitatem tuam defendissem. Decedenti mihi, & jam imperio annuo terminato, ante diem III. non. Sext. cum ad Sidam navi accederem, & mecum Q. Servilius esset, litteræ a meis sunt redditæ. Dixi statim Servilio (etenim videbatur esse commotus) ut omnia a me majora expectaret. Quid multa? benevolentior tibi, quam fui, nihilo sum factus, diligentior ad declarandam benevolentiam multo. Nam, ut vetus nostra simultas antea stimulabat me, ut caverem, ne cui suspicionem fictæ reconciliatæ gratiæ darem: sic affinitas novam cu-

ram mihi affert cavendi, ne quid de summo meo erga te amore detractum esse videatur. Vale.

ARGUMENTUM.

Agit gratias Appio, quod amicos suos in supplicationibus sibi decernendis studiose juvisset, pariaque illi officia pollicetur: quamquam socer Dolabella sit qui de majestate, & ambitu illum accusaverat.

M. T. C. IMP. APPIO PULCHRO S. D. 13

QUasi divinarem, tali in officio fore mihi aliquando expetendum studium tuum, sic cum de tuis rebus gestis agebatur, inserviebam honori tuo. Dicam tamen vere: plus quam acceperas reddidisti. Quis enim ad me non perscripsit, te non solum auctoritate orationis, sententia tua, quibus ego a tali viro contentus eram; sed etiam opera, consilio, domum veniendo, conveniendis meis, nullum onus officii cuiquam reliquum fecisse? Hæc mihi ampliora multo sunt, quam illa ipsa, propter quæ hæc laborantur. Insignia enim virtutis multi etiam sine virtute affecuti sunt: talium virorum tanta studia assequi sola virtus potest. Itaque mihi propono fructum amicitiae nostræ, ipsam amicitiam, qua nihil est uberius, præsertim in iis studiis, quibus uterque nostrum devinctus est. Nam tibi me profiteor, & in rep. socium, de qua idem sentimus; & in quotidiana vita conjunctum, cum iis artibus, studiisque, quæ colimus. Velim ita fortuna tulisset, ut quanti ego omnes tuos facio, tanti tu meos facere posses: quod tamen ipsum, nescio qua permotus animi divinatione, non despero. Sed hoc nihil ad te: nostrum est onus. Illud velim sic habeas, quod intelliges, hac re novata, additum potius aliquid ad meum erga te studium; cui nihil videbatur addi posse, quam quidquam esse detractum. Cum hæc scribebam, censorem jam te esse sperabam: eo brevior est hæc epistola, &, ut adversus magistrum morum, modestior. Vale.

LIBER IV.

89

ARGUMENTUM.

Satis patebit hujus Epistolæ argumentum, si lector sciat, scriptam esse, cum Cæsar, pulso ex Italia Pompejo, bellum contra Pompeji Legatos in Hispaniam pararet. Respondet Sulpicio congressum petenti.

M T. C. SER. SULPICIO S. D. I

CAjus Trebatius familiaris meus ad me scripsit, te ex se quæsisse, quibus in locis essem, molesteque ferre, quod me propter valetudinem tuam, cum ad urbem accessissem, non vidisses, & hoc tempore velle te mecum, si propius accessissem, de officio utriusque nostrum communicare. Utinam, Servi, salvis rebus (sic enim est dicendum) colloqui potuissemus inter nos; profecto aliquid opis occidenti Reipublicæ tulissemus. Cognoram enim jam absens, te hæc mala multo ante providentem defensorem pacis, & in consulatu tuo, & post consulatum fuisse: ego autem cum consilium tuum probarem, & idem ipse sentirem, nihil proficiebam: fero enim veneram: solus eram: rudis esse videbar in causa: incideram in hominum pugnandi cupidorum insanias. Nunc quoniam nihil jam videmur posse opitulari reipub., si quid est, in quo nobismetipsis consulere possimus, non ut aliquid ex pristino statu nostro retineamus, sed ut quam honestissime lugeamus; nemo est omnium, qui cum potius mihi, quam tecum, communicandum putem. Nec enim clarissimorum virorum, quorum similes esse debemus, exempla, neque doctissimorum, quos semper coluisti, præcepta te fugiunt. Atque ipse antea ad te scripsissem, te frustra in Senatum, sive potius in conventum senatorum, esse venturum, ni veritus essem, ne ejus
ani-

animum offenderem, qui a me, ut te imitarer, petebat; cui quidem ego, cum me rogasset, ut adessem in senatu, eadem omnia, quæ a te de pace, & de Hispanis dicta sunt, ostendi me esse dicturum. Rem vides quo modo se habeat: orbem terrarum, imperiis distributis, ardere bello: urbem sine legibus, sine judiciis, sine jure, sine fide relictam direptioni, & incendiis. Itaque mihi venire in mentem nihil potest, non modo quod sperem, sed vix jam quod audeam optare, si autem tibi homini prudentissimo videtur, utile esse nos colloqui, quamquam longius etiam cogitabam ab urbe discedere, (cujus jam etiam nomen invitus audio) tamen propius accedam. Trebatio mandavi, ut, siquid tu eum velles ad me mittere, ne recusaret; idque ut facias, velim, aut, si quem tuorum fidelium voles, ad me mittas: ne aut tibi exire ex urbe necesse sit, aut mihi accedere. Ego tibi tantum tribuo, quantum mihi fortasse arrogo: ut exploratum habeam, quidquid nos communi sententia statuerimus, id omnes homines probaturos. Vale.

A R G U M E N T U M.

Disputat, utrum manendum sit in Italia, an ad Pompejum in Græciam navigandum, quorum alterum utilius, alterum honestius ait esse. Concludit, difficilem esse deliberationem: sed tamen discessionem magis probare.

M. T. C. S U L P I C I O S. D.

2

AD III. Kal. Majas, cum essem in Cumano, accepi tuas litteras: quibus lectis, cognovi non satis prudenter fecisse Philotimum: qui, cum abs te mandata haberet (ut scribis) de omnibus rebus, ipse ad me non venisset, litteras tuas misisset, quas intellexi breviores fuisse, quod eum perlaturum putasses. Sed tamen, postquam litteras
tuas

tuas legi, Postumia tua me convenit, & Servius noster. His placuit, ut tu in Cumanum venires: quod etiam mecum, ut ad te scriberem, egerunt. Quod meum consilium exquiris, id est tale, ut capere facilius ipse possim, quam alteri dare: quid enim est, quod audeam suadere tibi, homini summa auctoritate, summaque prudentia? Si quid rectissimum sit, quærimus, perspicuum est: si, quid maxime expediat, obscurum: sin ii sumus, qui profecto esse debemus, ut nihil arbitremur expedire, nisi quod rectum, honestumque sit; non potest esse dubium, quid faciendum nobis sit. Quod existimas meam causam conjunctam esse cum tua, certe similis in utroque nostrum, cum optime sentiremus, error fuit; nam omnia utriusque consilia ad concordiam spectaverunt: qua cum ipsi Cæsari nihil esset utilius, gratiam quoque nos inire ab eo in defendenda pace arbitrabamur. Quantum nos fefellerit, & quem in locum res deducta sit, vides: neque solum ea perspicis, quæ geruntur, quæque jam gesta sunt, sed etiam qui cursus rerum, qui exitus futurus sit. Ergo aut probare oportet ea, quæ fiunt; aut interesse, etiam si non probes: quorum altera mihi turpis, altera etiam periculosa ratio videtur. Restat, ut discedendum putem; in quo reliqua videtur esse deliberatio, quod consilium in discessu, quæ loca sequamur. Omnino cum inferior res numquam accidit, tum ne deliberatio quidem difficilior: nihil enim constitui potest, quod non incurrat in magnam aliquam difficultatem. Tu, si videbitur, ita censeo, facias: ut, si habes jam statutum, quid tibi agendum putes, in quo non sit conjunctum consilium tuum cum meo, supersedeas hoc labore itinētis: sin autem est, quod mecum communicare velis, ego te exspectabo. Tu, quod tuo commodo fiat, quamprimum velim venias, sicut intellexi & Servio, & Postumiæ placere. Vale.

Sulpicium Achajæ a Cesare præfectum consolatur in dolore, quem ex Reipub. calamitate capiebat. Scripta est epistola post victum Pompejum.

M. T. C. S U L P I C I O S. D.

3

Vehementer te esse sollicitum, & in communibus miseriis præcipuo quodam dolore angere, multi ad nos quotidie deferunt, quod quamquam minime miror, & meum quodammodo agnosco, doleo tamen, te, sapientia præditum prope singulari, non tuis bonis delectari potius, quam alienis malis laborare. Me quidem, etsi nemini concedo, qui maiorem ex perniciæ, & peste reipubl. molestiam traxerit; tamen multa jam consolantur, maximeque conscientia consiliorum meorum. Multo enim ante tamquam ex aliqua specula prospexi tempestatem futuram; neque id solum mea sponte, sed multo etiam magis monente, & denuntiante te. Etsi enim absui magnam partem consulatus tui, tamen & absens cognoscebam, quæ esset tua in hoc pestifero bello cavendo, & prædicendo sententia; & ipse affui primis temporibus tui consulatus, cum accuratissime monuisti senatum collectis omnibus bellis civilibus, ut & illa timerent, quæ meminissent; & scirent, cum superiores, nullo tali exemplo antea in republ. cognito, tam crudeles fuissent, quicumque postea rempub. oppressisset armis, multo intolerabiliorem futurum. Nam quod exemplo fit, id etiam jure fieri putant, & aliquid atque adeo multa addunt, & auferunt de suo. Quare meminisse debes, eos, qui auctoritatem, & consilium tuum non sunt secuti, sua stultitia occidisse, cum tua prudentia salvi esse potuissent. Dices: Quid me ista res consolatur in tantis tenebris, & quasi parietinis reipublicæ? Est omnino vix consolabilis dolor: tanta est omnium
nium

nium rerum amissio, & desperatio recuperandi; sed tamen & Cæsar ipse ita de te iudicat, & omnes cives sic existimant, quasi lumen aliquod, extinctis ceteris, elucere sanctitatem, & prudentiam, & dignitatem tuam. Hæc tibi ad levandas molestias magna esse debent. Quod autem a tuis abes, ideo levius ferendum est, quod eodem tempore a multis, ac magnis molestiis abes: quas ad te omnes perscriberem, nisi vererem, ne ea cognosceres absens, quæ quia non vides, mihi videris meliore esse conditione, quam nos, qui videmus. Hactenus existimo nostram consolationem recte adhibitam esse, quoad certior ab homine amicissimo fieres iis de rebus, quibus levari possent molestiæ tuæ. Reliqua sunt in te ipso neque mihi ignota, nec minima solatia, &, ut quidem ego sentio, multo maxima, quæ ego ipse experiens quotidie sic probo, ut ea mihi salutem afferre videantur. Te autem ab initio ætatis, memoria teneo, summe omnium doctrinarum studiosum fuisse, omniaque, quæ a sapientissimis ad bene vivendum tradita essent, summo studio, curaque didicisse: quæ quidem vel optimis rebus, & usui, & delectationi esse possent: his vero temporibus habemus aliud nihil, in quo acquiescamus. Nihil faciam insolenter; nec te tali vel scientia, vel natura præditum hortabor, ut ad eas te referas artes, quibus a primis temporibus ætatis studium tuum dedisti. Tantum dicam (quod te spero approbaturum) me, posteaquam illi arti, cui studueram, nihil esse loci neque in curia, neque in foro viderim, omnem meam curam, atque operam ad Philosophiam contulisse. Tuæ scientiæ excellenti, ac singulari non multo plusquam nostræ relictum est loci. Quare non equidem te moneo; sed mihi ita persuasi, te quoque in iisdem versari rebus, quæ etiamsi minus prodescent, animum tamen a sollicitudine abducerent. Ser-

vius quidem tuus in omnibus ingenuis artibus, in primisque in hac, in qua ego me scripsi acquiescere, ita versatur, ut excellat: a me vero sic diligitur, ut tibi uni concedam, præterea nemini: mihiq; ab eo gratia refertur, in quo ille existimat, quod facile appareat, cum me colat, & observet, tibi quoque in eo se facere gratissimum. Vale.

A R G U M E N T U M.

Laudat Sulpicii scripta. Probat, quod Achajæ administrandæ curam non recusarit: scribit de Marcelli restitutione, de suis studiis, de Sulpicio filio, de rebus urbanis, de Cesare.

M. T. C. S U L P I C I O S. D.

4

Accipio excusationem tuam, qua usus es, cur sæpius ad me litteras uno exemplo dedisses; sed accipio ex ea parte, quatenus aut negligentia, aut improbitate eorum, qui epistolas accipiant, fieri scribis, ne ad nos perferantur. Illam partem excusationis, qua te scribis orationis paupertate (sic enim appellas) iisdem verbis epistolas sæpius mittere, nec agnosco, nec probō: & ego ipse, quem tu per jocum (sic enim accipio) divitias orationis habere dicis, me non esse verborum admodum inopem agnosco (*εἰρῶνευσθαι* enim non necesse est) sed tamen idem (nec hoc *εἰρῶνευόμενος*) facile cedo tuorum scriptorum subtilitati, & elegantia. Consilium tuum, quo te usum scribis, hoc Achæicum negotium non recusavisse, cum semper probavissem, tum multo magis probavi, lectis tuis proximis litteris. Omnes enim causæ, quas commemoras, justissimæ sunt, tuaque & auctoritate, & prudentia dignissimæ. Quod aliter cecidisse rem existimas atque opinatus sis, id tibi nullo modo assentior. Sed quia tanta perturbatio, & confusio est rerum, ita perculsa, & prostrata fœdissimo bel-

lo jacent omnia, ut is cuique locus, ut ipse sit, miserrimus esse videatur: propterea & tui te consilii pœnitet, & nos, qui domi sumus, tibi beati videmur. At contra nobis non tu quidem vacuus molestiis, sed præ nobis beatus; atque hoc ipso melior est tua quam nostra conditio, quod tu, quid doleas, scribere audes, nos ne id quidem tuto possumus: nec id victoris vitio, quo nihil moderatius; sed ipsius victoriæ, quæ civilibus bellis semper est insolens. Uno te vicimus, quod de Marcelli, collegæ tui, salute paullo ante, quam tu, cognovimus, etiam mehercule, quod quemadmodum ea res ageretur, vidimus. Nam sic fas existimes, post has misérias id est, postquam armis disceptari cœptum est de jure publico, nihil esse actum aliud cum dignitate. Nam & ipse Cæsar, accusata acerbitate Marcelli (sic enim appellabat) laudatæque honorificentissime & æquitate tua, & prudentia, repente præter spem dixit, se senatui roganti de Marcello, ne hominis quidem caussa, negaturum. Fecerat autem hoc senatus, ut cum a L. Pisone mentio esset facta de Marcello, & cum C. Marcellus se ad Cæsaris pedes abjecisset, cunctus confurgeret, & ad Cæsarem supplex accederet. Noli quærere: ita mihi pulcher hic dies visus est, ut speciem aliquam viderer videre quasi reviviscentis reipublicæ. Itaque, cum omnes ante me rogati gratias Cæsari egissent, præter Volcatium (is enim si eo loco esset, negavit se facturum fuisse) ego rogatus, mutavi meum consilium; nam statueram (non mehercule inertia, sed desiderio pristinæ dignitatis) in perpetuum tacere. Fregit hoc meum consilium & Cæsaris magnitudo animi, & senatus officium. Itaque pluribus verbis egi Cæsari gratias, neque metuo, ne etiam in ceteris rebus honesto otio privarim: quod erat unicum solatium in malis. Sed tamen, quando effugij eius offensionem, qui fortasse arbitraretur, me hanc

hanc republ. non putare, si perpetuo tacerem, modice hoc faciam, aut etiam intra modum, ut & illius voluntati, & meis studiis serviam. Nam etsi a primâ ætate me omnis ars, & doctrina liberalis, & maxime philosophia delectavit, tamen hoc studium quotidie ingravescit, credo & ætatis maturitate ad prudentiam, & his temporum vitiis, ut nulla res alia levare animum molestiis possit. A quo studio te abduci negotiis, intelligo ex tuis literis; sed tamen aliquid jam noctes te adjuvabunt. Servius tuus, vel potius noster, summa te observantia colit, cujus ego cum omni probitate, summaque virtute, tum studiis, doctrinaque delector. Is mecum sæpe de tua mansione, aut decessione communicat. Adhuc in hac sum sententia, nihil ut faciamus, nisi quod maxime Cæsar velle videatur. Res sunt ejusmodi, ut, si Romæ sis, nihil te præter tuos delectare possit; de reliquis, nihil melius ipso est: ceteri, & cetera ejusmodi, ut, si alterutrum necesse sit, audire ea malis, quam videre. Hoc nostrum consilium nobis minime jucundum est, qui te videre cupimus, sed consulimus tibi. Vale.

A R G U M E N T U M.

Cum Cæsar bellum gereret in Hispania contra Pompeji liberos, periit Tullia ex partu, Ciceronis filia, jam a Dolabella dimissa. Consolatur Ciceronem Sulpicius, argumentis ad tollendum dolorem undecumque collectis. De Sulpicio sic Quintil. lib. II. Ser. Sulpicius insignem non immerito famam tribus orationibus meruit.

SULPICIUS CICERONI S. D.

5

POsteaquam mihi renuntiatum est de obitu Tullia filia tuæ, sane quam, pro eo ac debui, graviter, molesteque tuli, communemque eam calamitatem existimavi: qui si istic affuissem, neque
tibi

tibi defuisset, coramque meum dolorem tibi declarassem. Etsi genus hoc consolationis miserum, atque acerbum est, propterea quia, per quos id fieri debet propinquos, ac familiares, ipsi pari molestia afficiuntur, neque sine lacrimis multis id conari queunt; ut magis ipsi videantur aliorum consolatione indigere, quam aliis posse suum officium præstare: tamen quæ in præsentia mihi in mentem venerunt, decrevi brevi ad te perscribere; non quod ea te fugere existimem, sed quod forsitan dolore impeditus, minus ea perspicias. Quid est, quod tantopere te commoveat tuus dolor intestinus? Cogita, quemadmodum adhuc fortuna nobiscum egerit: ea nobis erepta esse, quæ hominibus non minus quam liberi cara esse debent, patriam, honestatem, dignitatem, honores omnes. Hoc uno incommodo addito, quid ad dolorem adungi potuit? aut qui non in illis rebus exercitatus animus callere jam debet, atque omnia minoris aestimare? An illius vicem (credo) doles? Quoties in eam cogitationem necesse est, ut tu veneris, ut & nos sæpe incidimus, hisce temporibus non pessime cum iis esse actum, quibus sine dolore licitum est mortem cum vita commutare? Quid autem fuit quod illam hoc tempore ad vivendum magnopere invitare posset? quæ res? quæ spes? quod animi solatium? ut cum aliquo adolescente primario conjuncta ætatem ageret? Licitum est tibi (credo) pro tua dignitate ex hac juventute generum deligere, cujus fidei liberos tuos te tuto committere putares. An ut ea liberos ex sese paret, quos cum florentes videret, lætaretur? qui rem a parente traditam per se tenere possent, honores ordinatim petaturi essent in republ., in amicorum negotiis liberalitate sua uterentur? Quid horum fuit, quod non prius, quam datum, ademptum sit? At vero malum est liberos amittere. Malum, nisi hoc pejus sit, hæc sufferre, & per-

pe-

peti. Quæ res mihi non mediocrem consolationem attulit, volo tibi commemorare, si forte eadem res tibi minuere dolorem possit. Ex Asia rediens, cum ab Ægina Megaram versus navigarem, cœpi regiones circumcirca prospicere: post me erat Ægina, ante Megara, dextra Piræus, sinistra Corinthus: quæ oppida quodam tempore florentissima fuerunt, nunc prostrata, & diruta ante oculos jacent. Cœpi egomet mecum sic cogitare: Hem nos homunculi indignamur, si quis nostrum interiit, aut occisus est, quorum vita brevior esse debet; cum uno loco tot oppidorum cadavera projecta jaceant! visne tu te Servi cohibere, & meminisse hominem te esse natum? Crede mihi; cogitatione ea non mediocriter sum confirmatus. Hoc idem, si tibi videtur, fac ante oculos tibi proponas; modo uno tempore tot viri clarissimi interierunt: de imperio præterea tanta diminutio facta est: omnes provinciæ conquassatæ sunt: in unius mulierculæ animula si jactura facta sit, tantopere commoveris? quæ si hoc tempore non suum diem obiisset, paucis post annis tamen ei moriendum fuit, quoniam homo nata fuerat. Etiam tu ab hisce rebus animum, ac cogitationem tuam avoca, atque ea potius reminiscere, quæ digna tua persona sunt; illam, quamdiu ei opus fuerit, vixisse; una cum republica fuisse: te patrem suum, prætorem, consulem, augurem vidisse: adolescentibus primariis nuptam fuisse: omnibus bonis prope perfunctam esse: cum respub. occideret, vita excessisse. Quid est quod tu, aut illa, cum fortuna hoc nomine queri possitis? Denique noli te oblivisci Ciceronem esse, & eum, qui aliis consueveris præcipere, & dare consilium, neque imitari malos medicos, qui in alienis morbis profitentur, se tenere medicinæ scientiam, ipsi se curare non possunt: sed potius, quæ aliis præcipere soles, ea tute tibi subjice, atque apud animum propone.

Nul-

Nullus dolor est, quem non longinquitas temporis minuat, atque molliat: hoc te exspectare tempus, tibi turpe est, ac non ei rei sapientia tua te occurrere. Quod si quis etiam inferis sensus est, qui illius amor in te fuit, pietasque in omnes suos, hoc certe illa te facere non vult. Da hoc illi mortuæ: da ceteris amicis, & familiaribus, qui tuo dolore mærent: da patriæ, ut, si qua in re opus sit, opera, & consilio tuo uti possit. Denique quoniam in eam fortunam devenimus, ut etiam huic rei nobis serviendum sit, noli committere, ut quisquam te putet non tam filiam, quam reipub. tempora, & aliorum victoriam lugere. Plura me ad te de hac re scribere pudet, ne videar prudentiæ tuæ diffidere. Quare, si hoc unum proposuero, finem faciam scribendi. Vidimus aliquoties secundam pulcherrime te ferre fortunam, magnamque ex ea re laudem adipisci: fac aliquando intelligamus, adversam quoque te æque ferre posse, neque id majus quam debeat tibi onus videri, ne ex omnibus virtutibus hæc una tibi videatur deesse. Quod ad me attinet, cum te tranquillo esse animo cognovero, de his rebus, quæ hic geruntur, quemadmodum se provincia habeat, certiolem faciam. Vale.

ARGUMENTUM.

Ad Servii consolationem respondet, suum dolorem, lectis illius litteris, aliqua ex parte lenitum: sed dolendi causas apud se & plures, & graviores esse, quam apud quamvis alium in simili calamitate.

M. T. C. S U L P I C I O S. D.

6

EGo vero, Servi, vellem, ut scribis, in meo gravissimo casu affuisses: quantum enim præsens me adjuvare potueris & consolando, & prope æque dolendo, facile ex eo intelligo, quod literis

teris tuis lectis, aliquantulum acquievi. Nam & ea scripsisti, quæ levare luctum possent, & in me consolando, non mediocrem ipse animi dolorem adhibuisti. Servius tamen tuus omnibus officiis, quæ illi tempori tribui potuerunt, declaravit, & quanti ipse me faceret, & quam suum talem erga me animum tibi gratum putaret fore, cujus officia jucundiora scilicet sæpe mihi fuerunt, numquam tamen gratiora. Me autem non ratio tua solum, & societas penæ ægritudinis, sed etiam auctoritas consolatur. Turpe enim esse existimo, me non ita ferre casum meum, ut tu tali sapientia præditus ferendum putas; sed opprimor interdum, & vix resisto dolori, quod ea me solatia deficiunt, quæ ceteris, quorum mihi exempla propono, simili in fortuna non defuerunt. Nam & Q. Maximus, qui filium consularem, clarum virum, & magnis rebus gestis, amisit, & L. Paullus, qui duos septem diebus, & vester Gallus, & M. Cato, qui summo ingenio, summa virtute filium perdidit, iis temporibus fuerunt, ut eorum luctum ipsorum dignitas consolaretur ea, quam ex repub. consequiebantur. Mihi autem, amissis ornamentis iis, quæ ipse commemoras, quæque eram maximis laboribus adeptus, unum manebat illud solatium, quod ereptum est. Non amicorum negotiis, non reipub. procuracione impediabantur cogitationes meæ: nihil in foro agere libebat, aspicere curiam non poteram: existimabam, id quod erat, omnes me & industriæ meæ fructus, & fortunæ perdidisse. Sed cum cogitarem hæc mihi tecum, & cum quibusdam aliis esse communia, & cum frangerem jam ipse me, cogeremque illa ferre toleranter, habebam, quo confugerem, ubi conquiescerem, cujus in sermone, & suavitate omnes curas, doloresque deponerem. Nunc autem hoc tam gravi vulnere etiam illa, quæ consenuisse videbantur, recrudescunt. Non enim, ut tum me a re-

repub. mæstum domus excipiebat, quæ levaret : sic nunc domo mærens, ad rempub. confugere possum, ut in ejus bonis acquiescam. Itaque & domo absum, & foro, quod nec eum dolorem, quem e republ. capio, domus jam consolari potest, nec domesticum respub. Quo magis te exspecto, teque videre quam primum cupio. Major mihi levatio afferri nulla potest, quam conjunctio consuetudinis, sermonumque nostrorum : quamquam sperabam, tuum adventum (sic enim audiebam) appropinquare. Ego autem cum multis de causis te exopto quamprimum videre, tum etiam, ut ante commitemur inter nos, qua ratione nobis traducendum sit hoc tempus, quod est totum ad unius voluntatem accommodandum, & prudentis, & liberalis, & (ut perspexisse mihi videor) nec a me alieni, & tibi amicissimi. Quod cum ita sit, magnæ tamen est deliberationis, quæ ratio sit ineunda nobis, non agendi aliquid, sed illius concessu, & beneficio quiescendi. Vale.

ARGUMENTUM.

Suadet, ut exulandi consilium abjiciat, & in patriam suam redeat, id Cæsarem facile concessurum : id optare ipsius fratrem, id ipsam Rempub. : id ad rationem etiam rei familiaris pertinere.

M. T. C. M. MARCELLO S. D.

7

ET si eo te adhuc consilio usum intelligo, ut id reprehendere non audeam; non quia ab eo ipse dissentiam, sed quod ea te sapientia esse judicem, ut meum consilium non anteponam tuo: tamen & amicitiae nostræ vetustas, & tua summa erga me benevolentia, quæ mihi jam a pueritia tua cognita est, me hortata est, ut ea scriberem ad te, quæ & saluti tuæ conducere arbitrarer, & non aliena esse ducerem a dignitate. Ego eum te esse, qui horum malorum initia multo ante videris, consu-

E

latum

latum magnificentissime, atque optime gesseris, præclare memini: sed idem etiam illa vidi, neque te consilium civilis belli ita gerendi, neque copias Cn. Pompeji, nec genus exercitus probare, semperque summe diffidere: qua in sententia me quoque fuisse, memoria tenere te arbitror. Itaque neque tu multum interfuisti rebus gerendis, & ego id semper egi, ne interesssem. Non enim iis rebus pugnabamus, quibus valere poteramus, consilio, auctoritate, causa; quæ erant in nobis superiora; sed lacertis, & viribus, quibus pares non eramus. Victi sumus igitur: aut, si vinci dignitas non potest, fracti certe, & abjecti. In quo tuum consilium nemo potest non maxime laudare, quod cum spe vincendi simul abjecisti certandi etiam cupiditatem, ostendistique, sapientem, & bonum civem initia belli civilis invitum fuscipere, extrema non libenter persequi. Qui non idem consilium, quod tu, secuti sunt, eos video in duo genera esse distractos. Aut enim renovare bellum conati sunt, hique se in Africam contulerunt: aut, quemadmodum nos, victori sese crediderunt. Medium quoddam tuum consilium fuit, qui hoc fortasse humilis animi duceres; illud pertinacis. Fateor, a plerisque, vel dicam ab omnibus, sapiens tuum consilium; a multis etiam magni, ac fortis animi iudicatum. Sed habet ista ratio, ut mihi quidem videtur, quemdam modum: præsertim cum tibi nihil deesse arbitrer ad tuas fortunas omnes obtinendas, præter voluntatem. Sic enim intellexi, nihil aliud esse, quod dubitationem afferret ei, penes quem est potestas, nisi quod vereretur, ne tu illud beneficium omnino non putares. De quo, quid sentiam, nihil attinet dicere; cum appareat, ipse quid fecerim. Sed tamen, si jam ita constituisses, ut abesse perpetuo mallet, quam ea, quæ nolles, videre: tamen id cogitare deberes, ubicumque esses, te fore in ejus ipsius, quem fugeres, pote-

potestate: qui si facile passurus esset, te carentem patria, & fortunis tuis, quiete & libere vivere, cogitandum tibi tamen esset, Romæ ne, & domi tuæ, cuiusmodi res esset, an Mytilenis, aut Rhodi malles vivere. Sed cum ita late pateat ejus potestas, quem veremur, ut terrarum orbem complexa sit: nonne mavis sine periculo domi tuæ esse, quam cum periculo alienæ? Equidem etiamsi oppetenda mors esset domi, atque in patria mallet, quam in externis, atque alienis locis. Hoc idem omnes, qui te diligunt, sentiunt, quorum est magna pro tuis maximis, clarissimisque virtutibus multitudo. Habemus etiam rationem rei familiaris tuæ, quam dissipari nolumus. Nam etsi nullam potest accipere injuriam, quæ futura perpetua sit: propterea quod neque is, qui tenet rempubl. pateretur, neque ipsa respubl.; tamen impetum prædonum in tuas fortunas fieri nolo: si autem qui essent, auderem scribere, nisi te intelligere considerem. Hic te unius sollicitudines, unus etiam multæ, & assiduæ lacrymæ C. Marcelli fratris optimi deprecantur: nos cura, & dolore proximi sumus, precibus tardiores, quod jus adeundi, cum ipsi deprecatore eguerimus, non habemus. Gratia tantum possumus, quantum victi: sed tamen consilio, studio, Marcello non desumus. A tuis reliquis non adhibemur: ad omnia parati sumus. Vale.

ARGUMENTUM.

Et hæc epistola eo spectat, ut Marcello reditus in patriam persuadeatur.

M. T. C. MARCELLO S. D.

8

NEque monere te audeo, præstanti prudentia virum, nec confirmare, maximi animi hominem, virumque fortissimum: consolari vero nullo modo. Nam si ea, quæ acciderunt, ita fers,

ut audio, gratulari magis virtuti debeo, quam consolari dolorem tuum: sin te tanta mala reipublicæ frangunt, non ita abundo ingenio, ut te consoletur, cum ipse me non possim. Reliquum est igitur, ut tibi me in omni re eum præbeam præstemque, ut ad omnia, quæ tui velint, ita adsum præsto, ut me non solum omnia debere tua causa, quæ possum; sed ea quoque, quæ non possum, putent. Illud tamen vel tu me monuisse, vel censuisse puta, vel propter benevolentiam tacere non potuisse, ut, quod ego facio, tu quoque animum inducas: si sit aliqua resp. in ea te esse oportere, iudicio omnium, reque principem, necessitate cedentem tempori: sin autem nulla sit, hunc tamen aptissimum esse etiam ad exsulandum locum. Si enim libertatem sequimur, qui locus hoc dominatu vacat? sin qualemcumque locum, quis est domestica sede iucundior? Sed mihi crede, etiam is, qui omnia tenet, favet ingeniis: nobilitatem vero, & dignitatem hominum quantum ei res, & ipsius causa concedit, amplectitur. Sed plura, quam statueram. Redeo ergo ad unum illud, me tuum fore cum tuis, si modo erunt tui: sin minus, me certe in omnibus rebus satis nostræ conjunctioni amorique facturum. Vale.

A R G U M E N T U M.

Reditum in patriam suadet, ut supra. Argumenta ex intima arte depromit, ad persuadendum firmissima.

M. T. C. MARCELLO S. D.

9

ET si perpaucis ante diebus dederam Q. Mutio litteras ad te pluribus verbis scriptas, quibus declaraveram, quo te animo censerem esse oportere, & quid tibi faciendum arbitrarer: tamen, cum Theophilus libertus tuus proficisceretur, cuius ego fidem erga te benevolentiamque perspexeram,

xeram; sine meis litteris eum ad te venire nolui. Iisdem igitur te de rebus etiam atque etiam horror, quibus superioribus litteris hortatus sum, ut in ea republica, quaecumque est, quamprimum velis esse. Multa videbis fortasse, quæ nolis; non plura tamen, quam audis quotidie. Non est porro tum, uno sensu solum oculorum moveri, cum illud idem auribus percipias, quod etiam majus videri solet, minus laborare. At tibi ipsi dicendum erit aliquid, quod non sentias, aut faciendum, quod non probes. Primum tempori cedere, id est necessitati parere, semper sapientis est habitum: deinde non habet, ut nunc quidem est, id vitii res. Dicere fortasse, quæ sentias, non licet, tacere plane licet. Omnia enim delata ad unum sunt. Is utitur consilio ne suorum quidem, sed suo: quod non multo secus fieret, si is rempublicam teneret, quem secuti sumus. An, qui in bello, cum omnium nostrum conjunctum esse periculum suo cerneret, certorum hominum minime prudentium consilio uteretur, eum magis communem censemus in victoria futurum fuisse, quam incertis rebus fuisset? & qui nec, te consule, tuum sapientissimum consilium secutus esset, nec, fratre tuo consulatum ex auctoritate tua gerente, vobis auctoribus uti voluerit, nunc omnia tenentem nostras sententias desideraturum censes fuisse? Omnia sunt misera in bellis civilibus, quæ majores nostri ne semel quidem, nostra ætas sæpe jam sensit: sed miserius nihil, quam ipsa victoria: quæ etiamsi ad meliores venit; tamen eos ipsos ferociores impotentioresque reddit, ut etiamsi natura tales non sint, necessitate esse cogantur: multa enim victori eorum arbitrio, per quos vicit, etiam invito, facienda sunt. An tu non videbas mecum simul, quam illa crudelis esset futura victoria? Igitur tunc quoque patria careres, ne, quæ nolles, videres? Non, inquires:

ego enim ipse tenerem opes, & dignitatem meam. At erat tuæ virtutis in minimis res tuas ponere, de republica vehementius laborare. Deinde, qui finis istius consilii est? nam adhuc & factum tuum probatur, & ut in tali re, etiam fortuna laudatur: factum, quod & initium belli necessario secutus sis, & extrema sapienter persequi nolueris: fortuna, quod honesto otio tenueris & statum, & famam dignitatis tuæ. Nunc vero nec locus tibi ullus dulcior esse debet patria, nec eam diligere minus debes, quod deformior est, sed misereri potius, nec eam multis claris viris orbata privare etiam aspectu tuo. Denique si fuit magni animi non isse supplicem victori; vide ne superbi sit aspernari ejusdem liberalitatem: & si sapientis est carere patria, duri non desiderare: & si republica non possis frui, stultum est nolle privata. Caput illud est, ut, si ista vita tibi commodior esse videatur, cogitandum tamen sit, ne tutior non sit. Magna gladiatorum est licentia; sed in externis locis minor etiam ad facinus verecundia. Mihi salus tua tantæ curæ est, ut Marcello fratri tuo aut par, aut certe proximus sim. Tuum est consulere temporibus, & incolumitati, & vitæ, & fortunis tuis. Vale.

A R G U M E N T U M.

Hortatur, ut reditum maturet, jam enim de reditu persuaserat.

M. T. C. MARCELLO S. D.

10

ET si nihil novi, quod ad te scriberem, habebam, magisque litteras tuas jam expectare incipiebam, vel te potius ipsum: tamen, cum Theophilus proficisceretur, non potui nihil ei litterarum dare. Cura igitur, ut quamprimum venias: venies enim, mihi crede, expectatus, neque solum nobis, id est tuis, sed prorsus omnibus.

bus. Venit enim mihi in mentem subvereri interdum, ne te delectet tarda decessio. Quod si nullum haberes sensum, nisi oculorum, prorsus tibi ignoscerem, si quosdam nosles videre: sed, cum leviora non multo essent, quæ audirentur, quam quæ viderentur; suspicarer autem multum interesse rei familiaris tuæ, te quamprimum venire, idque in omnes partes valere: putavi ea de re te esse admonendum. Sed, quoniam quod mihi placeret, ostendi, reliqua tu pro tua prudentia considera-bis. Me tamen velim, quod ad tempus te exspe-ctemus, certiolem facias. Vale.

ARGUMENTUM.

Significat, se in patriam rediturum, commotum consilio, & auctoritate Ciceronis.

M. MARCELLUS CICERONI S. D. II

PLurimum valuisse apud me tuam semper auctoritatem, cum in omni re, tum in hoc maxime negotio, potes existimare. Cum mihi C. Marcellus frater amantissimus mei, non solum consilium daret, sed precibus quoque me obsecraret; non prius mihi persuadere potuit, quam tuis est effectum litteris, ut uterer vestro potissimum consilio. Res quemadmodum sit acta, vestræ litteræ mihi declarant. Gratulatio tua, etsi est mihi probatissima, quod ab optimo sit animo; tamen hoc mihi multo jucundius est & gratius, quod in summa paucitate amicorum, propinquorum, ac necessariorum, qui vere meæ salutis faverent, te cupidissimum mei, singularemque mihi benevolentiam præstitisse cognovi. Reliqua sunt ejusmodi, quibus ego, quoniam hæc erant tempora, facile & æquo animo carebam; hoc vero ejusmodi esse statuo, ut sine talium virorum & amicorum benevolentia, neque in adversa, neque in secunda fortuna quis-

quam vivere possit. Itaque hoc ego mihi gratulor. Tu vero ut intelligas homini amicissimo te tribuisse officium, re tibi præstabo. Vale.

A R G U M E N T U M.

Marcellum a Magio interfectum, suaque erga mortuum officia significat.

S E R V I U S C I C E R O N I S. D. 12

ET si scio non jucundissimum me nuncium vobis allaturum: tamen, quoniam casus, & natura in bonis dominatur, visum est faciendum, quoquo modo res se haberet, vos certiores facere. Ad x. Kal. Jun. cum ab Epidauro Piræum navi adven-
tus essem, ibi Marcellum collegam nostrum conveni, eumque diem ibi consumpsi, ut cum eo essem. Postero die, cum ab eo digressus essem, eo consilio ut ab Athenis in Bœotiam irem, reliquamque jurisdictionem absolverem: ille, uti aje-
bat, supra Maleas Italiam versus navigaturus erat. Postridie ejus diei, cum ab Athenis proficisci in animo haberem, circiter horam decimam noctis Posthumius familiaris ejus ad me venit, & mihi nunciavit, M. Marcellum collegam nostrum post cœnæ tempus a P. Magio Chilone familiari ejus pugione percussum esse, & duo vulnera accepisse; unum in stomacho, alterum in capite secundum aurem: sperare tamen eum vivere posse: Magium seipsum interfecisse: postea se a Marcello ad me missum esse, qui hæc nuntiaret & rogaret, uti co-
gerem medicos: coegi, & a vestigio eo sum profectus prima luce. Cum non longe a Piræo abessem, puer Acidini mihi obviam venit cum codicillis, in quibus erat scriptum, paullo ante lucem Marcellum diem suum obiisse. Ita vir clarissimus ab homine teterrimo acerbissima morte est affectus: & cui inimici propter dignitatem percerant, inventus est amicus, qui ei mortem
affer-

afferret. Ego tamen ad tabernaculum ejus perrexi; inveni duos libertos, & pauculos servos, reliquos ajebant profugisse metu perterritos, quod dominus eorum ante tabernaculum interfectus esset. Coactus sum in eadem illa lectica, qua ipse delatus eram, meisque lecticariis in urbem eum referre: ibique pro ea copia, quæ Athenis erat, funus ei satis amplum faciendum curavi. Ab Atheniensibus, locum sepulturæ intra urbem ut darent, impetrare non potui, quod religione se impediri dicerent; neque tamen id antea cuiquam concesserant. Quod proximum fuit, ut, in quo vellemus gymnasio, eum sepeliremus, nobis permiserunt. Nos in nobilissimo orbis terrarum gymnasio Academix locum delegimus, ibique eum combussimus, posteaque curavimus, ut iidem Athenienses in eodem loco monumentum ei marmoreum faciendum locarent. Ita, quæ nostra officia fuerunt, pro collegio, & propinquitare, & vivo & mortuo omnia ei præstitimus. Vale. Dat. pridie Kal. Jun. Athenis.

A R G U M E N T U M.

Exultantem Nigidium spe redditus consolans, suam illi operam, suumque officium pollicetur; præterea rem omnem familiarem. In extremo hortatur, ut bono animo, fortique sit in utramque partem.

M. T. C. P. NIGIDIO FIGULO S. D. 13

Quærenti mihi jamdiu quid ad te potissimum scriberem, non modo certa res ulla, sed ne genus quidem litterarum usitatum veniebat in mentem. Unam enim partem, & consuetudinem earum epistolarum, quibus, secundis rebus, uti solebamus, tempus eripuerat, perfeceratque fortuna, ne quid tale scribere possem, aut omnino cogitare. Relinquebatur triste quoddam, & miserum, & his temporibus consentaneum genus

litterarum : id quoque deficiebat me , in quo debebat esse aut promissio auxilii alicujus , aut consolatio doloris tui . Quod pollicerer , non erat : ipse enim pari fortuna abjectus , aliorum opibus casus meos sustentabam , sæpiusque mihi veniebat in mentem , queri , quod ita viverem , quam gaudere , quod viverem . Quamquam enim nulla meipsum privatim perculit insignis injuria : nec mihi quidquam tali tempore in mentem venit optare , quod non ultro mihi Cæsar detulerit : tamen nihilominus eis conficior curis , ut hoc ipsum , quod maneam in vita , peccare me existimem . Careo enim cum familiarissimis multis , quos aut mors eripuit nobis , aut distraxit fuga , tum omnibus amicis , quorum benevolentiam nobis conciliarat per me quondam , te socio , defensa respubl. verforque in eorum naufragiis , & bonorum direptionibus . Nec audio solum , quod ipsum esset miserum , sed etiam idipsum video , quo nihil est acerbius , eorum fortunas dissipari , quibus nos olim adiutoribus illud incendium extinximus ; & in qua urbe modo gratia , auctoritate , & gloria floruimus , in ea nunc iis quidem omnibus caremus . Obtinemus ipsius Cæsaris summam erga nos humanitatem : sed ea plus non potest , quam vis & mutatio omnium rerum , atque temporum . Itaque orbus iis rebus omnibus , quibus & natura me , & voluntas & consuetudo assuefecerat , cum ceteris , ut quidem videor , tum mihi ipse displiceo . Natus enim ad agendum semper aliquid dignum viro , nunc non modo agendi rationem nullam habeo , sed ne cogitandi quidem : & qui antea aut obscuris hominibus , aut etiam fontibus opitulari poteram , nunc P. Nigidio uni omnium doctissimo , & sanctissimo , & maxima quondam gratia , & mihi certe amicissimo , ne benigne quidem polliceri possum . Ergo hoc ereptum est litterarum genus . Reliquum est , ut
con-

consoler, & afferam rationes, quibus te a molestiis coner abducere. At ea quidem facultas vel tui, vel alterius consolandi, in te summa est, si unquam in ullo fuit. Itaque eam partem, quæ ab exquisita quadam ratione & doctrina proficiscitur, non attingam, tibi totam relinquam. Quid sit forti, & sapienti homine dignum, quid gravitas, quid altitudo animi, quid acta tua vita, quid studia, quid artes, quibus a pueritia floruisti, a te flagitent, tu videbis. Ego, quod intelligere, & sentire, quia sum Romæ, & quia curo attendoque, possum, id tibi affirmo, te in istis molestiis, in quibus es hoc tempore, non diutius futurum: in iis autem, in quibus etiam nos sumus, fortasse semper fore. Videor mihi perspicere, primum ipsius animum, qui plurimum potest, propensum ad salutem tuam. Non scribo hoc temere. Quo minus familiaris sum, hoc sum ad investigandum curiosior. Quo facilius, quibus est iratior, respondere tristius possit, hoc est adhuc tardior ad te molestia liberandum. Familiares vero ejus, & ii quidem, qui illi jucundissimi sunt, mirabiliter de te & loquuntur, & sentiunt. Accedit eodem vulgi voluntas, vel potius consensus omnium. Etiam illa, quæ minimum nunc quidem potest, sed possit necesse est, respubl. quascunque vires habebit, ab iis ipsis, a quibus tenetur, de te propediem (mihi crede) impetrabit. Redeo igitur ad id, ut jam tibi etiam pollicear aliquid, quod primo omiseram. Nam & complectar ejus familiarissimos, qui me admodum diligunt, multumque mecum sunt, & in ipsius me consuetudinem, quam adhuc meus pudor mihi clausit, insinuabo: & certe omnes vias persequar, quibus putabo ad id, quod volumus, pervenire posse. In hoc toto genere plura faciam, quam scribere audeo. Cetera, quæ tibi a multis prompta esse certo scio, a me sunt paratissima: nihil in re fa-

miliari mea est, quod ego meum malim esse, quam tuum. Hac de re, & de hoc genere toto hoc scribo parcius, quod te, id quod ipse confido, sperare malo, te esse usurum tuis. Extremum illud est, ut te hortor & obsecrem, animo ut maximo sis: nec ea solum memineris, quæ ab aliis magnis viris accepisti; sed illa etiam, quæ ipse ingenio, studioque peperisti. Quæ si colliges, & sperabis omnia optime, & quæ accident, qualiacumque erunt, sapienter feres. Sed hæc tu melius vel optime omnium. Ego, quæ pertinere ad te intelligam, studiosissime omnia diligentissimeque curabo, tuorumque tristissimo meo tempore meritorum erga me memoriam conservabo. Vale.

ARGUMENTUM.

Respondet ad duplicem Plancii gratulationem, de recuperata Ciceronis dignitate, & de novis ejusdem nuptiis cum Publia, divortio jam facto cum Terentia.

M. T. C. C. N. PLANCIO S. D. 14

BInas a te accepi litteras Corcyræ datas: quarum alteris mihi gratulabare, quod audisses meam me pristinam dignitatem obtinere: alteris dicebas te velle, quæ egissem, bene ac feliciter evenire. Ego autem, si dignitas est bene de republ. sentire, & bonis viris probare quod sentias, obtineo dignitatem meam: sin autem in eo dignitas est, quod sentias, aut re efficere si possis, aut denique libera oratione defendere, ne vestigium quidem ullum est reliquum nobis dignitatis: agiturque præclare, si nosmetipsos regere possumus, ut ea, quæ partim jam adfunt, partim impendent, moderate feramus: quod est difficile in ejusmodi bello, cujus exitus ex altera parte cadem ostendat, ex altera servitutem. Quo in periculo non nihil me consolatur, cum recordor, hæc me tum vidis-

vidisse, cum secundas etiam res nostras, non modo adversas pertimescebam, videbamque quanto periculo de jure publico disceptaretur armis. Quibus si ii vicissent, ad quos ego pacis spe non belli cupiditate adductus accesseram, intelligebam tamen, & iratorum hominum & cupidorum, & insolentium, quam crudelis esset futura victoria: sin autem victi essent, quantus interitus esset futurus civium, partim amplissimorum, partim etiam optimorum: qui me hæc prædicentem, atque optime consulentem salutis suæ, malebant nimium timidum, quam satis prudentem existimari. Quod autem mihi de eo, quod egerim, gratularis, te ita velle certo scio; sed ego tam misero tempore nihil novi consilii cepissem, nisi in reditu meo nihilo meliores res domesticas, quam rempubl. offendissem. Quibus enim pro meis immortalibus beneficiis carissima mea salus, & meæ fortunæ esse debebant, cum propter eorum scelus nihil mihi intra meos parietes tutum, nihil insidiis vacuum viderem, novarum me necessitudinum fidelitate contra veterum perfidiam muniendum putavi. Sed de nostris rebus satis, vel etiam nimium multa. De tuis velim, ut eo sis animo, quo debes esse: id est ne quid tibi præcipue timendum putes: si enim status erit aliquis civitatis, quicumque erit, te omnium periculorum video expertem fore. Nam alteros tibi jam placatos esse intelligo, alteros numquam iratos fuisse. De mea autem in te voluntate sic velim judices, me, quibuscumque rebus opus esse intelligam: quamquam videam, quis sim hoc tempore, & quid possim; opera tamen, & consilio, studio quidem certe, rei, famæ, salutis tuæ præsto futurum. Tu, velim, & quid agas, & quid acturum te putes, facias me quam diligentissime certiores. Vale.

A R G U M E N T U M.

Hortatur, ut communem fortunam fortiter ferat.

M. T. C. PLANCIO S. D. 15

ACcepi perbreves tuas litteras, quibus id, quod scire cupiebam, cognoscere non potui: cognovi autem id, quod mihi dubium non fuit: nam, quam fortiter ferres communes misérias, non intellexi: quam me amares, facile perspexi. Sed hoc scieram: illud si scissem, ad id meas litteras accommodassem. Sed tamen etsi antea scripsi, quæ existimavi scribi oportere; tamen hoc tempore breviter commonendum putavi, ne quo periculo te proprio existimares esse: in magno omnes, sed tamen in communi sumus. Quare non debes aut propriam fortunam, & præcipuam postulare, aut communem recusare. Quapropter eo animo sumus inter nos, quo semper fuimus: quod de te sperares de me præstare possum. Vale.

L I B E R V.

A R G U M E N T U M.

Queritur Metellus Celer, qui Galliam Proconsul regebat, Metellum nepotem fratrem suum a Cicerone oppugnatum. Videtur esse paullo arrogantior epistola.

Q. METELLUS, Q. F. CELER PROCOS.

M. T. CICERONI S. D. 1

SI vales, bene est. Existimaram pro mutuo inter nos animo, & pro reconciliata gratia, neque me absentem ludibrio læsum iri, nec Metellum fratrem ob dictum, capite, ac fortunis per te oppugnatum iri. Quem si parum pudor ipsius defendebat, debebat vel familiæ nostræ dignitas, vel

vel meum studium erga vos, remque publ. satis sublevare. Nunc video illum circumventum, me desertum, a quibus minime conveniebat. Itaque in luctu, & squalore sum, qui provinciæ, qui exercitui præsum, qui bellum gero. Quæ quoniam nec ratione, nec majorum nostrorum clementia administraſtis, non erit mirandum, si vos pœnitebit. Te tam mobili in me, meosque esse animo non sperabam. Me interea nec domesticus dolor, nec cujusquam injuria a republ. abducat. Vale.

ARGUMENTUM.

Excusat se de Metello Nepote, suaque in ipsum Celerem merita commemorat.

M. T. C. Q. METELLO, Q. F. CELERI
PROCOS. S. D.

2

SI tu, exercitusque valeris, bene est. Scribis ad me, te existimasse, pro mutuo inter nos animo, & pro reconciliata gratia, numquam te a me ludibrio læsum iri. Quod cujusmodi sit, satis intelligere non possum: sed tamen suspicor ad te esse allatum, me, in senatu cum disputarem, permultos esse, qui republ. a me conservatam dolerent, dixisse: a te propinquos tuos, quibus negare non potuisses, impetrasse, ut ea, quæ statuisses tibi in senatu de mea laude esse dicenda, reticeres. Quod cum dicerem, illud adjunxi, mihi tecum ita dispertitum officium fuisse in reipubl. salute retinenda, ut ego urbem a domesticis insidiis, & ab intestino scelere, tu Italiam & ab armatis hostibus, & ab occulta conjuratione defenderes: atque hanc nostram tanti, & tam præclari muneris societatem a tuis propinquis labefactam: qui, cum tu a me rebus amplissimis atque honorificentissimis ornatus esses, timuissent, ne qua mihi pars abs te voluntatis mutux tribueretur. Hoc in sermone, cum a me exponeretur, quæ
mea

mea exspectatio fuisset orationis tuæ, quantoque in errore versatus essem: visa est oratio non injucunda, & mediocris quidam est risus consecutus, non in te, sed magis in errorem meum, & quod me abs te cupisse laudari, aperte atque ingenue confitebar. Jam hoc non potest in te non honorifice esse dictum, me in clarissimis meis atque amplissimis rebus, tamen aliquod testimonium tuæ vocis habere voluisse. Quod autem ita scribis, pro mutuo inter nos animo: quid tu existimes esse in amicitia mutuum, nescio: equidem hoc arbitror, cum par voluntas accipitur, & redditur. Ego, si hoc dicam, me tua causa prætermisisse provinciam, tibi ipse levior videar esse: meæ enim rationes ita tulerunt, atque ejus mei consilii majorem in dies singulos fructum voluptatemque capio. Illud dico, me, ut primum in concione provinciam depofuerim, statim quemadmodum eam tibi traderem, cogitare cœpisse. Nihil dico de sortitione vestra; tantum te suspicari volo, nihil in ea re per collegam meum, me insciente, esse factum. Recordare cetera, quam cito senatum illo die, facta sortitione, coegerim, quam multa de te verba fecerim: cum tu ipse mihi dixisti, orationem meam non solum in te honorificam, sed etiam in collegas tuos contumeliosam fuisse. Jam illud S. C. quod eo die factum est, ea præscriptione est, ut, dum id exstabit, officium meum in te obscurum esse non possit. Postea vero quam profectus es, velim recordere, quæ ego de te in senatu egerim, quæ in concionibus dixerim, quas ad te litteras miserim. Quæ cum omnia collegeris, tu ipse velim judices, fatisne videatur his omnibus rebus tuus adventus, cum proxime Romam venisti, mutuo respondisse. Quod scribis de reconciliata nostra gratia; non intelligo, cur reconciliatam esse dicas, quæ numquam immutata est. Quod scribis, non oportuisse Metellum
fra-

fratrem tuum ob dictum a me oppugnari: primum, hoc velim existimes, animum mihi istum tuum vehementer probari, & fraternam plenam humanitatis ac pietatis voluntatem: deinde, si qua ego in te fratri tuo, reipubl. causa restiterim, peto, ut mihi ignoscas: tam enim sum amicus reipubl. quam qui maxime. Si vero meam salutem contra illius impetum in me crudelissimum defenderim, satis habeas, nihil me etiam tecum de tui fratris injuria conqueri. Quem ego cum comperissem omnem sui tribunatus conatum in meam perniciem parare, atque meditari, egi cum Claudia uxore tua, & cum vestra sorore Mutia, cujus erga me studium pro Cn. Pompeji necessitudine multis in rebus prospexeram, ut cum ab illa injuria deterrerent. Atque ille (quod te audisse credo) pridie Kal. Jan. qua injuria nemo umquam in aliquo magistratu improbissimus civis affectus est, ea me consulem affecit, cum rempubl. conservassem, atque abeuntem magistratu concionis habendæ potestate privavit: cujus injuria mihi tamen honori summo fuit. Nam cum ille nihil mihi, nisi ut jurarem, permetteret: magna voce juravi verissimum, pulcherrimumque jusjurandum, quod populus item magna voce me vere jurasse juravit. Hac accepta tam insigni injuria, tamen illo ipso die misi ad Metellum communes amicos, qui agerent cum eo, ut ab illa mente desisteret; quibus ille respondit, sibi non esse integrum: etenim paullo ante in concione dixerat, ei, qui in alios animadvertisset indicta causa, dicendi ipsi potestatem fieri non oportere. Hominem gravem, & civem egregium! qui, qua poena senatus, consensu bonorum omnium, eos affecerat, qui urbem incendere, magistratus, ac senatum trucidare, bellum maximum constare voluissent, eadem dignum judicaret eum, qui curiam cæde, urbem incendiis, Italiam bello liberasset. Itaque ego

ego Metello fratri tuo præsentî restiti. Nam in senatu Kal. Jan. sic cum eo de republ. disputavi, ut sentiret, sibi cum viro forti, & constanti esse pugnandum. Ad III. non. Jan. cum agere cœpisset, tertio quoque verbo orationis suæ me appellabat, mihi minabatur: neque illi quidquam deliberatius fuit, quam me, quacumque ratione posset, non judicio, neque disceptatione, sed vi, atque impressione evertere. Hujus ego temeritati si virtute, atque animo non restitissem, quis esset, qui me in consulatu non casu potius existimaret, quam consilio sortem fuisse? Hæc si Metellum cogitare de me nescisti, debes existimare, te maximis de rebus a fratre esse celatum: sin autem aliquid impertivit tibi sui consilii, lenis a te, & facilis existimari debeo, qui nihil tecum de his ipsis rebus expostulem. Et, si intelligis, non me dicto Metelli, ut scribis, sed consilio ejus, animoque in me inimicissimo esse commotum: cognosce nunc humanitatem meam, si humanitas appellanda est in acerbissima injuria remissio animi, ac dissolutio. Nulla est a me umquam sententia dicta in fratrem tuum, quotiescunque aliquid est actum, sedens iis assensu, qui mihi lenissime sentire visi sunt. Addam illud etiam, quod jam ego curare non debui, sed tamen fieri non moleste tuli; atque etiam, ut ita fieret, pro mea parte adjuvi, ut S. C. meus inimicus, quia tuus frater erat, sublevaretur. Quare non ego oppugnavi fratrem tuum, sed fratri tuo repugnavi: nec in te, ut scribis, animo fui mobili; sed ita stabili, ut in mea erga te voluntate, etiam desertus ab officiis tuis permanerem. Atque, hoc ipso tempore tibi, pene minitanti nobis per litteras, hoc rescribo; atque respondeo: Ego dolori tuo non solum ignosco, sed summam etiam laudem tribuo: meus enim me sensus, quanta vis fraterni sit amoris, admonet. A te peto, ut tu quoque æquum te judi-

judicem dolori meo præbeas, si acerbe, si crudeliter, si sine causa sum a tuis oppugnatus, ut statuas, mihi non modo non cedendum, sed etiam tuo, atque exercitus tui auxilio, in ejusmodi causa, utendum fuisse. Ego te mihi semper amicum esse volui: me ut tibi amicissimum esse intelligeres, laboravi: maneo in voluntate, &, quoad voles tu, permanebo; citiusque amore tui fratrem tuum odisse desinam, quam illius odio quidquam de nostra benevolentia detrahatur. Vale.

ARGUMENTUM.

Quæ sequitur epistola, non dubito, quin Metelli Celeris potius sit, quam Nepotis, & in epistola Nepotem puto significari.

Q. METELLUS CELER CICERONI S. D. 3

Hominis importunissimi contumeliæ, quibus me, crebris concionibus, onerat, tuis erga me officiis leniuntur: &, ut sunt leves ab ejusmodi homine, a me despiciuntur: libenterque commutata persona, te mihi fratris loco esse duco. De illo ne meminisse quidem volo: tametsi bis eum invitum servavi. De me, meisque rebus, ne vobis multitudine litterarum molestior essem, ad Lollium perscripsi: de rationibus provinciæ quid vellem fieri, ut is vos doceret, & commonefaceret. Si poteris, velim pristinam tuam erga me voluntatem conserves. Vale.

ARGUMENTUM.

Studium, & auxilium Metelli Nepotis Consulatum gerentis, exul implorat.

M. T. C. METELLO NEPOTI COS. S. D. 4

Litteræ Quinti fratris, & T. Pomponii necessari mei, tantum mihi spei dederant, ut in te non minus auxilii, quam in tuo collega mihi constitutum fuerit. Itaque ad te litteras statim misi,

mihi, per quas, ut fortuna postulabat, & gratias tibi egi, & de reliquo tempore auxilium petii. Postea mihi non tam meorum litteræ, quam sermones eorum, qui hac iter faciebant, animum tuum immutatum significabant: quæ res fecit, ut tibi litteris obstrepere non auderem. Nunc mihi Quintus frater meus mitissimam tuam orationem, quam in senatu habuisses, perscripsit: qua inductus, ad te scribere sum conatus, & abs te, quantum tua fert voluntas, peto quæsoque, ut tuos mecum serves potius, quam propter arrogantem crudelitatem tuorum me oppugnes. Tu tuas inimicitias ut reipubl. donares, te vicisti: alienas ut contra rempubl. confirmes, adduceres? Quod si mihi tua clementia opem tuleris, omnibus in rebus me fore in tua potestate tibi confirmo: sin mihi neque magistratum, neque senatum, neque populum auxiliari, propter eam vim, quæ me cum reipubl. vicit, licuerit: vide, ne, cum velis revocare tempus omnium conservandorum, cum, qui servetur, non erit, non possis. Vale.

A R G U M E N T U M.

Exprobrat Antonio, qui Macedoniam Proconsul regebat, ingrati animi vitium. Deinde Atticum illi commendat.

M. T. C. ANTONIO M. F. IMP. S. D. 5

ET si statueram nullas ad te litteras mittere, nisi commendatitias (non quod eas intelligerem satis apud te valere; sed ne iis, qui me rogarent, aliquid de nostra conjunctione imminutum esse ostenderem) tamen, cum T. Pomponius, homo omnium meorum in te studiorum, & officiorum maxime conscius, tui cupidus, nostri amantissimus ad te proficisceretur, aliquid mihi scribendum putavi; præsertim cum aliter ipsi Pomponio satisfacere non possem. Ego si abs te summa officia desiderem, mirum nemini videri debeat: omnia enim

enim a me in te profecta sunt, quæ ad tuum com-
modum, quæ ad honorem, quæ ad dignitatem per-
tinerent. Pro his rebus nullam mihi abs te rela-
tam esse gratiam, tu es optimus testis. Contra
etiam esse aliquid abs te profectum, ex multis au-
divi: nam comperisse me, non audeo dicere: ne
forte id ipsum verbum ponam, quod abs te ajunt fal-
so in me solere conferri. Sed ea, quæ ad me de-
lata sunt, malo te ex Pomponio, cui non minus
molesta fuerunt, quam ex meis litteris cognosce-
re. Meus in te animus quam singulari officio fue-
rit, & senatus, & populus R. testis est: tu quam
gratus erga me fueris, ipse existimare potes:
quantum mihi debeas, ceteri existiment. Ego
quæ tua causa antea feci, voluntate sum addu-
ctus, ut facerem, posteaque constantia: sed re-
liqua, mihi crede, multo majus meum studium,
majoremque gravitatem, & laborem desiderant.
Quæ ego si non profundere, ac perdere videbor,
omnibus meis viribus sustinebo: sin ingrata esse
sentiam, non committam, ut tibi ipse insanire
videar. Ea quæ sint, & cujusmodi, poteris ex
Pomponio cognoscere: atque ipsum tibi Pom-
ponium ita commendo, ut, quamquam ipsius caus-
sa confido te omnia esse facturum; tamen abs te
hoc petam, ut, si quid residet in te amoris erga
me, id omne in Pomponii negotio ostendas. Hoc
mihi gratius facere nihil potes. Vale.

A R G U M E N T U M.

*Narrat, se diligentiam adhibuisse, ne Sextio succe-
deretur. Scribit de domo a se emptâ.*

M. T. C. P. SEXTIO L. F. PROCOS. S. D. 6

CUM ad me Decius librarius tuus venisset, egis-
setque mecum, ut operam darem, ne tibi
hoc tempore succederetur: quamquam illum ho-
minem frugi, & tibi amicum existimabam; ta-
men, quod memoria tenebam, cujusmodi ad me
litte-

litteras antea misisses, non satis credidi homini prudenti, tam valde esse mutatam voluntatem tuam. Sed posteaquam & Cornelia tua Terentiam convenit, & ego cum Q. Cornelio locutus sum, adhibui diligentiam, quotiescumque senatus fuit, ut adessem, plurimumque in eo negotii habui, ut Q. Fufium tribunum pleb., & ceteros, ad quos tu scripseras, cogerem mihi potius credere quam tuis litteris. Omnino res tota in mensem Januarium rejecta erat, sed facile obtinebatur. Ego tua gratulatione commotus, quod ad me pridem scripseras, velle te bene evenire, quod de Crasso domum emissem: emi eam ipsam domum xxxv. aliquanto post tuam gratulationem. Itaque nunc me scito tantum habere æris alieni, ut cupiam conjurare, si quis me recipiat: sed partim odio inducti me excludunt, & aperte vindicem conjurationis oderunt: partim non credunt, & a me insidias metuunt: nec putant ei nummos deesse posse, qui ex obsidione fœneratores exemerit. Omnino semissibus magna copia est: ego autem meis rebus gestis hoc sum assecutus, ut bonum nomen existimer. Domum tuam atque ædificationem omnem perspexi, & vehementer probavi. Antonium, etsi ejus in me officia omnes desiderant; tamen in senatu gravissime, ac diligentissime defendi, senatumque vehementer oratione mea, atque auctoritate commovi. Tu ad me velim litteras crebrius mittas. Vale.

A R G U M E N T U M .

Leniter expostulat, quod Pompejus sibi de oppressa Catilina conjuratione non esset pro rei magnitudine litteris gratulatus.

M. T. C. CN. POMPEJO, CN. F. MAGNO IMP.
S. D.

7

SI tu, exercitusque valetis, bene est, ego valeo.
Ex litteris tuis, quas publice misisti, cepi una
cum

cum omnibus incredibilem voluptatem : tantam enim spem otii ostendisti, quantam ego semper omnibus, te uno fretus, pollicebar. Sed hoc scito, tuos veteres hostes, novos amicos, vehementer litteris perculsos, atque ex magna spe deturbatos jacere. Ad me autem litteras, quas misisti, quamquam exiguam significationem tuæ erga me voluntatis habebant, tamen mihi scito jucundas fuisse : nulla enim re tam lætari soleo, quam meorum officiorum conscientia ; quibus si quando non in mutuo respondetur, apud me plus officii residere facillime patior. Illud non dubito, quin, si te mea summa erga te studia parum mihi adjunxerunt, respubl. nos inter nos conciliatura, conjuncturaque sit. Ac, ne ignores, quid ego in tuis litteris desiderarim, scribam aperte, sicut & mea natura, & nostra amicitia postulat. Res eas gessi, quarum aliquam in tuis litteris, & nostræ necessitudinis, & reipubl. causa, gratulationem expectavi : quam ego abs te prætermisam esse arbitror, quod verebatur, ne cujus animum offenderes : sed scito, ea, quæ nos pro salute patriæ gessimus, orbis terræ judicio, ac testimonio comprobari. Quæ, cum veneris, tanto consilio tantaque animi magnitudine a me gesta esse cognosces, ut tibi multo majori, quam Africanus fuit, me non multo minorem, quam Lælium, facile, & in republ. in amicitia adjunctum esse patiari. Vale.

A R G U M E N T U M.

Officium suum in Crassum prædicat : omniaque pollicetur, quæ ad illius commodum, aut amplitudinem pertinebunt.

M. T. C. M. LICINIO P. F. CRASSO S. D. 8

QUantum meum studium exstiterit dignitatis tuæ, vel tuendæ, vel etiam augendæ, non dubito, quin ad te omnes tui perscripserint : non enim

enim fuit aut mediocre, aut obscurum, aut ejusmodi, quod silentio posset præteriri. Nam & cum consulibus, & cum multis consularibus tanta contentione decertavi, quanta numquam antea ulla in causa, suscepique mihi perpetuam propugnationem pro omnibus ornamentis tuis: veterique nostræ necessitudini jamdiu debitum, sed multa varietate temporum interruptum officium cumulate reddidi. Neque mehercule umquam mihi tui aut colendi, aut ornandi voluntas defuit: sed quædam pestes hominum, laude aliena dolentium, & te nonnumquam a me alienarunt, & me aliquando immutarunt tibi. Sed exstitit tempus optatum mihi magis, quam speratum, ut, florentissimis tuis rebus, mea perspicui posset, & memoria nostræ voluntatis, & amicitiae fides. Sum enim consecutus, non modo ut domus tua tota, sed ut cuncta civitas me tibi amicissimum esse cognosceret. Itaque & præstantissima omnium feminarum uxor tua, & eximia pietate, virtute, gratia tui Crassi, meis consiliis, monitis, studiis, actionibusque nituntur: & senatus, populusque Rom. intelligit, tibi absenti nihil esse tam promptum, aut tam paratum, quam in omnibus rebus, quæ ad te pertineant, operam, curam, diligentiam, auctoritatem meam. Quæ sint acta, quæque agantur, domesticorum tibi litteris declarari puto. De me sic existimes, ac tibi persuadeas vehementer velim, non me repentina aliqua voluntate, aut fortuito, ad tuam amplitudinem meis officiis amplectendam incidisse: sed, ut primum forum attigerim, spectasse semper, ut tibi possem quam maxime esse conjunctus. Quo quidem ex tempore memoria teneo, neque meam tibi observantiam, neque mihi tuam summam benevolentiam, ac liberalitatem defuisse. Si qua interciderunt, non tam re, quam suspicione violata, ea cum fuerint & falsa & inania, sint evulsa

sa ex omni memoria vitæque nostra. Is enim tu vir es, & eum me esse cupio, ut, quoniam in eadem reipubl. tempora incidimus, conjunctionem amicitiamque nostram utrique nostrum laudi sperem fore. Quamobrem tu, quantum tuo iudicio tribuendum nobis esse putes, statues ipse, & ut spero, statues ex nostra dignitate: ego vero tibi profiteor atque polliceor eximium, & singulare meum studium in omni genere officii, quod ad honestatem & gloriam tuam spectet: in quo etiamsi multi mecum contendunt, tamen cum reliquis omnibus, tum Crassis tuis iudicibus, omnes facile superabo: quos quidem ego ambos unice diligo; sed in Marco benevolentia impari: hoc magis sum Publio deditus, quod me, quamquam a pueritia sua semper, tamen hoc tempore maxime, sicut alterum parentem, & observat & diligit. Has litteras velim existimes fœderis habituras esse vim, non epistolæ, meque ea, quæ tibi promitto ac recipio, sanctissime esse observaturum, diligentissimeque facturum. Quæ a me suscepta defensio est, te absente dignitatis tuæ: in ea jam ego, non solum amicitiae nostræ, sed etiam constantiae meæ causa, permanebo. Quamobrem satis esse hoc tempore arbitratus sum, hoc ad te scribere; me, si quid ipse intelligerem, aut ad voluntatem, aut ad commodum, aut ad amplitudinem tuam pertinere, mea sponte id esse facturum: sin autem quippiam aut a te essem admonitus, aut a tuis; effecturum, ut intelligeres, nihil neque te scripsisse, neque quemquam tuorum frustra ad me detulisse. Quamobrem velim ita & ipse ad me scribas de omnibus minimis, maximis, mediocribusque rebus, ut ad hominem amicissimum: & tuis præcipias, ut opera, consilio, auctoritate, gratia mea sic utantur in omnibus publicis, privatis, forensibus, domesticis tuis, amicorum, hospitum, clientium tuorum negotiis; ut quoad ejus

fieri possit, præsentia tuæ desiderium meo labore minuatur. Vale.

A R G U M E N T U M.

Vatinius, ex Consulatu a Cæsare dictatore in Illyricum missus commendat suam dignitatem Ciceroni contra malevolorum obrektiones.

P. VATINIUS IMP. CICERONI SUO S. D. 9

SI vales, bene est, ego valeo. Si tuam consuetudinem in patrociniis tuendis servas, P. Vatinius cliens ad te venit, qui pro se causam dicier vult. Non puto, repudiabis in honore, quem in periculo recepisti. Ego autem, quem potius adoptem, aut invocem, quam illum, quo defendente, vincere didici? an verear, ne, qui potentissimorum hominum conspirationem neglexerit pro mea salute, is pro honore meo, pusillorum, ac malevolorum obrektiones & invidias non prosternat atque obterat? Quare, si me, sicut soles, amas, suscipe me totum: atque hoc, quidquid est oneris ac muneris, pro mea dignitate tibi tuendum ac sustinendum puta. Scis meam fortunam, nescio quo modo, facile obrektiones invenire, non meo quidem mehercule merito: sed quanti id refert, si tamen fato nescio quo accidit? Si quis forte fuerit, qui nostræ dignitati obesse velit, peto a te, ut tuam consuetudinem & liberalitatem in me absente defendendo mihi præstes. Litteras ad senatum nostris de rebus gestis, quo exemplo miseram, infra tibi perscripsi. Dicitur mihi tuus servus anagnostes fugitivus cum Vardæis esse: de quo tu mihi nihil mandasti: ego tamen terramarique ut conquireretur, præmandavi: & profecto tibi illum reperiam, nisi in Dalmatiam aufugerit: & inde tamen aliquando eruam. Tu nos fac ames. Vale. Ad v. Id. Quint. ex castris, Narona.

AR-

ARGUMENTUM.

Scribit hæc de Dionysio Ciceronis servo, de Catilio pirata, de rebus a se in Dalmatia gestis, pro quibus supplicationes sibi decerni postulat.

VATINIUS IMP. CICERONI SUO S. D. 10

SI vales, bene est, ego quidem valeo. De Dionysio tuo adhuc nihil extrico: & eo minus, quod me frigus Dalmaticum, quod illinc ejecit, etiam hic refrigeravit; sed tamen non desistam, quin illum aliquando eruam. Sed tamen omnia mihi dura imperas. De Catilio nescio quid ad me scripsisti deprecationis diligentissimæ. Apage te eum nostro Sex. Servilio, nam mehercule ego illum quoque amo, sed huiusmodi vos clientes huiusmodi causas recipitis? hominem unum omnium crudelissimum, qui tot ingenuos, matresfamilias, cives R. occidit, arripuit, disperdidit; regiones vastavit? Simius non semissis homo contra me arma tulit, & eum bello cepi. Sed tamen, mi Cicero, quid facere possum? omnia mehercule cupio, quæ tu mihi imperas. Meam animadversionem, & supplicium, quo usus eram in eum, quem cepissem, remitto tibi, & condono. Quid illis respondere possum, qui sua bona direpta, naves expugnatas, fratres, liberos, parentes occisos; actione expostulant? Si mehercule Appianos haberem, in cuius locum suffectus sum, tamen hoc sustinere non possem. Quid ergo est? Faciam omnia sedulo, quæ te sciam velle. Defenditur a Q. Volusio, tuo discipulo: si forte ea res poterit adversarios fugare, in eo maxima spes est. Nos, si quid erit istic opus, defendes. Cæsar adhuc mihi injuriam facit: de meis supplicationibus & rebus gestis Dalmaticis adhuc non refert: quasi vero non iustissimi triumphi in Dalmatia res gesserim. Nam si hoc expectandum est, dum to-

tum bellum conficiam : viginti oppida sunt Dalmatiæ antiqua : quæ sibi ipsi adsciverunt , amplius sexaginta : hæc nisi omnia expugno , si mihi supplicationes non decernuntur , longe alia conditione ego sum , ac ceteri imperatores .

Ego post supplicationes mihi decretas , in Dalmatiam profectus sum : sex oppida vi oppugnando cepi : unum hoc , quod erat maximum , quater a me jam captum : quatuor enim turres , & quatuor muros cepi , & arcem eorum totam : ex qua me nives , frigora , imbres detruserunt : indigneque , mi Cicero , oppidum captum , & bellum jam confectum relinquere sum coactus . Quare te rogo , si opus erit , ad Cæsarem meam causam agas , meque tibi in omnes partes defendendum putes ; hoc existimans neminem te tui amantiorem habere . Vale . Dat. Nonis Dec. Narona .

A R G U M E N T U M .

Suum studium erga uxorem Vatinii , ipsumque Vatinium significat . Rogat deinde , ut omnino sibi remittat servum suum fugitivum Dionysium .

M. T. C. VATINIO IMP. S. D. II

GRata tibi mea esse officia non miror : cognovi enim te gratissimum omnium , idque nunquam destiti prædicare : nec enim tu mihi gratiam modo habuisti , verum etiam cumulatissime retulisti . Quamobrem reliquis tuis rebus omnibus , pari me studio erga te , & eadem voluntate cognosces . Quod mihi sceminam primariam Pompejam , uxorem tuam , commendas : cum Sura nostro statim , tuis litteris lectis , locutus sum , ut ei meis verbis diceret , ut , quidquid opus esset , mihi denuntiaret : me omnia , quæ ea veller , summo studio curaque facturum : itaque faciam , eamque , si opus esse videbitur ,
ipse

ipse conveniam. Tu tamen ei velim scribas, ut nullam rem neque tam magnam, neque tam parvam putet, quæ mihi aut difficilis, aut parum me digna videatur. Omnia, quæ in tuis rebus agam, & non laboriosa mihi & honesta videbuntur. De Dionysio, si me amas, confice: quamcumque ei fidem dederis, præstabo. Si vero improbus fuerit, ut est, duces eum captivum in triumpho. Dalmatis dii male faciant, qui tibi molesti sunt. Sed, ut scribis, brevi capientur & illustrabunt res tuas gestas: semper enim habiti sunt bellicosi. Vale.

A R G U M E N T U M.

Luccejum historiarum scriptorem rogat, ut de rebus a se in Consulatu gestis separatim volumen conficiat, quod illustrius videbatur.

M. T. C. L. LUCCEJO Q. F. S. D. 12

COram me tecum eadem hæc agere sæpe conantem deterruit pudor quidam, pene subrusticus; quæ nunc expromam absens audacius. Epistola enim non erubescit. Ardeo cupiditate incredibili, neque, ut ego arbitror, reprehendenda, nomen ut nostrum scriptis illustretur, & celebretur tuis: quod etsi mihi sæpe ostendis te esse facturum; tamen ignoscas velim huic festinationi meæ. Genus enim scriptorum tuorum, etsi erat semper a me vehementer expectatum, tamen vicit opinionem meam, meque ita vel cepit, vel incendit, ut cuperem quam celerrime res nostras monumentis commendari tuis. Non enim me solum commemoratio posteritatis ad spem quamdam immortalitatis rapit: sed etiam illa cupiditas, ut vel auctoritate testimonii tui, vel indicio benevolentiae, vel suavitate ingenii, vivi perfruamur. Neque tamen, hæc quum scribebam, eram nescius, quantis oneribus premerere susceptarum re-

rum, & jam institutarum : sed quia videbam, Italici belli & civilis historiam jam pene a te esse perfectam ; dixeras autem mihi , te reliquas res ordiri : deesse mihi nolui , quin te admonerem , ut cogitares , conjuncte ne malles cum ceteris rebus nostra contexere , an , ut multi Græci fecerunt , Callisthenes Troicum bellum , Timæus Pyrrhi , Polybius Numantinum ; qui omnes a perpetuis suis historiis ea , quæ dixi , bella separaverunt : tu quoque item civilem conjurationem ab hostilibus externisque bellis sejungeres . Equidem ad nostram laudem non multum video interesse : sed ad properationem meam quiddam interest , non te exspectare , dum ad locum venias ; ac statim causam illam totam , & tempus arripere . Et simul , si uno in argumento , unaque in persona mens tua tota versabitur , cerno jam animo , quanto omnia uberiora atque ornatiores futura sint . Neque tamen ignoro , quam impudenter faciam , qui primum tibi tantum oneris imponam , (potest enim mihi denegare occupatio tua) deinde etiam , ut ornes me , postulem . Quid si illa tibi non tantopere videntur ornanda ? Sed tamen , qui semel verecundiæ fines transierit , eum bene & naviter oportet esse impudentem . Itaque te plane etiam atque etiam rogo , ut & ornes ea vehementius etiam , quam fortasse sentis , & in eo leges historiæ negligas : gratiamque illam , de qua suavissime quodam in proœmio scripsisti , a qua te affici non magis potuisse demonstras , quam Herculem Xenophontium illum a voluptate : ea si me tibi vehementius commendabit , ne aspernere ; amorique nostro , plusculum etiam , quam concedit veritas , largiari . Quod si te adducemus , ut hoc suscipias ; erit (ut mihi persuadeo) materies digna facultate & copia tua . A principio enim conjurationis usque ad reditum nostrum videtur mihi modicum quoddam corpus confici posse :

posse : in quo & illa poteris uti civilium commutationum scientia, vel in explicandis causis rerum novarum, vel in remediis incommodorum, quum & reprehendes ea, quæ vituperanda duces; & quæ placebunt, exponendis rationibus comprobabis; &, si liberius, ut consuesti, agendum putabis, multorum in nos perfidiam, insidias, prodicionem notabis. Multam etiam casus nostri tibi varietatem in scribendo suppeditabunt, plenam cujusdam voluptatis, quæ vehementer animos hominum in legendo scripto retinere possit. Nihil est enim aptius ad delectationem lectoris, quam temporum varietates, fortunæque vicissitudines: quæ etsi nobis optabiles in experiendo non fuerunt, in legendo tamen erunt jucundæ. Habet enim præteriti doloris secunda recordatio delectationem. Ceteris vero, nulla perfunctis propria molestia, casus alienos sine ullo dolore intuentibus, etiam ipsa misericordia est jucunda. Quem enim nostrum ille moriens apud Mantineam Epaminondas non cum quadam miseratione delectat? qui tum denique sibi avelli jubet spiculum, posteaquam ei percontanti dictum est, clypeum esse salvum: ut etiam in vulneris dolore æquo animo cum laude moreretur. Cujus studium in legendo non erectum Themistoclis fuga, redituque retinetur? Etenim ordo ipse annalium mediocriter nos retinet, quasi enumeratione fastorum. At viri sæpe excellentis ancipites varique casus habent admirationem, expectationem, lætitiā, molestiam, spem, timorem: si vero exitu notabili concluduntur, expletur animus jucundissima lectionis voluptate. Quo mihi acciderit optatius, si in hac sententia fueris, ut a continentibus tuis scriptis, in quibus perpetuam rerum gestarum historiam complecteris, secernas hanc quasi fabulam rerum eventorumque nostrorum. Habet enim varios actus, multasque actiones & consiliorum,

& temporum. Ac non vereor, ne assentatiuncula quadam aucupari tuam gratiam videar, cum hoc demonstrem, me a te potissimum ornari celebrarique velle. Neque enim tu is es, qui, quid sis, nescias: & qui non eos magis, qui te non admirentur, invidos, quam eos, qui laudent, assentatores arbitrere. Neque autem ego sum ita demens, ut me sempiternæ gloriæ per eum commendari velim, qui non ipse quoque in me commendando propriam ingenii gloriâ consequatur. Neque enim Alexander ille, gratiæ causa, ab Apelle potissimum pingi, & a Lysippo fingi volebat: sed quod illorum artem cum ipsis, tum etiam sibi gloriæ fore putabat. Atque illi artifices corporis simulacra ignotis nota faciebant: quæ vel si nulla sint, nihilo sunt tamen obscuriores clari viri. Nec minus est Spartiates Agesilaus ille perhibendus, qui neque pictam neque fictam imaginem suam passus est esse, quam qui in eo genere laborarunt: unus enim Xenophontis libellus in eo rege laudando facile omnes imagines omnium statuasque superavit. Atque hoc præstantius mihi fuerit & ad lætitiâ animi, & ad memoriæ dignitatem, si in tua scripta pervenero, quam si in ceterorum, quod non ingenium mihi solum suppeditatum fuerit tuum, sicut Timoleonti a Timæo, aut ab Herodoto Themistocli, sed etiam auctoritas clarissimi, & spectatissimi viri, & in reip. maximis gravissimisque causis cogniti atque in primis probati: ut mihi non solum præconium, quod quum in Sigæum venisset Alexander, ab Homero Achilli tributum esse dixit, sed etiam grave testimonium impertitum clari hominis magnique videatur. Placet enim Hector ille mihi Nævianus, qui non tantum laudari se lætatur: sed addit etiam, a laudato viro. Quod si a te non impetro, hoc est, si qua te res impedierit (neque enim fas esse arbitror, quidquam me

rogan-

rogantem, abs te non impetrare) cogar fortasse facere, quod nonnulli sæpe reprehendunt. Scribam ipse de me: multorum tamen exemplo, & clarorum virorum. Sed, quod te non fugit, hæc sunt in hoc genere vitia: & verecundius ipsi de sese scribant, necesse est, si quid est laudandum: & prætereant, si quid forte reprehendendum est. Accedit etiam, ut minor sit fides, minor auctoritas; multi denique reprehendant, & dicant verecundiores esse præcones ludorum gymnycorum, qui cum ceteris coronas imposuerint victoribus, eorumque nomina magna voce pronuntiarint, cum ipsi ante ludorum missionem corona donentur, alium præconem adhibeant, ne sua voce ipsi se victores esse prædicent. Hæc nos vitare cupimus: & si recipis causam nostram, vitabimus: idque ut facias, rogamus. Ac, ne forte mirere, cur, cum mihi sæpe ostenderis, te accuratissime nostrorum temporum consilia atque eventus litteris mandaturum, a te id nunc tantopere & tam multis verbis petamus: illa nos cupiditas incendit, de qua initio scripsi, festinationis, quod alacres animo sumus: ut & ceteri, viventibus nobis, ex litteris tuis nos cognoscant, & nosmetipsi vivi gloriola nostra perfruamur. His de rebus, quid acturus sis, si tibi non est molestum, rescribas mihi velim. Si enim suscipis causam, conficiam commentarios rerum omnium: sin autem differs me in tempus aliud, coram tecum loquar. Tu interea non cessabis, & ea, quæ habes instituta, perpolies, nosque diliges. Vale.

ARGUMENTUM.

Significat Lucceji litteræ consolatorię quantam profecerint ad eam sollicitudinem minuendam, quam ex afflictâ Republicâ capiebat.

M. T. C. L. LUCCEJO Q. F. S. D. 13

QUamquam ipsa consolatio litterarum tuarum mihi gratissima est (declarat enim sum-

nam benevolentiam conjunctam pari prudentia) tamen illum fructum ex iis litteris vel maximum cepi, quod te præclare res humanas contemnentem, & optime contra fortunam paratum armatumque cognovi. Quam quidem laudem sapientiæ statuo esse maximam, non aliunde pendere, nec extrinsecus aut bene, aut male vivendi suspensas habere rationes. Quæ cogitatio, cum mihi non omnino excidisset (etenim penitus infederat) vi tamen tempestatum, & concursu calamitatum erat aliquantum labefactata, atque convulsa: cui te opitulari & video, & id fecisse etiam proximis litteris, multumque profecisse sentio. Itaque hoc sæpius dicendum, tibi que non significandum solum, sed etiam declarandum, arbitror, nihil mihi esse potuisse tuis litteris gratius. Ad consolandum autem cum illa valent, quæ eleganter copioseque collegisti, tum nihil plus, quam quod firmitudinem gravitatemque animi tui perspexi, quam non imitari, turpissimum existimo. Itaque hoc etiam fortiozem me puto, quam te ipsum præceptorem fortitudinis, quod tu mihi videris spem nonnullam habere, hæc aliquando futura meliora. Casus enim gladiatorii, similitudinesque eæ, tum rationes in ea disputatione a te collectæ, vetabant me reipub. penitus diffidere. Itaque alterum minus mirum, fortiozem te esse, cum aliquid speres: alterum mirum, spe ulla teneri. Quid est enim non ita affectum, ut id non deletum extinctumque omne esse fateare? circumspice omnia membra reipubl. quæ notissima sunt tibi: nullum reperies profecto, quod non fractum debilitatumve sit. Quæ persequerer, si aut melius ea viderem, quam tu vides, aut commemorare possem sine dolore: quamquam tuis monitis præceptisque omnis est abjiciendus dolor. Ergo & domestica feremus, ut censes, & publica paullo etiam fortius fortasse, quam tu ipse, qui præcipis.

Te

Te enim spes aliqua consolatur, ut scribis : nos autem erimus etiam in omni desperatione fortes, ut tu tamen idem & hortaris, & præcipis. Das enim mihi jucundas recordationes conscientiae nostrae, rerumque earum, quas, te in primis auctore, gessimus ; præstitimus enim patriæ non minus certe, quam debuimus : plus profecto, quam est ab animo cuiusquam, aut consilio hominis postulatum. Ignoscas mihi de me ipso aliquid prædicanti. Quarum enim tu rerum cogitatione nos levare ægritudine voluisti, earum etiam commemoratione lenimur. Itaque, ut mones, quantum potero, me ab omnibus molestiis & angoribus abducam, transferamque animum ad ea, quibus secundæ res ornantur, adversæ adjuvantur : tecumque & ero tantum, quantum patietur utriusque ætas & valetudo : &, si esse una minus poterimus, quam volumus ; animorum tamen conjunctione, iisdem studiis ita fruemur, ut nunquam non una esse videamur. Vale.

ARGUMENTUM.

Causam querit, cur Cicero ab Urbe tam diu absit, hortaturque, ut animum a mœrore abducatur.

L. LUCCEJUS CICERONI S. D. 14

SI vales, bene est, ego valeo, sicut soleo : paulo tamen etiam deterius, quam soleo. Te requisivi sæpius, ut viderem. Romæ quia postea non fuisti, quam discesserat, miratus sum, quod item nunc miror. Non habeo certum, quæ te res hinc maxime retrahat. Si solitudine delectare, cum scribas, & aliquid agas eorum, quorum consuesti, gaudeo : neque reprehendo tuum consilium. Nam nihil isto potest esse jucundius, non modo miseris his temporibus & luctuosis, sed etiam tranquillis & optatis : præsertim vel animo defatigato tuo, qui nunc requiem quærat ex ma-

gnis occupationibus : vel erudito , qui semper aliquid ex se promat , quod alios delectet , te ipsum laudibus illustres . Sin autem , sicut hic dum eras , lacrimis & tristitiæ te tradidisti , doleo , quia doles , & angere : non possum te , si non concedis , quod sentimus , ut liberius dicamus , accusare . Quid enim ? tu solus aperta non videbis , qui propter acumen occultissima perspicis ? tu non intelliges , te querelis quotidianis nihil proficere ? non intelliges duplicari sollicitudines , quas elevare tua te prudentia postulat ? Quod si non possumus aliquid proficere suadendo , gratia contentimus , & rogando , si quid nostra causa vis , ut istis te molestiis laxes , & ad convictum nostrum redeas , & ad consuetudinem , vel nostram communem , vel tuam solius ac propriam . Cupio non obtundere te , si non delectare nostro studio : cupio deterrere , ne permaneas in incepto , cum duæ res istæ contrariæ me conturbent : ex quibus , aut in altera mihi velim , si potes , obtemperes , aut in altera non offendas . Vale .

A R G U M E N T U M .

Querenti Luccejo , cur ab Urbe abesset , ejusque maiorem minuere conanti , respondet , & cur doleat , & cur in Urbe non vivat .

M. T. C. L U C C E J O S. D.

15

OMnis amor tuus ex omnibus partibus se ostendit in iis litteris , quas a te proxime accepi : non ille quidem mihi ignotus , sed tamen gratus & optatus : dicerem jucundus , nisi id verbum in omne tempus perdidissem ; neque ob eam unam causam , quam tu suspicaris , & in qua me lenissimis , & amantissimis verbis utens , re graviter accusas : sed quod , illius tanti vulneris quæ remedia esse debebant , ea nulla sunt . Quid enim ? ad amicosne confugiam ? quam multi sunt ? habuimus enim

enim fere communes ; quorum alii occiderunt , alii nescio quo pacto obduruerunt . Tecum vivere possem equidem & maxime vellem : vetustas , amor , consuetudo , studia paria , quod vinculum , quæ res deest nostræ conjunctioni ? possumusne igitur esse una ? nec mehercule intelligo , quid impediat : sed certe adhuc non fuimus , cum essemus vicini in Tusculano , & in Puteolano . Nam quid dicam in urbe ? in qua , cum forum commune sit , vicinitas non requiritur : sed casu nescio quo in ea tempora nostra ætas incidit , ut , cum maxime florere nos oporteret , tum vivere etiam pueret . Quod enim mihi poterat esse perfugium spoliato & domesticis & forensibus ornamentis , atque solatiis ? litteræ , credo , quibus utor assidue . Quid enim aliud facere possum ? sed nescio quo modo ipsæ illæ excludere me a portu & perfugio videntur , & quasi exprobrare , quod in ea vita maneam , in qua nihil insit , nisi propagatio miserrimi temporis . Hic tu ea me abesse urbe miraris , in qua domus nihil delectare possit ? summum sit odium temporum , hominum , fori , curiæ ? Itaque sic litteris utor , in quibus consumo omne tempus , non ut ab his medicinam perpetuam , sed ut exiguam doloris oblivionem petam . Quod si id egissemus ego atque tu , quod ne in mentem quidem nobis veniebat propter quotidianos metus , omne tempus una fuissemus : neque me valetudo tua offenderet , neque te inorror meus . Quod , quantum fieri poterit , consequamur . Quid enim utrique nostrum aprius ? propediem te igitur videbo . Vale .

ARGUMENTUM .

Consolatur diligenter in primis amicum , filii obitum immoderatus ferentem .

M. T. C. TITIO S. D. 16

ET si unus ex omnibus minime sum ad te consolandum accommodatus , quod tantum ex tuis
mo-

molestiis cepi doloris, ut consolatione ipse egerem: tamen, cum longius a summi luctus acerbitate meus abesset dolor, quam tuus, statui nostræ necessitudinis esse, meæque in te benevolentiae, non tacere tanto in tuo mœrore tam diu: sed adhibere aliquam modicam consolationem, quæ levare dolorem tuum posset, si minus sanare potuisset. Est autem consolatio pervulgata quidem illa maxime, quam semper in ore atque in animo habere debemus, homines nos ut esse meminerimus, ea lege natos, ut omnibus fortunæ telis proposita sit vita nostra: neque esse recusandum, quominus ea, qua nati sumus, conditione vivamus: neve tam graviter eos casus feramus, quos nullo consilio vitare possimus: eventisque aliorum memoria repetendis, nihil accidisse nobis novi cogitemus. Neque hæc, neque ceteræ consolationes, quæ sunt a sapientissimis viris usurpatæ, memoriæque litteris proditæ, tantum videntur proficere debere, quantum status ipse nostræ civitatis, & hæc prolatio temporum perditorum: cum beatissimi sint, qui liberos non susceperunt, minus autem miseri, qui his temporibus amiserunt, quam si eodem bona, aut denique aliqua repub. perdidissent. Quod si tuum te desiderium movet, aut si tuarum rerum cogitatione mœres; non facile exhauriri tibi istum dolorem posse universum puto. Sin illa te res cruciat, quæ magis amoris est, ut eorum qui occiderunt, miserias lugeas: ut ea non dicam, quæ sæpissime & legi, & audiui, nihil mali esse in morte, in qua si resideat sensus, immortalitas illa potius, quam mors ducenda sit: sin sit amissus, nulla videri miseria debeat, quæ non sentiatur: hoc tamen non dubitans confirmare possum, ea misceri, parari, impendere reipub., quæ qui reliquerit, nullo modo mihi quidem deceptus esse videatur. Quid est enim jam non modo pudori, probitati, virtuti, rectis studiis, bonis arti-

artibus, sed omnino libertati, ac salutis loci? non mehercule, quemquam audiui hoc gravissimo & pestilentissimo anno adolescentulum, aut puerum mortuum, qui mihi non a Diis immortalibus ereptus ex his miseriis, atque ex iniquissima conditione vitæ videretur. Quare, si tibi unum hoc detrahi potest, nequid iis, quos amasti, mali putes contigisse: permultum erit ex mœrore tuo diminutum. Relinquetur enim simplex illa jam cura doloris tui, quæ non cum illis communicabitur, sed ad teipsum proprie referetur: in qua non est jam gravitatis ac sapientiæ tuæ, quam tu a puero præstitisti, ferre immoderatus casum incommodorum tuorum, qui sit ab eorum, quos dilexeris, miseria maloque se junctus. Etenim eum semper te & privatis in rebus & publicis præstitisti, tuenda tibi ut sit gravitas, & constantiæ servendum. Nam, quod allatura est ipsa diuturnitas, quæ maximos luctus vetustate tollit, id nos præcipere consilio prudentiaque debemus. Etenim si nulla umquam fuit, liberis amissis, tam imbecillo mulier animo, quæ non aliquando lugendi modum fecerit; certe nos, quod est dies allatura, id consilio anteferre debemus: neque expectare temporis medicinam, quam repræsentare ratione possimus. His ego litteris, si quid profecissem, existimabam optandum quiddam me esse assecutum: sin minus forte valuissent, officio tamen esse functum benevolentissimi, atque amicissimi; quem me tibi & fuisse semper existimes velim, & futurum esse confidas. Vale.

ARGUMENTUM.

Excusat tarditatem litterarum: hortatur Sextium, ut exilii casum sapienter, fortiterque ferat.

M. T. C. P. SEXTIO P. F. S. D. 17

NON oblivione amicitiae nostræ, neque intermissione consuetudinis meæ, superioribus
tem-

temporibus ad te nullas litteras misi ; sed quod priora tempora in ruinis reipub. nostrisque jacerunt ; posteriora autem me a scribendo tuis injustissimis atque acerbissimis incommodis retardarunt. Cum vero & intervallum jam satis longum fuisset , & tuam virtutem animique magnitudinem diligentius essem mecum recordatus : non putavi esse alienum institutis meis , hæc ad te scribere . Ego te , P. Sexti , & primis temporibus illis , quibus in invidiam absens , & in crimen vocabare , defendi : & cum in tui familiarissimi judicio ac periculo tuum nomen conjungeretur , quam potui accuratissime te tuamque causam tutatus sum : & proxime recenti adventu meo cum rem aliter institutam offendissem , ac mihi placuisset , si adfuisset ; tamen nulla re salutis tuæ defui : cumque eo tempore invidia annonæ , inimici non solum tui , verum etiam amicorum tuorum , iniquitas totius judicii , multaque alia reipubl. vitia plus , quam causa ipsa veritasque valuissent : Publio tuo , neque opera , neque consilio , neque labore , neque gratia , neque testimonio defui . Quamobrem , omnibus officiis amicitiae diligenter a me sancteque servatis , ne hoc quidem prætermittendum esse duxi , te ut hortarer , rogaremque , ut & hominem te & virum esse meminisses , id est , ut & communem incertumque casum , quem neque vitare quisquam nostrum , neque præstare ullo pacto potest : sapienter ferres , & dolori fortiter , ac fortunæ resisteres : cogitaresque & in nostra civitate , & in ceteris , quæ rerum potitæ sunt , multis fortissimis atque optimis viris , injustis judiciis , tales casus incidisse . Illud utinam ne vere scriberem , ea te republica carere , in qua neminem prudentem hominem res ulla delectet . De tuo autem filio , vereor ne , si nihil ad te scripserim , debitum ejus virtuti videar testimonium non cepisse : sin autem omnia , quæ

quæ sentio, perscripserim; ne refricem meis literis desiderium, ac dolorem tuum; sed tamen prudentissime facies, si illius pietatem, virtutem, industriam, ubicumque eris, tuam esse, tecum esse dices: nec enim minus nostra sunt, quæ animo complectimur, quam quæ oculis intuemur. Quamobrem & illius eximia virtus, summusque in te amor, magnæ tibi consolationi debet esse; & nos, ceterique, qui te non ex fortuna, sed ex virtute tua pendimus, semperque pendemus; & maxime animi tui conscientia, cum tibi nihil merito accidisse reputabis, & illud adjunges, homines sapientes turpitudine, non casu; & delicto suo, non aliorum injuria, commoveri. Ego, & memoria nostræ veteris amicitiae, & virtute, atque observantia filii tui monitus, nullo loco deero, neque ad consolandum, neque ad levandum fortunam tuam. Tu si quid ad me forte scripseris, perficiam, ne te frustra scripsisse arbitrere. Vale.

ARGUMENTUM.

Argumentum utitur septem, ut Fabium exulem consoletur.

M. T. C. T. FABIO S. D. 18.

ET si egomet, qui te consolari cupio, consolandus ipse sum; propterea quod nullam rem gravius jamdiu tuli, quam incommodum tuum: tamen te magnopere non hortor solum, sed etiam pro amore nostro rogo atque oro, te colligas, virumque præbeas, & qua conditione omnes homines, & quibus temporibus nati sumus, cogites. Plus tibi virtus tua dedit, quam fortuna abstulit: propterea quod adeptus es, quod non multi homines novi: amisisti, quæ plurimi homines nobilissimi. Ea denique videtur conditio impendere legum, judiciorum, temporum, ut optime actum cum eo videatur esse, qui quam levissima poena

pœna ab hac repub. discesserit. Tu vero, qui & fortunas & liberos habeas, & nos ceterosque necessitudine & benevolentia tecum conjunctissimos; quique magnam facultatem sis habiturus nobiscum, & cum omnibus tuis vivendi; & cum unum sit judicium, ex tam multis, quod reprehendatur, ut quod una sententia, eaque dubia, potentiæ alicujus condonatum existimetur: omnibus his de causis debes istam molestiam quam levissime ferre. Meus animus erit in te liberosque tuos semper, quem tu esse vis, & qui esse debet. Vale.

A R G U M E N T U M.

Rufo, paullo ante Quæstori suo in Provincia, suadet, ut in bello civili Pompejum sequatur.

M. T. C. R U F O S. D. 19

ET si mihi numquam dubium fuit, quin tibi essem carissimus: tamen quotidie magis id perspicio, exstatque id, quod mihi ostenderas quibusdam litteris, hoc te studiosiorem in me colendo fore, quam in provincia fuisses: (etsi, meo judicio, nihil ad tuum provinciale officium addi potest) quo liberius judicium esse posset tuum. Itaque me & superiores litteræ tuæ admodum delectaverunt, quibus & expectatum meum adventum abs te amanter videbam, &, cum aliter res cecidisset ac putasses, te meo consilio magnopere esse lætatum: & his proximis litteris magnum cepi fructum & judicii & officii tui; judicii, quod intelligo, te, id quod omnes fortes, ac boni viri facere debent, nihil putare utile esse, nisi quod rectum, honestumque sit: officii, quod te mecum, quodcumque cepissem consilii, polliceris fore; quo neque mihi gratius, neque, ut ego arbitror, tibi honestius esse quidquam potest. Mihi consilium captum jamdiu est: de quo ad te,

non

non quo celandus esses, nihil scripsi antea, sed quia communicatio consilii, tali tempore, quasi quædam admonitio videtur esse officii, vel potius efflagitatio ad coeundam societatem vel periculi, vel laboris. Cum vero ea tua sit voluntas, humanitas, benevolentia erga me, libenter amplector talem animum: sed ita (non enim dimittam pudorem in rogando meum) si feceris id, quod ostendis, magnam habebō gratiam: si non feceris; ignoscā; & alterum timori, alterum mihi te negare non potuisse arbitrabor. Est enim res profecto maxima: quid rectum sit, apparet: quid expediat, obscurum est: ita tamen, ut si nos ii sumus, qui esse debemus, id est studio digni, & litteris nostris, dubitare non possimus; quin ea maxime conducant, quæ sunt rectissima. Quare tu, si simul placebit, statim ad me venies: sin idem placebit, atque eodem, nec continuo poteris: omnia tibi ut nota sint, faciam. Quidquid statueris, te mihi amicum; sin id, quod opto, etiam amicissimum iudicabo. Vale.

A R G U M E N T U M.

Purgatio Ciceronis ad Rufum, Questorem antea suum in Cilicia, de rationibus provincialibus.

M. T. C. R U F O S. D.

20

QUO modo potuissem, te convenissem, si eo, quo constitueras, venire voluisses. Quare etsi mei commodi causa commovere me noluisti; tamen ita existimes velim, me antelaturum fuisse, si ad me misisses, voluntatem tuam commodo meo. Ad ea, quæ scripsisti, commodius equidem possem de singulis ad te rebus scribere, si M. Tullius, scriba meus adesset: a quo mihi exploratum est, in rationibus dumtaxat referendis (de ceteris rebus affirmare non possum) nihil eum fecisse scientem, quod esset contra aut rem; aut

aut existimationem tuam : deinde , si rationum referendarum jus vetus & mos antiquus maneret , me relaturum rationes , nisi tecum pro conjunctione nostræ necessitudinis contulissem , confecissemque , non fuisse . Quod igitur fecissem ad urbem , si consuetudo pristina maneret : id , quando lege Julia relinquere rationes in provincia necesse erat , easdemque totidem verbis referre ad ærarium , feci in provincia . Neque ita feci , ut te ad meum arbitrium adducerem ; sed tribui tibi tantum , quantum me tribuisse numquam poenitebit : totum enim scribam meum , quem tibi video nunc esse suspectum , tibi tradidi : tu ei M. Mindium fratrem tuum adjunxisti . Rationes confectæ me absente sunt tecum , ad quas ego nihil adhibui præter lectionem . Ita accepi librum a meo servo scriba , ut eundem acceperim a fratre tuo . Si honos is fuit , majorem tibi habere non potui : si fides , majorem tibi habui , quam pene ipsi mihi . Si providendum fuit , ne quid aliter , ac tibi & honestum , & utile esset , referretur ; non habui , cui potius id negotii darem quam cui dedi . Illud quidem certe factum est , quod lex jubebat , ut apud duas civitates , Laodicensem , & Apamensem , quæ nobis maximæ videbantur , quoniam ita necesse erat , rationes confectas , & consolutas deponeremus . Itaque huic loco primum respondeo , me , quamquam justis de causis rationes deferre properarim , tamen te expectaturum fuisse , nisi in provincia relictas rationes pro relatis haberem . Quamobrem , de Volusio quod scribis , non est id rationum : docuerunt enim me periti homines : in his cum omnium peritissimus , tum mihi amicissimus C. Camillus , ad Volusium transferri nomen a Valerio non potuisse : sed prædes Valerianos teneri . Neque id erat HS xxx. ut scribis , sed xix. Erat enim curata nobis pecunia Valerii mancipis nomine :

ex qua reliquum quod erat in rationibus, retuli. Sed sic me & liberalitatis fructu privas, & diligentia, & (quod minime tamen laboro) mediocris etiam prudentia. Liberalitatis, quod mavis scribae mei beneficio, quam meo, legatum meum, praefectumque Q. Leptam, maxima calamitate levatos; cum praesertim non deberent esse obligati: diligentia, quod existimas de tanto officio meo, tanto etiam periculo nec scisse me quidquam, nec cogitasse: scribam, quicquid voluisset, cum id mihi ne recitasset quidem, retulisse: prudentia, cum rem a me non insipienter excogitatam: ne cogitatam quidem putes. Nam & Volusii liberandi meum fuit consilium: &, ut multa tam gravis Valerianis praedibus, ipsique T. Mario depelleretur, a me inita ratio est: quam quidem omnes non solum probant, sed etiam laudant: &, si verum scire vis, hoc uni scribae meo intellexi non nimium placere. Sed ego putavi esse viri boni, cum populus suum servaret, consulere fortunis tot vel amicorum vel civium. Nam de Lucejo est ita actum, ut, auctore Cn. Pompejo, ista pecunia in fano poneretur. Id ego agnovi meo jussu esse factum. Qua pecunia Pompejus est usus, ut tua, quam tum deposuerat Sextius. Sed haec ad te nihil intelligo pertinere. Illud me non animadvertisse moleste ferrem, ut adscriberem, te in fano pecuniam jussu meo deposuisse, nisi ista pecunia gravissimis esset certissimisque monumentis testata, cui data, quo S. C. quibus tuis, quibus meis litteris P. Sextio tradita esset. Quae cum viderem tot vestigiis impressa, ut in his errari non posset: non adscripsi id, quod tua nihil referebat: ego tamen adscripsisse malletm, quando id te video desiderare. Sicut scribis tibi id esse referendum, idem ipse sentio; neque in eo quidquam a meis rationibus discrepabunt tuae. Adde enim tu, meo jussu; quod ego quidem non

non addidi; nec causa est, cur negem: nec, si esset, & tu nolles, negarem. Nam de HS. nongentis millibus, certe ita relatum est, ut tu, siue frater tuus referri voluit. Sed, si quid est (quando de Luccejo parum provisum est) quod ego in rationibus referendis etiamnum corrigere possim: de eo mihi, cum S. C. non sim usus, quid per leges liceat, considerandum est: te certe in pecunia exacta ita afferre ex meis rationibus relatis non oportuit, nisi quid me fallit: sunt enim alii peritiores. Illud cave dubites, quin ego omnia faciam, quæ interesse tua, aut etiam velle te existimem, si ullo modo facere possim. Quod scribis de beneficiis: scito a me & tribunos militares, & præfectos, & contubernales dumtaxat meos delatos esse. In quo quidem ratio me fefellit: liberum enim mihi tempus ad eos deferendos existimabam dari: postea certior sum factus, triginta diebus deferri necesse esse, quibus rationes retulissem. Sane moleste tuli, non illa beneficia tuæ potius ambitioni reservata esse, quam meæ, qui ambitione nihil uterer. De centurionibus tamen, & de tribunorum mil. contubernalibus, res est in integro: genus enim horum beneficiorum definitum lege non erat. Reliquum est de HS. centum millibus: de quibus memini mihi a te Myrina litteras esse allatas, non mei errati, sed tui: in quo peccatum videbatur esse, si modo erat, fratris tui, & Tullii. Sed cum id corrigi non posset, quod, jam depositis rationibus, ex provincia decessemus: credo me quidem tibi pro animi mei voluntate, proque ea spe facultatum, quam tum habebamus, quam humanissime potuerim, rescripsisse. Sed neque tum me humanitate mearum litterarum obligatum puto, neque tuam hodie epistolam de HS. centum sic accepisse, ut ii accipiunt, quibus epistolæ per hæc tempora molestæ sunt. Simul illud
cogi-

cogitare debes, me omnem pecuniam, quæ ad me salvis legibus pervenisset, Ephesi apud publicanos deposuisse: id fuisse HS. xxii. mil. eam omnem pecuniam Pompejum abstulisse: quod ego sive æquo animo, sive iniquo fero: ut de HS. centum æquo animo ferre debes, & existimare eo minus ad te vel de tuis cibariis, vel de mea liberalitate pervenisse. Quod si mihi expensa ista HS. centum tulisses, tamen, quæ tua est suavitas, quique in me amor, nolles a me hoc tempore æstimationem accipere: nam, numeratum si cuperem, non erat. Sed hæc jocatum me putato, ut ego te existimo. Ego tamen, cum Tullius rure redierit, mittam eum ad te; si quid ad rem putabis pertinere. Hanc epistolam cur non scindi velim, causa nulla est. Vale.

A R G U M E N T U M.

Cupidum se esse significat Mescinii videndi: eumque hortatur, ut acerbitatem temporum litterarum studio, optimæque conscientiae recordatione mitiget.

M. T. C. LUCIO MESCINIO S. D. 21

GRATÆ mihi tuæ litteræ fuerunt: ex quibus intellexi, quod etiam sine litteris arbitrabar, te summa cupiditate effectum videndi mei: esse quod ego ita libenter accipio, ut tamen tibi non concedam. Nam tecum esse, ita mihi omnia, quæ opto, contingant, ut vehementer velim. Etenim, cum esset major & virorum, & civium bonorum, & jucundorum hominum, & amantium mei copia; tamen erat nemo, quicum essem libentius, quam tecum: & pauci, quibuscum essem æque libenter: hoc vero tempore, cum alii interierint, alii absint, alii mutati voluntate sint: unum, medius fidius, tecum diem libentius posuerim, quam hoc omne tempus cum plerisque eorum, quibuscum vivo necessario. Noli enim

enim existimare, mihi non solitudinem jucundiorē esse, quā tamen ipsa uti non licet, quam sermones eorum, qui frequentant domum meam, excepto uno, aut ad summum altero. Itaque utor eodem perfugio, quo tibi utendum censeo, litterulis nostris: præterea etiam conscientia consiliorum meorum. Ego enim is sum, quemadmodum tu facillime potes existimare, qui nihil umquam mea potius, quam meorum civium causa fecerim, cui nisi invidisset is, quem tu numquam amasti; (me enim amabas) & ipse beatus esset, & omnes boni. Ego sum is, qui nullius vim plus valere volui, quam honestum otium: idemque, cum illa ipsa arma, quæ semper timueram, plus posse sensi, quam illum consensum bonorum, quem ego idem effeceram: quavis tuta conditione pacem accipere malui, quam viribus cum valentiore pugnare. Sed & hæc, & multa alia coram brevi tempore licebit. Neque me tamen ulla res alia Romæ tenet, nisi expectatio rerum Africanarum: videtur enim mihi res in propinquum adducta discrimen. Puto autem mea nonnihil interesse; (quamquam id ipsum, quid intersit, non sane intelligo) verumtamen, quidquid illinc nunciatum sit, non longe abesse a consiliis amicorum. Est enim res ipsa jam in eum locum adducta, ut, quamquam multum intersit inter eorum causas, qui dimicant, tamen inter victorias non multum interfuturum putem. Sed plane animus, qui dubiis rebus forsitan fuerit infirmior, desperatis confirmatus est multum: quem etiam superiores tuæ litteræ confirmarunt: quibus intellexi, quam fortiter injuriam ferres: juvitque me; tibi cum summam humanitatem, tum etiam tuas litteras profuisse. Verum enim scribam: teneriore mihi animo videbare: sicut omnes fere. Qui, vita ingenua, in beata civitate, & libera viximus. Sed, ut illa secunda moderate tulimus, sic hanc
non

non solum adversam, sed etiam funditus ever-
sam fortunam fortiter ferre debemus; ut hoc sal-
tem in maximis malis boni consequamur, ut mer-
tem, quam etiam beati contemnere debeamus;
propterea quod nullum sensum esset habitura,
nunc sic affecti, non modo contemnere debeamus,
sed etiam optare. Tu, si me diligis, fruiere isto
otio, tibi que persuade, præter culpam ac pec-
catum, quo semper caruisti, & carebis, homi-
ni accidere nihil posse, quod sit horribile aut
pertimescendum. Ego, si videbitur recte fieri
posse, ad te veniam brevi: si quid acciderit, ut
mutandum consilium sit, te certior faciam sta-
tim. Tu ita fac cupidus mei videndi sis, ut
istiæ te ne moveas tam infirma valetudine, nisi
ex me prius quæsieris per litteras, quid te velim
facere. Me velim, ut facis, diligas, valetudi-
nique tuæ & tranquillitati animi servias. Vale.

LIBER VI.

ARGUMENTUM.

*A. Manlium Torquatum, qui Pompejanas partes
secutus erat, consolatur in eo, quod Romæ non
sit; & aliquam simul spem reditus ostendit.*

M. T. C. A. TORQUATO S. D. I

Etsi ea perturbatio est omnium rerum, ut suæ
quemque fortunæ maxime pœniteat; nemo-
que sit, quin ubivis, quam ibi, ubi est, esse
malit: tamen mihi dubium non est, quin hoc
tempore bono viro Romæ esse miserrimum sit.
Nam, etsi quocumque in loco quisque est, idem
est ei sensus, & eadem acerbitas ex interitu re-
rum & publicarum & suarum: tamen oculi au-
gent dolorem; qui ea, quæ ceteri audiunt, in-
tueri coguntur, nec avertere a miseriis cogita-

tionem sinunt. Quare etsi multarum rerum desiderio te angere necesse est: tamen illo dolore, quo maxime te confici audio, quod Romæ non sis, animum tuum libera. Etsi enim cum magna molestia tuos tuaque desideras: tamen illa quidem, quæ requiris, suum statum tenent: nec melius, si tu adesses, tenerent: nec sunt ullo in proprio periculo. Nec debes tu, cum de tuis cogitas, aut præcipuam aliquam fortunam postulare, aut communem recusare. De te autem ipso, Torquate, est tuum sic agitare animo, ut non adhibeas in consilium cogitationum tuarum desperationem, aut timorem. Nec enim is, qui in te adhuc injustior, quam tua dignitas postulabat, fuit, non magna signa dedit animi erga te mitigati. Nec tamen is ipse, a quo salus petitur, habet explicatam aut exploratam rationem salutis suæ. Cumque omnium bellorum exitus incerti sint; ab altera victoria tibi periculum nullum esse perspicio, quod quidem se junctum sit ab omnium interitu: ab altera te ipsum numquam timuisse certo scio. Reliquum est, ut te id ipsum, quod ego quasi consolationis loco pono, maxime excruciet, commune periculum reipub.: cujus tanti mali, quamvis docti viri multa dicant, tamen vereor, ne consolatio ulla possit vera reperiri, præter illam, quæ tanta est, quantum in cujusque animo roboris est atque nervorum. Si enim bene sentire recteque facere, satis est ad bene beateque vivendum, vereor, ne eum, qui se optimorum consiliorum conscientia sustentare possit, miserum esse nefas sit dicere. Nec enim nos arbitror, victoriæ præmiis ductos, patriam olim, & liberos, & fortunas reliquisse: sed quoddam nobis officium justum, & pium, & debitum reipub., nostræque dignitati videbatur: qui neque, cum id faciebamus, tam eramus amentes, ut explorata nobis esset victoria. Quare si id evenit,

nit, quod ingredientibus nobis in causam propositum fuit accidere posse: non debemus ita cadere animis, quasi aliquid evenit, quod fieri posse numquam putarimus. Simus igitur ea mente, quam ratio & virtus præscribit, ut nihil in vita nobis præstandum præter culpam putemus: eaque cum careamus, omnia humana placate & moderate feramus. Atque hæc eo pertinet oratio, ut, perditis rebus omnibus, tamen ipsa virtus se sustentare posse videatur. Sed, si est spes aliqua rebus communibus, ea tu, quicumque status est futurus, carere non debes. Atque hoc mihi scribenti veniebat in mentem, me eum esse, cuius tu desperationem accusare solitus esses; quemque auctoritate tua cunctantem & diffidentem excitare. Quo quidem tempore non ego causam nostram, sed consilium improbabam. Sero enim nos iis armis adversari videbam, quæ multo ante confirmata per nosmetipsos erant; dolebamque, pilis & gladiis; non consiliis, neque auctoritatibus nostris, de jure publico disceptari. Neque ego ea, quæ facta sunt, fore cum dicebam, divinabam futura: sed quod & fieri posse, & exitiosum fore, si evenisset, videbam; id ne accideret, timebam: præsertim cum, si mihi alterutrum de eventu, atque exitu rerum promittendum esset, id futurum, quod evenit, exploratius possem promittere. Iis enim rebus præstabamus, quæ non prodeunt in aciem: usu autem armorum, & militum robore inferiores eramus. Sed tu illum animum nunc adhibe, quæso, quo me tum esse oportere censebas. Hæc eo scripsi, quod mihi nunc Philargyrus tuus omnia de te requirenti, fidelissimo animo (ut mihi quidem visus est) narravit, te interdum sollicitum solere esse vehementius: quod facere non debes, nec dubitare, quin aut aliqua repub. sis futurus, qui esse debes; aut perdita, non affli-

etio- re conditione, quam ceteri. Hoc vero tempus, quo exanimati omnes & suspensi sumus, hoc moderatiore animo ferre debes, quod & in ea urbe es, ubi nata & alta est ratio, ac moderatio vitæ: & habes Ser. Sulpicium, quem semper unice dilexisti; qui te profecto & benevolentia & sapientia consolatur: cujus si essemus & auctoritatem, & consilium secuti, rogati potius potentiam, quam armati victoriam subissemus. Sed hæc longiora fortasse fuerunt, quam necesse fuit: illa, quæ majora sunt, brevius exponam. Ego habeo, cui plus, quam tibi, debeam, neminem: quibus tantum debeam, quantum tu intelligis, eos mihi huius belli casus eripuit. Qui sim autem hoc tempore, intelligo: sed quia nemo est tam afflictus, qui, si nihil aliud studeat, nisi id quod agit, non possit navare aliquid, & efficere: omne meum consilium, operam, studium, certe velim existimes tibi, tuisque liberis esse debitum. Vale.

A R G U M E N T U M.

Primum se excusat, quod minus sæpe scribat: deinde de reditu Torquati esse impetratum significat: & consolationis loco subjungit, nihil ei præcipue timendum.

M. T. C. A. TORQUATO S. D. 2

PEto a te, ne me putes oblivione tui rarius ad te scribere, quam solebam: sed aut gravitate valetudinis, qua tamen jam paululum videor levare: aut quod absim ab urbe, ut, qui ad te profisciscantur, scire non possim. Quare velim ita statutum habeas, me tui memoriam summa cum benevolentia tenere, tuasque omnes res non minori mihi curæ, quam meas esse. Quod majore in varietate versata est adhuc tua causa, quam homines aut volebant, aut opinabantur: mihi crede, non est pro malis temporum, quod mole-

molestie feras. Necesse est enim aut armis urgeri rempub. sempiternis, aut, his positis, recreari aliquando, aut funditus interire. Si arma valent; nec eos, a quibus reciperis, vereri debes; nec eos, quos adjuvisti. Sin armis aut conditione positis, aut defatigatione abjectis, aut victoria detractis, civitas respiraverit, & dignitate tua frui tibi & fortunis licebit. Sin omnino interierint omnia, fueritque is exitus, quem vir prudentissimus M. Antonius jam tum timebat, cum tantum instare malorum suspicabatur: misera est illa quidem consolatio, tali præsertim civi & viro, sed tamen necessaria, nihil esse præcipue cuiquam dolendum in eo, quod accidat universis. Quæ vis insit in his paucis verbis (plura enim committenda epistolæ non erant) si attendes, quod facis; profecto etiam sine meis litteris intelliges, te aliquid habere, quod speres; nihil quod aut hoc, aut aliquo reipub. statu timeas: omnia si interierint, cum superstitem te esse reipub. ne si liceat quidem, velis, ferendam esse fortunam, præsertim quæ absit a culpa. Sed hæc hætenus. Tu velim scribas ad me, quid agas, & ubi futurus sis: ut aut quo scribam, aut quo veniam, scire possim. Vale.

ARGUMENTUM.

Consolari vult: sed quia nihil aliud ad consolandum suppetit, consolationem ait debere esse optimorum consiliorum conscientiam.

M. T. C. A. TORQUATO S. D.

3.

Superioribus litteris, benevolentia magis adductus, quam quod res ita postularet, fui longior. Neque enim confirmatione nostra egebat virtus tua: neque erat ea mea causa atque fortuna, ut, cui omnia deessent, alterum confirmarem. Hoc item tempore brevior esse debeo: siue enim tum nihil opus fuit tam multis ver-

bis, nihilo magis nunc opus est: sive tum opus fuit, illud satis est, præsertim cum accesserit nihil novi. Nam etsi quotidie aliquid audimus earum rerum, quas ad te perferri existimo: summa tamen eadem est, & idem exitus, quem ego tam video animo, quam ea, quæ oculis cernimus: nec vero quidquam video, quod non idem te videre certo sciam. Nam etsi, quem exitum acies habitura sit, divinare nemo potest: tamen & belli exitum video; & si id minus, hoc quidem certe, cum sit necesse alterutrum vincere, qualis futura sit vel hæc, vel illa victoria. Idque cum optime perspexi, tale video, nihil ut mali videatur esse futurum, si id vel ante acciderit, quod vel maximum ad timorem proponitur. Ita enim vivere, ut non sit vivendum, miserrimum est. Mori autem nemo sapiens miserum duxit, ne beato quidem. Sed in ea es urbe, in qua hæc, vel plura, & ornatiora parietes ipsi loqui posse videantur. Ego tibi hoc confirmo, etsi levis est consolatio ex miseriis aliorum, nihilo te nunc majore in discrimine esse, quam quemvis aut eorum, qui discesserint, aut eorum, qui remanserint: alteri dimicant; alteri victorem timent. Sed hæc consolatio levis, illa gravior, qua te uti spero: ego certe utor: nec enim, dum ero, angar ulla re, cum omni vacem culpa: &, si non ero, sensu omnino carebo. Sed rursus *γλαῦκ' εἰς Ἀθήνας*, qui ad te hæc. Mihi tu, tui, tua omnia maximæ curæ sunt, & dum vivam, erunt. Vale.

A R G U M E N T U M.

Consolatoria epistola, rationibus undecumque collectis: sed, si consideras, desperationem potius continet.

M. T. C. A. TORQUATO S. D.

4

NOVI, quod ad te scriberem, nihil erat: & tamen, si quid esset, sciebam te a tuis certio-

certiorem fieri solere. De futuris autem rebus etsi semper difficile est dicere, tamen interdum conjectura possis propius accedere, cum res est ejusmodi, cujus exitus provideri possit. Nunc tantum videmur intelligere, non diuturnum bellum: etsi idipsum nonnullis videatur secus. Equidem cum hæc scribebam, aliquid jam actum putabam: non quo ego certo scirem, sed quo non difficilis erat conjectura. Nam cum omnis belli Mars communis, & cum semper incerti exitus præliorum sunt: tum hoc tempore ita magnæ utrinque copiæ, ita paratæ ad depugnandum esse dicuntur, ut, utercumque vicerit, non sit mirum futurum. Illa in dies singulos magis magisque opinio hominum confirmatur, etiam si inter causas armorum aliquantum intersit, tamen inter victorias non multum interfuturum. Alteros propemodum jam sumus experti: de altero, nemo est, quin cogitet, quam sit metuendus iratus victor armatus. Hoc loco si videor angere dolorem tuum, quem consolando levare debebam, fateor me communium malorum consolationem nullam invenire, præter illam: quæ tamen, si possis eam suscipere, maxima est, quæque ego quotidie magis utor; conscientiam rectæ voluntatis, maximam consolationem esse rerum incommodarum: nec esse ullum magnum malum, præter culpam. A qua quando tantum absumus, ut etiam optime fenserimus: eventusque magis nostri consilii, quam consilium reprehendatur: & quando præstitimus, quod debuimus, moderate, quod evenit, feramus. Sed hoc mihi tamen non sumo, ut te consolet de communibus miseriis, quæ & ad consolandum majoris ingenii, & ad ferendum, singularis virtutis indigent. Illud cuivis facile est docere, cur præcipue tu dolere nihil debeas. Ejus enim, qui tardior in te levando fuit, quam fore putaremus, non est mihi

dubia de tua salute sententia: de aliis autem non arbitror te exspectare quid sentiam. Reliquum est, ut te angat, quod absis a tuis tamdiu. Res molesta, præsertim ab iis pueris, quibus nihil potest esse festivius. Sed, ut ad te scripsi antea, tempus est hujusmodi, ut suam quisque conditionem miserrimam putet: &, ubi quisque sit, ibi esse minime velit. Equidem, nos quod Romæ sumus, miserrimum esse duco; non solum quod in omnibus malis acerbius est videre, quam audire: sed etiam, quod ad omnes casus subitorum periculorum magis objecti sumus, quam si abessemus: etsi meipsum consolatorem tuum, non tantum litteræ, quibus semper studui, quantum longinquitas temporis mitigavit. Quanto fuerim in dolore, meministi. In quo prima illa consolatio est, vidisse me plus, quam ceteros, cum cupiebam, quavis iniqua conditione, pacem. Quod etsi casu, non divinatione mea factum est; tamen hac inani prudentiæ laude delector. Deinde, quod mihi ad consolationem commune tecum est; si jam vocer ad exitum vitæ, non ab ea repub. avellar, qua carendum esse doleam; præsertim cum id sine ullo sensu futurum sit. Adjuvat etiam ætas, & acta jam vita, quæ cum cursu suo bene confecto delectatur; tum vetat in eo vix timere, quo nos jam natura ipsa pæne perduxerit. Postremo is vir, vel etiam ii viri, hoc bello occiderunt, ut impudentia videatur, eandem fortunam, si res cogat, recusare. Equidem mihi omnia propono: nec ullum est tantum malum, quod non putem impendere. Sed cum plus in metuendo mali sit, quam in illo ipso, quod timetur, desino: præsertim cum id impendeat, in quo non modo dolor nullus, verum finis etiam doloris futurus sit. Sed hæc satis multa, vel plura potius, quam necesse fuit: facit autem non loquacitas mea, sed benevolentia lon-

longiores epistolas. Servium discessisse Athenis, moleste tuli: non enim dubito, quin magnæ tibi levationi sit solitus esse quotidianus congressus, & sermo cum familiarissimi hominis, tum optimi & prudentissimi viri. Tu velim tere, ut debes & soles, tua virtute sustentares. Ego, quæ te velle, quæque ad te, & ad tuos pertinere arbitrabor, omnia studiose diligenterque curabo: quæ cum faciam, benevolentiam tuam erga me imitabor, merita non assequar. Vale.

ARGUMENTUM.

Cæcinam, qui pro Pompejo contra Cæsarem pugnaverat, patria carentem bene sperare jubet, sequæ ei nulla in re defuturum pollicetur.

M. T. C. A. CÆCINÆ S. D.

5

QUotiescumque filium tuum video (video autem fere quotidie) polliceor ei studium quidem meum & operam, sine ulla exceptione aut laboris, aut occupationis, aut temporis: gratiam autem, atque auctoritatem, cum hac exceptione, quantum valeam, quantumque possim. Liber tuus & lectus est, & legitur a me diligenter, & custoditur diligentissime. Res & fortunæ tuæ mihi maximæ curæ sunt; quæ quidem quotidie faciliores mihi, & meliores videntur: multisque video magnæ esse curæ: quorum de studio, & de sua spe filium ad te perscripsisse certo scio. Iis autem de rebus, quas conjectura consequi possumus, non mihi sumo, ut plus ipse prospiciam, quam te videre atque intelligere mihi persuaserim: sed tamen, quia fieri potest, ut tu ea perturbatiore animo cogites, puto esse meum, quid sentiam exponere. Ea natura rerum est, & is temporum cursus, ut non possit ista aut tibi, aut ceteris fortuna esse diuturna;

G v

neque

neque hærere in tam bona caussa, & in tam bonis civibus tam acerba injuria. Quare ad eam spem, quam extra ordinem de te ipso habemus, non solum propter dignitatem & virtutem tuam (hæc enim ornamenta sunt tibi etiam cum aliis communia) accedunt tua præcipua propter eximium ingenium summamque virtutem: cui mehercule hic, cujus in potestate sumus, multum tribuit. Itaque ne punctum quidem temporis in ista fortuna fuisses, nisi eo ipso bono tuo, quo delectatur, se violatum putaret: quod ipsum lenitur quotidie: significaturque nobis ab iis, qui simul cum eo vivunt, tibi hanc ipsam opinionem ingenii apud ipsum plurimum profuturam. Quapropter primum fac animo forti, atque magno sis: ita enim natus, ita educatus, ita doctus es, ita etiam cognitus, ut tibi id faciendum sit: deinde spem quoque habeas firmissimam propter eas causas, quas scripsi. A me vero tibi omnia, liberisque tuis paratissima, esse, confidas velim. Id enim & vetustas nostri amoris, & mea consuetudo in meos, & tua multa erga me officia postulant. Vale.

A R G U M E N T U M.

Ad confirmandum Cæcinæ exulis animum divinationem quandam inducit, sumptam ex Cæsaris natura, & ex civilium temporum ratione.

M. T. C. CÆCINÆ S. D.

6

VEreor, ne desideres officium meum; quod tibi pro nostra & meritorum multorum, & studiorum, & partium conjunctione, deesse non debet: sed tamen vereor, ne litterarum a me officium requiras: quas tibi & jampridem, & sæpe misissem, nisi quotidie melius expectans, gratulationem, quam confirmationem animi tui complecti litteris maluissem. Nunc, ut spero,
brevis

breui gratulabimur. Itaque in aliud tempus id argumentum epistolæ differo. His autem litteris animum tuum, quem minime imbecillum esse & audio, & spero, etsi non sapientissimi, at amicissimi hominis auctoritate, confirmandum etiam atque etiam puto: nec iis quidem verbis, quibus te consolet ut afflictum, & jam omni spe salutis orbatum; sed ut eum, de cuius incolumitate non plus dubitem, quam te meminisse dubitare de mea. Nam cum me ex republica expulissent ii, qui illam cadere posse, stante me, non putarunt: meminisse, me ex multis hospitibus, qui ad me ex Asia, in qua tu eras, venerant, audire, te de glorioso & celeri reditu meo confirmare. Si te ratio quædam Etruscæ disciplinæ, quam a patre nobilissimo atque optimo viro acceperas, non fefellit; ne nos quidem nostra divinatio fallat, quam cum sapientissimorum virorum monumentis atque præceptis, plurimoque, ut tu scis, doctrinæ studio, tum magno etiam usu tractandæ reipublicæ, magnaue nostrorum temporum varietate consecuti sumus. Cui quidem divinationi hoc plus confidimus, quod ea nos nihil in his tam obscuris rebus, tamque perturbatis umquam omnino fefellit. Dicerem, quæ antea futura dixissem, ni vereretur, ne ex eventis fingere videretur. Sed tamen plurimi sunt testes, me & initio, ne conjungeretur se cum Cæsare, monuisse Pompejum: & postea, ne se jungeret: conjunctione frangi Senatus opes; disjunctione civile bellum excitari videbam. At qui utebar familiarissime Cæsare, Pompejum faciebam plurimi: sed erat meum consilium cum fidele Pompejo, tum salutare utrique. Quæ præterea providerim, prætereo. Nolo enim, hunc de me optime meritum existimare, ea me suasisse Pompejo, quibus ille si paruisset, esset hic quidem clarus in toga, & princeps: sed tantas opes, quantas nunc

habet, non haberet. Eundem in Hispaniam censui: quod si fecisset, civile bellum nullum omnino fuisset. Rationem haberi absentis non tam pugnavi, ut liceret, quam ut, quando, ipso consule pugnante, populus iusserat, haberetur. Causa belli orta est: quid ego prætermisi aut monitorum, aut querelarum, cum vel iniquissimam pacem iustissimo bello anteferrem? Victa est auctoritas mea non tam a Pompejo (nam is movebatur) quam ab iis, qui duce Pompejo fratri, peropportunam & rebus domesticis, & cupiditatibus suis illius belli victoriam fore putabant. Susceptum bellum est, quiescente me: depulsum ex Italia, manente me, quoad potui: sed valuit apud me plus pudor meus, quam timor. Veritus sum deesse Pompeji saluti, cum ille aliquando non defuisset meæ. Itaque vel officio, vel fama bonorum, vel pudore victus, ut in fabulis Amphiaras, sic ego prudens, & sciens ad pestem ante oculos positam sum profectus. Quod in bello nihil adversi accidit, non prædicente me. Quare, quando, ut augures, & astrologi solent, ego quoque augur publicus ex meis superioribus prædictis constitui apud te auctoritatem augurii & divinationis meæ, debet habere fidem nostra prædictio. Non igitur ex alitis involatur, nec e cantu sinistro oscinis, ut in nostra disciplina est, nec ex tripudiis solistimis, aut sonivis tibi auguror, sed habeo alia signa, quæ observem: quæ etsi non sunt certiora illis, minus tamen habent vel obscuritatis, vel erroris. Notantur autem mihi ad divinandum signa duplici quadam via: quarum alteram duco a Cæsare ipso; alteram a temporum civilium natura atque ratione. In Cæsare hæc sunt: mitis clemensque natura, qualis exprimitur præclare illo libro querelarum tuarum. Accedit, quod mirifice ingeniis excellentibus, quale est tuum, delectatur: præterea cedit mul-
torum

torum justis & officio incensis, non inanibus aut ambiosis voluntatibus. In quo vehementer eum consentiens Etruria movebit. Cur hæc igitur adhuc parum profecerunt? Quia non putat se sustinere causas posse multorum, si tibi, cui justius videtur irasci posse, concesserit. Quæ est igitur, inquires, spes ab irato? Eodem fonte se hausturum intelligit laudes suas, e quo sit leviter aspersus. Postremo homo est valde acutus, & multum providens: intelligit, te, hominem in parte Italiæ minime contemnenda facile omnium nobilissimum, & in communi republica, cuivis summorum tuæ ætatis, vel ingenio, vel gratia, vel fama populi Rom. parem, non posse prohibere a republ. diutius. Nollet hoc temporis potius esse aliquando beneficium, quam jam suum. Dixi de Cæsare: nunc dicam de temporum rerumque natura. Nemo est tam inimicus ei causæ, quam Pompejus animatus melius, quam paratus susceperat, qui nos malos cives dicere aut homines improbos audeat. In quo admirari soleo gravitatem, & justitiam, & sapientiam Cæsaris: numquam, nisi honorificentissime Pompejum appellat. At in ejus personam multa fecit asperius. Armorum ista, & victoriæ sunt facta, non Cæsaris. At nos quemadmodum est complexus? Cassium sibi legavit: Brutum Galliæ præfecit, Sulpicium Græciæ: Marcellum, cui maxime succensebat, cum summa illius dignitate restituit. Quo igitur hæc spectant? Rerum hoc natura & civilium temporum non patietur: nec manens, nec mutata ratio feret: primum, ut non in causa pari eadem sit & conditio, & fortuna omnium; deinde, ut in eam civitatem boni viri, & boni cives nulla ignominia notati non révertantur, in quam tot nefariorum scelerum condemnati reverterunt. Habes angurium meum; quo, si quid addubitarem, non potius uterer, quam illa consolatione, qua facile for-

tem

tem virum sustentarem : te , si explorata victoria arma sumpsisses pro republica (ita enim tum putabas) non nimis esse laudandum : sin , propter incertos exitus eventusque bellorum , posse accidere , ut vinceremur , putasses ; non debere te ad secundam fortunam bene paratum fuisse , adversam ferre nullo modo posse . Disputarem etiam , quanto solatio tibi conscientia tui facti , quantæ delectationi in rebus adversis literæ esse deberent . Commemorarem non solum veterum , sed horum etiam recentium vel ducum , vel comitum tuorum gravissimos casus : etiam externos multos claros viros nominarem . Levat enim dolorem communis quasi legis , & humanæ conditionis recordatio . Exponerem etiam , quemadmodum hic , & quanta in turba , quantaque in confusione rerum omnium viveremus : necesse est enim minore desiderio perdita repub. carere , quam bona . Sed hoc genere nihil opus est . Incolumem te cito , ut spero , vel potius , ut perspicio , videbimus : interea tibi absenti , & huic , qui adest , imagini animi & corporis tui , constantissimo atque optimo filio tuo studium , officium , operam , laborem meum jampridem & pollicitus sum & detuli : nunc hoc amplius , quod me amicissime quotidie magis Cæsar amplectitur ; familiares quidem ejus , sicuti neminem . Apud quem quidquid valebo vel auctoritate , vel gratia , valebo tibi . Tu cura , ut cum firmitudine te animi , tum etiam spe optima sustentens . Vale .

A R G U M E N T U M .

Primum agit de libro , quem in Cæsarem scripserat : deinde studiose rogat , ut veniam sibi a Cæsare , potestatemque impetret redeundi .

A. CÆCINA CICERONI S. D. . 7

Quod tibi non tam celeriter liber est redditus , ignosce timori nostro , & miserere tempore

temporis. Filius, ut audio, pertimuit, (neque injuria) si liber exisset, quando non tam interest, quo animo scribatur, quam quo accipiatur, ne ea res inepte mihi noceret: cum præsertim adhuc stili poenas dem. Qua quidem in re singulari sum fato: nam cum mendum scripturæ litura tollatur, stultitia fama multetur; meus error exilio corrigitur, cujus summa criminis est, quod armatus adversario maledixi. Nemo nostrum est, ut opinor, quin vota victoriæ suæ fecerit: nemo, quin, etiam cum de alia re immolaret, tamen eo quidem ipso tempore, ut quamprimum Cæsar superaretur, optaret. Hoc si non cogitat, omnibus rebus felix est: si scit, & persuasus est, quid irascitur ei, qui aliquid scripsit contra suam voluntatem, cum ignoscat omnibus, qui multa deos venerati sint contra ejus salutem? Sed, ut eodem revertar, causa hæc fuit timoris. Scripsi de te parce, medius fidius, & timide, non revocans me ipse, sed pene refugiens. Genus autem hoc scripturæ, non modo liberum, sed incitatum atque elatum esse debere, quis ignorat? Solutum existimatur esse, alteri maledicere: tamen cavendum est, ne in petulantiam incidas: impeditum, seipsum laudare, ne vitium arrogantiae subsequatur. Solum vero liberum, alterum laudare, de quo quidquid derrahas, necesse est aut infirmitati, aut invidiæ assignetur. Ac nescio, an tibi gratius, opportuniusque acciderit. Nam quod præstare non poteram, primum erat non attingere: secundum beneficium, quam parcissime facere. Sed tamen ego me quidem sustinui: multa minui, multa sustuli: complura ne posui quidem. Quemadmodum igitur scalarum gradus, si alios tollas, alios incidas, nonnullos male hærentes relinquas, ruinæ periculum struas, non ascensum pares: sic totalis tum victum, tum fractum studium scribendi,

di, quid dignum auribus, aut probabile potest afferre? Cum vero ad ipsius Cæsaris nomen veni, toto corpore contremisco, non pœnæ metu, sed ipsius iudicii: totum enim Cæsarem non novi. Quem putas animum esse, ubi secum loquitur? hoc probabit: hoc verbum suspiciosum est: quid si hoc muto? at vereor, ne pejus sit. Age vero, laudo aliquem: num offendo? cum porro offendam, quid si non vult? armati stilum persequitur: victi, & nondum restituti quid faciet? Auges etiam tui mihi timorem, qui in Oratore tuo caves tibi per Brutum, & ad excusationem socium quæris. Ubi hoc omnium patronus facit, quid me, veterem tuum, nunc omnium clientem, sentire oportet? In hac igitur calumnia timoris, & cæcæ suspicionis tormento, cum plurima ad alieni sensus conjecturam, non ad suum iudicium scribantur, quam difficile sit evadere, si minus expertus es, quod te ad omnia summum atque excellens armavit ingenium; nos sentimus. Sed tamen ego filio dixeram, librum tibi legeret, & auferret: aut ea conditione daret, si reciperes te correcturum, hoc est, si totum alium faceres. De Asiatico itinere, quamquam summa necessitas premebat; ut imperasti, feci. Te pro me quid horter? vides tempus venisse, quo necesse sit de nobis constitui. Nihil est, mi Cicero, quod filium meum expectes: adolescens est: omnia excogitare, vel studio, vel ætate, vel metu non potest: totum negotium tu sustineas oportet: in te mihi omnis spes est. Tu, pro tua prudentia, quibus rebus gaudeat, quibus capiatur Cæsar, tenes: a te omnia proficiantur, & per te ad exitum perducantur necesse est: apud ipsum multum, apud ejus omnes plurimum potes: unum si tibi persuaseris, non hoc esse tui muneris, si quid rogatus fueris, ut facias: (quamquam id magnum & amplum est) sed totum tuum esse onus, perficies:

ficies : nisi forte aut in miseria nimis stulte , aut in amicitia nimis impudenter tibi onus impono . Sed utrique rei excusationem tuæ vitæ consuetudo dat : nam quod ita consuesti pro amicis laborare , non jam sic sperant abs te , sed etiam sic impetrant tibi familiares . Quod ad librum attinet , quem tibi filius dabit , peto a te , ne exeat : aut ita corrigas , ne mihi noceat . Vale .

A R G U M E N T U M .

Datum sibi a Balbo , & Oppio scribit , ut Cæcineret esse in Sicilia , ibique ut commoretur suadet .

M. T. C. CÆCINÆ S. D.

8

CUM esset mecum Largus , homo tui studiosus , locutus Kal. Jan. tibi præfinitas esse : quod omnibus rebus perspexeram , quæ Balbus , & Oppius , absente Cæsare , egissent , ea solere illi rata esse ; egi vehementer cum his , ut hoc mihi darent , tibi in Sicilia , quoad vellemus , esse uti liceret . Qui mihi consueissent , aut libenter polliceri , si quid esset ejusmodi , quod eorum animos non offenderet ; aut etiam negare , & afferre rationem , cur negarent : huic meæ rogationi potius non continuo responderunt : eodem die tamen ad me reverterunt : mihi hoc dederunt , ut esses in Sicilia , quoad velles : se præstituros ; nihil ex eo te offensionis habiturum . Quando ; quid tibi permittatur , cognovisti : quid mihi placeat , puto te scire oportere . Actis his rebus , litteræ a te mihi sunt redditæ , quibus a me consilium petis , quid sim tibi auctor : in Sicilia ne subsidas , an ad reliquias Asiaticæ negotiationis proficiscare . Hæc tua deliberatio non mihi convenire visa est cum oratione Largi . Ille enim mecum , quasi tibi non liceret in Sicilia diutius commorari , ita locutus erat : tu autem , quasi concessum sit , ita deliberas . Sed ego , sive hoc ,
sive

five illud est, in Sicilia censeo commorandum. Propinquitās locorum vel ad impetrandum adjuvat crebris litteris, & nuntiis, vel ad reditus celeritatem, re aut impetrata, quod spero, aut aliqua ratione confecta. Quamobrem censeo magnopere commorandum. T. Furfano Postumio familiari meo, legatisque ejus, item meis familiaribus, diligentissime te commendabo, cum venerint: erant enim omnes Mutinæ: viri sunt optimi, & tui similium studiosi, & mei necessarii. Quæ mihi venient in mentem, quæ ad te pertinere arbitrabor, ea mea sponte faciam. Si quid ignorabo, de eo admonitus omnium studia vincam. Ego etsi coram de te cum Furfano ita loquar, ut tibi litteris ad eum nihil opus sit: tamen, quoniam tuis placuit, te habere meas litteras, quas ei redderes, morem eis gessi: earum litterarum exemplum infra scriptum est. Vale.

A R G U M E N T U M.

Brevis est epistola, sed perfectæ commendationis exemplum.

M. T. C. FURFANO PROCOS. S. D. 9

CUM A. Cæcina tanta mihi familiaritas consuetudoque semper fuit, ut nulla major esse possit. Nam & patre ejus, claro homine & forti viro plurimum usi sumus: & hunc a puero, quod & spem mihi magnam afferebat summæ probitatis, summæque eloquentiæ, & vivebat mecum conjunctissime, non solum officiis amicitiae, sed etiam studiis communibus, sic semper dilexi, ut non ullo cum homine conjunctius viverem. Nihil attinet me plura scribere: quam mihi necesse est ejus salutem, & fortunas, quibuscumque rebus possim, tueri, vides. Reliquum est ut, cum cognorim pluribus rebus, quid tu & de bonorum fortuna, & de reip. calamitatibus sentires, nihil a te petam,

tam , nisi ut ad eam voluntatem , quam tua sponte erga Cæcinam habiturus esses , tantus cumulus accedat commendatione mea , quanti me a te fieri intelligo : hoc mihi gratius facere nihil potes . Vale .

A R G U M E N T U M .

*Pollicetur quidquid potest ad ejus incolumitatem ,
neque nullam spem fortunæ melioris ostendit .*

M. T. C. TREBIANO S. D.

10

EGO quanti te faciam , semperque fecerim , quanti me a te fieri intellexerim , sum mihi ipse testis . Nam & consilium tuum , vel casus potius diutius in armis civilibus commorandi , semper mihi magno dolori fuit ; & hic eventus , quod tardius , quam est æquum , & quam ego vellem , recuperes fortunam , & dignitatem tuam , mihi non minori curæ est , quam tibi semper fuerint casus mei . Itaque & Postumuleno , & Sextio , & sæpissime Attico nostro , proximeque Theudæ , liberto tuo , totum me patefeci , & his singulis sæpe dixi , quacumque re possem , me tibi , & liberis tuis satisfacere cupere : idque tu ad tuos velim scribas : hæc quidem certe , quæ in potestate mea sunt , ut operam , studium , consilium , rem , fidem meam sibi ad omnes res paratam putent . Si auctoritate & gratia tantum possem , quantum in ea republica , de qua ita meritus sum , posse deberem : tu quoque is esses , qui fuisti , cum omni gradu amplissimo dignissimus , tum certe ordinis tui facile princeps . Sed , quando eodem tempore , eademque de causâ nostrum uterque cecidit , tibi & illa polliceor , quæ supra scripsi , quæ sunt adhuc mea : & ea , quæ præterea videor mihi ex aliqua parte retinere , tamquam ex reliquiis pristinæ dignitatis . Neque enim ipse Cæsar , ut multis rebus intelligere potui , est alienus a nobis : & omnes fere familiarissimi ejus ,
casu

casu devincti magnis meis veteribus officiis, me diligenter observant, & colunt. Itaque, si qui mihi erit aditus de tuis fortunis; id est, de tua incolumitate, in qua sunt omnia, agendi, quod quidem quotidie magis ex eorum sermonibus adducor, ut sperem: agam per me ipse, & moliar. Singula persequi non est necesse: universum studium meum & benevolentiam ad te defero. Sed magni mea interest, hoc tuos omnes scire, quod tuis litteris fieri potest, ut intelligant, omnia Ciceronis patere Trebiano. Hoc eo pertinet, ut nihil existiment esse tam difficile, quod non pro te mihi susceptum, jucundum sit futurum. Vale.

A R G U M E N T U M.

Excusatio, cur non scripserit; consolatio, promissio meliorum rerum, & officii sui.

M. T. C. TREBIANO S. D. II.

ANtea misissem ad te litteras, si genus scribendi invenirem: tali enim tempore aut consolari amicorum est, aut polliceri. Consolatione non utebar, quod ex multis audiebam, quam fortiter sapienterque ferres injuriam temporum, quamque te vehementer consolaretur conscientia factorum, & consiliorum tuorum: quod quidem si facis, magnum fructum studiorum optimorum capis, in quibus te scio semper esse versatum: idque ut facias, etiam atque etiam te hortor. Simul, & illud tibi, homini peritissimo rerum, & exemplorum, & omnis vetustatis, ne ipse quidem rudis, sed in studio minus fortasse, quam vellem, at in rebus, atque usu plus etiam, quam vellem, versatus, spondeo tibi acerbitatem istam, & injuriam non diuturnam fore. Nam & ipse, qui plurimum potest, quotidie mihi delabi ad aequitatem, & ad rerum naturam videtur: & ipsa causa ea est, ut jam simul cum republica, quæ

in

in perpetuum jacere non potest, necessario reviviscat, atque recreetur: quotidieque aliquid fit lenius, & liberalius, quam timebamus. Quæ quoniam in temporum inclinationibus sæpe parvis posita sunt: omnia momenta observabimus; neque ullum prætermitemus tui juvandi, & levandi locum. Itaque illud alterum, quod dixi, litterarum genus quotidie mihi, ut spero, fiet proclivius, ut etiam polliceri possim: id re, quam verbis, faciam libentius. Tu velim existimes & plures te amicos habere, quam qui in isto casu sint, ac fuerint, quantum quidem ego intelligere potuerim; & me concedere eorum nemini. Fortem fac animum habeas & magnum: quod est in uno te: quæ sunt in fortuna, temporibus regentur, & consiliis nostris providebuntur. Vale.

ARGUMENTUM.

Gratulatur de reditu in patriam impetrato: hortatur, ut præterita ex animo deleat, dignitatisque recuperationem rei familiaris jacturæ anteponat.

M. T. C. TREBIANO S. D.

12

Dolabellam antea tantummodo diligebam: obligatus ei nihil eram: nec enim acciderat mihi opus esse: & ille mihi debebat, quod non defueram ejus periculis. Nunc tanto sum devinctus ejus beneficio, quod & antea in re, & hoc tempore in salute tua cumulatissime mihi satisfacit, ut nemini plus debeam. Qua in re tibi gratulor ita vehementer, ut te quoque mihi gratulari, quam gratias agere malim: alterum omnino non desidero, alterum vere facere poteris. Quod reliquum est, quando tibi virtus & dignitas tua reditum ad tuos aperuit: est tuæ sapientiæ magnitudinisque animi, quid amiseris, oblivisci; quid recuperaveris, cogitare. Vives cum tuis, vives nobiscum: plus acquisivisti dignita-

tis,

tis, quam amisisti rei familiaris: quæ ipsa tum esset jucundior, si ulla res esset publica. Nestorius noster familiaris ad me scripsit, te mihi maximas gratias agere. Hæc prædicatio tua mihi valde grata est: eaque te uti facile patior, cum apud alios, tum mehercule apud Sironem nostrum amicum. Quæ enim facimus, ea prudentissimo cuique maxime probata esse volumus. Te cupio videre quamprimum. Vale.

A R G U M E N T U M.

Gratulatur de reditu impetrato; & ad consolationem adscribit quedam perditis rebus aptiora.

M. T. C. A M P I O B A L B O S. D. 13

GRatulor tibi, mi Balbe, vereque gratulor: nec sum tam stultus, ut te usura falsi gaudii frui velim; deinde frangi repente, atque ita cadere, ut nulla res te ad æquitatem animi postea possit extollere. Egi tuam causam apertius, quam tempora nostra ferebant. Vincebatur enim fortuna ipsa debilitate gratiæ nostræ, tui caritate, & meo perpetuo erga te amore, culto a te diligentissime. Omnia promissa, confirmata, certa & rata sunt, quæ ad reditum & salutem tuam pertinent: vidi, cognovi, interfui. Etenim omnes Cæsaris familiares satis opportune habeo implicatos consuetudine, & benevolentia, sic, ut, cum ab illo discesserint, me proximum habeant. Hoc Pansa, Hirtius, Balbus, Oppius, Matius, Postumius, plane ita faciunt, ut me unice diligant. Quod si mihi pro me efficiendum fuisset, non me pœniteret pro ratione temporum ita esse molitum. Sed nihil est a me inservitum temporis causa: veteres mihi necessitudines cum his omnibus intercedunt: quibuscum ego agere de te non destiti. Principem tamen habuimus Pansam, tui studiosissimum, mei cupidum: qui valet apud
illum

illum non minus auctoritate, quam gratia. Cimper autem Tullius mihi plane satisfecit. Valent tamen apud Cæsarem non tam ambitiosæ rogationes, quam necessariæ: quas quia Cimper habebat, plus valuit, quam pro ullo alio valere potuisset. Diploma statim non est datum, quod mirifica est improbitas in quibusdam, qui tulissent acerbius, veniam tibi dari, quem illi appellabant tūbam belli civilis: multaque ita dicunt, quasi non gaudeant id bellum incidisse. Quare visum est occultius agendum, neque ullo modo divulgandum, de te jam esse perfectum. Sed id erit perbreve: nec dubito, quin, legente te has litteras, confecta jam res futura sit. Pansa quidem mihi gravis homo & certus, non solum confirmavit, verum etiam recepit, perceleriter se ablaturum diploma. Mihi tamen placuit hæc ad te perscribi: minus enim te firmum sermo Appulejæ tuæ, lacrimæque Ampiæ declarabant, quam significant litteræ tuæ: atque illæ arbitrabantur, cum a te abessent ipsæ, multo in graviore te cura futurum. Quare magnopere putavi, angoris & doloris tui levandi causa, pro certis ad te ea, quæ essent certa, perscribi oportere. Scis, me antea sic solitum esse scribere ad te, magis ut consolarer fortem virum atque sapientem, quam ut exploratam spem salutis ostenderem, nisi quam ab ipsa republica, cum hic ardor extinctus esset, sperari oportere censerem. Recordare tuas litteras, quibus & magnum animum mihi semper ostendisti, & ad omnes casus ferendos constantem ac paratum. Quod ego non mirabar, cum recordarer, te & a primis temporibus ætatis in rep. esse versatum, & tuos magistratus in ipsa discrimina incidisse salutis fortunarumque communium: & in hoc ipsum bellum esse ingressum, non solum uti victor, beatus; sed etiam ut si ita accidisset, victus
ut

ut sapiens esses. Deinde, cum studium tuum consumas in virorum fortium factis memoriæ prodendis; considerare debes, nihil tibi esse committendum, quamobrem eorum, quos laudas, te non simillimum præbeas. Sed hæc oratio magis esset apta ad illa tempora, quæ jam effugisti. Nunc vero tantum te parâ ad hæc nobiscum ferendâ: quibus ego si quam medicinam invenirem, tibi quoque eandem traderem. Sed est unum perfugium, doctrina ac litteræ, quibus semper usi sumus: quæ secundis rebus delectationem modo habere videbantur; nunc vero etiam salutem. Sed, ut ad initium revertar, cave dubites, quin omnia de salute ac reditu tuo perfecta sint, Vale.

A R G U M E N T U M.

Scribit, se bene sperare de Ligarii salute: ad eamque impetrandam omnia sua pollicetur. Interim hortatur, ut adversam fortunam moderate ferat.

M. T. C. Q. L I G A R I O S. D. 14

ET si tali tuo tempore me aut consolandi, aut juvandi tui causa scribere ad te aliquid pro nostra amicitia oportebat: tamen adhuc id non feci, quia neque lenire videbat oratione, neque levare posse dolorem tuum. Postea vero, quam magnam spem habere cœpi, fore, ut te brevi tempore incolumem haberemus: facere non potui, quin tibi & sententiam & voluntatem declararem meam. Primum igitur scribam, quod intelligo, & perspicio, non fore in te Cæsarem duriorum: nam & res eum quotidie, & dies, & opinio hominum, &, ut mihi videtur, etiam sua natura mitiorem facit: idque cum de reliquis sentio, tum de te etiam audio ex familiarissimis ejus: quibus ego ex eo tempore, quo primum ex Africa nuntius venit, supplicare una cum fratribus tuis non destiti: quorum quidem & virtus,

tus, & pietas, & amor in te singularis, & assidua, & perpetua salutis tuæ cura tantum proficit, ut nihil sit, quod non ipsum Cæsarem tributurum existimem: & si tardius sit, quam volumus; magnis occupationibus ejus, a quo omnia petuntur, aditus ad eum difficiliore fuerunt: & simul Africanæ causæ iratior, diutius velle videtur eos habere sollicitos, a quibus se putat diuturnioribus esse molestiis conflictatum: sed hoc ipsum intelligimus eum quotidie remissius, & placatius ferre. Quare mihi crede, & memoriæ manda, me tibi id affirmasse, te in istis molestiis diutius non futurum. Cum quid sentirem, exposui: quid velim tua causa, re potius declarabo, quam oratione: &, si tantum possem, quantum in ea republica, de qua ita meritus sum, ut tu existimas, posse debebam; ne tu quidem in istis incommodis esses: eadem enim causa opes meas fregit, quæ tuam salutem in discrimen adduxit. Sed tamen, quidquid imago veteris meæ dignitatis, quidquid reliquæ gratiæ valebunt; studium, consilium, opera, gratia, fides mea nullo loco deerit tuis optimis fratribus. Tu fac habeas fortem animum, quem semper habuisti: primum ob eas causas, quas scripsi: deinde, quod ea de republica semper voluisti atque sensisti, ut non modo nunc secunda sperare debeas, sed etiam, si omnia adversa essent, tamen conscientia & factorum & consiliorum tuorum, quæcumque acciderent, fortissimo & maximo animo ferre deberes. Vale.

ARGUMENTUM.

Exorditur ab officii sui commemoratione: deinde, quid de reditu Ligarii opinetur, subjungit.

M. T. C. Q. LIGARIO S. D.

15

ME scito omnem meum laborem, omnem operam, curam, studium in tua salute consumere: nam cum te semper maxime dilexi,

H

tum

tum fratrum tuorum , quos æque atque te summa benevolentia sum complexus , singularis pietas amorque fraternus , nullum me patitur officii erga te , studiique munus , aut tempus prætermittere . Sed quæ faciam , fecerimque pro te , ex illorum te litteris , quam ex meis , malo cognoscere . Quid autem sperem , aut confidam , & exploratum habeam de salute tua , id tibi a me declarari volo . Nam , si quisquam est timidus in magnis periculosisque rebus , semperque magis adversos rerum exitus metuens , quam sperans secundos , is ego sum : & , si hoc vitium est , eo me non carere confiteor . Ego idem tamen cum ad II. Kal. intercalares priores , rogatu fratrum tuorum venissem mane ad Cæsarem ; atque omnem adeundi & conveniendi illius indignitatem & molestiam pertulissem : cum fratres & propinqui tui jacerent ad pedes , & ego essem locutus , quæ causa , quæ tuum tempus postulabât : non solum ex oratione Cæsaris , quæ sane mollis & liberalis fuit : sed etiam ex oculis , & vultu , & multis præterea signis , quæ facilius perspicere potui , quam scribere , hanc in opinionem discessi , ut mihi tua salus dubia non esset . Quamobrem fac animo magno fortique sis : & , si turbidissima sapienter ferebas , tranquilliora late feras . Ego tamen tuis rebus sic adero , ut difficillimis : neque Cæsari solum , sed etiam amicis ejus omnibus , quos mihi amicissimos esse cognovi , pro te , sicut adhuc feci , libentissime supplicabo . Vale .

A R G U M E N T U M .

Continet hæc epistola , omnium brevissima , gratulationem , benevolentiam , officium .

M. T. C. B A S I L I O S. D. 16

Tibi gratulor : mihi gaudeo : te amo : tueor : a te amari , & quid agas , quidque istic agatur , certior fieri volo . Vale .

ARGU-

ARGUMENTUM.

Insinuat se ad petitionem, mutui amoris commemoratione: petit autem, ut se absentem tueatur, si quidem gratum fore non dubitet.

BITHYNICUS CICERONI S. D. 17

SI mihi tecum non & multæ & justæ causæ amicitiae privatim essent, repeterem initia amicitiae ex parentibus nostris: quod faciendum iis existimo, qui paternam amicitiam nullis ipsi officiis prosecuti sunt. Itaque contentus ero nostra ipsorum amicitia: cujus fiducia peto a te, ut absentem me, quibuscumque in rebus opus fuerit, tueare; si nullum officium tuum apud me intermoriturum existimas. Vale.

ARGUMENTUM.

Mirum declarat desiderium cum Bithynico vivendi, & adjicit, se esse illi amore conjunctissimum.

M. T. C. BITHYNICO S. D. 18

CUM ceterarum rerum causa cupio esse aliquando rempub. constitutam; tum velim mihi credas, accidere id etiam, quo magis expectam promissum tuum, quo in litteris uteris. Scribis enim, si ita sit, te mecum esse victurum. Gratissima mihi tua voluntas est: facisque nihil alienum necessitudine nostra, judiciisque patris tui de me, summi viri. Nam sic habeto, beneficiorum magnitudine eos, qui temporibus valuerunt, aut valeant, conjunctiores tecum esse, quam me, necessitudine neminem. Quamobrem grata mihi est & memoria tua nostræ conjunctionis, & ejus etiam augendæ voluntas. Vale.

ARGUMENTUM.

Respondet Leptæ, qui præconium fecissent, licere iis esse in Decurionibus; scribit de bello Hispaniensi, de Leptæ negotio, de Oratore suo, de mansione urbana.

M. T. C. LEPTÆ S. D.

19

Simul accepi a Seleuco tuo litteras, statim quæsi e Balbo per codicillos, quid esset in lege. Rescripsit, eos, qui facerent præconium, vetari esse in decurionibus: qui fecissent, non vetari. Quare bono animo sint & tui, & mei familiares: neque enim erat ferendum, cum, qui hodie aruspicinam facerent, in senatu Romæ legerentur: eos, qui aliquando præconium fecissent, in municipiis decuriones esse non licere. De Hispaniis novi nihil: magnum tamen exercitum Pompejum habere constat. Nam Cæsar ipse ad nos misit exemplum Paciæci litterarum, in quo erat, illi xi. esse legiones: scripserat etiam Messalla Q. Salasso, P. Curtium fratrem ejus, jussu Pompeji, inspectante exercitu, interfectum, quod consensisset cum Hispanis quibusdam, si in oppidum nescio quod Pompejus rei frumentariæ causa venisset, eum comprehendere, ad Cæsaremque deducere. De negotio tuo, quod sponsor es pro Pompejo; si Galba consponsor tuus redierit, homo in re familiari non parum diligens, non desinam cum illo communicare, si quid expediri possit: quod videbatur mihi ille confidere. Oratorem meum tantopere a te probari vehementer gaudeo. Mihi quidem sic persuadeo, me, quidquid habuerim judicii de dicendo, in illum librum contulisse. Qui si est talis, qualem tibi videri scribis: ego quoque aliquid sum: sin aliter, non recuso, quin, quantum de illo libro, tantundem de mei judicii fama detrahatur. Leptam nostrum cupio delectari

stari jam talibus scriptis: etsi abest maturitas ætatis, jam tamen personare aures ejus hujusmodi vocibus, non est inutile. Me Romæ tenuit omnino Tulliæ meæ partus. Sed cum ea, quemadmodum spero, satis firma sit; teneor tamen, dum a Dolabellæ procuratoribus exigam primam pensionem; & mehercule non tam sum peregrinator jam, quam solebam. Ædificia mea me delectabant, & otium: domus est, quæ nulli villarum mearum cedat: otium omni desertissima regione majus. Itaque ne litteræ quidem meæ impediuntur; in quibus sine ulla interpellatione versor. Quare, ut arbitror, prius hic te nos, quam istic tu nos videbis. Lepta suavissimus ediscat Hesiodum: & habebat in ore:

. . . . τῆς δ' ἀρετῆς ἰσπῶτα.

ARGUMENTUM.

Cum Cæsar ludos regionatim daturus esset, curationem eorum Lepta cupiebat. Cicero dissuadet. Meminit Suetonius de his ludis in Julii vita.

M. T. C. LEPTÆ S. D.

20

MAculam officio functum esse gaudeo: ejus Falernum mihi semper idoneum visum est diversorio: si modo tecti satis est ad comitatum nostrum recipiendum. Ceteroqui mihi locus non displicet: nec ea re Petrinum tuum deserram. Nam & villa, & amœnitas illa, commorationis est, non diversorii. De curatione aliqua munerum regionum, cum Oppio locutus sum: nam Balbum, posteaquam tu es profectus, non vidi: tantis pedum doloribus afficitur, ut se conveniri nolit. Omnino de tota re, ut mihi videris, sapientius faceres, si non curares: quod enim eo labore assequi vis, nullo modo assequere: tanta est enim intimorum multitudo, ut ex his potius aliquis effluat, quam novo sit aditus:

præsertim qui nihil afferat, præter operam; in qua ille se dedisse beneficium putabit, (si modo ipsum sciet) non accepisse. Sed tamen aliquid videbimus, in quo sit spes: aliter quidem non modo non appetendum, sed etiam fugiendum puto. Ego me Asturæ diutius arbitror commoraturum, quoad ille quandoque veniat. Vale.

A R G U M E N T U M.

Monet Toranium, ut in Sicilia commoretur, quoad scire possit, quid sibi agendum sit. Clausula consolationis nescio quid continet.

M. T. C. TORANIO S. D.

21

DEderam triduo ante pueris Cn. Plancii litteras ad te: eo nunc ero brevior, teque, ut antea consolabar, hoc tempore monebo. Nihil puto tibi esse utilius, quam ibidem opperiri, quoad scire possis, quid tibi agendum sit. Nam præter navigationis longæ, & hyemalis, & minime portuosæ periculum, quod vitaveris; ne illud quidem non quantivis, subito cum certi aliquid audieris, te istinc posse proficisci. Nihil est præterea, cur advenientibus te offerre gestias. Multa præterea metuo, quæ cum Chilone nostro communicavi. Quid multa? loco opportuniore in his malis nullo esse potuisti: ex quo te, quocumque opus erit, facillime & expeditissime conferas. Quod si recipiet ille se, ad tempus aderis: sin (quoniam multa accidere possunt) aliqua res eum vel impedit vel morabitur: tu ibi eris, ubi omnia scire possis: hoc mihi prorsus valde placet. De reliquo, ut te sæpe per litteras hortatus sum, ita velim tibi persuadeas, te in hac causa nihil habere, quod timendum sit, præter communem casum civitatis: qui etsi est gravissimus, tamen ita viximus, & id ætatis jam sumus, ut omnia, quæ non nostra culpa nobis

nobis accident, fortiter ferre debeamus. Hic tui omnes valent, summaque pietate te desiderant, & diligunt, & colunt. Tu & cura, ut valeas, & te istinc ne temere commoveas.

ARGUMENTUM.

Ad consolandum Toranium præterita colligit; & quid ipse fecerit, quasi exemplum ad imitandum proponit.

M. T. C. TORANIO S. D.

22

ET si, cum hæc ad te scriberem, aut appropinquare exitus hujus calamitosissimi belli, aut jam aliquid actum & confectum videbatur: tamen quotidie commemorabam, te unum in tanto exercitu mihi fuisse assensorem, & me tibi; solosque nos vidisse, quantum esset in eo bello mali, in quo, spe pacis exclusa, ipsa victoria futura esset acerbissima: quæ aut interitum allatura esset, si victus esses; aut, si vicisses, servitutum. Itaque ego, quem tum fortes illi viri, & sapientes, Domitii, & Lentuli, timidum esse dicebant: (eram plane: timebam enim, ne evenirent ea, quæ acciderant) idem nunc nihil timeo, & ad omnem eventum paratus sum. Cum aliquid videbatur caveri posse, tum id negligi dolebam: nunc vero, eversis omnibus rebus, cum consilio profici nihil possit, una ratio videtur, quidquid evenerit, ferre moderate; præsertim cum omnium rerum mors sit extremum; & mihi sim conscius, me, quoad licuerit, dignitati reipub. consuluisse; & hac amissa, salutem retinere voluisse. Hæc scripsi, non ut de me ipse dicerem, sed ut tu, qui conjunctissima fuisti mecum & sententia, & voluntate, eadem cogitares. Magna enim consolatio est, cum recordare, etiamsi fecus acciderit, te tamen recte vereque sensitse. Arque utinam liceat aliquando aliquo reipub. sta-

tu nos frui, interque nos conferre sollicitudines nostras, quas pertulimus tum, cum timidi putabamur, quia dicebamus ea futura, quæ facta sunt. De tuis rebus nihil esse, quod timeas, præter universæ reipub. interitum, tibi confirmo. De me autem sic velim iudices, quantum ego possim, me tibi, salutis tuæ, liberisque tuis summo cum studio præsto semper futurum. Vale.

A R G U M E N T U M.

Domitium, interitu amicorum dolentem, rogat, ut cum Reip. jam satisfecerit, incolumitati suæ consulat.

M. T. C. DOMITIO S. D.

23

NON ea res me deterruit, quominus, postquam in Italiam venisti, litteras ad te mitterem, quod tu ad me nullas miseris: sed quia nec quid tibi pollicerer, ipse egens rebus omnibus; nec quid suaderem, cum mihi metipsi consilium deesset; nec quid consolationis afferrem in tantis malis, reperiēbam. Hæc quamquam nihilo meliora sunt, nunc etiam atque etiam multo desperatiora; tamen inanes esse meas litteras, quam nullas, malui. Ego, si te intelligere in plus conatum esse suscipere reipub. causa muneris, quam quantum præstare potuisses; tamen, quibuscumque rebus possem, ad eam conditionem te vivendi, quæ daretur, quæque esset, hortarer. Sed cum consilii tui bene fortiterque suscepti eum tibi finem statueris, quem ipsa fortuna terminum nostrarum contentionum esse voluisset: oro obtestorque te pro nostra veteri conjunctione ac necessitudine, proque summa mea in te benevolentia, & tua in me pari, te ut nobis, parenti, conjugii, tuisque omnibus, quibus es, fuistisque semper carissimus, saluum conserves: incolumitati tuæ, tuorumque, qui ex
te

te pendent, consulas : quæ didicisti, quæque ab adolescentia pulcherrime a sapientissimis viris tradita, memoria & scientia comprehendisti, iis hoc tempore utare ; quos conjunctos summa benevolentia plurimisque officiis amisisti, eorum desiderium, si non æquo animo, at fortiter feras. Ego, quid possim, nescio : vel potius me parum posse sentio : illud tamen tibi polliceor, me, quæcumque saluti dignitatique tuæ conducere arbitrabor, tanto studio esse facturum, quanto semper tu & studio & officio in meis rebus fuisti. Hanc meam voluntatem ad matrem tuam, optimam scæminam, tuique amantissimam detuli. Si quid ad me scripseris, ita faciam, ut te velle intellexero. Sin autem tu minus scripseris : ego tamen omnia, quæ tibi utilia esse arbitrabor, summo studio diligenterque curabo. Vale.

LIBER VII.

ARGUMENTUM.

Ludos, quos Pompejus Magnus iterum consul dedit, describit, & extenuat : utrumque ob eam causam, ne Marium eos prætermisisset pœniteret.

M. T. C. M. MARIO S. D.

I

SI te dolor aliquis corporis, aut infirmitas valetudinis tuæ tenuit, quominus ad ludos venires, fortunæ magis tribuo, quam sapientiæ tuæ. Sin hæc, quæ ceteri mirantur, contemnenda duxisti, & cum per valetudinem posses, venire tamen nolueris : utrumque lætor, & sine dolore corporis te fuisse, & animo valuisse, cum ea, quæ sine causa mirantur alii, neglexeris : modo, ut tibi constiterit fructus otii tui ; quo quidem tibi perfrui mirifice licuit, cum esses in ista amœnitate pene solus relictus. Neque tamen du-

H v

bito,

bito, quin tu ex illo cubiculo tuo, ex quo tibi Stabianum perforasti, & patefecisti Sejanum, per eos dies matutina tempora lectiunculis consumpseris: cum illi interea, qui te istuc reliquerunt, spectarent communes mimos semisomni. Reliquas vero partes diei tu consumebas iis delectationibus, quas tibi ipsi ad arbitrium tuum compararas: nobis autem erant ea perpetienda, quæ scilicet P. Mæcius probavisset. Omnino, si quæris, ludi apparatissimi, sed non tui stomachi: conjecturam enim facio de meo. Nam primum honoris causa in scenam redierant ii, quos ego honoris causa de scena decessisse arbitrabar. Deliciæ vero tuæ noster Æsopus ejusmodi fuit, ut ei desinere per omnes homines liceret: is jurare cum cœpisset, vox eum defecit in illo loco, *Si sciens fallo*. Quid tibi ego alia narrem? nosti enim reliquos ludos. Quid? ne id quidem leporis habuerunt, quod solent mediocres ludi. Apparatus enim spectatio tollebat omnem hilaritatem: quo quidem apparatu non dubito, quin animo æquissimo carueris. Quid enim delectationis habent sexcenti muli in Clytemnestra? aut in Equo Trojano craterarum tria millia? aut armatura varia peditatus & equitatus, ut in aliqua pugna? quæ popularem admirationem habuerunt, delectationem tibi nullam attulissent. Quod si tu per eos dies operam dedisti Protogeni tuo, dummodo is tibi quidvis potius, quam orationes meas legerit: næ tu haud paullo plus, quam quisquam nostrum, delectationis habuisti. Non enim te puto Græcos aut Oscos ludos desiderasse; præsertim cum Oscos ludos vel in senatu nostro spectare possis; Græcos vero ita non ames, ut ne ad villam quidem tuam via Græca ire soleas. Nam quid ego te athletas putem desiderare, qui gladiatores contempseris? in quibus ipse Pompejus confitetur, se & operam & oleum perdidisse. Reliquæ sunt

sunt venationes binæ per dies quinque magnificæ, nemo negat : sed quæ potest esse homini politico delectatio, cum aut homo imbecillus a valentissima bestia laniatur, aut præclara bestia venabulo transverberatur? quæ tamen si videnda sunt, sæpe vidisti : neque nos, qui hæc spectavimus, quidquam novi vidimus. Elephantorum extremus dies fuit : in quo admiratio magna vulgi atque turbæ, delectatio nulla exstitit : quinetiam misericordia quædam consecuta est, atque opinio ejusmodi, esse quandam illi belluæ cum genere humano societatem. His ego tamen diebus, ludis scenicis, ne forte videar tibi non modo beatus, sed liber omnino fuisse, dirupi pæne me in judicio Galli Caninii, familiaris tui. Quod si tam facilem populum haberem, quam Æsopus habuit; libenter mehercule artem desinerem, tecumque, & cum similibus nostri viverem. Nam me cum antea tædebat, cum & ætas & ambitio hortabantur, & licebat denique, quem nolebam, non defendere : tum vero hoc tempore vita nulla est. Neque enim fructum ullum laboris exspecto : & cogor nonnumquam homines non optime de me meritos, rogatu eorum, qui bene meriti sunt, defendere. Itaque quæro causas omnes aliquando vivendi arbitrato meo; teque, & istam rationem otii tui & laudo vehementer, & probō : quodque nos minus intervifis, hoc fero animo æquiore, quod si Romæ esses, tamen neque nos lepore tuo, neque te (si quis est in me) meo frui liceret, propter molestissimas occupationes meas : quibus si me relaxaro, (nam ut plane exsolvam, non postulo) te ipsum quidem, qui multos annos nihil aliud commentaris, docebo profecto, quid sit humaniter vivere. Tu modo istam imbecillitatem valetudinis tuæ sustenta & tuere, ut facis, ut nostras villas obire, & mecum nostra simul lecticula concurrare possis. Hæc ad te pluribus ver-

bis scripsi, quam soleo, non otii abundantia, sed amoris erga te, quod me quadam epistola subinvitaras, si memoria tenes, ut ad te aliquid ejusmodi scriberem, quo minus te prætermisisse ludos pœniteret. Quod si affecutus sum, gaudeo: sin minus, hoc me tamen consolor, quod posthac ad ludos venies, nosque vides, neque in epistolis relinques meis spem aliquam delectationis tuæ. Vale.

A R G U M E N T U M.

Marii negotium sibi curæ fore promittit: deinde scribit quanti & faciat, & facere debeat condemnationem T. Munatii Plancii Burse; de quo vide Pædianum in commentario Miloniana. Scripta est primis diebus ejus anni, quo Ser. Sulpicius, & M. Marcellus Consules fuere: nam paullo post Cicero in provinciam ivit; & D. Plancum damnatum ait, cum primum exiit e magistratu.

M. T. C. M. MARIO S. D. 2

Mandatum tuum curabo diligenter. Sed homo acutus, ei mandasti potissimum, cui expediret, illud venire quamplurimo. Sed eo vidisti multum, quod præfinisti, quo ne pluris emerem. Quod si mihi permisisses: qui meus amor in te est, confecissem cum coheredibus: nunc, quando tuum pretium novi, licitatore potius apponam, quam illud minoris veneat: sed de joco satis est. Tuum negotium agam, sicuti debeo, diligenter. De Bursa te gaudere certo scio: sed nimis verecunde mihi gratularis. Putas enim, ut scribis, propter hominis sordes minus me magnam illam lætitiā putare. Credas mihi velim, magis me judicio hoc, quam morte inimici lætatum. Primum enim judicio malo, quam gladio: deinde gloria potius amici, quam calamitate. In primisque me delectavit, tantum
flu-

studium bonorum in me exstitisse contra incredibilem contentionem clarissimi ac potentissimi viri. Postremo, quod vix verisimile fortasse videatur, oderam multo pejus hunc, quam illum ipsum Clodium. Illum enim oppugnaram: hunc defenderam. Et ille, cum omnis respub. in meo capite discrimen esset habitura, magnum quiddam spectavit; nec sua quidem sponte, sed eorum auxilio, qui, me stante, stare non poterant: hic simiolus, animi causa, me, in quem inveheretur, delegerat: persuaseratque nonnullis invidis meis, se in me emissarium semper fore. Quamobrem valde jubeo gaudere te: magna res gesta est: numquam ulli fortiores cives fuerunt, quam qui ausi sunt eum contra tantas opes ejus, a quo ipsi lecti judices erant, condemnare. Quod fecissent numquam, nisi iis dolori meus fuisset dolor. Nos hic in multitudine & celebritate judiciorum, & novis legibus ita distinemur, ut quotidie vota faciamus, ne intercaletur, ut quamprimum te videre possimus. Vale.

ARGUMENTUM.

Caussam exponit, cur acie Pharsalica victus, a bello discesserit, quod illi ab iniquis vitio dabatur.

M. T. C. M. MARIO S. D.

3

Persæpe mihi cogitanti de communibus miseriis, in quibus tot annos versamur, & (ut video) versabimur, solet in mentem venire illius temporis, quo proxime fuimus una: quin etiam ipsum diem memoria teneo. Nam ad III. idus Majas, Lentulo, & Marcello Coss. cum in Pompejanum vesperi venissem, tu mihi sollicito animo præsto fuisti. Sollicitum autem te habebat cogitatio tum officii, tum etiam periculi mei. Si manerem in Italia, verebare, ne officio deessem: si proficiscerer ad bellum, periculum te meum
com-

commovebat. Quo tempore vidisti profecto me quoque ita conturbatum, ut non explicarem, quid esset optimum factu: pudori tamen malui famæque cedere, quam salutis meæ rationem ducere. Cujus me mei facti pœnituit, non tam propter periculum meum, quam propter vitia multa, quæ ibi offendi, quo veneram. Primum neque magnas copias, neque bellicosas: deinde, extra ducem, paucosque præterea, (de principibus loquor) reliqui primum in ipso bello rapaces: deinde in oratione ita crudeles, ut ipsam victoriam horrerem: maximum autem æs alienum amplissimorum virorum. Quid quæris? nihil boni, præter causam. Quæ cum vidissem; desperans victoriam, primum cœpi suadere pacem, cuius fueram semper auctor: deinde, cum ab ea sententia Pompejus valde abhorreret, suadere institui, ut bellum duceret. Hoc interdum probabat, & in ea sententia videbatur fore, & fuisset fortasse, nisi quadam ex pugna cœpisset suis militibus confidere. Ex eo tempore vir ille summus, nullus imperator fuit. Signa tirone, & collectitio exercitu cum legionibus robustissimis contulit: victus turpissime, amissis etiam castris, solus fugit. Hunc ego belli mihi finem feci: nec putavi, cum integri pares non fuisset, fractos superiores fore. Discessi ab eo bello, in quo aut in acie cadendum fuit, aut in aliquas insidias incidendum, aut deveniendum in victoris manus, aut ad Jubam confugiendum, aut capiendus tamquam exilio locus, aut consciscenda mors voluntaria. Certe nihil fuit præterea, si te victori nolles, aut non auderes committere. Ex omnibus autem iis, quæ dixi, incommodis, nihil tolerabilius exilio, præsertim innocenti: ubi nulla adjuncta est turpitudo: addo etiam, cum ea urbe careas, in qua nihil sit, quod videre possis sine dolore. Ego cum meis (si quidquam nunc cuiuspiam est) etiam
in

in meis esse malui. Quæ acciderunt, omnia dixi futura. Veni domum, non quod optima vivendi conditio esset: sed tamen, si esset aliqua forma reipubl. tamquam in patria ut essem: si nulla, tamquam in exilio. Mortem mihi cur consciscerem, causa nulla visa est: cur optarem, multæ. Vetus est enim, ubi non sis qui fueris, non esse cur velis vivere. Sed tamen vacare culpa, magnum est solatium; præsertim cum habeam duas res, quibus me sustentem; optimarum artium scientiam, & maximarum rerum gloriam: quarum altera mihi vivo numquam eripietur; altera ne mortuo quidem. Hæc ad te scripsi verbosius, & tibi molestus fui, quod te cum mei, tum reipub. cognovi amantissimum. Notum tibi omne consilium meum esse volui, ut primum scires, me numquam voluisse plus quemquam posse, quam universam rempubl. Postea autem quam alicujus culpa tantum valeret unus, ut obsisti non posset, me voluisse pacem: amisso exercitu, & eo duce, in quo spes fuerat uno, me voluisse etiam reliquis omnibus; postquam non potuerim, mihi ipsi finem fecisse belli: nunc autem, si hæc civitas est; civem esse me: si non, exulem esse non incommodiore loco, quam si me Rhodum, aut Mitylenas contulissem. Hæc tecum coram malueram: sed quia longius fiebat, volui per litteras eadem; ut haberes quid diceres, si quando in vituperatores meos incidisses. Sunt enim, qui, cum meus interitus nihil fuerit reipub. profuturus, criminis loco putent esse, quod vivam. Quibus ego certo scio non videri satis multos periisse: qui si me audissent, quamvis iniqua pace, honeste tamen viverent. Armis enim inferiores, non causa fuissent. Habes epistolam verbosio rem fortasse, quam velles: quod tibi ita videri putabo, nisi mihi longiorem remiseris. Ego, si, quæ volo, expediero, brevi tempore te, ut spero, videbo. Vale.

ARGUMENTUM.

Præmonet Marium de adventu suo in Pompejanum.

M. T. C. MARIO S. D.

4

AD VIII. Kal. in Cumanum veni cum Libone tuo, vel nostro potius: in Pompejanum statim cogito. Sed faciam te ante certiores. Te cum semper valere cupio, tum certe, dum hic sumus. Vides enim, quanto post una futuri simus. Quare si quid constitutum cum podagra habes, fac in alium diem differas. Cura igitur, ut valeas: & me hoc biduo, aut triduo exspecta. Vale.

ARGUMENTUM.

Commendat studiosissime Trebatium jurisconsultum Cæsari Galliarum proconsuli.

M. T. C. C. CÆSARI IMP. S. D.

5

Vide, quam mihi persuaserim, te me esse alterum, non modo in iis rebus, quæ ad me ipsum, sed etiam in iis rebus, quæ ad meos pertinent. C. Trebatium cogitarem, quocumque exirem, mecum ducere, ut eum meis omnibus studiis, & beneficiis quam ornatissimum, domum reducerem. Sed posteaquam & Pompeji commoratio diuturnior erat, quam putarem; & mea quædam tibi non ignota dubitatio, aut impedire profectionem meam videbatur, aut certe tardare: vide, quid mihi sumpserim. Cœpi velle, ea Trebatium exspectare a te, quæ sperasset a me: neque mehercule minus ei prolixè de tua voluntate promisi, quam eram solitus de mea polliceri. Casus vero mirificus quidam intervenit, quasi vel testis opinionis meæ, vel sponsor humanitatis tuæ. Nam cum de hoc ipso Trebatio cum Balbo nostro loquerer accuratius domi meæ, litteræ mihi dantur a te: quibus in extremis scriptum

ptum erat, *M. Orfium, quem mihi commendas, vel regem Gallie faciam, vel hunc Leptæ delega. Si vis tu, ad me alium mitte, quem ornem.* Sustulimus manus & ego & Balbus: tanta fuit oportunitas, ut illud nescio quod non fortuitum, sed divinum videretur. Mitto igitur ad te Trebatium, atque ita mitto, ut initio mea sponte, post autem invitatu tuo mittendum duxerim. Hunc, mi Cæsar, sic velim omni tua comitate complectare, ut omnia, quæ per me possis adduci, ut in meos conferre velis, in unum hunc conferas; de quo tibi homine hæc spondeo non illo vetere verbo meo, quod, cum ad te de Milone scripsissem, jure lusisti: sed more Romano, quo modo homines non inepti loquuntur; probiorem hominem, meliorem virum, prudentiorem esse neminem. Accedit etiam, quod familiam ducit in jure civili: singularis memoria, summa scientia. Huic ego neque tribunatum, neque præfecturam, neque ullius beneficii certum nomen peto: benevolentiam tuam & liberalitatem peto: neque impedio, quominus, si tibi ita placuerit, etiam hisce eum ornes gloriolæ insignibus: totum denique hominem tibi ita trado de manu (ut ajunt) in manum tuam istam, & victoria & fide præstantem. Sumus enim putidiusculi, quam per te vix licet: verum, ut video, licebit. Cura, ut valeas, & me, ut amas, ama.

A R G U M E N T U M.

Trebatium desiderium Urbis vix ferentem, hortatur, ut urbis, urbanitatisque memoriam, quasi quasdam ineptias, abjiciat, & de provincia, quo se contulerat, tum spe beneficiorum, tum constantia causa cogitet.

M. T. C. CAJO TREBATIO S. D. 6

IN omnibus meis epistolis, quas ad Cæsarem, aut Balbum mitto, legitima quædam est accessio

sio commendationis tuæ ; nec ea vulgaris , sed cum aliquo insigni indicio meæ erga te benevolentia. Tu modo ineptias istas , & desideria urbis , & urbanitatis depone : & , quo consilio profectus es , id assiduitate & virtute consequere . Hoc tibi tam ignoscemus nos amici , quam ignoverunt Medæ , quæ Corinthum arcem altam , habebant matronæ opulentæ , optimates : quibus illa manibus gypsatisissimis persuasit , ne sibi vitio illæ verterent , quod abesset a patria .

Nam multi suam rem bene gessere & publicam , patria procul .

Multi , qui domi ætatem agerent , propterea sunt improbi .

Quo in numero tu certe fuisses , nisi te extruissemus . Sed plura scribemus alias . Tu , qui ceteris cavere didicisti , in Britannia ne ab essedariis decipiaris , caveto : & , quando Medeam agere cœpi , illud semper memento ; *qui ipse sibi sapiens prodesse nequit , nequidquam sapit .* Cura , ut valeas .

A R G U M E N T U M .

Studium suum in commendando Trebatio significat : jocatur de Britannia : monet , ut in familiaritatem Cæsaris se penitus insinuet , & occasione utatur .

M. T. C. TREBATIO S. D.

7

EGo te commendare non desisto : sed , quid proficiam , ex te scire cupio . Spem maximam habeo in Balbo : ad quem de te diligentissime & sæpissime scribo . Illud soleo mirari , non me toties accipere tuas litteras , quoties a Q. Fratre mihi afferuntur . In Britannia nihil esse audio neque auri , neque argenti . Id si ita est , essedum aliquod suadeo capias , & ad nos quamprimum recurras . Sin autem sine Britannia tamen assequi id , quod volumus , possumus ; perface ,

ut

ut sis in familiaribus Cæsaris: multum te in eo frater adjuvabit meus, multum Balbus; sed, mihi crede, tuus pudor & labor plurimum. Imperatorem liberalissimum habes, ætatem opportunissimam, commendationem certe singularem: ut tibi unum timendum sit, ne ipse tibi defuisse videre. Vale.

ARGUMENTUM.

Modeste reprehendit Trebatium, qui Tribunatum militum a Cæsare delatum, recusaverat.

M. T. C. TREBATIO S. D. 8

SCripfit ad me Cæsar perhumaniter, nondum te sibi satis esse familiarem propter occupationes suas, sed certe fore: cui quidem ego rescripsi, quam mihi gratum esset futurum, si quamplurimum in te studii, officii, liberalitatis suæ contulisset. Sed ex tuis litteris cognovi præproperam festinationem tuam: & simul sum admiratus, cur tribunatus commoda, dempto præsertim labore militiæ, contempseris. Querar cum Vacerra, & Manilio: nam Cornelio nihil audeo dicere; cuius tu periculo stultus es, quando te ab eo sapere didicisse profiteris. Quin tu urges istam occasionem & facultatem, qua melior numquam reperietur? Quod scribis de illo Prætiano jureconsulto, ego te ei non desino commendare. Scribit enim ipse mihi, te sibi gratias agere debere. De eo quid sit, cura, ut sciam. Ego vestras Britannicas litteras exspecto. Vale.

ARGUMENTUM.

Litterarum officium a Trebatio requirit: monet, ne reditum in Urbem præpropere cupiat.

M. T. C. TREBATIO S. D. 9

JAmdiu ignoro, quid agas: nihil enim scribis: neque ego ad te his duobus mensibus scripseram:

ram : quia cum Quinto fratre meo non eras ; quo mitterem , aut cui darem , nesciebam . Cupio scire , quid agas , & ubi sis hiematurus . Equidem velim cum Cæsare : sed ad eum propter ejus occupationes nihil sum ausus scribere : ad Balbum tamen scripsi . Tu tibi deesse noli . Serius potius ad nos , dum plenior . Quod huc properes , nihil est , præsertim Vacerra mortuo : sed tibi consilium non deest . Quid constitueris , cupio scire . Cn. Octavius , an Cn. Cornelius tuus quidem familiaris , summo genere natus , terræ filius , is me , quia scit tuum familiarem esse , crebro ad cœnam invitat : adhuc non potuit perducere : sed mihi tamen gratum est . Vale .

A R G U M E N T U M .

Levitatis Trebatium per jocum arguit , quia scripserat , se Cæsari valde jureconsultum videri : item timiditatis , quod transire in Britanniam cum Cæsare recusavit , & alia nonnulla .

M. T. C. T R E B A T I O S. D. 10

LEgi tuas litteras , ex quibus intellexi , te Cæsari nostro valde jureconsultum videri . Est quod gaudeas , te in ista loca venisse , ubi aliquid sapere viderere . Quod si in Britanniam quoque profectus esses ; profecto nemo in illa tanta insula peritior te fuisset . Verumtamen (rideamus , licet : sum enim a te invitatus) subinvideo tibi , ultro te etiam arcessitum ab eo , ad quem ceteri , non propter ejus superbiam , sed propter occupationes , adspirare non possunt . Sed tu in ista epistola nihil mihi scripsisti de tuis rebus : quæ mehercule mihi non minori curæ sunt , quam meæ . Valde metuo , ne frigeas in hibernis : quamobrem camino luculento utendum censeo . Idem & Murio , & Manilio placebat , præsertim qui sagis non abundares : quamquam vos nunc istic satis cale-
re

re audio : quo quidem nuntio valde mehercule de te timueram . Sed tu in re militari multo es cautior , quam in advocationibus , qui neque in Oceano natare volueris , studiosissimus homo nandi , neque spectare essedarios , quem antea ne andabatam quidem defraudare poteramus . Sed jam satis jocati sumus . Ego de te ad Cæsarem quam diligenter scripserim , tute scis : quam sæpe , ego . Sed mehercule jam intermiseram , ne viderer liberalissimi hominis meique amantissimi voluntati erga me diffidere . Sed tamen his litteris , quas proxime dedi , putavi esse hominem commonendum : id feci : quid profecerim , facias me velim certiolem , & simul de toto statu tuo consiliisque omnibus . Scire enim cupio quid agas , quid exspectes , quam longum istum tuum discesum a nobis futurum putes . Sic enim tibi persuadeas velim , unum mihi esse solatium , quare facilius possim pati te esse sine nobis , si tibi esse id emolumento sciam : sin autem id non est , nihil duobus nobis est stultius : me , qui te non Romam attraham ; te , qui non huc advoles . Una mehercule nostra vel severa , vel jocosa congressio pluris erit , quam non modo hostes , sed etiam fratres nostri Ædui . Quare omnibus de rebus fac ut quamprimum sciam : *aut consolando , aut consilio , aut re juvero .*

A R G U M E N T U M .

Conatur Trebatio desiderium Urbis adimere : precipit tamen , ut , nisi absit ab Urbe cum emolumento , redeat .

M. T. C. TREBATIO S. D. II

Nisi ante Roma profectus esses , nunc eam certe relinqueres : quis enim tot interregnis jureconsultum desiderat ? Ego omnibus , unde petitur , hoc consilii dederim , ut a singulis interregibus binas advocationes postulent . Satisne ti-
bi

bi videor abs te jus civile didicisse? Sed heus tu, quid agis? ecquid fit? video enim te jamolari per litteras. Hæc signa meliora sunt, quam in meo Tusculano. Sed quid sit, scire cupio. Consuli quidem te a Cæsare scribis: sed ego tibi ab illo consuli mallet. Quod si aut fit, aut futurum putas; perfer istam militiam, & permane. Ego enim desiderium tui, spe tuorum commodorum consolabor: sin autem ista sunt inaniora; recipe te ad nos. Nam aut erit hic aliquid aliquando: aut, si minus, una mehercule collocutio nostra pluris erit, quam omnes Samarobrivarum. Denique, si te cito retuleris, sermo nullus erit. Sin diutius frustra abfueris; non modo Laberium, sed etiam sodalem nostrum Valerium pertimesco. Mira enim persona induci potest Britannici jureconsulti. Hæc ego non rideo, quamvis tu rideas: sed de re severissima tecum, ut soleo, jocor. Remoto joco, tibi hoc amicissimo animo præcipio, ut, si istic mea commendatione tuam dignitatem obtinebis, perferas nostri desiderium; honestatem, & facultates tuas augeas: sin autem ista frigeant, recipias te ad nos. Omnia tamen, quæ vis, & tua virtute profecto & nostro summo erga te studio consequere. Vale.

A R G U M E N T U M .

Ex intermissione litterarum arguit Trebatium Epicureum esse factum, & in eo jocatur.

M. T. C. T R E B A T I O S. D. 12

MIrabar, quid esset, quod tu mihi litteras mittere intermisisses. Indicavit mihi Pansa meus, Epicureum te esse factum. O castra præclara! quid tu fecisses, si te Tarentum, & non Samarobrivarum misisses? Jam tum mihi non placebas, cum idem intuebare, quod & Titius familiaris meus. Sed quonam modo jus civile de-

defendes, cum omnia tua causa facias, non civium? Ubi porro illa erit formula fiduciae, ut inter bonos bene agere oportet? Quis enim est bonus, qui facit nihil, nisi sua causa? Quod jus statues *communi dividundo*, cum commune nihil possit esse apud eos, qui omnia voluptate sua metiuntur? Quomodo autem tibi placebit, *Jovem lapidem* jurare, cum scias Jovem iratum esse nemini posse? Quid fiet porro populo Ulubrano, si tu statueris, *πολιτεύεσθαι* non oportere? Quare, si plane a nobis deficiis, moleste fero: sin Pansa assentari commodum est, ignosco: modo scribe aliquando ad nos, quid agas; & a nobis, quid agi, quid fieri, aut curari velis. Vale.

ARGUMENTUM.

Intermissionis litterarum causam dicit, quam, non accipiente Trebatio, inde occasionem arripit liberioris jocandi.

M. T. C. TREBATIO S. D. 13

A Deone me injustum esse existimasti, ut tibi irascerer, quod parum mihi constans, & nimium cupidus decedendi viderere, ob eamque causam me arbitrarere litteras ad te jamdiu non misisse? Mihi perturbatio animi tui, quam primis litteris perspiciebam, molestiam attulit: neque alia fuit ulla causa intermissionis litterarum, nisi quod ubi esses, plane nesciebam. Hic tu me etiam insimulas, nec satisfactionem meam accipis. Audi, mi Testa. Utrum superbiorem te pecunia facit, an quod te imperator consulit? Moriar, ni, quæ tua gloria est, puto te malle a Cesare consuli, quam inaurari. Si vero utrumque est: quis te feret, præter me, qui omnia ferre possum? Sed, ut ad rem redeam, te istic invitum non esse vehementer gaudeo: & ut illud erat molestum, sic hoc est jucundum. Tan-
tum

tum metuo, ne artificium tuum tibi parum proficit. Nam, ut audio, istic

Non ex jure manu confertum, sed mage ferro Rem repetunt.

Et tu soles ad vim faciundam adhiberi? Neque est, quod illam exceptionem in interdicto pertimescas: *quod tu prior vi hominibus armatis non veneris*. Scio enim, te non esse procacem in laessendo. Sed, ut ego quoque te aliquid de vestris cautionibus admoneam; Treviros vites censeo: audio capitales esse: mallet, auro, argento, ære essent. Sed alias jocabimur. Tu ad me de istis rebus omnibus scribas velim quam diligentissime. Ad IV. Non. Mart. Vale.

ARGUMENTUM.

Familiariter & jocosè Trebatium reprehendit, qui litteras nullas miserat.

M. T. C. TREBATIO S. D. 14

CHrysippus Vettius, Cyri architecti libertus fecit, ut te non immemorem putarem mei: salutem enim verbis tuis mihi nuntiavit. Valde jam lautus es, qui gravere litteras ad me dare, homini præsertim prope domestico. Quod si scribere oblitus es; minus multi jam, te advocato, causa cadent: sin nostri oblitus es; dabo operam, ut istuc veniam, antequam plane ex animo tuo effluam: sin æstivorum timor te debilitat; aliquid excogita, ut fecisti de Britannia. Illud quidem perlibenter audiavi ex eodem Chrysippo, te esse Cæsari familiarem. Sed mehercule mallet, id quod erat æquius, de tuis rebus ex tuis litteris quam sæpissime cognoscere. Quod certe ita fieret, si tu maluisses benevolentia, quam litium jura perdiscere. Sed hæc joci sumus, & tuo more, & nonnihil etiam nostro. Te valde amamus, nosque a te amari tum volumus, tum etiam confidimus. Vale.

ARGU-

ARGUMENTUM.

*Declarat suum absentis Trebatii desiderium,
& gratulatur de C. Matii familiaritate.*

M. T. C. TREBATIO S. D. 15

QUam sint morosi, qui amant, vel ex hoc intelligi potest. Molestè ferebam antea, te invitum istic esse: pungit me rursus, quod scribis, te esse istic libenter: neque enim mea commendatione te non delectari facile patiebar: & nunc angor, quidquam tibi sine me esse jucundum: sed tamen hoc malo nos ferre desiderium, quam te non ea, quæ spero, consequi. Quod vero in C. Matii suavissimi doctissimique hominis familiaritatem venisti, non dici potest, quam valde gaudeam: qui fac, ut te quam maxime diligat: mihi crede, nihil ex ista provincia potes, quod jucundius sit, deportare. Cura, ut valeas.

ARGUMENTUM.

Laudare videtur Trebatium ut sapientem, qui belli pericula vitaret: sed revera notat ut timidum. Adscribit de Octavio, de Trebatii divitiis, de superbia per jocum.

M. T. C. TREBATIO S. D. 16

IN equo Trojano scis esse in extremo, sero sapiunt. Tu tamen, mi vetule, non sero: primum illas rabiosulas, fat fatuas, dedisti: deinde, quod in Britannia non minus φιλοδέωρον te præbuiisti, plane non reprehendo: nunc vero in hibernis injectus mihi videris: itaque te commovere non curas: usquequaque sapere oportet, id erit telum acerrimum. Ego, si foris cœnitarem, Cn. Octavio familiari tuo non defuissem: cui tamen dixi, cum me aliquoties invitaret: Oro te, quis tu es? Sed mehercule, extra jocum, homo
I bellus

bellus est: vellem eum tecum abduxisses. Quid agatis, ecquid in Italiam venturi sis hac hieme, fac plane sciam. Balbus mihi confirmavit, te divitem futurum: id utrum Romano more locutus sit, bene nummatum te futurum, an, quomodo Stoici dicunt, *omnes esse divites, qui celo, & terra frui possunt*, postea videro. Qui istinc veniunt, superbiam tuam accusant, quod negent te percunctantibus respondere: sed tamen est, quod gaudeas; constat enim inter omnes, neminem te uno Samarobrivæ juris peritorem esse. Vale.

A R G U M E N T U M .

Gratulatur Trebatio, quod de reditu in Urbem jam non amplius cogitet; & hortatur, ut Caesaris amicitiam plurimi faciat, quam fore fructuosam promittit, in seque ipse recipit.

M. T. C. TREBATIO S. D.

17

EX tuis litteris & Q. Fratri gratias egi, & te aliquando collaudare possum, quod jam videris certa aliqua in sententia constitisse. Nam primorum mensium litteris tuis vehementer commovebar, quod mihi interdum pace tua dixerim levis in urbis, urbanitatisque desiderio, interdum piger, interdum timidus in labore militari, sæpe autem etiam quod a te alienissimum est subimpudens videbare: tamquam enim syngrapham ad imperatorem, non epistolam attulisses: sic, pecunia ablata, domum redire properabas: nec tibi in mentem veniebat, eos ipsos, qui cum syngraphis venissent Alexandriam, nullum adhuc nummum auferre potuisse. Ego, si mei commodi rationem ducerem, te mecum esse maxime vellem: non enim mediocri afficiebar vel voluptate ex consuetudine nostra, vel utilitate ex consilio, atque opera tua. Sed cum te ex adolescentia tua in amicitiam, & fidem meam contulisses: semper te non modo

modo tuendum mihi, sed etiam augendum, atque ornandum putavi. Itaque, quoad opinatus sum, me in provinciam exiturum; quæ ad te ultro attulerim, meminisse te credo: posteaquam mea mutata ratio est: cum viderem, me a Cæsare honorificentissime tractari, & unice diligere, hominisque liberalitatem incredibilem, & singularem fidem nossem; sic ei te commendavi, & tradidi, ut gravissime, diligentissimeque potui. Quod ille ira & accepit, & mihi sæpe literis significavit, & tibi verbis, & re ostendit, mea commendatione sese valde esse commotum. Hunc tu virum nactus, si me aut sapere aliquid, aut velles tua causa putas, ne dimiseris: & si qua te forte res aliquando offenderit, cum ille aut occupatione, aut difficultate tardior tibi erit visus, perfero, & ultima exspectato: quæ ego tibi & jucunda, & honesta præstabo. Pluribus te hortari non debeo: tantum moneo, neque amicitia confirmandæ clarissimi, ac liberalissimi viri, neque uberis provinciae, neque ætatis magis idoneum tempus, hoc si amiseris, te esse ullum unquam reperiturum. Hoc, quemadmodum vos scribere soletis in vestris libris, idem Q. Cornelio videbatur. In Britanniam te non esse profectum, vehementer gaudeo: quod & tu labore caruisti, & ego te de rebus illis non audiam. Ubi sis hibernaturus, & qua spe, aut conditione, perscribas ad me velim. Vale.

A R G U M E N T U M.

Laudat Trebatium; qui de militia cum Cæsare perferenda cogitaret: jocatur præterea in illius parsimoniam, quia scripserat in palimpsesto.

M. T. C. TREBATIO S. D.

18

ACcepi a te aliquot epistolas uno tempore, quas tu diversis temporibus dederas: in quibus me cetera delectarunt: significabant enim, te istam militiam jam firmo animo ferre, & esse

fortem virum & constantem . Quæ ego paullisper in te ita desideravi , non imbecillitate animi tui , sed magis , ut desiderio nostri te æstuarè putarem . Quare perge , ut cœpisti : forti animo istam tolera militiam . Multa , mihi crede , assequere : ego enim renovabo commendationem , sed tempore . Sic habeto , non tibi majori esse curæ , ut iste tuus a me discessus fructuosissimus tibi sit , quam mihi . Itaque , quando vestræ cautiones infirmæ sunt , Græculam tibi misi cautionem chirographi mei . Tu me velim de ratione Gallici belli certio rem facias : ego enim ignavissimo cuique maximam fidem habeo . Sed , ut ad epistolas tuas redeam , cetera belle : illud miror : quis solet eodem exemplo plures dare , qui sua manu scribit ? Nam , quod in palimpsesto , laudo equidem parsimoniam : sed miror , quid in illa chartula fuerit , quod delere malueris , quam hæc scribere : nisi forte tuas formulas ; non enim puto te meas epistolas delere , ut reponas tuas . An hoc significas , nihil fieri ? Frigere te ? Ne chartam quidem tibi suppeditare ? Jam ista tua culpa est , qui verecundiam tecum extuleris , & non hic nobiscum reliqueris . Ego te Balbo , cum ad vos profisciscetur , more Romano commendabo . Tu , si intervallum longius erit mearum litterarum , ne sis admiratus ; eram enim abfuturus mense Apr. Has litteras scripsi in Pontino , cum ad villam M. Æmilii Philemonis divertissem : ex qua jam audieram fremitum clientium meorum , quos quidem tu mihi conciliaisti . Nam Ulubris , honoris mei causa , vim maximam rancunculorum se commosse constabat . Cura ut valeas . vi. Idus Apr. de Pontino .

Epistolam tuam , quam accepi ab L. Arruntio , conscidi innocentem ; nihil enim habebat , quod non vel in concione recte legi posset : sed & Arruntius ita te mandasse ajebat , & tu adscripseras . Verum illud esto : nihil te ad me postea scripsisse demiror , præsertim tam novis rebus . Vale .

ARGUMENTUM.

Scribit de Topicis a se conscriptis, ut roganti Trebatio satisfaceret: eaque esse obscuriora significat, nec legenda sine interprete. Addit, si expeditam in questionibus habere doctrinam velit, exercitationem esse necessariam.

M. T. C. TREBATIO S. D.

19

Vide quanti apud me sis: etsi jure id quidem: non enim amore te vinco: verumtamen, quod præsenti tibi prope subnegaram, non tribueram certe, id absenti debere non potui. Itaque, ut primum Velia navigare cœpi, institui Topica Aristotelica conscribere, ab ipsa urbe commonitus amantissima tui. Eum librum tibi misi Rhegio scriptum quam planissime res illa scribi potuit. Sin tibi quædam videbuntur obscuriora, cogitare debebis, nullam artem literis sine interprete, & sine aliqua exercitatione percipi posse. Non longe abieris: num jus civile vestrum ex libris cognosci potest? Qui quamquam plurimi sunt: doctorem tamen, lumenque desiderant: quamquam tu, si attente leges, si sapius, per te omnia consequere, ut certe intelligas. Ut vero etiam ipsi tibi loci, proposita quæstione, occurrant, exercitatione consequere: in qua quidem nos te continebimus, si & salvi redierimus, & salva ista offenderimus. Vale.

v. Kal. Sext. Rhegio.

ARGUMENTUM.

De Amore Velienſium in Trebatium ſcribit; & hortatur, ne poſſeſſiones eas vendat, quæ tam miſeris temporibus perſugium eſſe poſſint.

M. T. C. TREBATIO S. D.

20

Amabilius mihi Velia fuit, quod te ab ea ſenſi amari: ſed quid ego dicam te, quem quis

I III

non

non amat? Rufio medius fidius tuus ita desiderabatur, ut si esset unus e nobis. Sed ego te non reprehendo, qui illum ad ædificationem tuam traduxeris. Quamquam enim Velia non est vi-
lior, quam Lupercal: tamen istuc malo, quam hæc omnia. Tu, si me audies, quem soles, has paternas possessiones tenebis; (nescio quid enim Velientes verebantur) neque Heletem, nobilem amnem, relinques; nec Papirianam domum deferres: quamquam illa quidem habet lucum, a quo etiam advenæ teneri solent: quem tamen si excideris, multum prospexeris. Sed in primis opportunum videtur, his præsertim temporibus, habere perfugium, primum eorum urbem, quibus carus sis: deinde etiam tuam domum, tuosque agros, eaque remoto, salubri, amœnoque loco: idque etiam mea interesse, mi Trebati, arbitror. Sed valebis, meaque negotia videbis, meque, Diis juvantibus, ante brumam expectabis. Ego a Sex. Fabio, Niconis discipulo, librum abstuli Νικωνος περι πολυφαγίας. O medicum suavem, meque docilem ad hanc disciplinam! Sed Bassus noster me de hoc libro celavit: te quidem non videtur. Ventus increbrescit. Cura, ut valeas. XIII. Kal. Sex. Velia.

A R G U M E N T U M .

Silii caussam, viri optimi, amici sui, Trebatio commendat. Videtur autem, cum extra Urbem esset, ad Trebatium in urbem hæc scripsisse.

M. T. C. TREBATIO S. D.

21

Silii caussam te docui: is postea fuit apud me, cum ei dicerem, tibi videri sponsonem illam nos sine periculo facere posse, *Si bonorum Turpilie possessionem Q. Cæpio prætor ex edicto suo mihi dedit: negare ajebat Servium tabulas testamenti esse eas, quas instituisset is, qui fa-*
ctio-

etionem testamenti non habuerit : hoc idem Offilium dicere : tecum se locutum negabat : meque rogavit, ut se, causamque suam tibi commendarem. Nec vir melior, mi Testa, nec mihi amior P. Silio quisquam est, te tamen excepto. Gratissimum igitur mihi feceris, si ad eum ultro veneris, eique pollicitus eris : sed, si me amas, quamprimum : hoc te vehementer etiam atque etiam rogo. Vale.

ARGUMENTUM.

Auctoritate Jurisconsultorum probat, quod de controversia quadam dixerat.

M. T. C. TREBATIO S. D.

22

Illuferas heri inter scyphos, quod dixeram, controversiam esse, posset ne heres, quod furtum antea factum esset, recte furti agere. Itaque, etsi domum bene potus, seroque redieram : tamen id caput, ubi hæc controversia est, notavi, & descriptum tibi misi : ut scires, id, quod tu neminem sensisse dicebas, Sex. Ælium, M. Manilium, M. Brutum sensisse. Ego tamen Scævolæ, & Testæ assentior. Vale.

ARGUMENTUM.

Signa quædam Ciceroni Gallus emerat, cum is tabellas potius pictas cuperet. Rescribit igitur, ex iis emptionibus nullam se curasse. De proxima domo illi conducenda se desiderare addit.

M. T. C. FABIO GALLO S. D.

23

Tantum ex Arpinati veneram, cum mihi a te litteræ redditæ sunt : ab eodemque accipi Aviani litteras : in quibus hoc erat liberalissimum, nomina se facturum, cum venisset, qua ego vellem die. Fac, quæso, qui ego sum, esse te : estne aut tui pudoris, aut nostri, primum

rogare de die : deinde plus annua postulare ? Sed essent, mi Galle, omnia facilia, si & ea mercatus esses, quæ ego desiderabam, & ad eam summam, quam volueram : ac tamen isthæc ipsa, quæ te emisse scribis, non solum rata mihi erunt, sed etiam grata ; plane enim intelligo, te non modo studio, sed etiam amore usum, quæ te delectarint, hominem (ut ego semper iudicavi) in omni iudicio elegantissimum, quæque me digna putaris, coemisse. Sed velim maneat Damasippus in sententia : prorsus enim ex istis emptionibus nullam desidero. Tu autem, ignarus instituti mei, quanti ego genus omne signorum omnium non æstimo, tanti ista quatuor, aut quinque sumpisti. Sed Bacchas istas cum Musis Metelli comparas. Quid simile ? Primum ipsas ego Musas numquam tanti putassem, atque id fecissem, Musis omnibus approbantibus : sed tamen erat aptum bibliothecæ, studiisque nostris congruens. Bacchis vero ubi est apud me locus ? At pulchellæ sunt : novi optime, & sæpe vidi : nominatim tibi signa, mihi nota, mandassem, si probassem ; ea enim signa ego emere soleo, quæ ad similitudinem gymnasiorum exornent mihi in palæstra locum. Martis vero signum quo mihi pacis auctori ? Gaudeo nullum Saturni signum fuisse : hæc enim duo signa putarem mihi æs alienum attulisse. Mercurii mallem aliquod fuisset : felicius, puto, cum Aviano transigere possemus. Quod tibi destinaras Trapezophoron : si te delectat, habebis ; sin autem sententiam mutasti, ego habebo scilicet. Ista quidem summa næ ego multo libentius emerim diversorium Tarracinæ, ne semper hospiti molestus sim. Omnino liberti mei video esse culpam, cui plane res certas mandaram ; itemque Junii, quem puto tibi notum esse, Aviani familiarem. Exhedria quædam mihi nova sunt instituta in porticula Tusculani : ea volebam

lebam tabellis ornare: etenim, si quid generis istiusmodi me delectat, pictura delectat. Sed tamen, si ista mihi sunt habenda, certiores velim me facias, ubi sint, quando arcessantur, quo genere vesturæ. Si enim Damasippus in sententia non manebit, aliquem pseudo-Damasippum vel cum iactura reperiemus. Quod ad me de domo scribis iterum, jam id ego proficiscens mandaram meæ Tulliæ: ea enim ipsa hora acceperam tuas litteras: egeram etiam cum tuo Nicia, quod is utitur, ut scis, familiariter Cassio. Ut redii autem, prius quam tuas legi has proximas litteras: quæsi de mea Tullia, quid egisset: per Liciniam se egisse dicebat; sed opinor, Cassium uti non ita multum sorore: eam porro negare, se audere, cum vir abesset (est enim profectus in Hispaniam Decius) illo & absente & insciente migrare. Est mihi gratissimum, tanti a te æstimatam consuetudinem vitæ, victusque nostri: primum ut eam domum sumeres, ut non modo prope me, sed plane mecum habitare posses: deinde, ut migrare tantopere festines. Sed, ne vivam, si tibi concedo, ut ejus rei tu cupidior sis, quam ego sum. Itaque omnia experiar; video enim, quid mea intersit, quid utriusque nostrum. Si quid egero, faciam ut scias. Tu & ad omnia rescribes: & quando te exspectem, facies me, si tibi videbitur, certiores. Vale.

ARGUMENTUM.

Narrat, quam inique Tigellius sibi irascatur. Idem scribit lib. 13. ad Att. ep. 17. Nec dubito, quin hujus nepos sit is, de quo Horatius Sat. 2. & 3. lib. 1.

M. T. C. FABIO GALLO S. D.

24

A Moris quidem tui, quoquo me verti, vestigia, vel proxime de Tigellio; sensi enim

ex litteris tuis, valde te laborasse. Amo igitur voluntatem. Sed pauca de re. Capius, opinor, olim, *Non omnibus dormio*: sic ego non omnibus, mi Galle, servio: etsi quæ est hæc servitus? Olim, cum regnare existimabamur, non tam ab ullis, quam hoc tempore observor a familiarissimis Cæsaris omnibus, præter istum. Id ego in lucris pono, non ferre hominem pestilentiorum patria sua: eumque addictum jam tum puto esse Calvi Licinii Hipponacte præconio. At vide, quid succenseat. Phameæ causam susceperam, ipsius quidem causa: erat enim mihi sane familiaris. Is ad me venit, dixitque, judicem sibi operam dare constituisse eo ipso die, quo de P. Sextio in consilium iri necesse erat: respondi, nullo modo me facere posse, cum vellem: alium diem si sumpsisset, me ei non defuturum. Ille autem, qui sciret, se nepotem bellum tibi cinem habere, & sat bonum unctorem, discessit a me, ut mihi videbatur, iratior. Habes Sardos venales, alium alio nequiores. Cognosti meam causam, & istius Salaconis iniquitatem. Catonem tuum mihi mitte: cupio enim legere: me adhuc non legisse turpe utrique nostrum est. Vale.

A R G U M E N T U M .

Rescribit de epistola non conscissa. Monenti, ut de Cesare caute loqueretur, & scriberet, gratias agit.

M. T. C. M. FABIO GALLO S. D. 25

Quod epistolam conscissam doles, noli laborare: salva est domi: petes, cum libebit. Quod autem me mones, valde gratum est: idque ut semper facias rogo. Videris enim mihi vereri, ne, si istum habuerimus, rideamus *γέλωτα σαρδώνιον*. Sed heus tu, manum de tabula: magister adest citius, quam putaramus. Vereor ne in Catonem, Cato in nos. Mi Galle, cave putes quid-

quidquam melius; quam epistolæ tuæ partem ab eo loco: *Cetera labuntur*. Secreto hoc audi: tecum habeto: ne Apellæ quidem liberto tuo dixeris: præter duos nos loquitur isto modo nemo: bene, maleve, videro: sed, quidquid est, nostrum est. Urbe igitur, nec transversum unguem (quod ajunt) a stilo: is enim est dicendi opifex: atque ego quidem aliquantum jam etiam noctis assumo. Vale.

ARGUMENTUM.

Scribit de morbo ex herbarum esu contracto.

M. T. C. GALLO S. D.

26

CUM decimum jam diem graviter ex intestino laborarem; neque iis, qui mea opera uti volebant, probarem, me non valere, quia febrim non haberem, fugi in Tusculanum; cum quidem biduum ita jejunos fuisset, ut ne aquam quidem gustarem. Itaque confectus languore, & fame, magis tuum officium desideravi, quam abs te requiri putavi meum. Ego autem cum omnes morbos reformido, tum quod Epicurum tuum Stoici male accipiunt, quia dicat *δυσκοιὰ, καὶ δυσεντερικὰ πᾶσι* sibi molesta esse: quorum alterum morbum edacitatis esse putant; alterum etiam turpioris intemperantiæ. Sane *δυσεντερικὰν* pertinueram: sed visa est mihi vel loci mutatio, vel animi etiam relaxatio, vel ipsa fortasse jam senescentis morbi remissio profuisse. Attamen ne mirere, unde hoc acciderit, quomodo commiserim: lex sumptuaria, quæ videtur *λιτότητα* attulisse, ea mihi fraudi fuit. Nam, dum volunt isti lautè terra nata, quæ lege excepta sunt, in honorem adducere; fungos, heluellas, herbas omnes ita condiunt, ut nihil possit esse suavius: in eas cum incidissem in cœna augurali apud Lentulum, me tanta *διάρροια* arripuit, ut hodie pri-

num videatur cœpisse consistere. Ira ego, qui me ostreis, murænis facile abstinebam; a beta etiam, & malva deceptus sum: posthac igitur erimus cautiores. Tu tamen cum audisses ab Anicio, (vidit enim me nauseantem) non modo mittendi causam justam habuisti, sed etiam visendi. Ego hic cogito commorari, quoad me reficiam: nam & vires & corpus amisi. Sed, si morbum depulero, facile, ut spero, illa revocabo. Vale.

A R G U M E N T U M.

Gallum, non eum, ad quem proxime scripsit, Fabiæ gentis; sed, ut opinor, Sextiæ, accusat, ut iniquum, & impudentem.

M. T. C. GALLO S. D.

27

Miror, cur me accuses, cum tibi id facere non liceat: quod si liceret, tamen non deberas. Ego enim te, inquis, in consulatu observaram: & ais, fore, ut te Cæsar restituat. Multa tu quidem dicis, sed tibi nemo credit. Tribunatum plebis dicis te mea causa petisse. Utinam semper esses tribunus: intercessorem non querereres. Negas me audere, quod sentiam dicere: quasi tibi, cum parum pudenter me rogares, parum fortiter responderim. Hæc tibi scripsi, ut isto ipso in genere, in quo aliquid posse vis, te nihil esse cognosceres. Quod si humaniter mecum questus esses; libenter tibi me, & facile purgassem: non enim mihi ingrata sunt, quæ fecisti; sed, quæ scripsisti, molesta. Me autem, propter quem ceteri liberi sunt, tibi liberum non visum, demiror; nam, si falsa fuerunt, quæ tu ad me, ut ais, detulisti: quid ego tibi debeo? Sin vera; tu es optimus testis, quid mihi populus Rom. debeat. Vale.

ARGUMENTUM.

Probat consilium Curii, qui, Repub. desperata, in Græciam se contulerit: & adjungit, se totum in litteris esse, libertate prorsus amissa.

M. T. C. MAN. CURIO S. D.

28

MEmini, cum mihi desipere videbare, quod istic potius viveres, quam nobiscum. Erat enim multo domicilium hujus urbis (cum quidem hæc urbs) aptius humanitati, & suavitati tuæ, quam tota Peloponnesus, nedum Patræ. Nunc contra & vidisse mihi multum videris, cum, prope desperatis his rebus, te in Græciam contulisti; & hoc tempore non solum sapiens, qui hinc absis, sed etiam beatus: quamquam quis, qui aliquid sapiat, nunc beatus esse potest? Sed, quod tu, cui licebat, pedibus es consecutus, ut ibi esses, *ubi nec Pelopidarum*; nosti cetera: nos idem propemodum consequimur alia ratione, cum enim salutationi nos dedimus amicorum, quæ fit hoc etiam frequentius, quam solebat, quod, quasi avem albam, videntur bene sentientem civem videre: abdo me in bibliothecam. Itaque opera efficio tanta, quanta fortasse tu senties; intellexi enim ex tuo sermone quodam, cum mœstitiam meam, & desperationem accusares, domi tuæ dicere te, ex meis libris animum meum desiderare: sed mehercule & tum remp. lugebam, quæ non solum suis erga me, sed etiam meis erga se beneficiis erat mihi carior: & hoc tempore, quamquam me non ratio solum consolatur, quæ plurimum debet valere, sed etiam dies, quæ stultis quoque mederi solet: tamen doleo ita communem rem esse dilapsam, ut ne spes quidem, melius aliquando fore, relinquatur. Nec vero nunc quidem culpa in eo est, in cujus potestate omnia sunt (nisi forte id ipsum esse non

non debuit) sed alia casu, alia etiam nostra culpa sic acciderunt, ut de præteritis non sit querendum. Reliquam spem nullam video: quare ad prima redeo. Sapienter hæc reliquisti, si consilio: feliciter, si casu. Vale.

A R G U M E N T U M.

Memoriam declarat accepti a Cicerone beneficii, & commendatitias ab eo litteras petit ad Sulpicii successorem.

MAN. CURIUS M. CICERONI SUO S. D. 29

SI vales, bene est. Sum enim χρήσι μιν tuus, κτήσι δὲ Attici nostri: ergo fructus est tuus, mancipium illius: quod quidem si inter senes coemptionales venale proscripserit, egerit non multum. At illa nostra prædicatio quanti est? nos quod simus, quod habeamus, quod homines existimemur, id omne abs te habere? Quare, Cicero mi, persevera constanter nos conservare: & Sulpicii successori nos de meliore nota commenda, quo facilius tuis præceptis obtemperare possimus, teque ad ver lubentes videre, & nostra defigere, deportareque tuto possimus. Sed, amice magne, noli hanc epistolam Attico ostendere: sine eum errare, & putare me virum bonum esse, nec solere duos parietes de eadem fidelia dealbare. Ergo, patrone mi, bene vale, Tironemque meum saluta nostris verbis. D. A. D. IV. Cal. Nov.

A R G U M E N T U M.

Ostendit, quam misere agatur cum Repub. cum Cæsar Caninium ad aliquot horas Consulem creaverit: & de litteris commendatitiis ad Acilium scriptis significat.

M. T. C. CURIO S. D. 30

EGo vero jam te nec hortor, nec rogo, ut domum redeas; quin hinc ipse evolare cupio, & ali-

& aliquo pervenire, *ubi nec Pelopidarum nomen, nec facta audiam*. Incredibile est, quam turpiter mihi facere videar, qui his rebus intersim. Næ tu videris multo ante providisse, quid impenderet, tum, cum hinc profugisti: quamquam enim hæc etiam auditu acerba sunt: tamen audire tolerabilius est, quam videre. In campo certe non fuisti, cum hora secunda, comitiis quæstoriiis institutis, sella Q. Maximi, quem illi consulem esse dicebant, posita esset: quo mortuo nuntiato, sella sublata est. Ille autem, qui comitiis tributis esset auspicatus, centuriata habuit: consulem hora septima renuntiavit, qui usque ad Kal. Jan. esset, quæ erant futuræ mane postridie. Ita Caninio consule scito neminem prandisse: nihil tamen eo consule mali factum est: fuit enim mirifica vigilantia, qui suo toto consulatu somnum non viderit. Hæc tibi ridicula videntur: non enim ades: quæ si videres, lacrymas non teneres. Quid, si cetera scribam? sunt enim innumerabilia generis ejusdem: quæ quidem non ferrem, nisi me in philosophiæ portum contulissem, & nisi haberem socium studiorum meorum Atticum nostrum: cujus quando proprium te esse scribis mancipio, & nexu; meum autem usu, & fructu, contentus isto sum. Id enim cujusque est proprium, quo quisque fruitur, atque utitur. Sed hæc alias pluribus. Acilius, qui in Græciam cum legionibus missus est, maximo meo beneficio est: bis enim est a me judicio capitis, rebus salvis, defensus: & est homo non ingratus, meque vehementer observat. Ad eum de te diligentissime scripsi; eamque epistolam cum hac conjunxi: quam ille cum acceperit, ecquid tibi pollicitus sit, velim ad me scribas. Vale.

ARGUMENTUM.

Invitat eum ad officia mutua; & ad Urbem ut redeat, rogat, veteris urbanitatis retinendæ causâ.

M. T. C. CURIO S. D.

31

FAcile perspexi ex tuis litteris (quod semper studui) & me a te plurimi fieri, & te intelligere, quam mihi carus esses. Quod quando uterque nostrum consecutus est: reliquum est, ut officiis certemus inter nos; quibus æquo animo vel vincam te; vel vincar abs te. Acilio non fuisse necesse meas dari litteras, facile patior. Sulpicii tibi operam intelligo ex tuis litteris, non multum opus fuisse, propter res ita contractas, ut, quemadmodum scribis, nec caput, nec pedes. Equidem vellem, pedes haberent, ut aliquando redires. Vides enim exaruisse jam veterem urbanitatem: ut Pomponius noster suo jure possit dicere: *Nisi nos pauci retineamus gloriam antiquam Atticam.* Ergo is tibi, nos ei succedimus. Veni igitur, quæso, ne tantum semen urbanitatis una cum repub. intereat. Vale.

ARGUMENTUM.

Scribit hanc epistolam in Provincia: prima pars de dictis est, secunda de judiciis, tertia de Rep., ultima de Dolabella nondum genero.

M. T. C. VOLUMNIO S. D.

32

QUod sine prænomine familiariter, ut debebas, ad me epistolam misisti; primum addubitavi, num a Volumnio senatore esset, quocum mihi est magnus usus: deinde *Ἀτραπὴ* litterarum fecit, ut intelligerem, tuas esse: quibus in litteris omnia mihi perjucunda fuerunt, præter illud, quod parum diligenter possessio salinarum mearum a te procuratore defenditur. Ais enim, ut
ego

ego discefferim, omnia omnium dicta, in his etiam Sextiana, in me conferri. Quid? Tu id pateris? Nonne defendis? Non resistis? Equidem sperabam, ita notata me reliquisse genera dictorum meorum, ut cognosci sua sponte possent. Sed quando tanta fæx est in urbe, ut nihil sit tam *ἀκυρον*, quod non alicui venustum esse videatur: pugna, si me amas, nisi acuta *ἀμφιβολία*, nisi elegans *ὑπερβολή*, nisi *παράγραμμα* bellum, nisi ridiculum *παρά ἀπροσδοκίαν*, nisi cetera, quæ sunt a me in secundo libro de Oratore per Antonii personam disputata de ridiculis, *ἐντεχνα*, & arguta apparebunt, ut sacramento contendas, mea non esse. Nam de judiciis quod quereris, multo laboro minus: trahantur per me pedibus omnes rei: sit vel Selius tam eloquens, ut possit probare se liberum: non laboro. Urbanitatis possessionem, amabo, quibusvis interdictis defendamus: in qua te unum metuo, contemno ceteros. Derideri te putas? Nunc demum intelligo, te sapere. Sed mehercule, extra jocum: valde mihi tuæ litteræ facietæ elegantisque visæ sunt. Illa, quamvis ridicula essent, sicut erant: mihi tamen risum non moverunt; cupio enim nostrum illum amicum in tribunatu quamplurimum habere gravitatis: idque cum ipsius causa, (est enim mihi, ut scis, in amoribus) tum mehercule etiam reipub. quam quidem, quamvis in me ingrata sit: tamen amare non desinam. Tu, mi Volumni, quando & instituisti, & mihi vides esse gratum, scribe ad me quam sæpissime de rebus urbanis, de repub. Jucundus est mihi sermo litterarum tuarum; Præterea Dolabellam, quem ego perspicio, & judico cupidissimum esse, atque amantissimum mei, cohortare, & confirmare, & redde plane meum. Non mehercule quo quidquam desit, sed quia valde cupio, non videor nimium laborare. Vale.

ARGUMENTUM.

Hæc epistola missa est post Civile bellum. Scribit, se exercitationis causa declamare, auditoribus Hirtio, Cassio, Dolabella. Volumnium vocat ad eadem studia. Addit deliberatum sibi esse, Cæsare permittente, a causis, iudiciisque discedere.

M. T. C. VOLUMNIO S. D. 33

QUOD declamationibus nostris cares, damni nihil facis. Quod Hirtio invideres, nisi eum amares, non erat causa invidendi; nisi forte ipsius eloquentiæ magis, quam quod me audiret, invideres. Nos enim plane, mi suavissime Volumni, aut nihil sumus, aut nobis quidem ipsis displicemus, gregalibus illis, quibus, te plaudente, vigeamus, amissis: ut, etiamsi aliquando aliquid dignum nostro nomine emisimus, ingemiscamus, quod hæc *pennigero, non armigero in corpore tela exerceantur*, ut ait Philoctetes apud Accium, abjecta gloria. Sed tamen omnia mihi erunt, si tu veneris, hilariora: quamquam venies, ut ipse intelligis, in maximarum quasi concursum occupationum; quas si, ut volumus, exceperimus; ego vero multam salutem & foro dicam; & curiæ; vivamque tecum multum, & cum communibus nostris amatoribus. Nam & Cassius tuus, & Dolabella noster, vel potius uterque noster, studiis iisdem tenentur, & meis æquissimis utuntur auribus. Opus est huc limatulo, & politulo tuo iudicio, & illis interioribus litteris meis, quibus sæpe verecundior me in loquendo facis. Mihi enim iudicatum est (si modo hoc Cæsar aut patietur, aut volet) deponere illam jam personam, in qua me sæpe illi ipsi probavi, ac me totum in litteras abdere, tecumque, & cum ceteris earum studiosis honestissimo otio perfrui. Tu, vellem, ne veritus esses, ne perinvitus legerem tuas litteras, si mihi, quemadmodum scribis, longiores forte misisses: ac velim posthac sic statuas, tuas mihi litteras longissimas quasque gratissimas fore. Vale.

LIBER VIII.

ARGUMENTUM.

Commentarium mittit rerum urbanarum, & excusat se, quod alteri negotium dederit ad illa colligenda. Addit hæc: de Comitibus Transpadanorum Romæ rumorem nullum esse: de successione Galliarum nihil relatum: de Pompejo cupere se aliquid cognoscere; de Cæsare varia dissipari; aliaque nonnulla. Respondit Cicero huic epistola ea, quæ est 8. lib. 2.

M. CÆLIUS RUFUS M. T. CICERONI

S. D.

I

QUOD tibi decedenti pollicitus sum, me omnes res urbanas diligentissime tibi perscripturum: data opera paravi, qui sic omnia perfecteretur, ut verear, ne tibi arguta nimium hæc sedulitas videatur. Tamen si tu, scio, quam sis curiosus, & quam omnibus peregrinantibus gratum sit, minimarum quoque rerum, quæ domi gerantur, fieri certiores; tamen in hoc te deprecor, ne meum hoc officium arrogantiae condempnes, quod hunc laborem alteri delegavi: non quin mihi suavissimum sit & occupato, & ad litteras scribendas, ut tu nosti, pigerrimo, tuæ memoriæ dare operam: sed ipsum volumen, quod tibi misi, facile, ut ego arbitror, me excusat. Nescio cujus otii esset, non modo perscribere hæc, sed omnino animadvertere. Omnia enim sunt ibi S. C. edicta, fabulæ, rumores. Quod exemplum si forte minus te delectarit, ne molestiam tibi cum impensa mea exhibeam, fac me certiores. Si quid in repub. majus actum erit, quod isti operarii minus commode persequi possint: & quemadmodum actum sit, & quæ existimatio consecuta, quæque de eo spes est, diligenter

genter tibi perscribemus. Ut nunc est, nulla magnopere expectatio est; nam & illi rumores de comitiis Transpadanorum Cumarum tenuis caluerunt. Romam cum venissem, ne tenuissimam quidem auditionem de ea re accepi. Præterea Marcellus quidem adhuc nihil retulit de successione provinciarum Galliarum: in Kal. Jun. ut mihi ipse dixit, eam distulit relationem: sane quam eos sermones repressit, qui de eo tum fuerant, cum Romæ nos essemus. Tu, si Pompejum, ut volebas, offendisti, qui tibi visus sit, & quam orationem habuerit tecum, quamque ostenderit voluntatem, (solet enim aliud sentire, & loqui: neque tamen tantum valere ingenio, ut non appareat, quid cupiat) fac mihi perscribas. Quod ad Cæsarem attinet, crebri, & non belli de eo rumores: sed sussurationes dumtaxat veniunt: alius equitem perdidisse, quod opinor certe factum: alius septimam legionem vapulasse; ipsum apud Bellovacos circumferri, interclusum ab reliquo exercitu: neque adhuc certi quidquam est: neque hæc incerta tamen, vulgo jactantur: sed inter paucos, quos tu nosti plane, secreto narrantur: at Domitius, cum manus ad os apposuit. Te ad ix. Kal. Jun. subrostrani (quod illorum capiti sit) dissiparant perisse: ita ut in urbe, ac foro toto maximus rumor fuerit, te a Q. Pompejo in itinere occisum. Ego, qui scirem, Q. Pompejum Baulis embæneticam facere, & usque eo, ut ego misereretur ejus esurie, non sum commotus; & hoc mendacio, si qua pericula tibi impenderent, ut defungeremur optavi. Plancus quidem tuus Ravennæ est: & magno congiario donatus a Cæsare, nec beatus, nec bene instructus est. Tui politici libri omnibus vigent. Vale.

ARGUMENTUM.

Nuntiat de absoluto Messalla, ejusque defensore Hortensio a populo male accepto: adjicit quædam de Republica, & de competitoribus suis.

M. CÆLIUS M. T. CICERONI S. D. 2

Certe, inquam, absolutus est: me repræsentante pronuntiatum est, & quidem omnibus ordinibus, sed & singulis in unoquoque genere sententiis. Vide modo, inquis. Non mehercules: nihil enim unquam tam præter opinionem, tam quod videretur omnibus indignum, accidit: quin ego, cum pro amicitia validissime faverem ei, & me jam ad dolendum præparassem; postquam factum est, obstupui, & mihi visus sum captus esse. Quid alios putas? Clamoribus scilicet maximis judices corripuerunt, & ostenderunt, plane esse, quod ferri non posset. Itaque relictus lege Licinia, majore esse periculo videtur. Accessit huc, quod postridie ejus absolutionis in theatrum Curionis Hortensius introiit: puto, ut suum gaudium gauderemus. Hic tibi strepitus, fremitus, clamor, tonitruum, & rudentum sibilus. Hoc magis animadversum est, quod intactus a sibilo pervenerat Hortensius ad senectutem. Sed tum ita bene, ut in totam vitam cuivis satis esset, & pœniteret eum jam vicisse. De repub. quod tibi scribam, nihil habeo. Marcelli impetus resederunt, non inertia, sed, ut mihi videbatur, consilio. De comitiis consularibus incertissima est existimatio. Ego incidi in competitorem nobilem & nobilem agentem: nam M. Octavius, Cn. F., & C. Hirrus mecum petit. Hoc ideo scripsi, quod scio, te acriter propter Hirrum nuntium nostrorum comitiorum expectaturum. Tu tamen simul ac me designatum audieris, ut tibi curæ sit, quod ad pantheras attinet, rogo. Syngrapham Sittianam
tibi

tibi commendo . Commentarium rerum urbana-
rum primum dedi L. Castrinio Pæto ; secundum
ei , qui has litteras tibi reddet . Vale .

A R G U M E N T U M .

*Suum in scribendo officium prædicat ; scribit , de
Comitiis suis quæ opinio sit : de Milonis re quid
egerit : præterea cupere se aliquo Ciceronis libro
illustrari .*

M. CÆLIUS M. T. CICERONI S. D. 3

ESt ne ? vici ? & tibi sæpe , quod me negaras
discedens curaturum , litteras mitto ? est : si
quidem perferuntur , quas do . Atque hoc eo dili-
gentius factito , quod , cum otiosus sum , plane ,
ubi delectem otiolum meum , non habeo . Tu
cum Romæ eras , hoc mihi certum , ac jucundis-
simum vacanti negotium erat , tecum id otii tem-
pus consumere : idque non mediocriter desidero :
ut non modo mihi solus esse , sed Romæ , te pro-
fecto , solitudo videatur facta : & , qui (quæ mea
negligentia est) multos sæpe dies ad te cum hic
eras , non accedebam , nunc , quotidie non esse
te , ad quem cursitem , discrucior . Maxime ve-
ro , ut te dies , noctesque quæram , competitor
Hirrus curat . Quomodo illum putas , auguratus
tuum competitorem dolere , & dissimulare , me
certiorem quam se , candidatum ? de quo ut ,
quem optas , quamprimum nuntium accipias ,
tua medius fidius magis , quam mea causa cupio .
Nam mea , si fio , forsitan cum locupletiore refe-
ram : sed hoc usque eo suave est , quod , si accide-
rit , tota vita risus nobis deesse non poterit . Sed
tanti ? sed mehercule : non multum M. Octavius
eorum odia , qui Hirrum premunt , quæ permul-
ta sunt , sublevat . Quod ad Philotimi liberti of-
ficiū , & bona Milonis attinet : dedimus operam ,
ut & Philotimus quam honestissime Miloni absen-
ti ,

ti, ejusque necessariis satisfaceret, & secundum ejus fidem, & sedulitatem, æstimatio tua conservaretur. Illud nunc a te peto, si eris (ut spero) otiosus, aliquod ad nos, ut intelligamus nos tibi curæ esse, σύνταγμα conscribas. Qui tibi istuc, inquis, in mentem venit homini non inepto? Aliquod ex tam multis tuis monumentis exstare, quod nostræ amicitiae memoriam posteris quoque prodat, velim. Cujusmodi, puto, quæris. Tu aptius, qui omnem nosti disciplinam, quod maxime conveniat, excogitabis: genere tamen, quod & ad nos pertineat, & διδασκαλίαν quamdam, ut versetur inter manus, habeat. Vale.

A R G U M E N T U M .

Scribit de judiciis, de magistratibus, de Rep., de se ipso, de syngrapha Sittiana, de Rege Alexandrino.

M. CÆLIUS M. T. CICERONI S. D. 4

INvideo tibi: tam multa quotidie, quæ mire re, istuc perferuntur. Primum illud, absolutum Messallam, deinde eundem condemnatum: C. Marcellum Cos. factum: M. Claudium a repulsa postulatam a Gallis duobus: P. Dolabellam quindecimvirum factum. Hoc tibi non invideo, caruisse te pulcherrimo spectaculo, & Lentuli Cruris repulsi vultum non vidisse. At qua spe, quam certa opinione descenderat? quam ipso diffidente Dolabella? & hercules, nisi nostri equites acutius vidissent, pene concedente adversario superasset. Illud te non arbitror miratum. Servium tribunum pl. designatum, condemnatum: cujus locum C. Curio petiit: sane quam multis incutit, qui eum, facilitatemque ejus non norunt, magnum metum. Sed, ut spero, & volo, & ut se fert ipse, bonos, & senatum malet: totus, ut nunc est, hic scaturit. Hujus autem voluntatis initium, & causa est, quod eum non
me-

mediocriter Cæsar, qui solet infimorum hominum amicitias sibi qualibet impensa adjungere, valde contempsit. Qua in re mihi videtur illud perquam venuste cecidisse, quod a reliquis quoque usque eo est animadversum, ut Curio, qui nihil consilio facit, ratione, & insidiis usus videretur in evitandis eorum consiliis, qui se intenderant adversarios in ejus tribunatum: Lælios, & Antonios, & id genus valentes dico. Has ego tibi litteras eo majore misi intervallo, quod comitiorum dilationes occupatiorem me habebant, & exspectare in dies exitum cogeabant, ut, confectis omnibus, te facerem certiorum. Ad Kal. Sext. usque exspectavi: prætoris moræ quædam inciderunt. Mea porro quem eventum sint habitura, nescio: opinionem quidem, quod ad Hirrum attinet, incredibilem ædiliū plebis comitiis nacta sunt; nam M. Cælium Vicinianum mentio illa fatua, quam deriseramus olim, & promulgatio de Dictatore subito dejecit, & dejectum magno clamore insecuta est. Inde Hirrum cuncti jam, non faciendum, flagitare. Spero te celeriter & de nobis, quod sperasti, & de illo, quod vix sperare ausus es, auditurum. De republica jam novi quidquam exspectare desieramus. Sed, cum senatus habitus esset ad Apollinis ad xi. Kal. Sex., & referretur de stipendio Cn. Pompeji, mentio facta est de legione ea, quam expensam tulit C. Cæsari Pompejus, quo numero esset, quo appeteretur: cum ex Gallia coactus est dicere Pompejus, se legionem abducturum, sed non statim sub mentionem, & convivium obrectatorum. Inde interrogatus de successione C. Cæsaris: de qua, hoc est de provinciis, placitum est, ut quamprimum ad urbem reverteretur Cn. Pompejus, ut coram eo de successione provinciarum ageretur; nam Ariminum ad exercitum Pompejus erat iturus, & statim

tim iit: puto idibus Sex. de ea re factum iri: profecto aut transigetur aliquid, aut turpiter intercedetur. Nam in disputando coniecit illam vocem Cn. Pompejus, omnes oportere senatui dicto audientes esse. Ego tamen sic nihil expecto, quomodo Paullum consulem des. primum sententiam dicentem. Sæpius te admoneo de syngrapha Sittiana: cupio enim te intelligere, eam rem ad me valde pertinere. Item de pantheris, ut Cybiratas arceffas, curesque mihi ut vehantur. Præterea nuntiatum nobis, & pro certo jam habetur, regem Alexandrinum mortuum. Quid mihi suadeas, quomodo regnum illud sese habeat, quis procuret, diligenter mihi perscribas. Kal. Sex.

ARGUMENTUM.

Monet Ciceronem, ut, antequam Parthi bellum inferrent, statueret quid sibi agendum esset: imparem enim fore dimicationem: de Rep. nihil ait esse novi.

M. CÆLIUS M. T. CICERONI S. D. 5

QUa tu cura sis, quod ad pacem provinciæ tuæ finitimarumque regionum attinet, nescio: ego quidem vehementer animi pendeo. Nam si hoc moderari possemus, ut pro viribus copiarum tuarum belli quoque existeret magnitudo; & quantum gloriæ, triumphoque opus esset, assequeremur; periculosamque & gravem illam dimicationem evitarem: nihil tam esset optandum. Nunc, si Parthus movet aliquid, scio, non mediocrem fore contentionem: tuus porro exercitus vix unum saltum tueri potest. Hanc autem nemo ducit rationem: sed omnia desiderantur ab eo (tamquam nihil denegatum sit ei, quominus quam paratissimus esset) qui publico negotio præpositus est. Accedit huc, quod

successionem futuram propter Galliarum controversiam non video. Tamen si hac de re puto te constitutum, quid facturus esses, habere: tamen, quo maturius constitueres, cum hunc eventum providebam, visum est, ut te facerem certiores. Nosti enim hæc translatitia: de Galliis constituetur: erit, qui intercedat: deinde alius existet, qui, nisi libere liceat de omnibus provinciis decernere senatui, reliquas impediatur: sic multum ac diu luderetur, atque ita diu, ut plus biennium in his tricis moretur. Si quid novi de republ. quod tibi scriberem, haberem, usus essem mea consuetudine, ut diligenter & quid actum esset, & quid ex eo futurum sperarem, perscriberem. Sane tamquam in quodam incili jam omnia adhæserunt. Marcellus idem illud de provinciis urget: neque adhuc frequentem senatum efficere potuit. Quod si hoc præterito anno Curio tribunus, & eadem actio de provinciis introibit: quam facile nunc sit omnia impedire, & quam hoc Cæsari, qui sua causa, remp. non curet, superet, non te fallit. Vale.

A R G U M E N T U M.

Narrat de Hirro competitore ab Ædilitate dejecto: de Provinciis nihil actum significat. Pantheras petit: M. Feridium commendat: addit nonnulla de Favonio, Pompejo, Calidio.

M. CÆLIUS M. T. CICERONI S. D. 6

SIC tu, inquis, Hirrum tractasti? Immo, si scias, quam facile, quam ne contentionis quidem minimæ fuerit, pudeat te, ausum illum unquam esse incedere tamquam tuum competitorum. Post repulsam vero risus facit: civem bonum ludit, & contra Cæsarem sententias dicit: expectationem corripit: Curionem prorsus non mediocriter objurgatus hac repulsa se mutavit.

vit. Præterea qui numquam in foro apparuerit, non multum in judiciis versatus sit, agit causas liberales: sed raro post meridiem. De provinciis quod tibi scripseram idibus Sext. actum iri, interpellat iudicium Marcelli consulis designati: in Kal. rejecta causa est: ne frequentiam quidem efficere potuerunt. Has litteras ad iv. non. Sept. dedi, cum ad eam diem ne profligatum quidem quidquam esset. Ut video, causa hæc integra in proximum annum transferetur: & quantum divino, relinquendus tibi erit, qui provinciam obtineat. Nam non expedietur successio; quando Galliæ, quæ habent intercessorem, in eandem conditionem, quam ceteræ provinciæ, vocantur. Hoc mihi non est dubium: quo tibi magis scripsi, ut ad hunc eventum te parares. Fere litteris omnibus tibi de pantheris scripsi: turpe tibi erit; Patiscum Curioni decem misisse, te non multis partibus plures: quas ipsas Curio mihi & alias Africanas decem donavit: ne putes illum tantum prædia rustica dare scire. Tu, si modo memoria tenueris, & Cibratas arcessieris, itemque in Pamphyliam litteras miseris, (nam ibi plures capi ajunt) quod voles efficies. Hoc vehementius laboro nunc, quod seorsum a collega puto mihi omnia paranda. Amabo te, impera tibi: hoc cura. Soles libenter, ut ego, majorem partem nihil curare. In hoc negotio nulla tua, nisi loquendi, cura est, imperandi, & mandandi. Nam, simul atque erunt captæ, qui alant eas & deportent, habes eos, quos ad Sittianam syngrapham misi. Puto etiam, si nullam spem mihi litteris ostenderis, me isto missurum alios. M. Feridium equitem Romanum, amici mei filium, bonum & strenuum adolescentem, qui ad suum negotium istuc venit, tibi commendo: & te rogo, ut eum in tuorum numero habeas. Agros, quos fructuarios habent civitates, vult

tuo beneficio, quod tibi facile, & honestum factu est, immunes esse: gratos & bonos viros tibi obligaris. Nolo te putare Favonium a columnariis præteritum: optimus quisque eum non fecit. Pompejus tuus aperte Cæsarem vetat provinciam tenere cum exercitu, & consulem esse: tamen hanc sententiam dixit, nullum hoc tempore S. C. faciendum. Scipio hanc, ut Kal. Mar. de provinciis Galliis, neu quid conjunctim referretur. Contristavit hæc sententia Balbum Cornelium: & scio, eum conquestum esse cum Scipione. Calidius in defensione sua fuit disertissimus, in accusatione satis frigidus. Vale.

A R G U M E N T U M.

Varia scribit: primum de judiciis quibusdam, tum de rep. satis copiose, postremo de seipso.

M. CÆLIUS M. T. CICERONI S. D. 7

ET si de repub. quæ tibi scribam, habeo: tamen nihil, quo magis gavisurum te putem, habeo, quam hoc. Scito, C. Sempronium Rufum, Rufum, mel, ac delicias tuas, calumniam maximo plausu tulisse: quæris qua in causa? M. Tuccium, accusatorem suum, post ludos Romanos reum lege Plotia de vi fecit, hoc consilio, quod videbat, si extraordinarius nemo reus accessisset, sibi hoc anno causam esse dicendam. Dubium porro illi non erat, quid futurum esset. Nemini hoc deferre munusculum maluit, quam suo accusatori. Itaque sine ullo subscriptore descendit, & Tuccium reum fecit. At ego, simul atque audiui, invocatus ad subsellia rei accurro: surgo, neque verbum de re facio. Totum Sempronium usque eo perago, ut Vestorium quoque interponam, & illam fabulam narrem, quemadmodum tibi pro beneficio dederit, si quid injuriis suis esset, quo Vestorius teneretur. Hæc quoque magna nunc con-
tentio

rentio forum tenet. M. Servilius postquam, ut cœperat, omnibus in rebus turbabat, nec, quod non venderet, quidquam reliquerat; maximeque nobis traditus erat invidiæ: neque Laterensis prætor, postulante Pausania, nobis patronis, *quo ea pecunia pervenisset*, recipere voluit: quod Pilius, necessarius Attici nostri, de repetundis eum postulavit: magna illico fama surrexit; & de damnatione ferventer loqui est cœptum: Quo vento projicitur Appius minor, ut indicet pecuniam ex bonis patris pervenisse ad Servilium, prævaricationisque caussa diceret depositum HS. LXXXI. Admiraris amentiam: quid si actiones stultissimas, quid si nefarias patris confessiones audisses? Mittit in consilium eisdem illos, qui lites æstimarant, judices. Cum æquo numero sententiæ fuissent, Laterensis leges ignorans, pronunciavit, quod singuli ordines judicassent: & ad extremum, ut solent, Non redigam. Postquam discessit, & pro absoluto Servilius haberi cœptus, legisque unum & centesimum caput legit, in quo ita erat: *Quod eorum judicium major pars judicarit, id jus ratumque esto*: in tabulas absolutum non retulit, ordinum judicia perscripsit. Postulante rursus Appio, cum L. Lollio transegit, & se relaturum dixit. Sic nunc neque absolutus neque damnatus Servilius, de repetundis faucius Pilio tradetur. Nam de divinatione Appius, cum calumniam jurasset, contendere ausus non est, Pilioque cessit: & ipse de pecuniis repetundis a Serviliis est postulatus, & præterea de vi reus a quodam suo emissario Titio est factus. Recte hoc par habet. Quod ad rempublicam pertinet, omnino multis diebus, expectatione Galliarum, actum nihil est. Aliquando tamen, re sæpe dilata, & graviter acta, & plane perspecta Cn. Pompeji voluntate in eam partem, ut eum decedere post Kalend. Mart. placeret: S. C. quod tibi misi, factum est, auctoritatesque perscriptæ.

S. C. auctoritas. Pridie Kalend. Octob. in aede Apollinis, scribendo affuerunt L. Domitius, Cn. F. Ahenobarbus, Q. Cæcilius, Q. F. Metellus Pius Scipio, L. Villius, L. F. Pomt. Annalis, C. Septimius, T. F. Quirina, C. Luccejus, C. F. Pup. Hirrus, C. Scribonius, C. F. Pop. Curio, L. Attejus, L. F. An. Capito, M. Oppius, M. F. Terentina. Quod M. Marcellus consul V. F. de provinciis consularibus. D. E. R. I. C. uti L. Paullus, C. Marcellus Cos. cum magistratum iniissent ad Kalend. Mart., quæ in suo magistratu futurae essent, de consularibus provinciis ad senatum referrent, neve quid prius ex Kalend. Mart., neve quid conjunctim de ea re referretur a consulibus, utique ejus rei causa per dies comitiales senatum haberent, S. Q. C. facerent: & cum de ea re ad senatum referretur a consulibus, qui in CCC. iudiciis essent, sex adducere liceret. Si quid de ea re ad populum, ad plebemve lato opus esset, ut Ser. Sulpicius, M. Marcellus Cos. præt. tribunique pleb., quibus eorum videretur, ad populum, plebemve ferrent: quod ii non tulissent, uti, quicumque deinceps essent, ad populum, plebemve ferrent.

I. V. Pridie Kalend. Octob. in aede Apollinis, scribendo affuerunt L. Domitius, Cn. F. Ahenobarbus, Q. Cæcilius, Q. F. Metellus Pius Scipio, L. Villius, L. F. Pomt. Annalis, C. Septimius, T. F. Quirina, C. Scribonius, C. F. Pop. Curio, L. Attejus, L. F. An. Capito, M. Oppius, M. F. Terentina. Quod M. Marcellus consul V. F. de provinciis. D. E. R. I. C. senatum existimare, neminem eorum, qui potestatem habent intercedendi, impediendi, moram asserre oportere, quominus de repub. ad senatum referri, S. Q. C. fieri possit: qui impedierit, eum senatum existimare contra rempub. fecisse. Si quis huic S. C. intercesserit: senatui placere, auctoritatem perscribi, & de ea re ad senatum, populumque referri. Huic S. C. intercessit C. Cælius, L. Vicinius, P. Cornelius, C. Vibius Pansa.

Item

Item senatui placere, de militibus, qui in exercitu C. Cæsaris sunt, qui eorum stipendia emerita, causas, quibus de causis missi fieri debeant, habeant, ad hunc ordinem referri, ut eorum ratio habeatur, causæque cognoscantur. Si quis huic S. C. intercesserit, senatui placere, auctoritatem perscribi, & de ea re ad senatum, populumque referri. Huic S. C. intercessit C. Cælius, C. Panfa, tribuni plebis. Itemque Senatui placere, in Ciliciam provinciam, inque VIII. reliquas provincias, quas prætorii pro prætore obtinerent, eos, qui prætores fuerunt, neque in provincia cum imperio fuerunt, quos eorum ex S. C. cum imperio in provincias pro prætore mitti oporteret, eos sortito in provincias mitti placere: si ex eo numero, quos S. C. in provincias ire oporteret, ad numerum non essent, qui in eas provincias proficiscerentur: tum, uti quodque collegium primum prætorum fuisset, neque in provincias profecti essent, ita sorte in provincias proficiscerentur: si ii ad numerum non essent, tunc deinceps proximi cujusque collegii, qui prætores fuissent, neque in provincias profecti essent, in sortem conjicerentur, quoad is numerus effectus esset, quem ad numerum in provincias mitti oporteret. Si quis huic S. C. intercessisset, auctoritas perscriberetur. Huic S. C. intercessit C. Cælius, C. Panfa tribuni plebis. Illa præterea Cn. Pompeji sunt animadversa, quæ maxime confidentiam attulerunt hominibus, ut diceret, se ante Kal. Mart. non posse sine injuria de provinciis Cæsaris statuere, post Kal. Mart. se non dubitaturum. Cum interrogaretur, si qui tum intercederent: dixit, hoc nihil interesse, utrum Cæsar senatui dicto audiens futurus non esset, an pararet, qui senatum decernere non pateretur. Quid si, inquit alius, & consul esse, & exercitum habere velit? At ille, quam clementer! quid si filius meus fustem mihi impingere velit? His vocibus, ut existimarent homines, Pompejo cum

Cæsare esse negotium, effecit. Itaque jam, ut video, alterutram ad conditionem descendere vult Cæsar, ut aut maneat, neque hoc anno sui ratio habeatur: aut, si designari poterit, decedat. Curio se contra eum totum parat: quid assequi possit, nescio. Illud video, bene sentientem, etsi nihil effecerit, cadere non posse. Me tractat liberaliter, Curio & mihi suo munere negotium imposuit. Nam, si mihi non dedisset eas, quæ ad ludos ei advektæ erant Africanæ, potuit supersederi. Nunc, quando dare necesse est, velim tibi curæ sit, quod a te semper petii, ut aliquid istinc bestiarum habeamus: Sittianamque syngropham tibi commendo. Libertum Philonem istuc misi, & Diogenem Græcum, quibus mandata & litteras ad te dedi: eos tibi & rem, de qua misi, velim curæ habeas: nam, quam vehementer ad me pertineat, in iis, quas tibi illi reddent, litteris descripsi. Vale.

A R G U M E N T U M.

Scribit de Parthici belli rumore, & de Provinciis quid putet actum iri. Addit actiones Curionis de agro Campano, de Ciceronis decessu. Affirmat, se officio suo satis esse facturum.

M. CÆLIUS M. T. CICERONI S. D. 8

SAnequam litteris C. Cassii, & Dejotari, sumus commoti. Nam Cassius cis Euphratem copias Parthorum esse scripsit: Dejotarus, profectas per Commagenem in provinciam nostram. Ego quidem præcipuum metum, quod ad te attinebat, habui, qui scirem, quam paratus ab exercitu esses, ne quod hic tumultus dignitati tuæ periculum afferret. Nam de vita, si paratior ab exercitu esses, timuisssem: nunc hæc exiguitas copiarum, recessum, non dimicationem mihi tuam præfagiebat. Hoc quo modo acciperent homines, quam

quam probabilis necessitas futura esset, vereor etiam nunc: neque prius definam formidare, quam tetigisse te Italiam audiero. Sed de Parthorum transitu nuntii varios sermones excitarunt. Alius enim, Pompejum mittendum; alius, ab urbe non removendum; alius, Cæsarem cum suo exercitu; alius, consules: nemo tamen, ex S. C. privatos. Consules autem, quia verentur, ne illud S. C. fiat, ut paludati exeant, & contumeliose præter eos ad alium res transferatur, omnino senatum haberi nolunt: usque eo, ut parum diligentes in republica videantur: sed honeste, sive negligentia, sive inertia est, sive ille, quem proposui, metus latet sub hac temperantiæ estimatione, nolle provinciam. A te litteræ non venerunt: &, nisi Dejotari subsecutæ essent, in eam opinionem Cassius venerat, quæ diripuisset ipse, ut viderentur ab hoste vastata, finxisse bellum, & Arabas in provinciam immisisse, eosque Parthos esse, senatui renuntiasse. Quare tibi suadeo, quicumque est istic status rerum, diligenter & caute perscribas, ne aut velificatus alicui dicaris: aut aliquid, quod referret scire, reticuisse. Nunc exitus est anni: nam ego has litteras ad xiv. Kal. Dec. scripsi. Plane nihil video ante Kalend. Januar. agi posse. Nosti Marcellum, quam tardus & parum efficax sit: itemque Servium, quam cunctator. Cujusmodi putas hos esse? aut qui id, quod nolint, conficere posse, qui quæ cupiunt, tamen ita frigide agunt, ut nolle existimentur? Novis magistratibus autem, si Parthicum bellum erit, hæc causa primos menses occupabit. Sin autem aut non erit istic bellum, aut tantum erit, ut vos aut successores parvis additis copiis, sustinere possint, Curionem video se dupliciter jactaturum: primum, ut aliquid Cæsari adimat: inde ut aliquid Pompejo tribuat, quodvis, quamlibet tenue munusculum. Paulus

porro non humane de provincia loquitur: hujus cupiditati occursurus est Furnius noster: plures suspicari non possum. Hæc novi: alia, quæ possunt accidere, non cerno: multa tempus afferre, & præparata multa scio: sed intra fines hos, quæcumque acciderint, vertentur. Illud addo actiones C. Curionis de agro Campano: de quo negant Cæsarem laborare, sed Pompejum valde nolle, ne vacuus advenienti Cæsari pateat. Quod ad tuum decessum attinet; illud tibi non possum polliceri, me curaturum, ut tibi succedatur: illud certe præstabo, ne amplius prorogetur. Tui consilii est, si tempus, si senatus coget, si honeste a nobis recusari non poterit, velisne perseverare: mei officii est, meminisse, qua obtestatione decedens, mihi, ne paterer fieri, mandaris. Vale.

A R G U M E N T U M.

Capita sunt hujus epistolæ, de Appio a Dolabella accusato, de Ciceronis officio, de affinitate cum Dolabella jungenda, de Repub. Huic respondet epistola decimatertia libri secundi.

M. CÆLIUS M. T. CICERONI S. D. 9

NON dubito, quin perlatum ad te sit, Appium a Dolabella reum factum: sanequam non ea, quam existimaveram, invidia. Neque enim stulte Appius: qui simul atque Dolabella accessit ad tribunal, introierat in urbem, triumphique postulationem abjecerat. Quo facto retulit sermones, paratiorque visus est, quam speraverat accusator. Is nunc in te maximam spem habet. Scio, tibi eum non esse odio: quam velis eum obligare, in tua manu est: cum quo similtates si tibi non fuissent, liberius tibi de tota re esset. Nunc si ad illam summam veritatem legitimum jus exegeris: cavendum tibi erit, ne parum simpliciter & candide posuisse inimicitias videaris. In hanc partem porro tutum tibi erit, si quid volueris, gratificari: nemo enim

ne-

necessitudine & amicitia te deterritum ab officio dicet. Illud mihi occurrit, quod inter postulationem, & nominis delationem, uxor a Dolabella discessit. Quid mihi discedens mandaris, memini; quid ego tibi scripserim, te non arbitrator oblitum. Non est jam tempus plura narrandi. Unum illud monere te possum: si res tibi non displicebit, tamen hoc tempore nihil de tua voluntate ostendas; & exspectes, quemadmodum exeat ex hac causa. Ne qua invidiosum tibi sit, si emanarit. Porro significatio ulla si intercesserit, clarius quam deceat, aut expediat, fiat. Neque ille tacere eam rem poterit, quæ suæ spei tam opportuna acciderit: quæque in negotio conficiendo tanto illustrior erit: cum præsertim is sit, qui si perniciosum sciret esse loqui de hac re, vix tamen se contineret. Pompejus dicitur valde pro Appio laborare, ut etiam putent alterutrum de filiis ad te missurum. Hic nos omnes absolvimus: & hercule confecta omnia, fœda & inhonesta sunt. Consules autem habemus summa diligentia: adhuc S. C. nisi de feriis Latinis, nullum facere potuerunt. Curioni nostro tribunatus congelciat. Sed dici non potest, quo modo hic omnia jaceant. Nisi ego cum tabernariis & aquariis pugnarem, veternus civitatem occupasset. Si Parthi vos nihil calfaciunt, nos hic frigore frigesimus. Tamen, quoquo modo hic omnia jaceant, potuit sine Parthis. Bibulus in Amano nescio quid cohorticularum amisit. Hoc sic nunciatum est. Quod tibi supra scripsi, Curionem frigere; jam calet; nam ferventissime concerpitur. Levissime enim, quia de intercalando non obtinuerat, transfugit ad populum, & pro Cæsare loqui cœpit: legemque Viariam, non dissimilem agrariæ Rulli, & Alimentariam, quas jubet ædiles metiri, jactavit: hoc nondum fecerat, cum priorem epistolæ partem scripsi. Ama-

bo te, si quid, quod opus fuerit, Appio facies, ponito me in gratiam. De Dolabella integrum tibi reserves, suadeo: & huic rei, de qua loquor, & dignitati tuæ, æquitatisque opinioni hoc ita facere expedit. Turpe tibi erit pantheras Græcas me non habere. Vale.

A R G U M E N T U M.

Scribit de belli Parthici periculo, de Cornificii nuptiis, de Valeriæ divortio, de Ocellæ adulterio.

M. CÆLIUS M. T. CICERONI S. D. IO

QUam cito tu istinc decedere cupias, nescio: ego quidem eo magis, quo adhuc felicius rem gessisti. Dum istic eris, de belli Parthici periculo cruciabor, ne hunc risum meum metus aliquis perturbet. Breviores has litteras properanti publicanorum tabellario subito dedi: tuo liberto pluribus verbis scriptas pridie dederam. Res autem novæ nullæ sane acciderunt: nisi hæc vis tibi scribi, quæ certe vis. Cornificius adolescens Orestillæ filiam sibi despondit. Paulla Valeria, soror Triarii, divortium sine causâ, quo die vir e provincia venturus erat, fecit. Nuptura est D. Bruto: nondum retulerat. Multa in hoc genere incredibilia, te absente, acciderunt. Ser. Ocella nemini persuasisset, se mœchum esse, nisi triduo bis deprehensus esset. Quæris, ubi? ubi hercule ego minime vellem: relinquo tibi quod ab aliis quærâs: neque enim displicet mihi, imperatorem singulos percontari, cum qua sit aliquis deprehensus. Vale.

A R G U M E N T U M.

Supplicationes Ciceroni a senatu decretas significat pro re in Provincia bene gesta; &, quæ fuerit cujusque vel sententia, vel voluntas, docet: scribit etiam de Rep.

M. CÆLIUS M. T. CICERONI S. D. II

Non diu, sed acriter nos tuæ supplicationes torserunt: incideramus enim in difficilem
no-

nodum. Nam Curio, tui cupidissimus, cui omnibus rationibus comitiales eripiebantur, negabat se ullo modo pati posse, decerni supplicationes: ne quod furore Paulli adeptus esset boni, sua culpa videretur amisisse, & prævaricator causæ publicæ existimaretur. Itaque ad pactionem descendimus: & confirmarunt consules, se his supplicationibus in hunc annum non usuros. Plane, quod utrisque consulibus gratias agas, est: Paulo magis certe. Nam Marcellus sic respondit ei, spem in istis supplicationibus non habere: Paullus, se omnino in hunc annum non edicturum. Renuntiatum nobis erat, Hirrum diutius dicturum: prendimus eum: non modo non fecit, sed, cum de hostibus ageretur, & posset rem impedire, si, ut numeraretur, postularet, tacuit. Tantum Catoni assensus est, qui & locutus honorifice, non decrerat supplicationes. Tertius ad hos Favonius accessit. Quare pro cuiusque natura & instituto gratiæ sunt agendæ: his, quod tantum voluntatem ostenderunt, pro sententia, cum impedire possent, non pugnarunt: Curioni vero, quod de suarum actionum cursu tua causâ deflexit. Nam Furnius & Lentulus, ut debuerunt, quasi eorum res esset, una nobiscum circumierunt, & laborarunt. Balbi quoque Cornelii operam & sedulitatem laudare possum. Nam cum Curione vehementer locutus est; & eum, si aliter fecisset, injuriam Cæsari facturum dixit: tum ejus fidem in suspicionem adduxit, qui inique transigi volebant, Domitii, Scipiones: quibus hac re ad intercessionem evocandam interpellantibus, venustissime Curio respondit, se eo libentius non intercedere, quod quosdam, qui decernerent, videret confici nolle. Quod ad rempublicam attinet, in unam causam omnis contentio coniecta est: de provinciis, inquam, adhuc incubuisse cum senatu Pompejus videtur, ut Cæsar ante id. Nov. dece-

decedat. Curio omnia potius subire constituit, quam id pati: ceteras suas abiecit actiones. Nostri porro, quos tu bene nosti, ad extremum certamen rem deducere non audent. Scena rei totius hæc. Pompejus, tamquam Cæsarem non impugnet, sed, quod illi æquum putet, constituat, ait, Curionem quærere discordias. Valde autem non vult, & plane timet Cæsarem consulem designari prius, quam exercitum & provinciam tradiderit. Accipitur satis male a Curione; & totus ejus secundus consulatus exagitur. Hoc tibi dico; si omnibus rebus prement Curionem, Cæsar defendetur: si intercessorem (quod videntur) reformidabunt, Cæsar, quoad volet, manebit. Quam quisque sententiam dixerit, in commentario est rerum urbanarum: e quo tu, quæ digna sunt, selige: multa transi, in primis ludorum explosiones, & funerum, & ceterarum ineptiarum: plura habet utilia. Denique malo in hanc partem errare, ut, quæ non desideras, audias, quam quidquam, quod opus est, prætermittatur. Tibi curæ fuisse de Sittiano negotio gaudeo. Sed, quando suspicaris, minus certa fide eos tibi visos, tamquam procurator, sic agas, rogo. Vale.

A R G U M E N T U M.

Gratulatur affinitate Dolabellæ: de Curionis intercessione, & de provinciis, quid actum sit, significat; & de Hortensii præsentis jam morte nuntiat.

M. CÆLIUS M. T. CICERONI S. D. 12

GRatulor tibi affinitate viri medius fidius optimi. Nam hoc ego de illo existimo. Cetera porro, quibus adhuc ille sibi parum utilis fuit, & ætate jam sunt decursa, & consuetudine, atque auctoritate tua, & pudore Tulliæ, siqua restabunt, confido celeriter sublaturum iri. Non est enim pugna in vitiis, neque hebes ad id, quod melius sit,

fit, intelligendum. Deinde, quod maximum est, ego illum valde amo. Velles C. Curionem nostrum lautum intercessionis de provinciis exitum habuisse. Nam cum de intercessione referretur, quæ relatio fiebat ex S. C. primaque M. Marcelli sententia pronuntiata esset, qui agendum cum tribunis pl. censebat: frequens senatus in alia omnia iit. Stomacho est scilicet Pompejus Magnus nunc ita languenti, ut vix id, quod sibi placeat, reperiat. Transierant illuc, ut ratio esset ejus habenda, qui neque exercitum, neque provincias traderet. Quemadmodum hoc Pompejus laturus sit, cum cognoscat, quidnam reip. futurum sit, si aut non possit, aut non curet, vos senes divites videritis. Q. Hortensius, cum has litteras scripsi, animam agebat. Vale.

ARGUMENTUM.

Queritur de Appii Claudii injuriis.

M. CÆLIUS M. T. CICERONI S. D. 13

PUdet me tibi confiteri, & queri de Appii, hominis ingratisissimi injuriis; qui me odisse, quia magna mihi debebat beneficia, cœpit: &, cum homo avarus, ut ea solveret, sibi imperare non posset; occultum bellum mihi indixit: ita occultum tamen, ut multi mihi renuntiarent, & ipse facile animadverterem, male eum de me cogitare. Posteaquam vero comperi, eum collegium tentasse: deinde aperte cum quibusdam locutum: cum L. Domitio, ut nunc est, mihi inimicissimo homine, deliberare: velle hoc munusculum deferre Cn. Pompejo: ipsum reprehenderem, & ab eo deprecarer injuriam, quem vitam mihi debere putarem, impetrare a me non potui. Quid ergo est? Tum quidem aliquot amicis, qui testes erant meorum in illum meritorum, locutus sum: posteaquam illum, ne cui satisfa-

tisfaceret quidem, me dignum habere sensi, malui collegæ ejus homini alienissimo mihi, & propter amicitiam tuam non æquissimo, me obligare, quam illius simiæ vultum subire. Id postquam rescit, excanduit, & me causam inimiziarum quærere clamitavit; ut, si mihi in pecunia minus satisfacisset, per hanc speciem similitudinis eum consecrarem. Postea non destitit arcessere palam Servium accusatorem, inire cum Domitio consilia: quibus cum parum procederet, ut ulla lege mihi ponerent accusatorem; compellari ea lege me voluerunt, qua dicere non poterant. Insolentissimi homines summis Circensibus ludis meis postulandum me lege Scantinia curant. Vix hoc erat Pola elocutus, cum ego Appium censorem eadem lege postulavi. Quod melius caderet, nihil vidi. Nam sic est a populo, & non infimo quoque approbatum, ut majorem Appio dolorem fama, quam postulatio attulerit. Præterea cœpi facellum, in domo quod est, ab eo petere. Conturbat me mora servi hujus, qui tibi litteras attulit. Nam acceptis prioribus litteris, amplius quadraginta mansit. Quid tibi scribam, nescio. Scis Domitio diem timori esse. Exspecto te valde, & quamprimum videre cupio. A te peto, ut meas injurias proinde doleas, ut me existimas & dolere & ulcisci tuas solere. Vale.

A R G U M E N T U M.

Hæc epistola multa complectitur: de L. Domitii Ahenobarbi repulsa in Auguratu, de Saturnino ab Cn. Domitio Calvino accusato, de Pompeji, Cæsarisque discordia, de Appii ad corrigendam civitatem ridicula diligentia.

M. CÆLIUS M. T. CICERONI S. D. 14

TAnti non fuit Arsacen capere, Seleuciam expugnare, ut earum rerum, quæ hic gestæ sunt,

sunt, spectaculo careres : numquam tibi oculi doluissent, si in repulsa Domitii vultum vidisses : magna illa comitia fuerunt, & plane studia ex partium sensu apparuerunt : perpauci necessitudinem secuti officium præstiterunt. Itaque mihi est Domitius inimicissimus, ut ne familiarem quidem suum quemquam tam oderit, quam me : atque eo magis, quod per injuriam sibi putat ereptum, cujus ego auctor fuerim. Nunc fuit tam gavisos homines suum dolorem, unumque me studiosiorem Antonii. Nam Cn. Saturninum adolescentem ipse Cn. Domitius reum fecit, sane quam superiore a vita invidiosum : quod iudicium nunc in expectatione est, etiam in bona spe, post Sex. Peducæi absolutionem. De summa republ. sæpe tibi scripsi, me annum pacem non videre : & quo propius ea contentio, quam fieri necesse est, accedit, eo clarius id periculum apparet. Propositum hoc est, de quo, qui rerum potiuntur, sunt dimicaturi : quod Cn. Pompejus constituit non pati C. Cæsarem consulem aliter fieri, nisi exercitum, & provincias tradiderit : Cæsari autem persuasum est, se salvum esse non posse, si ab exercitu recesserit. Fert illam tamen conditionem, ut ambo exercitus tradant. Sic illi amores, & invidiosa conjunctio non ad occultam recedit obtrectationem, sed ad bellum se erupit : neque mearum rerum quid consilii capiam, reperio ; quod non dubito, quin te quoque hæc deliberatio sit perturbatura. Nam mihi cum hominibus his & gratia & necessitudo est : tum causam illam, non homines odi. Illud te non arbitror fugere, quin homines in dissensione domestica debeant, quamdiu civiliter sine armis certetur, honestiorem sequi partem : ubi ad bellum & castra ventum sit, firmiorem ; & id melius statuere, quod tutius sit. In hac discordia video, Cn. Pompejum, senatum, quinque res judicant,

dicant, secum habiturum: ad Cæsarem omnes, qui cum timore, aut mala spe vivant, accessuros: exercitum conferendum non esse: omnino sat spatii sit ad considerandas utriusque copias, & ad eligendam partem. Prope oblitus sum, quod maxime fuit scribendum. Scis Appium centiorem hic ostenta facere? de signis & tabulis, de agri modo, de ære alieno acerrime agere? Persuasum est ei censuram, lomentum, aut nitrum esse: errare mihi videtur. Nam dum fordes eluere vult, venas sibi omnes & viscera aperit. Curre per Deos atque homines, & quamprimum hæc risum veni: legis Scantiniæ iudicium apud Drusum fieri: Appium de tabulis & signis agere. Crede mihi, est properandum. Curio noster sapienter id, quod remisit de stipendio Pompeji, fecisse existimatur. Ad summam, quæris, quid putem futurum? Si alteruter eorum ad Parthicum bellum non eat, video magnas impendere discordias, quas ferrum & vis iudicabit: uterque animo & copiis est paratus. Si sine summo periculo fieri posset, magnum & iucundum tibi fortuna spectaculum parabat. Vale.

A R G U M E N T U M .

Pompejum vituperat, Cæsarem laudat: addit de cupiditate sua conveniendi & alloquendi Ciceronis, & de itinere ad Alpes.

M. CÆLIUS M. T. CICERONI S. D. 15

ECquando tu hominem ineptiorem, quam tuum Cn. Pompejum vidisti, qui tantas turbas, qui tam nugax esset, commoritur? Ecquem autem Cæsare nostro acriorem in rebus gerendis; eodem in victoria temperatiorem aut legisti, aut audisti? Quid est? nunc tibi nostri milites, qui durissimis & frigidissimis locis, teterrima hieme, bellum ambulando confecerunt, malis orbiculatis esse

esse pasti videntur. Quid jam; inquis? gloriose omnia, si scias, quam sollicitus sum; tum hanc meam gloriam, quæ ad me nihil pertinet, derideas: quæ tibi exponere, nisi coram, non possum: idque celeriter fore spero. Nani me, cum expulisset ex Italia Pompejum, constituit ad urbem vocare: id quod jam existimo confectum; nisi malit Pompejum Brundisii circumfederi. Peream, si minima causa est properandi isto mihi, quod te videre, & omnia intima conferre discupio: habeo autem quam multa? Hui vereor (quod solet fieri) ne, cum te videro, omnia obliviscar. Sed tamen quodnam ob scelus iter mihi necessarium retro ac Alpes versus incidit? Adeo, quod Intemelii in armis sunt, neque de magna causa. Bellienus, verna Demetrii, qui ibi cum præsidio erat; Domitium quemdam, nobilem illic Cæsaris hospitem, a contraria factione nummis acceptis, comprehendit, & strangulavit: civitas ad arma in eo cum quatuor cohortibus mihi per nives eundum est. Usquequaque, inquis, Domitii mali dant. Vellem quidem Venere prognatus tantum animi habuisset in vestro Domitio, quantum ipse catenatus in hoc habuit. Ciceroni F. S. D. Vale.

ARGUMENTUM.

Pulso ex Italia Pompejo, suadet Ciceroni Cælius, ne afflictam fortunam sequatur, sed in aliquem locum a bello vacuum se recipiat. Suasio est ab utili contra honestum: castris enim Pompeji & Coss. defendi Resp. videbatur. Rescribit huic Cicero lib. 2. epist. 16.

M. CÆLIUS M. T. CICERONI S. D. 16

EXanimatus sum tuis litteris, quibus te nihil nisi triste cogitare ostendisti: neque id quid esset, perscripsisti: non enim, quale esset,

set, quod cogitares, aperuisti. Has illico ad te litteras scripsi. Per fortunas tuas, Cicero, per liberos te oro & obsecro, ne quid gravius de salute & incolumitate tua consulas. Nam deos, hominesque, amicitiamque nostram testificor, me neque temere tibi prædixisse, neque temere monuisse: sed postquam Cæsarem convenerim, sententiamque ejus, qualis futura esset, parta victoria, cognoverim, te certiolem fecisse. Si existimas eandem rationem fore Cæsari in dimittendis adversariis, & conditionibus ferendis, erras. Nihil, nisi atrox & sævum cogitat, atque etiam loquitur. Iratus senatui exiit: his intercessionibus plane incitatus est: non mehercule erit deprecationi locus. Quare, si tibi tu, si filius unicus, si domus, si spes tuæ reliquæ tibi curæ sunt; si aliquid apud te nos, si vir optimus gener tuus valet (quorum fortunas non debes velle conturbare) sequere eam causam, in cujus victoria salus nostra est; ne aut odisse, aut relinquere cogamur; aut impiam cupiditatem contra salutem tuam habeamus. Denique illud cogita: quod offensæ fuerit, in ista cunctatione te prius subiisse: nunc te contra victorem facere, quem dubiis rebus lædere noluisti: & ad eos fugatos accedere, quos resistentes sequi nolueris, summæ stultitiæ est. Vide, ne, dum pudet te parum optimatem esse, parum diligenter, quid optimum sit, eligas. Quod si totum tibi persuadere non possum; saltem, dum, quid de Hispaniis agamus, scitur, expecta; quas tibi nuncio adventu Cæsaris fore nostras. Quam isti spem habeant, amissis Hispaniis, nescio. Quod porro tuum consilium sit ad desperatos accedere, non medius fidius reperio. Hoc, quod tu non dicendo mihi significasti, Cæsar audierat: ac, simulatque, ave, mihi dixit, statim, quid de te audisset, exposuit: negavi me scire: sed tamen ab eo petii, ut ad te litteras mitteret, quibus maxime

me ad remanendum commoveri posses . Me secum in Hispaniam ducit . Nam , nisi ita faceret , ego prius quam ad urbem accederem , ubicumque esses , ad te percurrissem , & hoc a te præsens contendissem , atque omni vi te retinuissem . Etiam atque etiam , mi Cicero , cogita , ne te tuosque omnes funditus evertas : ne te sciens prudensque eo demittas , unde exitum vides nullum esse . Quod si te , aut voces optimatum commovent , aut nonnullorum hominum insolentiam & jactationem ferre non potes ; eligas censeo aliquod oppidum vacuum a bello , dum hæc decernuntur : Id si feceris , & ego te sapienter fecisse judicabo , & Cæsarem non offendes . Vale .

ARGUMENTUM .

Queritur , se Curionis amore , & Appii odio ab optima mente descivisse , & Cæsaris partes potius , quam Pompeji secutum esse : cujus rei culpam partim in fortunam , quod in Hispania fuerit , quo tempore Cicero ad Pompejum in Græciam profectus est : partim etiam in Ciceronem ipsum confert . Postremo , quid molietur , exponit .

M. CÆLIUS M. T. CICERONI S. D. 17

ERgo me potius in Hispania fuisse tum , quam Formiis , cum tu profectus es ad Pompejum ? quod utinam ut Ap. Claudius in ista parte : C. Curio cujus amicitia me paullatim in hanc perditam causam imposuit : nam mihi sentio bonam mentem iracundia & amore ablatam . Tum tu porro cum ad te proficiscens noctu Ariminum venissem , dum mihi pacis mandata das ad Cæsarem , & mirificum civem agis , amici officium neglexisti , neque mihi consuluisti . Neque hæc dico , quod diffidam huic causæ : sed , crede mihi , perire satius est , quam hos videre . Quod si timor vestræ crudelitatis non esset , ejecti jam pridem
hinc

hinc essemus. Nam hic nunc, præter fœneratores paucos, nec homo, nec ordo quisquam est, nisi Pompejanus. Equidem jam effeci, ut maxime plebs, &, qui antea noster fuit, populus, vester esset. Cur hoc, inquis? immo reliqua exspecta. Vos invitos vincere coegero: irritavi in me Catonem. Vos dormitis: nec hæc adhuc mihi videmini intelligere, quam nos pateamus, & quam simus imbecilli. Atque hoc nullius præmii spe faciam: sed, quod apud me plurimum solet valere, doloris, atque indignitatis causa. Quid istic facitis? prælium exspectatis, quod firmissimum est? Vestras copias non novi: nostri valde depugnare, & facile algere, & esurire consueverunt. Vale.

LIBER IX.

ARGUMENTUM.

Adventum cupit Varronis, quod in ejus librorumque consuetudine omnem spem reposuerit leniendi doloris, quem ex afflictâ Republica capiebat.

M. T. C. M. TERENTIO VARRONI S. D. I

EX iis litteris, quas Atticus a te missas mihi legit, quid ageres, & ubi esses, cognovi: quando autem te visuri essemus, nihil sane ex eisdem litteris potui suspicari. In spem tamen venio, appropinquare tuum adventum: qui mihi utinam solatio sit: etsi tot tantisque rebus urgemur, ut nullam allevationem quisquam non stultissimus sperare debeat. Sed tamen aut tu potes me, aut ego te fortasse aliqua re juvare. Scito enim me, posteaquam in urbem venerim, rediisse cum veteribus amicis, id est cum libris nostris, in gratiam: etsi non idcirco eorum usum dimiseram, quod iis succenserem: sed quod eorum me supponebat. Videbar enim mihi, cum me in
res

res turbulentissimas infidelissimis sociis demississem, præceptis illorum non satis paruisse. Ignoscunt mihi, & revocant in consuetudinem pristinam: teque, quod in ea permanseris, sapientiorrem, quam me, dicunt fuisse. Quamobrem, quando placatis his utor, videor sperare debere, si te viderim, & ea, quæ premant, & ea, quæ impendeant, me facile transiturum. Quamobrem siue in Tusculano, siue in Cumano adesse tibi placebit, siue (quod minime velim) Romæ: dummodo simul simus, perficiam profecto, ut id utrique nostrum commodissimum esse videatur. Vale.

ARGUMENTUM.

Diutius retente epistola causam exponit. Deinde suadet, sibi que ita statutum affirmat, ut hominum frequentiam vitet, dum gratulatio ob Africanæ victorie nuntium defervescat: suumque iuvande quoquo modo Reipub. desiderium declarat.

M. T. C. VARRONI S. D.

2

CAninius idem tuus & idem noster, cum ad me pervespero venisset, & se postridie mane ad te iturum esse dixisset: dixi ei me daturum aliquid mane, & ut peteret, rogavi. Conscripsi epistolam noctu: nec ille ad me rediit: oblitum credidi. Attamen eam ipsam epistolam misissem per meos, nisi audissem ex eodem, postridie te mane e Tusculano exiturum. At tibi repente paucis post diebus, cum minime expectarem, venit ad me Caninius mane; proficisci ad te statim, dixit: etsi erat *ἔσλος* illa epistola, præsertim tantis postea novis rebus allatis; tamen perire meam lucubrationem nolui, & eam ipsam Caninio dedi: sed cum eo, ut cum homine docto, & amantissimo tui, locutus ea sum, quæ pertulisse illum ad te existimo. Tibi autem idem consilii do, quod mihi met ipsi; ut vitemus oculos hominum, si linguas minus

nus facile possumus. Qui enim victoria se efferunt, quasi victos nos intuentur. Qui autem victos esse nostros moleste ferunt, nos dolent vivere. Quæres fortasse, cur, cum hæc in urbe sint, non absim, quemadmodum tu. Tu enim ipse, qui & me & alios prudentia vincis, omnia, credo, vidisti, nihil omnino te fefellit. Quis est tam Lynceus, qui in tantis tenebris nihil offendat? nusquam incurrat? Ac mihi quidem jampridem venit in mentem, bellum esse aliquo exire, ut ea, quæ agebantur hic, quæque dicebantur, nec viderem, nec audirem. Sed calumniabar ipse: putabam, qui obviam mihi venisset, ut cuique commodum esset; suspicaturum, aut dicturum, etiam si non suspicaretur: Hic aut metuit, & ea re fugit: aut aliquid cogitat, & habet navem paratam. Denique, levissime qui suspicaretur, & qui fortasse me optime novisset: putaret, me idcirco discedere, quod quosdam homines oculi mei ferre non possent. Hæc ego suspicans, adhuc Romæ maneo: & tamen *λεανδρίως* consuetudo diuturna callum jam obduxit stomacho meo. Habes rationem mei consilii. Tibi igitur hæc censeo latendum: tantisper ibidem, dum defervescat hæc gratulatio, & simul dum audiamus, quemadmodum negotium confectum sit: confectum enim esse existimo. Magni autem intererit, qui fuerit victoris animus, qui exitus rerum: quamquam, quo me conjectura ducat, habeo: sed exspecto tamen. Te vero nolo, nisi ipse rumor jam raucus erit factus ad Bajas venire. Erit enim nobis honestius, etiam cum hinc discefferimus, videri venisse in illa loca ploratum potius, quam natatum. Sed hæc tu melius: modo nobis stet illud, una vivere in studiis nostris; a quibus antea delectationem modo petebamus, nunc vero etiam salutem: non deesse, si quis adhibere volet, non modo ut architectos, verum etiam ut fabros, ad ædificandam remp. & potius libenter

ter accurrere : sin nemo utetur opera , tamen & scribere , & legere πολιτείας ; & si minus in curia , atque in foro , at in litteris , & libris , ut doctissimi veteres fecerunt , navare reipublicæ , & de moribus , ac legibus quærere . Mihi hæc videntur . Tu quid sis acturus , & quid tibi placeat , pergratum erit , si ad me scripseris .

ARGUMENTUM .

Scribit , se iturum ad Varronem : sed homines reprehensuros dicit , si , cum Respub. sit miserrima , ipsi ab Urbe absint , & in villis otio fruuntur ; se tamen eorum inscitiam negligere , & in studiis omnino cum Varrone victurum .

M. T. C. VARRONI S. D.

3

ET si , quid scriberem , non habebam , tamen Caninio ad te eunti non potui nihil dare . Quid ergo potissimum scribam ? quod velle te puto , cito me ad te esse venturum . Etsi vide , quæso , satisne rectum sit , nos , hoc tanto incendio civitatis , in istis locis esse . Dabimus sermonem iis , qui nesciunt , nobis , quocumque in loco simus , eundem cultum , eundem victum esse . Quid refert ? tamen in sermonem incidemus . Valde id , credo , laborandum est , ne , cum omnes in omni genere & scelerum ; & flagitiorum volutentur , nostra nobiscum , aut inter nos cessatio vitupere-
tur . Ego vero , neglecta barbarorum inscitia , te persequar . Quamvis enim hæc sint misera , quæ sunt miserrima ; tamen artes nostræ , nescio quo modo , nunc uberiores fructus ferre videntur , quam olim ferebant : sive quia nulla nunc in re alia acquiescimus : sive quod gravitas morbi facit , ut medicinæ egeamus , eaque nunc appareat , cujus vim non sentiebamus , cum valebamus . Sed quid ego hæc ad te , cujus domi nascuntur ? γλαῦκ' εἰς Ἀθήνας : nihil scilicet , nisi ut , rescribens aliquid , me expectares . Sic igitur facies . Vale .

L

AR-

A R G U M E N T U M.

*De Varronis adventu ex Diodori philosophi sententia
jocatur : nam in libro de Fato, Diodori opinionem
improbans , Chrysippo assentitur .*

M. T. C. VARRONI S. D.

4

ΠΕρὶ δυνάτων με scito κατὰ Διόδωρον κρίνειν .
Quapropter , si venturus es , scito , necesse
esse te venire : sin autem non es , οὐδ' ἀδυνάτων
est te venire . Nunc vide , utra te κρίνεις magis de-
lectet , Χρυσίππεια ne ; an hæc , quam noster Dio-
dorus non concoquebat . Sed de his etiam rebus ,
otiosi cum erimus , loquemur : hoc etiam est κατὰ
Χρυσίππον δυνάτὸν . De Costio mihi gratum est :
nam id etiam Attico mandaraim . Tu si minus ad
nos , nos accurremus ad te : si hortum in biblio-
theca habes , nihil deerit . Vale .

A R G U M E N T U M .

*Probat & diem , quo conventuri sunt , & Varronis ,
suumque consilium , quod semel a Cæsare victi ,
ab armis discesserint .*

M. T. C. VARRONI S. D.

5

MIhi vero ad nonas bene maturum videtur fo-
re ; neque solum propter rempub. , sed etiam
propter anni tempus . Quare diem istum probō :
itaque eundem ipse sequar . Consilii nostri , ne
si eos quidem , qui id secuti non sunt , non pœni-
teret , nobis pœnitendum putarem . Secuti enim
sumus non spem , sed officium . Reliquimus autem
non officium , sed desperationem . Ita verecun-
diores fuimus , quam qui se domo non commove-
bant : saniores , quam qui , amissis opibus , do-
mum non reverterunt . Sed nihil minus fero ,
quam severitatem otiosorum : & , quoquo modo
res se habet , magis illos vereor , qui in bello oc-
cide-

ciderunt, quam hos curo, quibus non satisfacimus, quia vivimus. Mihi si spatium fuerit in Tusculanum ante nonas veniendi, istuc te videbo: sin minus, persequar in Cumanum; & ante te certio- rem faciam, ut lavatio parata sit. Vale.

ARGUMENTUM.

Nuntiat Caesaris adventum: & belli civilis causam in Pompejum potius, quam in Caesarem confert; Varronem autem laudat, quod se ab armis ad studia, quasi a tempestate in portum, contulerit.

M. T. C. VARRONI S. D. 6

CAninius noster me tuis verbis admonuit, ut scriberem ad te, si quid esset, quod putarem te scire oportere. Est igitur adventus in expectatione: neque tu id ignoras. Sed tamen, cum ille scripisset, ut opinor, se in Alfiense venturum; scripserunt ad eum sui, ne id faceret: multos ei molestos fore, ipsumque multis. Ostiæ videri, commodius eum exire posse. Id ego non intelligebam, quid interesset. Sed tamen Hirtius mihi dixit, & se ad eum, & Balbum, & Oppium scripsisse, ut ita faceret, homines, ut cognovi, amantes tui. Hoc ego idcirco nosse te volui, ut scires, hospitium tibi ubi parares, vel potius utrobique: quid enim ille factururus, incertum est: & simul ostentavi tibi, me istis esse familiarem, & consiliis eorum interesse. Quod ego cur nolim, nihil video: non enim est idem, ferre, si quid ferendum est; & probare, si quid probandum non est. Etsi, quid non probem quidem, nescio, præter initia rerum. Nam hæc in voluntate fuerunt. Vidi enim (nam tu aberas) nostros amicos cupere bellum; hunc autem non tam cupere, quam non timere. Ergo hæc consilii fuerunt: reliqua necessaria. Vincere autem aut hos, aut illos necesse est. Scio te semper me-

cum in luctu fuisse, cum videremus, quam illud ingens malum alterutrius exercitus ex ducum interitu: tum vero, extremum malorum omnium esse civilis belli victoriam; quam quidem ego etiam illorum timebam, ad quos veneramus. Crudeliter enim otiosis minabantur: eratque iis & tua invisa voluntas, & mea oratio. Nunc vero, si essent nostri potiti, valde intemperantes fuissent. Erant enim nobis perirati, quasi quidquam de nostra salute decrevissemus, quod non idem illis censuissemus: aut quasi utilius reip. fuerit, eos etiam ad bestiarum auxilium confugere, quam vel mori, vel cum spe, si non optima, at aliqua tamen, vivere. At in perturbata repub. vivimus. Quis negat? Sed hæc viderint ii, qui nulla sibi subsidia ad omnes vitæ status paraverunt. Huc enim ut venirem, superior longius, quam volui, fluxit oratio. Cum enim te semper magnum hominem duxi, tum quod his tempestatibus es prope solus in portu; fructusque doctrinæ percipis eos, qui maximi sunt, ut ea consideres, eaque tractes, quorum & usus & delectatio est omnibus istorum & actis & voluptatibus anteponenda. Equidem hos tuos Tusculanenses dies instar esse vitæ puto: libenterque omnibus omnes opes concesserim, ut mihi liceat, vi nulla interpellante, isto modo vivere. Quod nos quoque imitamus, ut possumus, & in nostris studiis libentissime conquiescimus. Quis enim hoc non dederit nobis, ut, cum opera nostra patria sive non possit uti, sive nolit, ad eam vitam revertamur, quam multi docti homines, fortasse non recte, sed tamen multi etiam reip. præponendam putaverunt? Quæ igitur studia, magnorum hominum sententia, vacationem habent etiam publici muneris, iis, concedente republica, cur non abutamur? Sed plus facio, quam Caninius mandavit. Is enim, si quid ego scirem,

roga-

rogarat, quod tu nescires; ego tibi ea narro, quæ tu melius scis, quam ipse, qui narro. Faciam ergo illud, quod rogatus sum, ut eorum, quæ temporis huius sint, quæ tua interesse audiero, ne quid ignores. Vale.

ARGUMENTUM.

Maturum jam esse ait, ut ab Urbe discedat: & de Cæsaris ex Africano bello redeuntis itinere tumores quosdam nuntiat.

M. T. C. VARRONI S. D.

7

Cænabam apud Sejum, cum utrique nostrum redditæ sunt a te litteræ. Mihi vero jam maturum videtur. Nam, quod antea te calumniatus sum, indicabo malitiam meam. Volebam prope alicubi esse te, si quid bonæ salutis σωτήρ σου ἐρχομένω: nunc, quando confecta sunt omnia, dubitandum non est, quin equis viris. Nam, ut audiui de Lucio Cæsare filio, mecum ipse, *Quid hic mihi faciet patri?* Itaque non desino apud istos, qui nunc dominantur, cœnitare. Quid faciam? temporis serviendum est. Sed ridicula missa; præsertim cum sit nihil, quod rideamus.

Africa terribili tremit, horrida terra, tumultu. Itaque nullum est ἀτοπρονυμίζον, quod non verear. Sed quod quæris, quando, qua, quo, nihil adhuc scimus. Istuc ipsum de Bais, nonnulli dubitant, an per Sardiniam veniat. Illud enim adhuc prædium suum non inspexit: nec ullum habet deterius, sed tamen non contemnit. Ego omnino magis arbitror per Siciliam: vel jam sciemus: adventat enim Dolabella. Eum puto magistrum fore.

πολλοὶ μαθηταὶ κρείττονες διδασκάλων.

Sed tamen, si sciam, quid tu constitueris, meum consilium accommodabo potissimum ad tuum. Quare exspecto tuas litteras. Vale.

ARGUMENTUM.

*Promiserat Varro, quosdam libros se esse in Cicero-
nis nomine editurum. Cicero nunc admonet eum
promissi, missis quasi admonitoribus quatuor libris
Academicis, quos Varroni dicavit.*

M. T. C. VARRONI S. D.

8

ET si munus flagitare, quamvis quis ostenderit, ne populus quidem solet, nisi concitatus: tamen ego expectatione promissi tui moveor, ut admoneam te, non ut flagitem. Misi autem ad te quatuor admonitores non nimis verécundos. Nosti enim profecto os ejus adolescentioris Academiæ. Ex ea igitur media excitatos misi; qui, metuo, ne te forte flagitent: ego autem mandavi, ut rogarent. Expectabam omnino jamdiu, meque sustinebam, ne ad te prius ipse quid scriberem, quam aliquid accepissem, ut possem te remunerari quam simillimo munere. Sed, cum tu tardius faceres, id est (ut ego interpretor) diligentius, teneri non potui, quin conjunctionem studiorum, amorisque nostri, quo possem, litterarum genere declararem. Feci igitur sermonem inter nos habitum in Cumano, cum esset una Pomponius: tibi dedi partes Antiochinas, quas a te probari, intellexisse mihi videbar; mihi sumpsit Philonis. Puto fore, ut, cum legeris, mirere, id nos locutos esse inter nos, quod numquam locuti sumus: sed nosti morem dialogorum. Post hac autem, mi Varro, quamplurima, si videbitur, & de nobis, & inter nos: sero fortasse: sed superiorum temporum fortuna reip. causam sustineat. Hæc ipsi præstare debemus. Atque utinam quietis temporibus, atque aliquo, si non bono, at saltem certo statu civitatis, hæc inter nos studia exercere possemus. Quamquam tum quidem vel aliæ quæpiam rationes honestas nobis & curas,

&

& actiones darent : nunc autem quid est , sine his cur vivere velimus ? Mihi vero cum his ipsis vix : his autem detractis , ne vix quidem . Sed hæc coram , & sæpius . Migrationem , & emptionem feliciter evenire volo , tuumque in ea re consilium probo . Cura ut valeas .

ARGUMENTUM .

Suadet Dolabella gener Ciceroni , ut aut Caesaris partes sequatur , aut in aliquam civitatem a bello vacuam se recipiat : quod idem Cælius fecerat . Vide epist. 16. lib. 18.

DOLABELLA M. T. CICERONI S. D. 9

SI vales , gaudeo ; & ipse valeo ; & Tullia nostra recte valet . Terentia minus belle habuit : sed certum scio , jam convaluisse eam . Præterea rectissime sunt apud te omnia . Etsi nullo tempore in suspicionem tibi debui venire , partium causa potius , quam tua , tibi suadere , ut te aut cum Cæsare nobiscumque conjungeres , aut certe in otium referres : præcipue nunc , jam inclinata victoria , ne possum quidem in ullam aliam incidere opinionem , nisi in eam , in qua scilicet tua de re tibi suadere videar , quod pie tacere non possum . Tu autem , mi Cicero , sic hæc accipies , ut , siue probabuntur tibi , siue non probabuntur , ab optimo certe animo , ac deditissimo tibi & cogitata , & scripta esse judices . Animadvertis Cn. Pompejum nec nominis sui , nec rerum gestarum gloria , nec etiam Regum , aut nationum clientelis , quas ostentare crebro solebat , esse tutum ; & hoc etiam , quod infimo cuique contigit , illi non posse contingere , ut honeste effugere possit , pulso Italia , amissis Hispaniis , capto exercitu veterano , circumvallato nunc denique : quod nescio , an ulli umquam nostro acciderit imperatori . Quamobrem quid aut ille sperare possit , aut tu ,

animum adverte pro tua prudentia. Sic enim facillime, quod tibi utilissimum erit, consilii capies. Illud autem a te peto, ut, si jam ille evitaverit hoc periculum, & se abdiderit in classem, tu tuis rebus consulas; & aliquando tibi potius, quam cuivis, sis amicus. Satisfactum est jam a te vel officio, vel familiaritati: satisfactum etiam partibus, & ei reipublicæ, quam tu probabas. Reliquum est, ubi nunc est resp., ibi simus potius, quam, dum illam veterem sequimur, simus in nulla. Quare velim, mi jucundissime Cicero, si forte Pompejus, pulsus his quoque locis, rursus alias regiones petere cogitur, ut tu te vel Athenas, vel in quamvis quietam recipias civitatem. Quod si eris facturus, velim mihi scribas, ut ego, si illo modo potero, ad te advolem. Quæcumque de tua dignitate ab imperatore erunt impetranda, qua est humanitate Cæsar, facillimum erit ab eo tibi ipsi impetrare: & meas tamen preces apud eum non minimum auctoritatis habituras puto. Erit tuæ quoque fidei, & humanitatis curare, ut is tabellarius, quem ad te misi, reverti possit ad me, & a te mihi litteras referat. Vale.

A R G U M E N T U M .

Quasi per jocum scribit, inter Niciam & Vidium se judicem esse constitutum: & item per jocum de P. Sylle morte quiddam scribit.

M. T. C. DOLABELLÆ S. D. 10.

NON sum ausus Salvio nostro nihil ad te litterarum dare: nec mehercule habebam, quid scriberem, nisi te a me mirabiliter amari: de quo etiam nihil scribente me, te non dubitare certo scio. Omnino mihi magis litteræ sunt expectandæ a te, quam a me tibi. Nihil enim Romæ geritur, quod te putem scire curare: nisi forte scire vis, me inter Niciam nostrum & Vidium,

diūm, iudicem esse. Profert alter, ut opinor, duobus versiculis expensum Niciæ: alter Aristarchus hos βελίζει. Ego, tamquam criticus antiquus, iudicaturus sum, utrum sint τῶ ποντῶ, an παρεμβελήφθοι. Puto te nunc dicere: Oblitusne es igitur fungorum illorum, quos apud Niciam? & ingentium culinarium cum Sophia Septimiæ? Quid ergo? tu adeo mihi excusam severitatem veterem putas, ut ne in foro quidem reliquæ pristinæ frontis appareant? Sed tamen suavissimum συμβίωτω nostrum præstabo integellum: nec committam, ut, si ego cum condemnaro, tu restituas: ne habeat Plancus Bursa, apud quem litteras discat. Sed quid ago? cum mihi sit incertum, tranquillo ne sis animo; an, ut in bello, in aliqua majuscula cura, negotiove versere, labor longius. Cum igitur mihi erit exploratum, te libenter esse risurum, scribam ad te pluribus. Te tamen hoc scire volo, vehementer populum sollicitum fuisse de P. Syllæ morte, antequam certum scierit. Nunc quærere desierunt, quomodo perierit: satis putant se scire, quod sciunt. Ego ceteroqui animo æquo fero; unum vereor, ne hasta Cæsaris refrixerit. Vale.

ARGUMENTUM.

Deplorat Tulliolæ mortem: & in Dolabellæ sermonibus plurimum sibi ait solatii futurum: quamquam jam eam Dolabella dimiserat: sed fingendum erat Ciceroni, temporis causa; cum Dolabella apud Cæsarem dominantem gratia plurimum valeret.

M. T. C. DOLABELLÆ SUO S. D. II

VEL meo ipsius interitu mallet litteras meas desiderares, quam eo casu, quo sum gravissime afflictus: quem ferrem certe moderatius, si te haberem. Nam & oratio tua prudens, & amor

erga me singularis multum levaret. Sed quoniam brevi tempore, ut opinio nostra est, te sum visurus, ita me affectum offendes, ut multum a te possim juvari: non quo ita sim fractus, ut, aut hominem me esse, oblitus sim, aut fortunæ succumbendum putem: sed tamen hilaritas illa nostra, & suavitas, quæ te præter ceteros delectabat, erepta mihi omnis est. Firmitatem tamen, & constantiam, si modo fuit aliquando in nobis, eandem cognosces, quam reliquisti. Quod scribis, prælia te mea causâ sustinere: non tam id laboro, ut, si qui mihi obtrecent, a te refutentur; quam intelligi cupio (quod certe intelligitur) me a te amari: quod ut facias, te etiam atque etiam rogo: ignoscasque brevitati mearum litterarum: nam & celeriter una futuros nos arbitror, & nondum satis confirmatus sum ad scribendum. Vale.

A R G U M E N T U M.

Gratulatur Dolabelle de Bajarum salubritate: & orationem pro Dejotaro Rege ad Casarem habitam mittit.

M. T. C. DOLABELLÆ S. D. 12

GRatulor Bais nostris, siquidem, ut scribis, salubres repente factæ sunt: nisi forte te amant, & tibi assentantur; & tamdiu, dum tu ades, sunt oblitz sui. Quod quidem si ita esset, minime miror, cælum etiam, & terras vim suam, si tibi ita conveniat, dimittere. Oratiunculam pro Dejotaro, quam requirebas, habebam mecum, quod non putaram. Itaque eam tibi misi: velim sic legas, ut causam temerem & inopem, nec scriptione magnopere dignam. Sed ego hospiti veteri, & amico munusculum mittere volui levidense, crasso filo, cujusmodi ipsius solent esse munera. Tu velim animo sapienti, fortique sis, ut tua moderatio, & gravitas aliorum infamet injuriam. Vale.

Ar-

ARGUMENTUM.

Rogat Dolabellam, ut Suberino, & Planio reditum in patriam conficiat: eosque ita excusat, ut ostendat, casu quodam, & necessitate coactos, Pompeji partes in Hispania fuisse.

M. T. C. DOLABELLÆ S. D.

13

C Suberinus Calenus & meus est familiaris, & Leptæ nostri familiarissimus pernecessarius. Is cum vitandi belli causa profectus esset in Hispaniam cum M. Varrone ante bellum, ut in ea provincia esset, in qua nemo nostrum, post Afranium superatum, bellum ullum fore putarat; incidit in ea ipsa mala, quæ summo studio vitaverat. Oppressus est enim bello repentino: quod bellum commotum a Scapula, ita postea confirmatum est a Pompejo, ut nulla ratione se ab illa miseria eripere posset. Eadem causa fere est M. Planii Hæredis, qui est item Calenus, Leptæ nostri familiarissimus. Hosce igitur ambos sic tibi commendo, ut majore cura, studio, sollicitudine animi commendare non possim. Volo ipsorum causa: meque in eo vehementer & amicicia moveat & humanitas. Leptæ vero cum ira laboret, ut ejus fortunæ videantur in discrimen venire; non possum ego non aut proxime, atque ille, aut etiam æque laborare. Quapropter, etsi sæpe expertus sum, quantum me amares: tamen sic velim tibi persuadeas, id me in hac re maxime judicaturum. Peto igitur a te, vel, si pateris, oro, ut homines miseros, & fortuna, quam vitare nemo potest, magis, quam culpa, calamitosos, conserves incolumes; velisque, per te me hoc munus cum ipsis amicis hominibus, tum municipio Caleno, qui cum mihi magna necessitudo est, tum Leptæ, quem omnibus antepono, dare. Quod dicturus sum, puto equidem non valde ad rem pertinere, sed ta-

men nihil obest dicere. Res familiaris alteri eorum valde exigua est, alteri vix equestris. Quapropter quando his Cæsar vitam sua liberalitate concessit; nec est, quod iis præterea magnopere possit adimi: reditum, si me tantum amas, quantum certe amas, hominibus confice. In quo nihil est, præter viam longam: quam idcirco non fugiunt, ut & vivant cum suis, & moriantur domi. Quod ut enitare, contendasque, vel potius, ut perficias (posse enim te, mihi persuasi) vehementer te etiam atque etiam rogo. Vale.

ARGUMENTUM.

Dolabellam laudibus extollit, quia columnam in foro Cæsari, quasi Deo, erectam everterat. Vide lib. 14. ad Atticum, & Laetantium lib. 1. c. 15.

M. T. C. DOLABELLÆ COS. S. D. 14

ETſi contentus eram, mi Dolabella, tua gloria; satisque ex ea magnam lætitiā voluptatemque capiebam: tamen non possum non confiteri, cumulari me maximo gaudio, quod vulgo hominum opinio socium me adscribat tuis laudibus. Neminem conveni (convenio autem quotidie plurimos: sunt enim permulti optimi viri, qui valetudinis causa in hæc loca conveniant; præterea ex municipiis frequentes necessarii mei) quin omnes, cum te summis laudibus ad cælum extulerunt, mihi continuo maximas gratias agant. Negant enim, se dubitare, quin tu meis præceptis & consiliis obtemperans, præstantissimum te civem, & singularem consulem præbeas. Quibus ego, quamquam verissime possum respondere, te, quæ facias, tuo iudicio, & tua sponte facere, nec cuiusquam egere consilio: tamen neque plane assentior, ne imminuam tuam laudem, si omnis a meis consiliis profecta videatur; neque valde nego. Sum enim avidior etiam,

etiam, quam satis est, gloriæ. Est tamen non alienum a dignitate tua, quod ipsi Agamemnoni, Regum Regi, fuit honestum, habere aliquem in consiliis capiundis Nestorem: mihi vero gloriosum, te juvenem consulem florere laudibus, quasi alumnū disciplinæ meæ. L. quidem Cæsar, cum ad eum ægrotum Neapolim venissem, quamquam erat oppressus totius corporis doloribus, tamen ante, quam me plane salutavit, O mi Cicero, inquit, gratulor tibi, cum tantum vales apud Dolabellam, quantum si ego apud sororis filium valerem, jam salvi esse possemus. Dolabellæ vero tuo & gratulor, & gratias ago: quem quidem, post te consulem, solum possumus vere consulem dicere. Deinde multa de facto, ac de re gestatum nihil magnificentius, nihil præclarius actum unquam, nihil reipub. salutarius. Atque hæc una vox omnium est. A te autem peto, ut me hanc quasi falsam hæreditatem alienæ gloriæ sinas cernere, meque aliqua ex parte in societatem tuarum laudum venire patiari. Quamquam, mi Dolabella (hæc enim jocatus sum) libentius omnes meas, si modo sunt aliquæ meæ laudes, ad te transfunderim, quam aliquam partem exhauferim exituis. Nam cum te semper tantum dilexerim, quantum tu intelligere potuisti: tum his tuis factis sic incensus sum, ut nihil unquam in amore fuerit ardentius. Nihil est enim (mihi crede) virtute formosius, nihil pulchrius, nihil amabilius. Semper amavi, ut scis, M. Brutum propter ejus summum ingenium, suavissimos mores, singularem probitatem, atque constantiam: tamen idibus Mart. tantum accessit ad amorem, ut mirarer, locum fuisse augendi in eo, quod mihi jam pridem cumulatū esse videbatur. Quis erat, qui putaret ad eum amorem, quem erga te habebam, posse aliquid accedere? tantum accessit, ut mihi nunc denique amare videar, antea dilexisse.

Qua-

Quare quid est, quod ego te hortor, ut dignitati & gloriæ servias? proponam tibi claros viros; quod facere solent, qui hortantur? Neminem habeo clariorem, quam te ipsum: te imitare oportet, tecum ipse certes: nec licet quidem tibi jam, tantis rebus gestis, non tui similem esse. Quod cum ita sit, hortatio non est necessaria, gratulatione magis utendum est. Contigit enim tibi, quod haud scio, an nemini, ut summa severitas animadversionis non modo non invidiosa, sed etiam popularis esset, & cum bonis omnibus, tum infimo cuique gratissima. Hoc si tibi fortuna quadam contigisset, gratularer felicitati tuæ; sed contigit magnitudine tum animi, tum etiam ingenii, atque consilii. Legi enim concionem tuam: nihil illa sapientius: ita pederentim & gradatim tum accessus a te ad causam facti, tum recessus, ut res ipsa maturitatem tibi animadvertendi omnium concessu daret. Liberasti igitur & urbem periculo, & civitatem metu: neque solum ad tempus maximam utilitatem attulisti, sed etiam ad exemplum: quo facto intelligere debes, in te repositam esse rempub., tibi-que non modo tuendos, sed etiam ornandos esse illos viros, a quibus initium libertatis profectum est. Sed his de rebus coram plura propediem, ut spero. Tu, quoniam rempub. nosque conservas, fac ut diligentissime te ipsum, mi Dolabella, custodias. Vale.

A R G U M E N T U M.

Duabus Pæti epistolis respondet: priori, jure se ejus valetudine perturbatum, cupis & amore in se, & ingenii festivitatem plurimum faciat; posteriori, nihil referre, utrum Romæ sit, an Neapoli; cum Romæ unus natus regatur omnia: itaque se manere in sententia de domo Neapoli emenda, dicit.

M. T. C. PAPIRIO PÆTO S. D. 15

Duabus tuis epistolis respondebo: uni, quam pridie ante acceperam a Zetho; alteri, quam

attulerat Phileros tabellarius. Ex prioribus tuis litteris intellexi, pergratam tibi esse curam meam valetudinis tuæ; quam tibi perspectam esse gaudeo. Sed, mihi crede, non perinde, ut est reapse, ex litteris perspicere potuisti. Nam cum a satis multis (non enim possum aliter dicere) & colime videam, & diligi; nemo est illorum omnium mihi te jucundior. Nam quod me amas, quod id & jam pridem, & constanter facis, est id quidem magnum, atque haud scio, an maximum; sed tibi commune cum multis: quod tu ipse tam amandus es, tamque dulcis, tamque in omni genere jucundus, id est proprie tuum. Accedunt non Attici, sed falsiores, quam illi Atticorum, Romani veteres, atque urbani sales. Ego autem (existimes licet, quod lubet) mirifice capior facetiis, maxime nostratibus, præsertim cum eas videam primum oblitus Latio, tum cum in urbem nostram est iussa peregrinitas, nunc vero etiam braccatis & transalpinis nationibus, ut nullum veteris leporis vestigium appareat. Itaque, te cum video, omnes mihi Granios, omnes Lucilios, vere ut dicam, Crassos quoque, & Lælios videre videor. Moriar, si, præter te, quemquam reliquum habeo, in quo possim imaginem antiquæ, & vernaculæ festivitatis agnoscere. Ad hos lepores cum amor erga me tantus accedat, miraris, me tanta perturbatione valetudinis tuæ tam graviter exanimatum fuisse? Quod autem altera epistola purgas te, non dissuasorem mihi emptionis Neapolitanæ fuisse, sed auctorem cominationis urbanæ: neque ego aliter accepi: intellexi tamen idem, quod his intelligo litteris, non existimasse te, mihi licere, id quod ego arbitrabar, res has non omnino quidem, sed magnam partem relinquere. Catulum mihi narras, & illa tempora. Quid simile? ne mihi quidem ipsi tunc placebat, diutius abesse ab reip. custodia: sedebamus enim in puppi, clavumque tenebamus:

nunc

nunc autem vix est in sentina locus. An minus multa S. C. futura putas, si ego sim Neapoli? Romæ cum sum, & urgeo forum, S. C. scribuntur apud amatorem tuum, familiarem meum. Et quidem, cum in mentem venit, ponor ad scribendum: & ante audio S. C. in Armeniam & Syriam esse perlatum, quod in meam sententiam factum esse dicatur, quam omnino mentionem ullam de ea re esse factam. Atque hoc nolim meolari putes. Nam mihi scito jam a Regibus ultimis allatas esse litteras, quibus mihi gratias agant, quod se mea sententia Reges appellaverim: quos ego non modo Reges appellatos, sed omnino natos nesciebam. Quid ergo est? tamen, quamdiu hic erit noster hic præfectus moribus, parebo auctoritati tuæ: cum vero aberit, ad fungos me tuos conferam. Domum si habebo, in denos dies singulos sumptuariæ legis conferam. Sin minus invenero, quod placeat, decrevi habitare apud te. Scio enim, me nihil gratius tibi facere posse. Domum Sullanam desperabam jam, ut tibi proxime scripsi: sed tamen non abjeci. Tu, velim, ut scribis, cum fabris eam perspicias. Si enim nihil est in parietibus, aut in recto vitii, cetera mihi probabuntur. Vale.

A R G U M E N T U M.

Ostendit primum, nihil a se prætermisum, ut Cæsarianorum sibi benevolentiam conciliaret: deinde, neque boni civis, neque sapientis hominis officium in se desiderari posse; postremo ad Papirii jocationes respondet.

M. T. C. PAPIRIO PÆTO S. D.

16

DElectaverunt me litteræ tuæ, in quibus primum amavi amorem tuum, qui te ad scribendum incitavit, verentem, ne Silius suo muntio aliquid mihi sollicitudinis attulisset; de quo & tu mihi antea scripseras; bis quidem eodem exemplo,

plo, facile ut intelligerem, te esse commotum : & ego tibi accurate rescripseram, ut quoquomodo, in tali re, atque tempore, aut liberarem te ista cura, aut certe levarem. Sed quando proximis quoque litteris ostendis, quantæ curæ tibi sit ea res, sic, mi Pæte, habeto : quidquid arte fieri potuerit (non enim jam satis est consilio pugnare ; artificium quoddam excogitandum est) sed tamen quidquid elaborari, aut effici potuerit ad istorum benevolentiam conciliandam & colligendam, summo studio me consecutum esse : nec frustra, ut arbitror : sic enim color, sic observor ab omnibus iis, qui a Cæsare diliguntur, ut ab eis me amari putem. Nam, etsi non facile dijudicatur amor verus, & fictus, nisi aliquod incidat ejusmodi tempus, ut, quasi aurum igne, sic benevolentia fidelis periculo aliquo perspicui possit : cetera sunt signa communia. Sed ego uno utor argumento, quomobrem me ex animo, vereque arbitrer diligi, quod & nostra fortuna ea est, & illorum, ut simulandi causa non sit. De illo autem, quem penes est omnis potestas, nihil video, quod timeam : nisi quod omnia sunt incerta, cum a jure discessum est : nec præstari quidquam potest, quale futurum sit, quod positum est in alterius voluntate, ne dicam libidine. Sed tamen ejus ipsius nulla re a me offensus est animus. Est enim adhibita in ea re ipsa summa a nobis moderatio. Ut enim olim arbitrabar esse meum, libere loqui, cujus opera esset in civitate libertas ; sic, ea nunc amissa, nihil loqui, quod offendant aut illius, aut eorum, qui ab illo diliguntur, voluntatem. Effugere autem si velim nonnullorum acute aut facete dictorum offensionem, fama ingenii mihi est abjicienda ; quod si id possem, non recusarem. Sed tamen ipse Cæsar habet peracre judicium : & ut Servius, frater tuus (quem litteratissimum fuisse judico) facile diceret, hic versus Plauti non est, hic est, quod tri-

tas

tas haberet aures notandis generibus poetarum, & consuetudine legendi: sic audio Cæsarem, cum volumina jam confecerit *ἀποδιδυμῶν*, si quid afferatur ad eum pro meo, quod meum non sit, rejicere solere: quod eo nunc magis facit, quia vivunt mecum fere quotidie illius familiares. Incidunt autem in sermone vario multa; quæ fortasse illis, cum dixi, nec illitterata, nec insulsa esse videantur. Hæc ad illum cum reliquis actis perferuntur: ita enim ipse mandavit. Sic fit, ut, si quid præterea de me audiat, non audiendum putet. Quamobrem Enomao tuo nihil utor: etsi posuisti joco versus Accianos. Sed quæ est invidia? aut quid nunc mihi invideri potest? Verum fac esse omnia. Sic video philosophis placuisse, iis, qui mihi soli videntur vim virtutis tenere; nihil esse sapientis præstare, nisi culpam; qua videor mihi dupliciter carere: & quod ea senserim, quæ rectissima fuerunt; & quod, cum viderem, præsidii non satis esse ad ea obtinenda, viribus certandum cum valentioribus non putarim. Ergo in officio boni civis certe non sum reprehendendus. Reliquum est, ne quid stulte, ne quid temere dicam, faciamve contra potentes. Id quoque puto esse sapientis. Cetera vero, quid quisque me dixisse dicat, aut quomodo ille accipiat, aut qua fide mecum vivant ii, qui me assidue colunt, & observant, præstare non possum. Ita fit, ut & superiorum consiliorum conscientia, & præsentis temporis moderatione me consoler: & illam Accii similitudinem non modo jam ad invidiam, sed ad fortunam transferam: quam existimo levem & imbecillam, animo firmo & gravi, tamquam fluctum a saxo, frangi oportere. Etenim, cum plena sint monumenta Græcorum, quemadmodum sapientissimi viri regna tulerint vel Athenis, vel Syracusis: cum, fervientibus suis civitatibus, fuerint ipsi quodam modo liberi: ego me non putem tueri
meum

meum statum sic posse, ut neque offendam animum cuiusquam, nec frangam dignitatem meam? Nunc venio ad iocationes tuas, quando tu, secundum Ænomium Accii, non ut olim solebat, Atellanum, sed, ut nunc fit, mimum introduxisti. Quem tu mihi Popilium, quem denarium narras? quam Tyrotarichi patinam? facilitate mea ista ferebantur antea: nunc mutata res est. Hirtium ego, & Dolabellam dicendi discipulos habeo, cœnandi magistros. Puto enim te audisse (si forte ad vos omnia perferuntur) illos apud me declamitare, me apud illos cœnitare. Tu autem, quod mihi bonam copiam ejures, nihil est: tum enim, cum rem augebas, quæsticulis te faciebam attentiores: nunc, cum tam æquo animo bona perdās, non eo sis consilio, ut cum me hospitio recipias, æstimationem te aliquam putes accipere: etiam hæc levior est plaga ab amico, quam a debitore. Nec tamen eas cœnas quæro, ut magnæ reliquæ fiant: quod erit, magnificum sit & lautum. Memini te mihi Phameæ cœnam narrare: temperius fiat; cetera eodem modo. Quod si perseveras me ad matris tuæ cœnam vocare; feram id quoque. Volo enim videre animum, qui mihi audeat ista, quæ scribis, apponere, aut etiam polypum Miniani Jovis similem. Crede mihi, non audebis. Ante meum adventum fama ad te de mea nova lautitia veniet: eam extimesces. Neque est, quod in promulsidæ spei ponas aliquid: quam totam sustuli. Solebam enim antea delectari oleis, & lucanicis tuis. Sed quid hæc loquimur? liceat modo isto venire. Tu vero (volo enim abstergere animi tui metum) ad Tyrotarichum antiquum redi. Ego tibi unum sumptum afferam, quod balneum calefacias oportebit: cetera more nostro; superiora illa lussimus. De villa Seliciana & curasti diligenter, & scripsisti facetissime. Itaque puto me prætermisurum: salis enim satis est, sanctorum parum. Vale.

A R G U M E N T U M.

Agros quosdam Cæsar militibus divisurus videbatur : ea divisio , veritus est Pætus , ne ad ipsius agros perveniret : id querenti Cicero respondet.

M. T. C. PAPIRIO PÆTO S. D. 17

NON tu homo ridiculus es , qui , cum Balbus noster apud te fuerit , ex me quæras , quid de istis municipiis & agris futurum putem ? quasi aut ego quidquam sciam , quod iste nesciat ; aut , si quid aliquando scio , non ex isto soleam scire . Immo vero , si me amas , tu fac , ut sciam , quid de nobis futurum sit . Habuisti enim in tua potestate , ex quo vel ex sobrio , vel certe ex ebrio scire posses . Sed ego ista , mi Pæte , non quæro : primum quia de lucro prope jam quadriennium vivimus (si aut hoc lucrum est , aut hæc vita , superstitem reipub. vivere) deinde , quod scire quoque mihi videor , quid futurum sit : fiet enim quodcumque volent , qui valebunt : valebunt autem semper arma . Nobis igitur fatis esse debet , quidquid conceditur : hoc si quis pati non potuit , mori debuit . Vejentem quidem agrum & Capenatem metiuntur : hic non longe abest a Tusculano . Nihil tamen timeo : fruor , dum licet : opto , ut semper liceat . Si id minus contigerit , tamen , quando ego , vir fortis , idemque philosophus , vivere pulcherrimum duxi , non possum eum non diligere , cujus beneficio id consecutus sum : qui si cupiat esse reipub. qualem fortasse & ille vult , & omnes optare debemus : quid faciat , tamen non habet : ita se cum multis colligavit . Sed longius progredior : scribo enim ad te . Hoc tamen scito , non modo me , qui consiliis non intersum ; sed ne ipsum quidem principem scire , quid futurum sit . Nos enim illi servimus : ipse temporibus : ita nec ille , quid tempora postulatura sint ; nec nos , quid ille

ille cogitet, scire possumus. Hæc tibi antea non rescripsi, non quo cessator esse solerem, præsertim in litteris: sed, cum explorati nihil haberem, nec tibi sollicitudinem ex dubitatione mea, nec spem ex affirmatione asserere volui. Illud tamen adscribam, quod est verissimum, me his temporibus adhuc de isto periculo nihil audisse. Tutamen pro tua sapientia debebis optare optima, cogitare difficillima, ferre quæcumque erunt. Vale.

ARGUMENTUM.

Exponit, quibus caussis adductus, quasi aperto ludo, suos familiares in eloquentia cœperit exercere. Addit nonnulla per jocum de cœnarum lautitia.

M. T. C. PAPIRIO PÆTO S. D. 18

CUM essem otiosus in Tusculano, propterea quod discipulos obviam miseram, ut iidem me quam maxime conciliarent familiari suo, accepi tuas litteras plenissimas suavitatis, ex quibus intellexi, probari tibi meum consilium, quod, ut Dionysius tyrannus, cum Syracusis expulsus esset, Corinthi dicitur ludum aperuisse: sic ego, sublatis judiciis, amisso regno forensi, ludum quasi habere cœperim. Quid quæris? me quoque delectat consilium: multa enim consequor: primum, id quod maxime nunc opus est, munio me ad hæc tempora. Id cuiusmodi sit, nescio: tantum video, nullius adhuc consilia me huic antepondere: nisi forte mori melius fuit: in lectulo, fateor: sed non accidit: in acie non fui. Ceteri quidem Pompejus, Lentulus tuus, Scipio, Afranius, fœde perierunt: at Cato præclare. Jam istuc quidem, cum volumus, licebit: demus modo operam, ne tam necesse nobis sit, quam illi fuit: id quod agimus. Ergo hoc primum. Sequitur illud: ipse melior fio, primum valetudine, quam, intermissis exercitationibus, amiseram: deinde ipsa illa, si qua fuit

in me, facultas orationis, nisi me ad has exercitationes retulissem, exaruisset. Extremum illud est, quod tu nescio an primum putes: plures jam pavones confeci, quam tu pullos columbinos. Tu istuc te Atheriano jure delectato: ego me hic Hirtiano. Veni igitur, si vir es, & discce jam *πρωτολογμένας*, quas quæris: etsi sus Minervam. Sed quando, ut video, æstimationes tuas vendere non potes, neque ollam denariorum implere, Romam tibi remigrandum est. Satius est hic cruditate, quam istuc fame. Video te bona perdidisse: spero idem istuc familiares tuos. Actum igitur de te est, nisi provides. Potes mulo isto, quem tibi reliquum dicis esse (quando cantherium comedisti) Romam pervehi. Sella tibi erit in ludo, tamquam hypodidascalo, proxima: eam pulvinus sequetur. Vale.

ARGUMENTUM.

Cum scripisset Pætus, Balbum tenuiculo apparatu fuisse contentum, joci materiam inde arripit Cicero: idque eum arguit malitiose scripssisse, ne majorem apparatusum ipse requireret.

M. T. C. PAPIRIO PÆTO S. D. 19

TAmén a malitia non discedis: tenuiculo apparatu significas Balbum fuisse contentum: hoc videris dicere, cum Reges tam sint continentes, multo magis consulares esse oportere. Nescis me ab illo omnia expiscatum: recta enim a porta domum meam venisse: neque hæc admiror, quod non ad tuam potius; sed illud, quod non ad suam. Ego autem tribus primis verbis, Quid noster Pætus? At ille adjurans, nusquam se umquam libentius. Hoc si verbis assecutus es, aures ad te afferam non minus elegantes: sin autem obsonio, peto a te, ne pluris esse Balbos, quam disertos putes. Me quotidie aliud ex alio impedit. Sed si
me

me expediero, ut in ista loca venire possim; non committam, ut te sero a me certio rem factum putes. Vale.

ARGUMENTUM.

Jocatur suo more cum Pæto; Epicureum se ait esse factum, abjecta Reip. judiciorumque cura.

M. T. C. PAPIRIO PÆTO S. D. 20

Dupliciter delectatus sum tuis litteris; & quod ipse risi, & quod te intellexi jam posse ride- re. Me autem a te, ut scurram velitem, malis oneratum esse, non moleste tuli. Illud doleo, in ista loca venire me, ut constitueram, non potuisse: habuisses enim non hospitem, sed contuberna- lem. At quem virum? non eum, quem tu es so- litus propulsare conficere. Integram famem ad ovum affero. Itaque usque ad assum vitulinum ope- ra perducitur. Illa mea, quæ solebas antea laudare, o hominem facilem! o hospitem non gravem! abierunt. Nam omnem nostram de repub. curam, cogitationem de dicenda in senatu sententia, com- mentationem caussarum abjecimus. In Epicuri nos, adversarii nostri, castra coniecimus: nec ta- men ad hanc insolentiam, sed ad illam tuam lau- titiam, veterem, dico, cum in sumptum habebas: etsi numquam plura prædia habuisti. Proinde re para: cum homine & edaci tibi res est, & qui jam aliquid intelligat: *Quidam* autem homines scis, quam insolentes sint: dediscenda tibi sunt sportel- læ, & artolagani tui. Nos jam ex areis tantum habemus, ut Verrium tuum, & Camillum (qua munditia homines! qua elegantia!) vocare sæ- pius audeamus. Sed vide audaciam: etiam Hir- tio cœnam dedi, sine pavone tamen: in ea cœna coquus meus, præter jus fervens, nihil potuit imi- tari. Hæc igitur est nunc vita nostra. Mane salu- ramus domi & bonos viros multos, sed tristes; & hos

hos lætos victores, qui me quidem perofficiose & peramanter observant. Ubi salutatio defluxit, literis me involvo, aut scribo, aut lego. Veniunt etiam qui me audiant, quasi doctum hominem, quia paullo sum, quam ipsi, doctior. Inde corpori omne tempus datur. Patriam eluxi jam & gravius, & diutius, quam ulla mater unicum filium. Sed cura, si me amas, ut valeas: ne ego, te jacente, bona tua comedam. Statui enim tibi ne ægroto quidem parcere. Vale.

A R G U M E N T U M.

Confutat, quod Papirius scripserat, fulmina quaedam verborum esse in Ciceronis epistolis, quæ ipse stulte imitaretur. Confutat & illud, quod negarat, Papirium quemquam fuisse patricium.

M. T. C. PAPIRIO PÆTO S. D. 21

AIn tandem? insanire tibi videris, quod imitere verborum meorum, ut scribis, fulmina? tum insanires, si consequi non posses: cum vero etiam vincas, me prius irrideas, quam te, oportet. Quare nihil tibi opus est illud a Trabea, sed potius ἀπόδειγμα meum. Verumtamen quid tibi ego videor in epistolis? nonne plebejo sermone agere tecum? nec enim semper eodem modo. Quid enim simile habet epistola aut iudicio, aut concioni? quin ipsa iudicia non solemus omnia tractare uno modo. Privatas causas, & eas tenues, agimus subtilius: capitis, aut famæ scilicet ornatus: epistolas vero quotidianis verbis texere solemus. Sed tamen, mi Pæte, qui tibi venit in mentem negare, Papirium quemquam umquam nisi plebejum fuisse? fuerunt enim patricii minorum gentium, quorum princeps L. Papirius Mugillanus, qui consul cum L. Sempronio Atriatino fuit, cum antea censor cum eodem fuisset, annis post R. C. CCCXII. Sed tum Papirii dicebamini. Post hunc

hunc XIII. fuerunt, sella curuli, ante L. Papirium Crassum; qui primus Papirius est vocari desitus. Is dictator cum L. Papirio Cursore magistro equitum factus est, annis post R. C. cccc. xv., & quadriennio post consul cum C. Duillio. Hunc secutus est Cursor, homo valde honoratus: deinde L. Masso ædilitius: inde multi Massones: quorum quidem tu omnium patriciorum imagines habere volo. Deinde Carbones, & Turdi insequuntur. Hi plebei fuerunt, quos contempnas censeo. Nam præter hunc C. Carbonem, quem Damasippus occidit, civis e rep. Carbonum nemo fuit. Cognovimus Cn. Carbonem, & ejus fratrem scurræ: quid his improbius? De hoc amico meo, Rubriæ filio, nihil dico. Tres illi fratres fuere, C. Cn. M. Carbones. Marcus, P. Flacco accusante, condemnatus, fur magnus ex Sicilia. Cajus, accusante L. Crasso, cantharidas sumpsisse dicitur. Is & tribunus plebis seditiosus, & P. Africano vim attulisse existimatus est. Hoc vero, qui Lilybæi a Pompejo nostro interfectus est, improbius nemo (meo iudicio) fuit: Jam pater ejus, accusatus a M. Antonio, tutorio atramento absolutus putatur. Quare ad patres censeo revertare: plebei quam fuerint importuni, vides. Vale.

ARGUMENTUM.

Disputat pro Stoicis de libertate loquendi; quos tamen ait, se non imitari.

M. T. C. PAPIRIO PÆTO S. D.

22

AMo verecundiam, vel potius libertatem loquendi. Atque hoc Zenoni placuit, homini mehercule acuto: etsi Academiæ nostræ cum eo magna rixa est. Sed, ut dico, placet Stoicis suo quamque rem nomine appellare. Sic enim disserunt, nihil esse obscenum, nihil turpe dictu. Nam si quod sit in obscenitate flagitium, id aut in re

M

esse,

esse, aut in verbo; nihil esse tertium. In re non est. Itaque non modo in comœdiis res ipsa narratur, ut ille in Demiurgo: modo (forte nosti canticum: meministi Roscium) ita me destituit nudum: totus est sermo verbis tectus, re impudentior. Sed etiam in tragœdiis: quid est enim illud? Quæ mulier una? quid, inquam; est? Usurpata duplex cubile. Quid illud? Pheræi hic cubile inire est ausus. Quid est? Virginem me quondam invitam per vim violat. Jupiter bone, violat? Atqui idem significat: sed alterum nemo tulisset. Vides igitur, cum eadem res sit; quia verba non sint, nihil videri turpe. Ergo in re non est: multo minus in verbis. Si enim, quod verbo significatur, id turpe non est; verbum, quod significat, turpe esse non potest. Anum appellas alieno nomine; cur non suo potius? Si turpe est, ne alieno quidem; si non est, suo potius. Candam antiqui penem vocabant: ex quo est propter similitudinem peniculus. At hodie penis est in obscenis. At vero Piso ille Frugi in annalibus suis queritur, adolescentes peni deditos esse. Quod tu in epistola appellas suo nomine, ille tectius penem. Sed quia multi, factum est tam obscenum, quam id verbum, quo tu usus es. Quid, quod vulgo dicitur, cum nos te volumus convenire, num obscenum est? Memini, in senatu diserrum consularem ita eloqui. Hanc culpam majorem, an illam dicam? Potuit obscenius? non, inquis: non enim ita sensit. Non ergo in verbo est: docui autem in re non esse: nusquam igitur est. Liberis dare operam, quam honeste dicitur? etiam patres rogant filios: ejus operæ nomen non audent dicere. Socratem fidibus docuit nobilissimus fidicen. Is Connus vocitatus est. Num id obscenum putas? Cum loquimur terni, nihil flagitii dicimus; at, cum bini, obscenum est. Græcis quidem, inquires: nihil est ergo in verbo; quando & ego Græce scio:

& ta-

& tamen tibi dico, bini: idque tu facis, quasi ego Græce, non Latine dixerim. Ruta, & menta, recte utrumque. Volo mentam pusillam ita appellare, ut rutulam: non licet. Bella tectoriola dicis: dic ergo etiam pavimenta isto modo: non potes. Vides igitur nihil esse, nisi ineptias: turpitudinem nec in verbo esse, nec in re: itaque nusquam esse. Ergo in verbis honestis obscena ponimus: quid enim? non honestum verbum est divisio? at inest obscenum, cui respondet intercapedo: num hæc ergo obscena sunt? Nos autem ridicule. Si dicimus, ille patrem strangulavit, honorem non præsumur: sin de Aurelia aliquid, aut Lollia, honos præfandus est. Et quidem jam non etiam obscena verba pro obscenis sunt. Batuit, inquit, impudenter: depfit, multo impudentius. Atqui neutrum est obscenum. Stultorum plena sunt omnia. Testes, verbum honestissimum in iudicio: alio loco non nimis. At honesti Colei Lanuvini: Cliternini non honesti. Quid? ipsa res modo honesta, modo turpis. Suppedit, flagitium est. Jam erit nudus in balneo, non reprehendes. Habes scholam Stoicam: οὐ σοφοῦς δὲ ὑπερφύμων ἔσθι: quam multa ex uno verbo tuo? Te adversus me omnia audere, gratum est. Ego servo, & servabo (sic enim assuevi) Platonis verecundiam. Itaque tectis verbis ea ad te scripsi, quæ apertissimis agunt Stoici. Sed illi etiam crepitus ajunt æque liberos, ac ructus esse oportere. Honorem igitur Kalendis Martiis. Tu me diliges, & valebis.

ARGUMENTUM.

Prænuntiat Pæto adventum suum: quamquam enim audierit eum pedibus laborare, se tamen putare ait, coequum illius articulari morbo non impediri, quominus cœnam possit apparare.

M. T. C. PAPIRIO PÆTO S. D. 23

Heri veni in Cumanum: cras ad te fortasse. Sed, cum certum sciam, faciam te paullo

ante certiozem. Etsi M. Ceparius, cum mihi in silva Gallinaria obviam venisset; quæsissemque, quid ageres, dixit, te in lecto esse, quod ex pedibus labores. Tuli scilicet molestæ, ut debui: sed tamen constitui ad te venire, ut & viderem te, & viserem, & cœnarem etiam. Non enim arbitror, coquum etiam te arthriticum habere. Expecta igitur hospitem cum minime edacem; tum inimicum cœnis sumptuosus. Vale.

A R G U M E N T U M.

Rufum a Pæto commendatum ait, sibi curæ etiam atque etiam fore. Dein monet, ut omnino ad cœnas & convivium amicorum redeat. Concludit, nihil sibi esse Repub. carius.

M. T. C. PAPIRIO PÆTO S. D. 24

Rufum istum, amicum tuum, de quo iterum jam ad me scribis, adjuvarem, quantum possem; etiam si ab eo læsus essem; cum te tanto opere viderem ejus causa laborare: cum vero & ex tuis litteris; & illius ad me missis intelligam & judicem, magnæ curæ ei salutem meam fuisse, non possum ei non amicus esse: neque solum tua commendatione, quæ apud me, ut debet, valet plurimum, sed etiam voluntate, ac judicio meo. Volo enim, te scire, mi Pæte, initium mihi suspitionis, & cautionis, & diligentia fuisse litteras tuas: quibus litteris congruentes fuerunt aliæ postea multorum. Nam & Aquini, & Fabrateria consilia sunt inita de me, quæ te video inaudisse: & quasi divinarent, quam his molestus essem futurus, nihil aliud egerunt, nisi me ut opprimerent. Quod ego non suspicans, incautior fuisset, nisi à te admonitus essem. Quamobrem iste tuus amicus apud me commendatione non eget. Utinam ea fortuna reipub. sit, ut ille me quam gratissimum possit cognoscere. Sed hæc hætenus. Te ad cœnas itare desisse, molestæ fero. Magnæ enim te delectatione & voluptate privasti. Deinde etiam vereor (licet enim verum dicere), ne nescio quid illud,

illud, quod solebas, dediscas, & obliviscare cœnulas facere. Nam, si tum, cum habebas, quos imitarere, non multum proficiebas; quid nunc te facturum putem? Spurina quidem, cum ei rem demonstrassem, & vitam tuam superiorem exposuissem, magnum periculum summæ reip. demonstrabat, nisi ad superiorem consuetudinem, tum, cum favonius flaret, revertisses: hoc tempore ferri posse, si forte tu frigus ferre non posses. Sed mehercule, mi Pæte, extra jocum, moneo te, quod pertinere ad beate vivendum arbitror; ut cum viris bonis, jucundis, amantibus tui vivas. Nihil est aptius vitæ, nihil ad beate vivendum accommodatius. Nec id ad voluptatem refero, sed ad communiter vitæ atque victus, remissionemque animorum, quæ maxime sermone efficitur familiari, qui est in conviviis dulcissimus: ut sapientius nostri, quam Græci: illi συμπόσια, aut σὺρδειπνα, id est, compotationes, aut concœnationes: nos convivia; quod tum maxime simul vivitur. Vides, ut te philosophando revocare coner ad cœnas? Cura, ut valeas: id foris cœnitando facillime consequere. Sed cave, si me amas, existimes, me, quod jocosius scribam, abjecisse curam reip. Sic tibi, mi Pæte, persuade, me dies & noctes nihil aliud agere, nihil curare, nisi ut mei cives salvi liberique sint. Nullum locum prætermitto monendi, agendi, providendi. Hoc denique animo sum, ut, si in hac cura, atque administratione vita mihi ponenda sit, præclare actum mecum putem. Etiam atque etiam vale.

ARGUMENTUM.

Scripta hanc epistolam ante bellum civile, cum esset in Cilicia Proconsul. Cavillatur in eo, quia sibi Papirius præcepta de re militari litteris traderat. Dein M. Fabium commendat.

M. T. C. IMP. PAPIRIO PÆTO S. D. 25

SUmmum me ducem litteræ tuæ reddidere. Plane nesciebam, te tam peritum esse rei militaris.

taris. Pyrrhi te libros, & Cineæ video lectitasse. Itaque obtemperare cogito præceptis tuis: hoc amplius, navicularum habere aliquid in ora maritima: contra equitem Parthum negant ullam armaturam meliorem inveniri posse. Sed quid ludimus? nescis, quocum imperatore tibi negotium sit. *Κυρς παυδαυ*, quam contriveram legendo, totam in hoc imperio explicavi. Sed jocabimur alias coram, &, ut spero, brevi: nunc ades ad imperandum, vel ad parendum potius; sic enim antiqui loquebantur. Cum M. Fabio (quod scire te arbitror) summus mihi est usus; valdeque eum diligo, cum propter summam probitatem ejus, ac singularem modestiam, tum quod in iis controversiis, quas habeo cum tuis combibonibus Epicureis, optima opera ejus uti soleo. Is cum ad me Laodiceam venisset, mecumque eum ego esse vellem, repente percussus est atrocissimis litteris, in quibus scriptum erat, fundum Herculanensem a Q. Fabio fratre proscriptum esse, qui fundus cum eo communis esset. Id M. Fabius pergraviter tulit; existimavitque, fratrem suum, hominem non sapientem, impulsu inimicorum suorum eo progressum esse. Nunc, si me amas, mi Pæte, negotium totum suscipe: molestia Fabium libera. Auctoritate tua nobis opus est, & consilio, & etiam gratia. Noli pati litigare fratres, & judiciis turpibus conflictari. Mathonem, & Pollionem inimicos habet Fabius. Quid multa? non mehercule tam perscribere possum, quam mihi gratum feceris, si otiosum Fabium reddideris. Id ille in te positum esse putat, mihi que persuadet. Vale.

A R G U M E N T U M.

Descriptio & excusatio cœnæ hilarioris, præsertim accumbente Cytheride meretrice mima.

M. T. C. PAPIRIO PÆTO S. D. 26

Accubueram hora nona, cum ad te harum exemplum in codicillis exaravi. Dices, ubi?
Apud

Apud Volumnium Eutrapelum, & quidem supra me Atticus, infra Verrius, familiares tui. Miraris tam exhilaratam esse severitatem nostram? Quid ergo faciam? te consulo, qui philosophum audis. Angar? excruciemne me? quid assequar? Deinde quem ad finem? Vivas, inquis, in litteris. An quidquam me aliud agere censes? Haud possem vivere, nisi in litteris viverem. Sed est earum etiam non satietas, sed quidam modus: a quibus cum discessi, etsi minimum mihi est in cœna, quod tu unum *ζῆτῆμα* Dioni Philosopho posuisti, tamen, quid potius faciam, prius quam me dormitum conferam, non reperio. Audi reliqua. Infra Eutrapelum Cytheris accubuit. In eo igitur, inquis, convivio Cicero ille, *Quem adspectabant, cujus ob os Graji ora obvertebant sua?* Non mehercule suspicatus sum, illam affore: sed tamen ne Aristippus quidem ille Socraticus erubuit, cum esset objectum, habere eum Laida: *Habeo*, inquit, *non habeor a Laide*: Græce hoc melius: tu, si voles, interpretabere. Me vero nihil istorum ne juvenem quidem movit umquam: ne nunc senem. Convivio delector: ibi loquor aliquid, quod in solum, ut dicitur: & gemitum etiam in risus maximos transfero. An tu id melius, qui etiam philosophum irriseris? Cum ille, si quis quid quæreret, dixisset, cœnam te quærere a mane dixeris? Ille Baro te putabat quæsiturum, unum cælum esset, an innumerabilia. Quid ad te? At hercule cœna numquid ad te? ibi præsertim. Sic igitur vivitur: quotidie aliquid legitur, aut scribitur: deinde, ne amicis nihil tribuamus, epulamur una, non modo non contra legem, si ulla nunc lex est, sed etiam intra legem, & quidem aliquanto. Quare nihil est, quod adventum nostrum extimescas. Non multi cibi hospitem accipies, sed multi joci. Vale.

LIBER X.

ARGUMENTUM.

Invehitur in Antonii immoderatam potentiam : & Plancum , Transalpinam Galliam ; quam ultimam Cicero Philippicarum lib. 5. vocat , administrantem hortatur , ut in Remp. omni cogitatione , studioque incumbat . Postremo agit gratias de Furnio honorifice tractato .

M. T. C. MUNATIO PLANCO IMP.

COS. DES. S. D.

I

ET abfui , proficiscens in Græciam : & posteaquam de medio cursu reip. sum voce revocatus , numquam per M. Antonium quietus fui : cuius tanta est non insolentia , (nam id quidem vulgare vitium est) sed immanitas , non modo ut vocem , sed ne vultum quidem liberum possit ferre cuiusquam . Itaque mihi maximæ curæ est , non de mea quidem vita , cui satisfeci vel ætate , vel factis , vel (si quid etiam hoc ad rem pertinet) gloria ; sed me patria sollicitat , in primisque , mi Plance , expectatio consulatus tui : quæ ita longa est , ut optandum sit , ut possint ad id tempus reip. spiritum ducere . Quæ potest enim spes esse in ea rep. , in qua hominis impotentissimi , atque intemperantissimi armis oppressa sunt omnia ? & in qua nec senatus , nec populus vim habet ullam , nec leges ullæ sunt , nec judicia , nec omnino simulacrum aliquod , aut vestigium civitatis ? Sed , quando acta omnia mitti ad te arbitrabar , nihil erat , quod singulis de rebus scriberem . Illud autem erat amoris mei (quem a tua pueritia susceptum non servavi solum , sed etiam auxi) monere te , atque hortari , ut in rempub. omni cogitatione , curaque incumberes . Quæ si ad tuum tempus perducitur , facilis gubernatio est : ut perducatur

au-

autem, magnæ tum diligentia est, tum etiam fortunæ. Sed & te aliquantô ante, ut spero, habebimus, & præterquam quod reipub. consulere debemus, tamen tuæ dignitati ita favemus, ut omne nostrum consilium, studium, officium, operam, laborem, diligentiam ad amplitudinem tuam conferamus. Ita facillime & reipub., quæ mihi carissima est, & amicitia nostræ, quam sanctissime nobis colendam puto, me intelligo satisfacturum. Furnium nostrum tanti a te fieri, quantum ipsius humanitas, & dignitas postulat, nec miror, & gaudeo: teque hoc existimare volo, quidquid in eum iudicii officiique contuleris, id ita me accipere, ut in me ipsum te putem contulisse. Vale.

ARGUMENTUM.

Excusat. se., quod in senatum ad agendam Planci causam non venerit; & officium suum pollicetur in iis rebus, quæ præsentiam suam requirere videbuntur.

M. T. C. PLANCO IMP. COS. DES. S. D. 2

MEum studium honori tuo pro necessitudine nostra non defuisset, si aut tuto in senatum, aut honeste venire potuissem. Sed nec sine periculo quisquam, libere de republica sentiens, versari potest in summa impunitate gladiatorum: nec nostræ dignitatis videtur esse, ibi sententiam de republica dicere, ubi me & melius, & propius audiant armati, quam senatores. Quapropter in privatis rebus nullum neque officium, neque studium meum desiderabis: ne in publicis quidem, si quid erit, in quo me interesse necesse sit, umquam deero, ne cum periculo quidem meo, dignitati tuæ. In iis autem rebus, quæ nihilominus, ut ego absim, confici possunt, peto a te, ut me rationem habere velis & salutis, & dignitatis meæ. Vale.

A R G U M E N T U M.

Aucupatur benevolentiam Planci, partim laudibus, partim commemoratione veteris amicitiae: & hortatur, ut Rempublicam suscipiat, veritus id, quod accidit, ne se cum Antonio conjungeret.

M. T. C. PLANCO IMP. COS. DES. S. D. 3

CUm ipsum Furnium per se vidi libentissime, tum hoc libentius, quod, illum audiens, te videbar audire. Nam & in re militari virtutem, & in administranda provincia iustitiam, & in omni genere prudentiam mihi tuam exposuit: & præterea mihi non ignotam in consuetudine, & familiaritate suavitatem tuam adjunxit: præterea summam erga se liberalitatem. Quæ omnia mihi jucunda, hoc extremum etiam gratum fuit. Ego, Plance, necessitudinem constitutam habui cum domo vestra ante aliquanto, quam tu natus es; amorem autem erga te ab ineunte pueritia tua; confirmata jam ætate familiaritatem, cum studio meo, tum iudicio tuo, constitutam. His de causis mirabiliter faveo dignitati tuæ, quam mihi tecum statuo esse communem. Omnia summa consecutus es, virtute duce, comite fortuna: eaque es adeptus adolescens, multis invidentibus, quos ingenio industriaque fregisti. Nunc me, amantissimum tui, nemini concedentem, qui tibi vetustate necessitudinis potior possit esse, si audies, omnem tibi reliquæ vitæ dignitatem ex optimo reipublicæ statu acquires. Scis profecto (nihil enim te fugere potuit) fuisse quoddam tempus, cum homines existimarent, te nimis servire temporibus: quod ego quoque existimarem, si te ea, quæ patiebare, probasse etiam arbitrarer. Sed cum intelligerem, quid sentire, prudenter te arbitrabar videre, quid posses. Nunc alia ratio est omnium rerum: tuum iudicium est, idque liberum. Consul es designatus,

opti-

optima ætate, summa eloquentia, maxima orbitate reipub. virorum talium. Incumbe, per Deos immortales, in eam curam, & cogitationem, quæ tibi summam dignitatem, & gloriam afferat. Unus autem est, hoc præsertim tempore, per tot annos repub. devexata, reipub. bene gerendæ cursus ad gloriam. Hæc amore magis impulsus scribenda ad te putavi, quam quod arbitrarer, te monitis & præceptis meis egere. Sciebam enim, ex iisdem te hæc haurire fontibus, ex quibus ipse hauseram. Quare modum faciam. Hoc tantum significandum putavi, ut potius amorem tibi ostenderem meum, quam ostentarem prudentiam. Interea, quæ ad dignitatem tuam pertinere arbitror, studiose diligenterque curabo. Vale.

ARGUMENTUM.

Agit gratias Ciceroni, quod eum ad verissimæ gloriæ studium cohortatus sit; seque in Reipub. potestate totum fore pollicetur.

PLANCUS CICERONI S. D.

4

GRatissimæ mihi tuæ litteræ fuerunt, quas ex Furnii sermone te scripsisse animadverto. Ego autem præteriti temporis excusationem afferro, quod te profectum audieram: nec multo ante rediisse scivi, quam ex epistola tua cognovi. Nul- lum enim in te officium, ne minimum quidem, sine maxima culpa videor posse præterire: in quo tuendo habeo causas plurimas vel paternæ necessitudinis, vel meæ a pueritia observantiæ, vel tui erga me mutui amoris. Quare, mi Cicero, quod mea tuaque patitur ætas, persuade tibi, te unum esse, in quo ego colendo patriam mihi constituerim sanctitatem. Omnia igitur tua consilia mihi non magis prudentiæ plena (quæ summa est) videntur, quam fidelitatis, quam ego ex mea conscientia metior. Quare, si aut aliter

M VI

fenti-

sentirem, certe admonitio tua me reprimere, aut, si dubitarem, hortatio impellere posset, ut id sequeretur, quod tu optimum putares. Nunc vero, quid est, quod me in aliam partem trahere possit? Quaecumque in me bona sunt, aut fortunæ beneficio tributa, aut meo labore parta, etsi a te propter amorem carius sunt æstimata, tamen vel inimicissimi iudicio tacta sunt, ut, præter bonam famam, nihil desiderare videantur. Quare hoc unum tibi persuade, quantum viribus eniti, consilio providere, auctoritate movere potuero, hoc omne reipub. semper futurum. Non est ignotus mihi sensus tuus: neque, si facultas, optabilis mihi quidem, tui præsentis esset, umquam a tuis consiliis discreparem: nec nunc committam, ut ullum meum factum reprehendere jure possis. Sum in expectatione omnium rerum, quid in Gallia citeriore, quid in urbe Januario mense geratur, ut sciam. Interim maximam hic sollicitudinem curamque sustineo, ne inter aliena vitia hæ gentes nostra mala suam putent occasionem. Quod si proinde, ut ipse mereor, mihi successerit, certe & tibi, cui maxime cupio, & omnibus viris bonis satisfaciam. Fac valeas, meque mutuo diligas.

A R G U M E N T U M.

Hic quoque Plancum ad suscipiendam, tuendamque Rempub. gloriæ stimulis incitat.

M. T. C. PLANCO IMP. COS. DES. S. D. 5

BInas a te accepi litteras eodem exemplo, quod ipsum argumento mihi fuit diligentiae tuæ. Intellexi enim te laborare, ut ad me tuæ expectatissimæ litteræ perferrentur: ex quibus cepi fructum duplicem, mihi in comparatione difficilem ad judicandum, amorem ne erga me tuum, an animum in rempublicam pluris æstimandum putarem. Est omnino patriæ caritas meo quidem ju-

judicio maxima : sed amor , voluntatisque conjunctio plus certe habet suavitatis . Itaque commemoratio tua paternæ necessitudinis , benevolentiaque ejus , quam erga me a pueritia contulisses , ceterarumque rerum ; quæ ad eam sententiam pertinebant , incredibilem mihi lætitiā attulerat . Rursus declaratio animi tui , quem haberes de repub. , quemque habiturus esses , mihi erat jucundissima : eoque major erat hæc lætitiā , quod ad illa superiora accedebat . Itaque te non hortor solum , mi Plancæ , sed plane etiam oro (quod feci iis litteris , quibus tu humanissime respondisti) ut tota mente , omnique animi impetu in rempub. incumbas . Nihil est , quod tibi majori fructui , gloriæque esse possit : nec quidquam ex omnibus rebus humanis est præclarius , aut præstantius , quam de repub. bene mereri . Adhuc enim patitur tua summa humanitas , & sapientia , me , quod sentiam , libere dicere . Fortuna suffragante , videris res maximas consecutus : quod quamquam sine virtute non potuisses , tamen ex maxima parte ea , quæ es adeptus , fortunæ temporibusque tribuuntur . His temporibus difficillimis reipublicæ quidquid subveneris , id erit totum , & proprium tuum . Incredibile est omnium civium , latronibus exceptis , odium in Antonium . Magna spes in te , & in tuo exercitu , magna expectatio ; cujus , per Deos , gratiæ gloriæque cave tempus amittas . Sic moneo , ut filium : sic faveo , ut mihi : sic hortor , ut & pro patria , & amicissimum . Vale .

ARGUMENTUM .

Cum Plancus , litteris ad Senatum scriptis , pacem cum Antonio suasset , suadet Cicero , ut pacem armis potius , quam pactione querat , & ut se a societate malorum civium aliquando sejungens , totum ad Rempubl. transferat .

M. T. C. PLANCO IMP. COS. DES. S. D. 6

Quæ locutus est Furnius noster de animo tuo in rempublicam , ea gratissima fuerunt senatui ,

tui, populoque Romano probatissima: quæ autem recitatæ sunt litteræ in senatu, nequaquam consentire cum Furnii oratione visæ sunt. Pacis enim auctor eras, cum collega tuus, vir clarissimus, a fœdissimis latronibus obsideretur: qui, aut positis armis, pacem petere debent: aut, si pugnantes eam postulant, victoria pax, non pactione parient da est. Sed de pace litteræ vel Lepidi, vel tuæ, quam in partem acceptæ sint, ex viro optimo fratre tuo, & C. Furnio poteris cognoscere. Me autem impulit tui caritas, ut, quamquam nec tibi ipsi consilium deesset, & fratris, Furniique benevolentia, fidelisque prudentia tibi præsto esset futura, vellem tamen meæ quoque auctoritatis pro plurimis nostris necessitudinibus præceptum ad te aliquod pervenire. Crede igitur mihi, Plance: omnes, quos adhuc gradus dignitatis consecutus sis (es autem adeptus amplissimos) eos honorum vocabula habituros, non dignitatis insignia, nisi te cum libertate pop. Rom., & cum senatus auctoritate junxeris. Sejunge te, quæso, aliquando ab iis, cum quibus te non tuum judicium, sed temporum vincula junxerunt. Complures in perturbatione reipublicæ consules dicti, quorum nemo consularis habitus, nisi qui animo exstitit in rempubl. consulari. Talem igitur te esse oportet, qui primum te ab impiorum civium, tui dissimillimorum, societate sejungas: deinde te senatui, bonisque omnibus auctorem, principem, ducem præbeas: postremo, ut pacem esse judices non in armis positis, sed in abjecto armorum & servitutis metu. Hæc si & ages, & senties, tum eris non modo consul & consularis, sed magnus etiam consul & consularis: sin aliter, tum in istis amplissimis nominibus honorum non modo dignitas nulla erit, sed erit summa deformitas. Hæc impulsus benevolentia scripsi paullo severius: quæ tu in experiendo ea ratione, quæ te digna est, vera esse cognosces. xiiii. Kal. Apr.

ARGUMENTUM.

Exponit, cur brevior sit hæc epistola, & cur studium suum in Remp. serius patefecerit; suamque dignitatem Ciceroni commendat.

PLANCUS IMP. COS. DES. CICERONI S. D. 7

PLura tibi de meis consiliis scriberem, rationemque omnium rerum redderem verbosius, quo magis judicares, omnia me reipubl. præstitisse, quæ & tua exhortatione excepi, & mea affirmatione tibi recepi (non minus enim a te probari, quam diligi semper volui: nec te magis in culpa defensorem mihi paravi, quam prædicatorem meritorum meorum esse volui) sed brevior me duæ res faciunt: una, quod publicis litteris omnia sum persecutus: altera, quod M. Varisidium, equitem Romanum, familiarem meum, ad te ipsum transire iussi, ex quo omnia cognoscere posses. Non, medius fidius, mediocri dolore afficiebar, cum alii occupare possessionem laudis viderentur: sed usque mihi temperavi, dum perducerem eo rem, ut dignum aliquid & consulatu meo, & vestra expectatione efficerem. Quod spero, si me fortuna non fefellerit, me consecuturum: ut, maximo præsidio reipubl. nos fuisse, & nunc sentiant homines, & in posterum memoria teneant. A te peto, ut dignitati meæ suffrageris: &, quarum rerum spe ad laudem me vocasti, harum fructu in reliquum facias alacriorem. Non minus posse te, quam velle, exploratum mihi est. Fac valeas, meque mutuo diligas.

ARGUMENTUM.

Causas affert, quibus adductus non ita mature, ut homines expectabant, defensorem se publicæ libertatis professus sit: deque exercitu suo, & statu Provinciæ significat.

PLANCUS IMP. COS. DES. COSS. PRR.

TR. PL. S. P. PL. Q. R. S. D. 8

SI cui forte videor diutius & hominum expectationem, & spem reipubl. de mea voluntate

te tenuisse suspensam : huic prius excusandum me esse arbitror, quam de insequenti officio quidquam ulli pollicendum. Non enim præteritam culpam videri volo redemisse, sed optimæ mentis cōgitata jampridem maturo tempore enuntiare. Non me præteribat, in tanta sollicitudine hominum, & tam perturbato statu civitatis, fructuosissimam esse professionem bonæ voluntatis; magnosque honores ex ea re complures consecutos videbam. Sed cum in eum casum me fortuna demisisset, ut, aut celeriter pollicendo, magna in spe ad proficiendum impedimenta opponerem; aut, si in eo mihi temperavissem, majores occasiones ad opitulandum haberem: expeditius iter communis salutis, quam meæ laudis, esse volui. Nam quis in ea fortuna, quæ mea est, & ab ea vita, quam in me cognitam hominibus arbitror, & cum ea spe, quam in manibus habeo, aut sordidum quidquam pati, aut perniciosum concupiscere potest? Sed aliquantum nobis temporis, & magni laboris, & multæ impensæ opus fuit, ut, quæ reipubl. bonisque omnibus polliceremur, exitu præstaremus; neque ad auxilium patriæ nudi cum bona voluntate, sed cum facultatibus accederemus. Confirmandus erat exercitus nobis, magnis sæpe præmiis sollicitatus, ut ab repub. potius moderata, quam ab uno infinita speraret. Confirmandæ complures civitates, quæ superiore anno largitionibus concessionibusque præmiorum erant obligatæ: ut & illa vana putarent, & eadem a melioribus auctoribus petenda existimarent. Eliciendæ etiam voluntates reliquorum, qui finitimis provinciis exercitibusque præfuerunt, ut potius cum pluribus societatem defendendæ libertatis iniremus, quam cum paucioribus funestam orbi terrarum victoriam pareremus. Munienti vero nosmetipsi fuimus, aucto exercitu, auxiliisque multiplicatis, ut,

cum

cum præferremus sensus aperte, tum etiam invitis quibusdam, sciri, quid defensuri essemus, non esset periculosum. Itaque numquam distitabor, multa me, ut ad effectum horum consiliorum pervenirem, & simulasse invitum, & dissimulasse cum dolore, quod præmatura denuntiatio boni civis imparati quam periculosa esset, ex casu collegæ videbam. Quo nomine etiam C. Furnio legato, viro forti, atque strenuo, plura etiam verbo, quam scriptura, mandata dedimus; ut & rectius ad vos perferrentur, & nos essemus tutiores; quibusque rebus & communem salutem muniri, & nos armari conveniret, præcepimus. Ex quo intelligi potest, curam reipubl. summæ defendendæ jampridem apud nos excubare. Nunc, cum, Deum benignitate, ab omni re simus paratiores, non solum bene sperare de nobis homines, sed explorare judicare volumus. Legiones habeo quinque sub signis, & sua fide virtuteque reipubl. conjunctissimas, & nostra liberalitate nobis obsequentes: provinciam omnium civitatum consensu paratissimam, & summa contentione ad officia certantem: equitatus, auxiliorumque tantas copias, quantas hæ gentes ad defendendam suam salutem, libertatemque conficere possunt. Ipse ita sum animo paratus, vel provinciam tueri, vel ire, quo respub. vocet, vel tradere exercitum, auxilia, provinciamque, ut vel omnem impetum belli in me convertere non recusem; si modo meo casu aut confirmare patriæ salutem, aut periculum morari possim. Hæc si jam expeditis omnibus rebus, tranquilloque statu civitatis polliceor: in damno meæ laudis reipubl. commodo lætabor: sin ad societatem integerimorum & maximorum periculorum accedam, consilia mea æquis iudicibus ab obtreptione invidiorum defendenda commendo. Mihi quidem ipsi fructus meritorum meorum in reipublicæ incolu-

columitate satis magnus est paratus. Eos vero, qui meam auctoritatem, & multo magis vestram fidem secuti, nec ulla spe decipi, nec ullo metu terreri potuerunt, ut commendatos vobis habeatis, petendum videtur. Valete.

A R G U M E N T U M.

Suum studium erga Rempublicam præsefert; modeste dignitatem suam commendat: quid egerit, quid acturus sit, exponit: qualem ducat exercitum significat.

PLANCUS IMP. COS. DES.

CICERONI S. D.

9

Nihil me tibi temere scripsisse, aut te ceteris de me frustra recepisse, lætor. Certe hoc majus habes testimonium amoris mei, quo maturius tibi, quam ceteris, consilia mea volui esse nota. In dies vero meritorum meorum fieri accessiones, pervidere te spero, cogniturum magis recipio. Quod ad me attinet, mi Cicero, (ita ab imminentibus malis resp. me adjuvante liberetur) sic honores, præmiaque vestra suspicio, conferenda certe cum immortalitate, ut sine his nihil de meo studio perseverantiaque sim remissurus. Nisi in multitudine optimorum civium impetus animi mei fuerit singularis, & opera præcipua, nihil ad meam dignitatem accedere volo suffragatione vestra. Concupisco autem nihil mihi, contra quam ipse pugno; sed & temporis, & rei te moderatorem facile patior esse. Nihil aut sero, aut exigue a patria civi tributum potest videri. Exercitum ad vi. Kalend. Majas Rhodanum trajeci, magnis itineribus. Vienna equites mille via brevioræ præmisi. Ipse, si a Lepido non impediatur, celeritate satisfaciam: si autem in itinere meo se opposuerit, ad tempus consilium capiam. Copias adduco & genere, & nume-

numero, & fidelitate firmissimas. Te, ut diligas me, si mutuo te facturum scis, rogo. Vale.

ARGUMENTUM.

Laudat Plancum de optima voluntate, studioque juvande Reipub., præmiaque illum a Senatu honorificentissima sperare vult: operamque in eo suam pollicetur, & hortatur, ut egregie pergat in Rep. tuenda.

M. T. C. PLANCO IMP. COS. DES.

S. D.

10

ET si satis ex Furnio nostro cognoveram, quæ tua voluntas, quod consilium de reipub. esset; tamen, lectis tuis litteris, liquidius de toto sensu tuo judicavi. Quamobrem, quamquam in uno prælio omnis fortuna reipub. disceptat; (quod quidem, cum hæc legeres, jam decretum arbitrabar fore) tamen ipsa fama, quæ de tua voluntate perccebit, magnam es laudem consecutus. Itaque, si consulem Romæ habuissemus, declaratum esset a senatu cum tuis magnis honoribus, quam gratus esset conatus & apparatus tuus. Cujus rei non modo non præterit tempus, sed ne maturum quidem etiam nunc, meo quidem iudicio, fuit. Is enim denique honos mihi videri solet, qui non propter spem futuri beneficii, sed propter magna merita claris viris deferitur & datur. Quare, sit modo aliqua resp., in qua honos elucere possit, omnibus, mihi crede, amplissimis honoribus abundabis. Is autem, qui vere appellari potest honos, non invitamentum ad tempus, sed perpetuæ virtutis est præmium. Quamobrem, mi Plance, incumbere toto pectore ad laudem: subveni patriæ: opitulare collegæ: omnium gentium consensum, & incredibilem conspirationem adjuva. Me tuorum consiliorum adiutorem, dignitatis fautorem, omnibus in rebus tibi amicissimum fide-

fideliſſimumque cognoſces. Ad eas enim cauſas, quibus inter nos amore ſumus, officiis; veruſtate conjuncti, patriæ caritas acceſſit; eaque effecit, ut tuam vitam anteferrem meæ. IV. Kal. April.

A R G U M E N T U M.

Gratias agit pro officiis, quæ in ipſum Cicero contulerat; & de ſuo ſtudio erga Remp. omnia pollicetur.

PLANCUS CICERONI S. D.

II

Immortales ago tibi gratias, agamque, dum vivam: nam, relaturum me, affirmare non poſſum. Tantis enim tuis officiis non videor mihi reſpondere poſſe, niſi forte (ut tu graviffime, diſertiffimeque ſcripſiſti) ita ſenſurus es, ut me reſerre gratiam putes, cum memoria tenebo. Si de filii tui dignitate eſſet actum, amabilius certe niſi facere potuiſſes. Primæ tuæ ſententiæ infinitis cum muneribus; poſteriores ad tempus arbitriumque amicorum meorum compoſitæ; oratio aſſidua & perpetua de me, jurgia cum obtreſcatoribus propter me, notiſſima mihi ſunt: non mediocris adhibenda mihi eſt cura, ut reipub. me civem dignum tuis laudibus præſtem; in amicitia tua memorem atque gratum. Quod reliquum eſt, tuum munus tuere; & me, ſi, quem eſſe voluiſti, eum exitu rebusque cognoſcis, defende ac ſuſcipe. Cum Rhodanum copias trajeciſſem, fratremque cum tribus millibus equitum præmiſiſſem, ipſe iter ad Mutinam dirigerem, in itinere de prælio facto, Brutoque, & Mutina obſidione liberatis audivi. Animadverti, nullum alium receptum Antonium, reliquiasque, quæ cum eo eſſent, habere; niſi in his partibus: duasque ei ſpes eſſe propoſitas: unam Lepidi ipſius, alteram exercitus. Quod quædam pars exercitus non minus furioſa eſt, quam qui cum Antonio fuerunt, equitatum revocavi. Ipſe in Allobrogibus conſtiti, ut proinde

de ad omnia paratus essem, ac res me moneret. Si nudus huc se Antonius conferet, facile mihi videor per me sustinere posse, remque publicam ex vestra sententia administrare, quamvis ab exercitu Lepidi recipiatur. Si vero copiarum aliquid secum adducet, etsi decima legio veterana, quæ nostra opera revocata cum reliquis est, ad eundem furorem redierit: tamen, ne quid detrimenti fiat, dabitur opera a me; idque me præstaturum spero, dum istinc copiarum trajiciantur, conjunctæque nobiscum facilius perditos opprimant. Hoc tibi spondeo, mi Cicero, neque animum, neque diligentiam mihi defuturam. Cupio mehercule nullam residuam sollicitudinem esse. Sed, si fuerit, nec animo, nec benevolentia, nec patientia cujusquam pro vobis cedam. Do quidem ego operam, ut etiam Lepidum ad hujus rei societatem incitem; omniaque ei obsequia polliceor, si modo rempub. respicere velit. Utor in hac re adjutoribus interpretibusque fratre meo, & Laterense, & Furnio nostro. Non me impediunt privatae offensiones, quominus pro reipub. salute etiam cum inimicissimo consentiam. Quod si nihil profecero, nihilominus maximo sum animo, & majore fortasse cum mea gloria vobis satisfaciam. Fac valeas, meque mutuo diligas.

A R G U M E N T U M .

Significat, quam gratæ Senatui fuerint ejus litteræ de apparatu, studioque defendendæ Reipub., quidque ex ejus litteris actum sit; & hortatur eum, ut solet, ad recuperandam libertatem.

M. T. C. PLANCO IMP. COS. DES. S. D. 12

ET si reipublicæ causa maxime gaudere debeo, tantum ei te præsidii, tantum opis attulisse extremis pæne temporibus: tamen ita te victorem complectar, repub. recuperata, ut magnam partem

tem mihi lætitiæ tua dignitas afferat, quam & esse jam, & futuram amplissimam intelligo. Cave enim putes, ullas litteras umquam gratiores, quam tuas, in senatu esse recitatas. Idque contigit tum meritorum tuorum in rempubl. eximia quadam magnitudine, tum verborum sententiarumque gravitate. Quod mihi quidem minime novum, qui & te nossem, & tuarum litterarum ad me misarum promissa meminissem, & haberem a Furio nostro tua penitus consilia cognita: sed senatui majora visa sunt, quam erant expectata: non quod umquam de tua voluntate dubitasset; sed nec, quantum facere posses, nec, quo progredi velles, exploratum satis habebat. Itaque cum ad VII. Id. Apr. mane mihi tuas litteras M. Varisidius reddidisset, easque legissem, incredibili gaudio sum elatus: cumque magna multitudo optimorum virorum, & civium me de domo deduceret, feci continuo omnes participes meæ voluptatis. Interim ad me venit Munatius noster, ut consueverat; & ego ei litteras tuas ostendi: nihil dum enim sciebat: nam ad me primum Varisidius: idque sibi a te mandatum esse dicebat. Paulo post idem mihi Munatius eas litteras legendas dedit, quas ipsi miferas, & eas, quas publice. Placuit nobis, ut statim ad Cornutum prætorem urbis litteras deferremus, qui, quod consules aberant, consulare munus sustinebat more majorum. Senatus est continuo convocatus, frequensque convenit propter famam, atque expectationem tuarum litterarum. Recitatis litteris, oblata religio Cornuto est, pulchriorum admonitu, non satis diligenter eum auspiciis operam dedisse; idque a nostro collegio comprobatum est. Itaque res dilata est in posterum. Eo autem die magna mihi fuit pro tua dignitate contentio cum Servilio, qui cum gratia effecisset, ut sua sententia prima pronuntiaretur: frequens eum senatus reliquit, & in alia omnia di-

discessit : meæque sententiæ , quæ secunda pronuntiata erat , cum frequens assentiretur senatus , rogatu Servilii P. Titius intercessit . Res in posterum dilata . Venit paratus Servilius , Jovi ipsi iniquus , cujus in templo res agebatur . Hunc quemadmodum fregerim , quantaque contentione Titium intercessorem abjecerim , ex aliorum te literis malo cognoscere . Unum hoc ex meis : senatus gravior , constantior , amicius tuis , laudibus esse non potuit , quam tum fuit . Nec vero tibi senatus amicius , quam cuncta civitas . Mirabiliter enim populus R. universus , & omnium generum ordinumque consensus ad liberandam rempub. conspiravit . Perge igitur , ut agis , nomenque tuum commenda immortalitati : atque hæc omnia , quæ habent speciem gloriæ , collectam ex inanissimis splendoris insignibus , contemne ; breviam , fugacia , caduca existima . Verum decus in virtute positum est , quæ maxime illustratur magnis in rempub. meritis . Eam facultatem habes maximam , quam , quando complexus es , tene , & perfice , ut ne minus respub. tibi , quam tu reipub. debeas . Me tuæ dignitatis non modo fautorem , sed etiam amplificatorem cognosces . Id tum reipub. , quæ mihi est mea vita carior , tum nostræ necessitudini debere me , judico . Atque in his curis , quas contuli ad dignitatem tuam , cepi magnam voluptatem , quod bene cognitam mihi T. Munatii prudentiam & fidem , magis etiam perspexi in ejus incredibili erga te benevolentia & diligentia . III. Id. April. Vale .

ARGUMENTUM .

Scribit de S. C. in suam sententiam facto ad augendam Planci dignitatem ; hortaturque , ut Antoniani belli reliquias conficiat .

M. T. C. PLANCO IMP. COS. DES. S. D. 13

UT primum potestas data est augendæ dignitatis tuæ , nihil prætermisi in te ornando , quod possi-

positum esset aut in præmio virtutis, aut in honore verborum. Id ex ipso S. C. poteris cognoscere: ita enim est perscriptum, ut a me de scripto dicta sententia est: quam senatus frequens secutus est summo studio, magnoque consensu. Ego, quamquam ex tuis litteris, quas mihi misisti, perspexeram, te magis iudicio bonorum, quam insignibus gloriæ delectari: tamen considerandum nobis existimavi, etiam si tu nihil postulares, quantum tibi a repub. deberetur. Tu contexes extrema cum primis. Qui enim M. Antonium oppresserit, is bellum confecerit. Itaque Homerus non Ajacem, nec Achillem, sed Ulysssem appellavit *πτολίποδον*. Vale.

A R G U M E N T U M.

Laudat Plancum de subsidio reipub. ferendo; & hortatur, ut Antonium ad Mutinam fuscum persequatur ac perdat.

M. T. C. PLANCO IMP. COS. DES. S. D. 14

O Gratam famam biduo ante victoriam, de subsidio tuo, de studio, de celeritate, de copiis! Atqui, etiam hostibus fuscis, spes omnis in te est. Fugisse enim ex prælio Mutinensi dicuntur notissimi latronum duces. Est autem non minus gratum extrema delere, quam prima depellere. Equidem expectabam jam tuas litteras, idque cum multis: sperabamque, etiam Lepidum, temporibus admonitum, tecum & reip. satis esse facturum. In illam igitur curam incumbe, mi Plance, ut ne qua scintilla tæterrimi belli relinquatur. Quod si erit factum, & remp. divino beneficio affeceris, & ipse æternam gloriam consequere. III. Id. Maji. Vale.

A R G U M E N T U M.

Nuntiat, quid ad opprimendum Antonium paret.

PLANCUS IMP. CICERONI S. D. 15

HIs litteris scriptis, quæ postea accidissent, scire te, ad remp. putavi pertinere. Sedulitas

litas mea , ut spero , & mihi , & reipub. tulit fructum . Namque assiduis internuntiis cum Lepido egi , ut missa omni contentione , reconciliataque voluntate nostra , communi consilio reipub. succurreret : se , liberos , urbem pluris , quam unum perditum abjectumque latronem , putaret ; obsequioque meo , si ita faceret , ad omnes res abuteretur . Profeci itaque per Laterensem internuntium : fidem mihi dedit , se Antonium , si prohibere sua provincia non potuisset , bello persecuturum : me , ut venirem , copiasque conjungerem , rogavit : eoque magis , quod & Antonius ab equitatu firmus esse dicebatur , & Lepidus ne mediocrem quidem equitatum habebat . Nam etiam ex paucitate ejus , non multis ante diebus , decem , qui optimi fuerant , ad me transierunt . Quibus rebus ego cognitis , cunctatus non sum : in cursu bonorum consiliorum Lepidum adjuvandum putavi . Adventus meus quid profecturus esset , vidi : vel quod equitatu meo persequi atque opprimere equitatum ejus possem : vel quod exercitus Lepidi eam partem , quæ corrupta est , & ab rep. alienata , & corrigere & coercere præsentia mei exercitus possem . Itaque in Isara , flumine maximo , quod in finibus est Allobrogum , ponte uno die facto , exercitum ad iv. Id. Maji transduxi . Cum vero mihi nuntiatum esset , L. Antonium , præmissum cum equitibus , & cohortibus , ad Forum Julii venisse : fratrem cum equitum quatuor millibus , ut occurreret ei , misi ad prid. Id. Maji . Ipse maximis itineribus cum quatuor legionibus expeditis , & reliquo equitatu subsequar . Si nos mediocri modo fortuna reip. adjuverit , & audaciæ perditorum , & nostræ sollicitudinis hic finem reperiemus . Quod si latro , præcognito nostro adventu , rursus in Italiam se recipere cœperit , Bruti erit officium , occurrere ei , cui scio nec consilium , nec animum defuturum . Ego tamen , si id acciderit ,

fratrem cum equitatu mittam, qui sequatur, Italiam a vastatione defendat. Fac valeas, meque mutuo diligas.

A R G U M E N T U M.

Gratissimas Senatui fuisse Planci litteras, maximeque opportunas significat: eique auctor est, ut in rebus tam subitis consilium Senatus ne expectet; ipse a sese consilium capiat.

M. T. C. PLANCO S. D.

16

Nihil post hominum memoriam gloriosius, nihil gratius, ne tempore quidem ipso opportunius, accidere vidi, quam tuas, Plance, litteras. Redditæ sunt enim, frequenti senatu, Cornuto, cum is frigidas sane, & inconstantes recitasset litteras Lepidi: sub eas statim recitatæ sunt tuæ, non sine magnis quidem clamoribus. Cum rebus enim ipsis essent, & studiis beneficiisque in remp. gratissimæ: tum erant gravissimis verbis, & sententiis. Flagitare senatus institit Cornutum, ut referret statim de tuis litteris. Ille se considerare ait velle. Cum ei magnum convicium fieret cuncto a senatu, quinque tribuni pleb. retulerunt. Servilius rogatus rem distulit: ego eam sententiam dixi, cui sunt assensi ad unum: ea quæ fuerit, ex S. C. cognosces. Tu, quamquam consilio non eges, vel abundas potius, tamen hoc animo esse debes, ut nihil huc rejicias: neve in rebus tam subitis, tamque angustis a senatu consilium petendum putes. Ipse tibi sis senatus: quocumque te ratio reipub. docet, sequare. Cures, ut ante factum aliquid a te egregium audiamus, quam futurum putarimus. Illud tibi promitto, quidquid erit a te factum, id senatum non modo ut fideliter, sed etiam ut sapienter factum, comprobaturum. Vale.

ARGUMENTUM.

Præsentem belli statum describit, cum excusatione fratris a se dimissi, & commendatione suæ dignitatis.

PLANCUS IMP. CICERONI S. D. 17

ANtonius Idib. Maji ad Forum Julii cum primis copiis venit. Ventidius bidui spatio abest ab eo. Lepidus ad Forum Voconii castra habet, qui locus a Foro Julii quatuor & viginti milia passuum abest: ibique me expectare constituit, quemadmodum ipse mihi scripsit. Quod si omnia mihi integra & ipse, & fortuna servaverit, recipio vobis, celeriter me negotium ex sententia confecturum. Fratrem meum, assiduis laboribus concursationibusque confectum, graviter se habuisse, antea tibi scripsi: sed tamen, cum primum posse ingredi cœpit, non magis sibi, quam reipub. convaluisse se existimans, ad omnia pericula princeps esse non recusabat. Sed ego eum non solum hortatus sum, verum etiam coegi isto proficisci: quod illa valetudine magis conficere se, quam metuere posset in castris; & quod acerbissimo interitu consulum rempub. nudatam, tali cive prætore in urbanis officiis indigere existimabam. Quod si quis vestrum non probabit, mihi prudentiam in consilio defuisse sciat, non illi erga patriam fidelitatem. Lepidus tandem, quod ego desiderabam; fecit, ut Apellam ad me mitteret, quo obside, fide illius, & societatis in repub. administranda uterer. Studium in ea re suum mihi L. Gellius, de tribus fratribus, Segaviano probavit, quo ego interprete novissime ad Lepidum sum usus. Amicum eum reip. cognoscere videor: libenterque ei sum testimonio, & omnibus ero, qui bene merentur. Fac valeas, meque mutuo diligas, dignitatemque meam, si mereor, tuearis, sicut adhuc singulari cum benevolentia fecisti. Vale.

ARGUMENTUM.

Narrat, quibus de causis ad Lepidum proficiscatur.

PLANCUS CICERONI S. D.

18

Quid in animo habuerim, cum Lævus Nerva-
que discesserunt a me, & ex litteris, quas eis
dedi, & ex ipsis cognoscere potuisti, qui om-
nibus rebus, consiliisque meis interfuerunt. Ac-
cidit mihi, quod homini pudenti, & cupido sa-
tisfaciendi reipublicæ, bonisque omnibus accide-
re solet, ut consilium sequerer periculosum ma-
gis, dum me probarem, quam tutum, quod ha-
bere posset obtrectionem. Itaque post disces-
sum legatorum, cum binis continuis litteris &
Lepidus me, ut venirem, rogaret, & Laterensis
multo etiam magis, prope implorans, obtesta-
retur: non ullam rem aliam extimescens, quam
eamdem, quæ mihi quoque facit timorem, va-
rietatem atque infidelitatem exercitus ejus: non
dubitandum putavi, quin succurrerem, meque
communi periculo offerrem. Sciebam enim, etsi
cautius illud erat consilium, exspectare me ad Isa-
ram, dum Brutus trajiceret exercitum; & cum
collega consentiente, exercitu concordi, & bene
de Rep. sentiente, hostibus obviam ire: tamen,
si quid Lepidus bene sentiens detrimenti cepisset,
hoc omne assignatum iri aut pertinaciæ meæ,
aut timori videbam, si aut hominem offensum
mihi, conjunctum cum rep. non sublevassem; aut
ipse a certamine belli tam necessarij me remo-
vissem. Itaque potius periclitari volui, si possem
mea præsentia & Lepidum tueri, & exercitum
facere meliorem, quam nimis cautus videri. Sol-
licitiorem certe hominem non suis contractis ne-
minem puto fuisse. Nam quæ res nullam habe-
bat dubitationem, si exercitus Lepidi absit, ea
nunc magnam affert sollicitudinem, magnumque
habet casum. Mihi enim si contigisset, ut prior

occurrerem Antonio, non mehercule horam confli-
 flitisset: tantum ego & mihi confido, & sic per-
 culsas illius copias, Ventidique mulionis castra
 despicio. Sed non possum non exhorrescere, si
 quid intra cutem subest vulneris, quod prius no-
 cere potest, quam sciri curarique possit. Sed
 certe, nisi uno loco metaremur, magnum peri-
 culum ipse Lepidus, magnum ea pars exercitus
 adiret, quæ bene de rep. sentit. Magnam etiam
 perditionem hostes accessionem sibi fecissent, si quas
 copias a Lepido abstraxissent. Quæ si adventus
 meus represserit, agam gratias fortunæ, constan-
 tiæque meæ, quæ me ad hanc experientiam exci-
 tavit. Itaque ad XII. Kal. Jun. ab Isara castra
 movi: pontem tamen, quem in Isara feceram,
 castellis duobus ad capita positis, reliqui, præsidia-
 que ibi firma posui, ut venienti Bruto, exercitui-
 que ejus sine mora transitus esset paratus. Ipse,
 ut spero, diebus octo, quibus has litteras dabam,
 cum Lepidi copiis me conjungam. Vale.

ARGUMENTUM.

*Officium Planci in actione gratiarum sibi fuisse
 gratissimum fatetur, hortaturque, ut ad extin-
 guendas belli reliquias omni studio incumbat.*

M. T. C. PLANCO IMP. S. D. 19

QUamquam gratiarum actionem a te non de-
 siderabam, cum te re ipsa, atque animo
 scirem esse gratissimum: tamen (fatendum est
 enim) fuit ea mihi per jucunda: sic enim vidi,
 quasi ea, quæ oculis cernuntur, me a te amari.
 Dices, quid antea? Semper quidem, sed num-
 quam illustrius. Litteræ tuæ mirabiliter gratae
 sunt senatui, cum rebus ipsis, quæ erant gravis-
 simæ & maximæ, fortissimi animi, summi-
 que consilii: tum etiam gravitate sententiarum, at-
 que verborum. Sed, mi Plance, incumbere, ut

belli extrema perficias : in hoc erit summa & gloria & gloria . Cupio omnia reip. caussa : sed , mehercule , in ea conservanda jam defatigatus , non multo plus faveo patriæ , quam tuæ gloriæ : cujus maximam facultatem tibi Dii immortales , ut spero , dedere : quam complectere , obsecro . Qui enim Antonium oppresserit , is hoc tæterrimum bellum periculosissimumque confecerit . Vale .

A R G U M E N T U M .

Petit , ut de Lepidi fide significet , utrum pro Rep. sit , an se cum Antonio conjunxerit : & hortatur ad belli reliquias opprimendas .

M. T. C. PLANCÓ S. D.

20

ITa erant omnia , quæ istinc afferebantur , incerta , ut , quid ad te scriberem , non occurreret . Modo enim , quæ vellemus , de Lepido , modo contra nuntiabantur . De te tamen constans fama , nec decipi posse , nec vinci : quorum alterius fortuna partem habet quamdam ; alterum proprium est prudentiæ tuæ . Sed accepi litteras a collega tuo , datas Id. Majis , in quibus erat , te ad se scripsisse , a Lepido non recipi Antonium . Quod erit certius , si tu ad nos idem scripseris : sed minus audes fortasse propter inanem lætitiā litterarum superiorum . Verum ut errare , mi Plance , potuisti (quis enim id effugerit ?) sic , decipi te non potuisse , quis non videt ? Nunc vero etiam erroris caussa sublata est . Culpā enim illa ; *bis ad eundem* , vulgari reprehensa proverbio est . Sin , ut scripsisti ad collegam , ita se res habet , omni cura liberati sumus : nec tamen erimus priusquam , ita esse , tu nos feceris certiores . Mea quidem , ut ad te sæpius scripsi , hæc sententia est : qui reliquias huius belli oppresserit , eum totius belli confectorem fore : quem te & opto esse , & confido futurum . Studia mea erga te , quibus

bus certe nulla esse majora potuerunt, tibi tam grata esse, quam ego putavi fore, minime miror, vehementerque lætor. Quæ quidem tu, si recte istic erit, majora & graviora cognosces. iv. Kal. Jun.

ARGUMENTUM.

Nunciat de Lepidi perfidia, & conjunctione cum Antonio: novarumque copiarum subsidium postulat, & suam commendat dignitatem.

PLANCUS CICERONI S. D.

21

PUderet me inconstantia mearum litterarum, si non hæc ex aliena levitate penderent. Omnia feci, quare, Lepido conjuncto ad remp. defendendam, minore sollicitudine vestra perditis resisterem. Omnia ei & petenti recepi, & ultro pollicitus sum; scripsi que tibi biduo ante, confidere me bono Lepido esse usurum, communique consilio bellum administraturum. Credidi chirographis ejus; affirmationi præsentis Laterensis, qui tum apud me erat, reconciliaremque me Lepido, fideinque haberem, orabat. Non licuit diutius bene de eo sperare. Illud certe cavi, & cavebo, ne mea credulitate reip. summa fallatur. Cum Isaram flumen, uno die ponte confecto, exercitum transduxissem, pro magnitudine rei celeritatem adhibens, quod petierat per litteras ipse, ut maturarem venire: præsto mihi fuit stator ejus cum litteris, quibus, ne venirem, denuntiabat: se posse conficere per se negotium: interea ad Isaram exspectarem. Indicabo temerarium meum consilium tibi: nihilominus ire decreveram, existimans eum socium gloriæ vitare. Putabam, posse me nec de laude jejuni hominis deliberare quidquam: & subesse tamen propinquis locis, ut, si durius aliquid esset, succurrere celeriter possem. Ego non malus homo hoc suspicabar. At Laterensis, vir sanctissimus, suo

chirographo mittit mihi litteras : in eisque desperans de se , de exercitu , de Lepidi fide , querensque , se destitutum , aperte denuntiat , videam , ne fallar : suam fidem solutam esse : reipubl. ne desim . Exemplar ejus chirographi Titio dedi . Ipsa chirographa omnia , & quibus credidi , & ea , quibus fidem non habendam putavi , Lævo Cispio dabo perferenda , qui omnibus his interfuit rebus . Accessit eo , ut milites ejus , cum Lepidus concionaretur , improbi per se , corrupti etiam per eos , qui præsunt , Canidios , Ruffrenosque , & ceteros , quos , cum opus erit , scietis , conclamarint viri boni , pacem se velle , neque esse cum ullis pugnatuos , duobus jam consulibus singularibus occisis , tot civibus pro patria amissis , hostibus denique omnibus judicatis , bonisque publicatis . Neque hoc aut vindicarat Lepidus , aut sanarat . Hæc me venire , & duobus exercitibus conjunctis objicere exercitum fidelissimum , maxima auxilia , principes Galliarum , provinciam cunctam , summæ dementiæ , & temeritatis esse , vidi : mihiq; , si ita oppressus essem , remquepub. mecum perdidissem , mortuo non modo honorem , sed misericordiam quoque defuturam . Itaque rediturus sum : nec tanta munera perditis hominibus dari posse , sinam . Exercitum locis ut habeam opportunis , provinciam tuear , etiam si ille exercitus desciverit , omnia ut integra servem , dabo operam , quoad exercitus huc summittatis , parique felicitate rempub. hic vindicetis : nec depugnare , si occasio tulerit , nec obsideri , si necesse fuerit , nec mori , si casus inciderit , pro vobis paratior fuerit quisquam . Quare hortor te , mi Cicero , exercitum huc trahendum quamprimum cures , & matures prius , quam hostes magis corroborentur , & nostri perturbentur . In quo si celeritas erit adhibita , resp. in possessione victoriæ , deletis sceleratis , permanebit .

nebit. Fac valeas, meque diligas. Fratrem meum tibi, fortissimum civem, & ad omnia paratissimum, excusem litteris? qui ex laore in fabriculam incidit assiduam, & satis molestam. Cum primum poterit, istuc recurrere non dubitabit, ne quo loco reipubl. desit. Meam dignitatem commendatam habeas, rogo. Concupiscere me nihil oportet: habeo te & amantissimum mei, &, quod optavi, summæ auctoritatis. Tu videris, quantum & quando tuum munus apud me velis esse. Tantum te rogo, in Hirtii locum me subdas, & ad tuum amorem, & ad meam observantiam. Vale.

ARGUMENTUM.

Agris dividendis præfici Plancus cupiebat, ad militum gratiam colligendam: de ea re Cicero respondet.

M. T. C. PLANCO S. D.

22

IN te, & in collega omnis spes est, Diis approbantibus. Concordia vestra, quæ senatui declarata litteris vestris est, mirifice & senatus & cuncta civitas delectata est. Quod ad me scripseras de re agraria, si consultus senatus esset, ut quisque de te honorificentissimam sententiam dixisset, eam secutus essem: qui certe ego fuisssem. Sed propter tarditatem sententiarum, moramque rerum, cum ea, quæ consulebantur, ad exitum non pervenirent: commodissimum mihi, Plancoque fratri visum est, uti eo, quod ne nostro arbitratu componeretur, quis fuerit impedimento, arbitror, te ex Planci litteris cognovisse. Sed sive in S. C., sive in ceteris rebus desideras aliquid, sic tibi persuade, tantam esse apud omnes bonos tui caritatem, ut nullum genus amplissimæ dignitatis excogitari possit, quod tibi non paratum sit. Litteras tuas vehementer exspecto, & quidem tales, quales maxime opto. Vale.

N Y

ARGU-

ARGUMENTUM.

Excusat se, quod Lepido crediderit; & suam diligentiam in copiis tuto reducendis declarat, accepto nuntio de Lepidi Antoniique conjunctione; quo in periculo subsidium Cæsariani exercitus postulat.

PLANCUS CICERONI S. D.

23

NUmquam mehercule, mi Cicero, me pœnitebit maxima pericula pro patria subire, dum, si quid acciderit mihi, a reprehensione temeritatis absim. Confiterer imprudentia me lapsum, si umquam Lepido ex animo credidissem. Credulitas enim error est magis, quam culpa; & quidem in optimi cujusque mentem facillime irrepit. Sed ego non hoc vitio pæne sum deceptus: Lepidum enim pulchre noram. Quid ergo est? Pudor me, qui in bello maxime est periculosus, hunc casum coegit subire. Nam, si uno loco essem, verebar, ne cui obtrectatorum viderer & nimium pertinaciter Lepido offensus, & mea patientia etiam alere bellum. Itaque copias prope in conspectum Lepidi Antoniique adduxi; quadragintaque millium passuum spatio relicto, confedi, eo consilio, ut vel celeriter accedere, vel salutariter recipere me possem. Adjunxi hæc in loco eligendo, flumen oppositum ut haberem, in quo mora transitus esset: Vocontii sub manu ut essent, per quorum loca mihi fideliter pateret iter. Lepidus, desperato adventu meo, quem non mediocriter captabat, se cum Antonio conjunxit ad iv. Kal. Jun., eodemque die ad me castra moverunt: viginti millia passuum cum abessent, res mihi nuntiata est. Dedi operam, Deum benignitate, ut & celeriter me reciperem, & hic discessus nihil fugæ simile haberet; non miles ullus, non eques, non quidquam impedimentorum amitteretur, aut ab illis furentibus latronibus interciperetur. Itaque pridie Non. Jun.

omnes

omnes copias Isaram trajeci , pontesque , quos feceram , interrupi , ut spatium ad se colligendum homines haberent , & ego me interea cum collega conjungerem , quem triduo , cum has dabam litteras , exspectabam . Laterensis nostri & fidem & animum singularem in rempublicam semper fitebor . Sed certe nimia ejus indulgentia in Lepidum ad hæc pericula perspicienda fecit eum minus sagacem . Qui quidem , cum in fraudem se deductum videret , manus , quas justius in Lepidi perniciem armasset , sibi afferre conatus est . In quo casu tamen interpellatus , adhuc vivit , & dicitur victurus . Sed tamen de hoc mihi parum certum est . Magno cum dolore parricidarum elapsus sum iis : veniebant enim eodem furore in me , quo in patriam , incitati . Iracundias autem harum rerum recentes habebant : quod Lepidum castigare non destiteram , ut extingueret bellum : quod colloquia facta improbabam : quod legatos , fide Lepidi missos ad me , in conspectum venire vetueram : quod C. Catium Vestinum tribunum mil. missum ab Antonio ad eum cum litteris exceperam . In quo hanc capio voluptatem , quod certe , quo magis me petiverunt , tanto majorem iis frustratio dolorem attulit . Tu , mi Cicero , quod adhuc fecisti , idem præsta , ut vigilanter nervoseque nos , qui stamus in acie , subornes . Veniat Cæsar cum copiis , quas habet firmissimas : aut , si ipsum aliqua res impedit , exercitus ejus mittatur , cujus ipsius magnum periculum agitur . Quidquid aliquando futurum fuit in castris perditorum contra patriam , hoc omne jam convenit . Pro urbis vero salute cur non omnibus facultatibus , quas habemus , utamur ? Quod si vos istic non defueritis , profecto , quod ad me attinet , omnibus rebus abunde reipubl. satisfaciam . Te quidem , mi Cicero , in dies mehercule habeo cariorum ; sollicitudinesque meas quotidie magis tua merita ex-

cunt, ne quid aut ex amore, aut ex iudicio tuo perdam. Opto, ut mihi liceat jam præfenti pietate meorum officiorum tua beneficia tibi facere jucundiora. Vale. viii. Idus Jun. Civarone, ex finibus Allobrogum.

A R G U M E N T U M .

Pollicetur se memorem beneficiorum : suas copias narrat : subsidium aut ab Octaviano, aut Africano exercitum postulat : Octavianum quasi negligentem in tuenda Rep. accusat.

PLANCUS IMP. COS. DES. CICERONI S. D. 24

FAcere non possum, quin in singulas res, meritaque tua tibi gratias agam. Sed mehercule facio cum pudore. Neque enim tanta necessitudo, quantam tu mihi tecum esse voluisti, desiderare videtur gratiarum actionem : neque ego lubenter pro maximis tuis beneficiis tam vili munere defungor orationis ; & malo præfens observantia, indulgentia, assiduitate memorem me tibi probare. Quod si mihi vita contigerit, omnes gratas amicitias, atque etiam pias propinquitates in tua observantia, indulgentia, assiduitate vincam. Amor enim tuus, ac iudicium de me, utrum mihi plus dignitatis in perpetuum, an voluptatis quotidie sit allaturus, non facile dixerim. De militum commodis fuit tibi curæ, quos ego non potentiae meæ causa (nihil enim me non salutariter cogitare scio) ornari volui a senatu : sed primum, quod ita meritos iudicabam : deinde, quod ad omnes casus conjunctiores reip. esse volebam : novissime, ut ab omni omnium sollicitatione aversos eos tales vobis præstare possem, quales adhuc fuerunt. Nos adhuc hic omnia integra sustinuimus. Quod consilium nostrum, etsi, quanta sit aviditas hominum, non sine causa, talis victoriæ, scio, tamen vobis probari, spero. Non enim, si quid in
his

his exercitibus sit offensum, magna subsidia respublica habet expedita; quibus subito impetu, ac latrocinio parricidarum resistat: Copias vero nostras notas tibi esse arbitror. In castris meis legiones sunt veteranæ tres: tironum vel luculentissima ex omnibus una: in castris Bruti una veterana legio: altera bima: octo tironum. Ita universus exercitus numero amplissimus est, firmitate exiguus. Quantum autem in acie tironi sit committendum, nimium sæpe expertum habemus. Ad hoc robur nostrorum exercituum, siue Africanus exercitus, qui est veteranus, siue Cæsaris accessisset, æquo animo summam rempub. in discrimen deduceremus. Aliquanto autem propius esse; quod ad Cæsarem attinet, videbamus. Nihil destitit eum litteris hortari; neque ille intermisit affirmare, se sine mora venire: cum interim aversum illum ab hac cogitatione, ad alia consilia video se contulisse. Ego tamen ad eum Furnium nostrum cum mandatis litterisque misi, si quid forte proficere posset. Scis tu, mi Cicero, quod ad Cæsaris amorem attinet, societatem mihi esse tecum: vel quod in familiaritate Cæsaris, vivo illo, jam tueri eum, & diligere mihi fuit necesse: vel quod ipse, quoad ego nosse potui, moderatissimi atque humanissimi fuit sensus: vel quod ex tam insigni amicitia mea, atque Cæsaris, hunc filii loco & illius, & vestro iudicio substitutum, non perinde habere mihi turpe videtur. Sed quidquid tibi scribo, dolenter mehercule magis, quam inimice facio. Quod vivit Antonius hodie, quod Lepidus una est, quod exercitus habent non contemnendos, quod sperant, quod audent, id omne Cæsari acceptum referre possunt. Neque ego superiora repetam: sed ex eo tempore, quo ipse mihi professus est se venire, si venire voluisset; aut oppressum jam bellum esset, aut in adversissimam illis Hispaniam cum detrimento eorum maximo extru-

sum. Quæ mens eum, aut quorum consilia a tanta gloria, sibi vero etiam necessaria ac salutari avocarit; & ad cogitationem consulatus bimestris, summo cum terrore hominum, & insulsa cum efflagitatione transtulerit, exputare non possum. Multum in hac re mihi videntur necessarii ejus & reipub., & ipsius causa proficere posse: plurimum, ut puto, tu quoque: cujus illè tanta merita habet, quanta nemo præter me: numquam enim obliviscar, maxima ac plurima me tibi debere. De his rebus, ut exigeret cum eo, Furnio mandavi. Quod si, quantam debeo, habuero apud eum auctoritatem, plurimum ipsum juvero. Nos interea duriori conditione bellum sustinemus: quod neque expeditissimam dimicationem putamus; neque tamen refugiendo commissuri sumus, ut majus detrimentum respub. accipere possit. Quod si aut Cæsar se respexerit, aut Africanæ legiones celeriter venerint, securos vos ab hac parte reddemus. Tu, ut instituisti, me diligas, rogo, proprieque tuum esse, tibi persuadeas. v. Kal. Sex. ex castris.

A R G U M E N T U M.

Modeste reprehendit in Furnio præproperam adipiscendæ Præturæ festinationem.

M. T. C. C. FURNIO S. D.

25

SI interest, id quod homines arbitrantur, reip. te, ut instituisti, atque fecisti, navare operam, rebusque maximis, quæ ad extinguendas reliquias belli pertinent, interesse; nihil videris melius, neque laudabilius, neque honestius facere posse: istamque operam tuam, navitatem, animum in rempub. celeritati præturæ anteponendam censeo. Nolo enim te ignorare, quantam laudem consecutus sis: mihi crede, proximam Planco, idque ipsius testimonio, præterea fama scientiaque omnium. Quamobrem, si quid operis tibi etiam
nunc

nunc restat, id maximopere censeo persequendum. Quid enim honestius? aut quid honesto anteponendum? Sin autem satisfactum reip. putas, celeriter ad comitia, quando mature futura sunt, veniendum censeo: dummodo ne quid hæc ambitiosa festinatio imminuat ejus gloriæ, quam consecuti sumus. Multi clarissimi viri, cum reip. darent operam, annum petitionis suæ non obierunt. Quod eo facilius nobis est, quod non est annus hic tibi destinatus: ut, si ædilis fuisses, post biennium tuus annus esset. Nunc nihil prætermittere videbere usitati, & quasi legitimi temporis ad petendum. Video autem, Planco consule, etsi etiam sine eo rationes expeditas haberes, tamen splendidiorem petitionem tuam fore, si modo ista ex sententia confecta essent. Omnino plura me scribere, cum tuum tantum consilium judiciumque sit, non ita necesse arbitrabar: sed tamen sententiam meam tibi ignotam esse nolebam: cujus est hæc summa, ut omnia te metiri dignitate malim, quam ambitione; majoremque fructum ponere in perpetuitate laudis, quam in celeritate præturæ. Hæc eadem locutus sum domi meæ, adhibito Quinto fratre meo, & Cæcina, & Calvisio, studiosissimis tui, cum Dardanus, libertus tuus, interesset: omnibus probari videbatur oratio mea: sed tu optime judicabis. Vale.

A R G U M E N T U M.

Scripserat Furnius, ad comitia Prætoria se venturum: Cicero dissuadet, comitiaque dilata significat.

M. T. C. FURNIO S. D.

26

LECTIS tuis litteris, quibus declarabas, aut omit- tendos Narbonenses, aut cum periculo dimicandum, illud magis timui: quod vitatum, non moleste fero. Quod de Planci, & Bruti concordia scribis, in eo vel maximam spem pono victoriæ. De Gallorum studio nos aliquando cognoscemus,

ut

ut scribis, cujus id opera maxime excitatum sit. Sed jam, mihi crede, cognovimus. Itaque jucundissimis tuis litteris stomachatus sum in extremo. Scribis enim, si in Sextilem comitia, cito te: si jam confecta, citius, ne diutius cum periculo factus sis. O mi Furni, quam tu causam tuam non nosti, qui alienas tam facile discas! Tu nunc candidatum te putas, & id cogitas, ut aut ad comitia curras: aut, si jam confecta, domi tuæ sis: scilicet ne cum maximo periculo, ut scribis, stultissimus sis. Non arbitror, te ita sentire: omnes enim tuos ad laudem impetus novi. Quod si, ut scribis, ita sentis, non magis te, quam de te iudicium reprehendo meum. Te adipiscendi magistratus levissimi & divulgatissimi, si ita adipiscare, ut plerique, præpropera festinatio abducat a tantis laudibus, quibus te omnes in cælum jure & vere ferunt? Scilicet id agitur, utrum hac petitione, an proxima prætor fias, non ut ita de repub. mereare, omni honore ut dignissimus judicare? Utrum nescis, quam alte ascenderis? an pro nihilo id putas? Si nescis, tibi ignosco: nos in culpa sumus. Sin intelligis, ulla tibi est prætura, vel officio, quod pauci, vel gloria, quam omnes sequuntur, dulcior? Hac de re & ego, & Calvisius, homo magni judicii, tuique amantissimus, te accusamus quotidie. Comitia tamen, quando ex his pendes, quantum facere possumus, quod multis de causis reipub. arbitramur conducere, in Januarium mensem protrudimus. Vince igitur, & vale.

A R G U M E N T U M.

Lepidum quasi molli brachio objurgat, quia summis honoribus a Senatu ornatus, gratiarum agendarum officium neglexerat. Tum pacem inter Antonium, & bonos cives conciliare cupientem hortatur, ne se interponat.

M. T. C. M. LEPIDO S. D.

27

QUOD mihi pro mea summa erga te benevolentia magnæ curæ est, ut quam amplissima digni-

gnitate sis, moleste tuli, te senatui gratias non egisse, cum esses ab eo ordine ornatus summis honoribus. Pacis inter cives conciliandæ te cupidum esse lætor: pacem eam si a servitute sejungis, consules & reipub., & dignitati tuæ. Sin ista pax perditum hominem in possessionem impotentissimi dominatus restitutura est; hoc animo scito esse omnes sanos, ut mortem servituti anteponant. Itaque sapientius, meo quidem iudicio, facies, si te in istam pacificationem non interpones, quæ neque senatui, neque populo, neque cuiquam bono probatur. Sed hæc audies ex aliis, aut certior fies litteris. Tu pro tua prudentia, quid optimum factu sit, videbis.

A R G U M E N T U M.

Dolet, se non fuisse participem conjurationis in Cæsarem, quia superstes Antonius perniciem Reip. molitur: deinde suum libertatis recuperandæ studium declarat.

M. T. C. C. TREBONIO S. D.

28

QUam vellem ad illas pulcherrimas epulas me Id. Mart. invitasses! reliquiarum nihil haberemus. At nunc cum his tantum negotii est, ut vestrum illud divinum in remp. beneficium nonnullam habeat querelam. Quod vero a te, viro optimo, seductus est, tuoque beneficio adhuc vivit hæc pestis; interdum, quod mihi vix fas est, tibi subirascor. Mihi enim negotii plus reliquisti uni, quam, præter me, omnibus. Ut enim primum post Antonii foedissimum discessum senatus haberi libere potuit, ad illum animum meum reverti pristinum, quem tu cum cive acerrimo, patre tuo, in ore & amore semper habuisti. Nam, cum senatum ad XIII. Kalend. Jan. tribuni pleb. vocavissent, deque alia re referrent, totam rempub. sum complexus; egique acerrime, senatumque

que jam languentem & defessum ad pristinam virtutem consuetudinemque revocavi, magis animi, quam ingenii viribus. Hic dies, meaque contentio atque actio spem primum populo Rom. attulit libertatis recuperandæ. Nec vero ipse postea tempus ullum intermisi de republ. non cogitandi solum, sed etiam agendi. Quod nisi res urbanas, actaque omnia ad te perferri arbitrarer, ipse perscriberem; quamquam eram maximis occupationibus impeditus. Sed illa cognosces ex aliis: a me pauca, & ea summatim. Habemus fortem senatum: consulares partim timidos, partim male sentientes. Magnum damnum factum est in Servio. L. Cæsar optime sentit: sed, quod avunculus est, non acerrimas dicit sententias. Consules egregii: præclarus D. Brutus: egregius puer Cæsar, de quo spero equidem reliqua. Hoc vero certum habeto, nisi ille veteranos celeriter conscripssisset, legionesque duæ de exercitu Antonii ad ejus se auctoritatem contulissent, atque is oppositus esset terror Antonio, nihil Antonium sceleris, nihil crudelitatis præteriturum fuisse. Hæc, tibi etsi audita esse arbitrabar, volui tamen notiora esse. Plura scribam, si plus otii habuero. Vale.

A R G U M E N T U M .

Scribit de suo studio erga salutem Ampii exsulantis; bonamque spem habere jubet.

M. T. C. AMPIO BALBO S. D. 29

DE meo studio erga salutem & incolumitatem tuam, credo te cognosse ex litteris tuorum, quibus me cumulatissime satisfecisse, certo scio: nec iis concedo, quamquam sunt singulari in te benevolentia, ut te salvum malint, quam ego. Illi mihi necesse est concedant, ut tibi plus, quam ipsi, hoc tempore prodesse possim: quod quidem nec destiti facere, nec desistam: & jam in maxima

ma re feci, & fundamenta jeci salutis tuæ. Tu fac, bono animo, magnoque sis, meque tibi nulla in re defuturum esse confidas. Pridie Non. Quinct. Vale.

ARGUMENTUM.

Prelium, victoriaque de Antonio relata nuntiantur.

SER. GALBA CICERONI S. D. 30

DEcimo septimo Kal. Maji, quo die Panfa in castris Hirtii erat futurus, cum quo ego eram (nam ei obviam processeram millia passuum centum, quo maturius veniret) Antonius legiones eduxit duas, secundam, & quintam trigessimam, & cohortes prætorias duas, unam suam, alteram Silani, & evocatorum partem. Ita obviam venit nobis, quod nos quatuor legiones tironum habere solum arbitrabatur. Sed noctu, quo tutius venire in castra possemus, legionem Martiam, cui ego præesse solebam, & duas cohortes prætorias miserat Hirtius nobis. Cum equites Antonii apparuissent, contineri neque legio Martia, neque cohortes prætoriarum potuerunt: quas sequi cœpitur coacti, quando eas retinere non poteramus. Antonius ad Forum Gallorum suas copias continebat, neque sciri volebat, se legiones habere: tantum equitatum & levem armaturam ostendebat. Posteaquam vidit se invito legionem ire Panfa, sequi se duas legiones jussit tironum. Posteaquam angustias paludis & silvarum transivimus, acies est instructa a nobis duodecim cohortium. Nondum venerant legiones duæ, cum repente Antonius in aciem suas copias de vico produxit, & sine mora concurrit. Primo ita pugnatum est, ut acrius non posset ex utraque parte pugnari: sed dexterius cornu, in quo ego eram cum Martiarum legionis cohortibus octo, impetu primo fugaverat legionem trigessimam quintam Antonii, ut amplius passus quingentos ultra aciem, quo loco steterat, processerit. Itaque, cum equites nostrum cornu

cir-

circuire vellent, recipere me cœpi, & levem armaturam opponere Maurorum equitibus, ne aversos nostros aggrederentur. Interim video me esse inter Antonianos, Antoniumque post me aliquanto: repente equum immisi ad eam legionem tiro-num, quæ veniebat ex castris, scuto rejecto. Antoniani me insequi: nostri pila conjicere velle. Ita nescio quo fato sum servatus, quod cito sum a nostris cognitus. In ipsa Æmilia, ubi cohors Cæsaris prætoria erat, diu pugnatum est. Cornu sinisterius, quod erat infirmius, ubi Martiæ legionis duæ cohortes erant, & cohors prætoria pedem referre cœperunt, quod ab equitatu circumibantur, quo vel plurimum valet Antonius. Cum omnes se recepissent nostri ordines, recipere me novissimus cœpi ad castra. Antonius, tamquam victor, castra putavit se posse capere. Quo cum venit, complures ibi amisit, nec egit quidquam. Audita re, Hirtius cum cohortibus viginti veteranis redeunti Antonio in sua castra occurrit, copiasque omnes ejus delevit fugavitque eodem loco, ubi erat pugnatum, ad forum Gallorum. Antonius cum equitibus hora noctis quarta se in castra sua ad Mutinam recepit. Hirtius in ea castra rediit, unde Panfa exierat, ubi duas legiones reliquerat, quæ ab Antonio erant oppugnatae. Sic partem majorem suarum copiarum Antonius amisit veteranarum: nec id tamen sine aliqua jactura cohortium prætoriarum nostrarum, & legionis Martiæ fieri potuit. Aquilæ duæ, signa sexaginta sunt relata Antonii. Res bene gesta est. Ad XII. Kal. Maji, ex castris. Vale.

A R G U M E N T U M.

Excusat se, quod studium suum erga Remp. litteris nondum declaraverit; seque libertatis recuperandæ cupidum ostendit.

C. ASINIUS POLLIO CICERONI S. D. 31

Minime mirum debet tibi videri, nihil me scripsisse de rep., posteaquam itum est ad arma.

arma. Nam saltus Castulonensis, qui semper tenuit nostros tabellarios, etsi nunc frequentioribus latrociniiis infestior factus est, tamen nequaquam tanta in mora est, quanta qui locis omnibus dispositi ab utraque parte scrutantur tabellarios, & retinent. Itaque nisi nave perlatae litterae essent, omnino nescirem, quid istic fieret. Nunc vero natus occasionem, posteaquam navigari coeptum est, cupidissime & quam creberrime potero scribam ad te. Ne movear ejus sermonibus, quem tametsi nemo est, qui videre velit, tamen nequaquam proinde, ac dignus est, ederunt homines, periculum non est: adeo est enim invisus mihi, ut nihil non acerbum putem, quod commune cum illo sit. Natura autem mea, & studia trahunt me ad pacis & libertatis cupiditatem. Itaque illud initium civilis belli saepe deflevi. Cum vero non liceret mihi nullius partis esse, quia utrobique magnos inimicos habebam; ea castra fugi, in quibus plane tutum me ab insidiis inimici sciebam non futurum: compulsus eo, quo minime volebam, ne in extremis essem, plane pericula non dubitanter adii. Caesarem vero, quod me in tanta fortuna, modo cognitum, vetustissimorum familiarium loco habuit, dilexi summa cum pietate & fide. Quae mea sententia gerere mihi licuit, ita feci, ut optimus quisque maxime probarit. Quod jussus sum, eo tempore, atque ita feci, ut appareret, invito imperatum esse. Cujus facti injustissima invidia erudire me potuit, quam jucunda libertas, & quam misera sub dominatione vita esset. Ita, si id agitur, ut rursus in potestate omnia unius sint; quicumque is est, ei me profiteor inimicum. Nec periculum est ullum, quod pro libertate aut refugiam, aut deprecor. Sed Consules neque S. C., neque litteris suis praeceperant mihi, quid facerem. Unas enim post Idus Martias demum a Pansa litteras accepi, in quibus hortatur me, ut senatui scri-

scribam, me & exercitum in potestate ejus futurum. Quod, cum Lepidus concionaretur, atque omnibus scriberet, se consentire cum Antonio, maxime contrarium fuit. Nam quibus commeatibus, invito illo, per illius provinciam legiones ducerem? aut, si cetera transiissem, num etiam Alpes poteram transvolare, quæ præsidio illius tenentur? Adde huc, quod perferri litteræ nulla conditione potuerunt. Sexcentis enim locis excutiuntur: deinde etiam retinentur a Lepido tabellarii. Illud me Cordubæ pro concione dixisse, nemo vocabit in dubium, provinciam me nulli, nisi qui a senatu missus venisset, traditurum. Nam de legione trigesima tradenda, quantas habuerim contentiones, quid ego scribam? Qua tradita, quanto pro republ. infirmior futurus fuerim, quis ignorat? Hac enim legione noli acrius aut pugnacius quidquam putare esse. Quare me eum existima esse, qui primum pacis cupidissimus sim; (omnes enim cives plane studeo esse salvos) deinde qui & me & rep. vindicare in libertatem paratus sim. Quod familiarem meum in tuorum numero habes, opinione tua mihi gratius est. Invideo illi tamen, quod ambulat, & jocatur tecum. Quæres, quanti æstimem; si umquam licuerit vivere in otio, experieris. Nullum enim vestigium abs te discessurus sum. Illud vehementer admiror, non scripsisse te mihi, manendo in provincia ne, an ducendo exercitum in Italiam, reip. magis satisfacere possim. Ego quidem, etsi mihi tutius ac minus laboriosum est manere; tamen, quia video tali tempore multo magis legionibus opus esse, quam provinciis, quæ præsertim recuperari nullo negotio possunt, constitui, ut nunc est, cum exercitu proficisci. Deinde ex litteris, quas Pansæ misi, cognosces omnia: nam earum tibi exemplar misi.

xvii. Kal. April. Cordubæ.

ARGUMENTUM.

Enumerat, quæ Balbus Quæstor suus flagitiose commiserit, quæque ipse fecerit, ad exercitum in Reip. potestate continendum.

C. ASINIUS POLLIO CICERONI S. D. 32

BAlbus Quæstor, magna numerata pecunia, magno pondere auri, majore argenti coacto de publicis exactionibus, ne stipendio quidem militibus reddito, duxit se a Gadibus: & triduum tempestate retentus ad Calpen, Kal. Jun. trajecit sese in regnum Bogudis, plane bene peculiatus. His rumoribus utrum Gades referatur, an Romam (ad singulos enim nuntios turpissime consilia mutat) nondum scio: sed, præter furta, & rapinas, & virgis cæsos socios, hæc quoque fecit, ut ipse gloriari solet, eadem, quæ C. Cæsar. Ludis, quos Gadibus fecit, Herennium Gallum histrionem, summo ludorum die annulo aureo donatum, in quatuordecim sessum deduxit: tot enim fecerat ordines equestris loci. Quatuorviratum sibi prorogavit: comitia biennii biduo habuit, hoc est, renuntiavit, quos ei visum est: exsules reduxit, non horum temporum, sed illorum, quibus a seditiosis senatus trucidatus, aut expulsus est, Sex. Varo proconsole. Illa vero jam ne Cæsaris quidem exemplo, quod ludis prætextam de suo itinere ad L. Lentulum procos. sollicitandum posuit. Et quidem, cum ageretur, flevit, memoria rerum gestarum commotus. Gladiatoribus autem Fadium quemdam, militem Pompejanum, quia, cum depressus in ludum, bis gratis depugnasset, auctorari sese volebat, & ad populum confugerat, primum Gallos equites immisit in populum: (conjecti enim sunt lapides in eum, cum arriperetur Fadius) deinde abstractum defodit in ludo, & vivum combussit: cum quidem pransus, nudis pedibus, tunica

nica soluta, manibus ad tergum rejectis, inambularet, & illi misero quiritanti, Civis Romanus sum, responderet, Abi nunc, populi fidem implora. Bestiis vero cives Rom. in his circulatorum quemdam auctiorum, notissimum hominem Hispali, quia deformis erat, objecit. Cum hujusmodi portento res mihi fuit. Sed de illo plura coram. Nunc, quod præstat, quid me velitis facere, constituite. Tres legiones firmas habeo: quarum unam vigesimam octavam, cum ad se initio belli arcessisset Antonius hac pollicitatione, quo die in castra venisset, denarios quingenos singulis militibus daturum, in victoria vero eadem præmia, quæ suis legionibus (quorum quis ullum finem, aut modum futurum putavit?) incitatissimam retinui, ægre mehercule; nec retinuissem, si uno loco habuissem, utpote cum singulæ quædam cohortes seditionem fecerint. Reliquas quoque legiones non destitit litteris atque infinitis pollicitationibus incitare. Nec vero minus Lepidus urfit me & suis, & Antonii litteris, ut legionem trigesimam mitterem sibi. Itaque, quem exercitum neque vendere ullis præmiis volui, nec eorum periculorum metu, quæ, victoribus illis, portendebantur, diminuere, debetis existimare retentum, & conservatum reip. esse; atque ita credere, quodcumque imperassetis, facturum fuisse, si quod jussistis, feci. Nam & provinciam in otio, & exercitum in mea potestate tenui: finibus meæ provinciæ nusquam excessi: militem non modo legionarium, sed ne auxilium quidem ullum quoquam misi; &, si quos equites decedentes nactus sum, supplicio affeci. Quarum rerum fructum satis magnum, repub. salva, tulisse me putabo. Sed repub. si me satis novisset, & major pars senatus, majores ex me fructus tulisset. Epistolam, quam Balbo, cum etiam nunc in provincia esset, scripsi, legendam tibi misi:

misi: etiam prætextam, si voles legere, Gallum Cornelium, familiarem meum, poscito. VI. Id. Jun. Cordubæ. Vale.

ARGUMENTUM.

Deplorat calamitatem Reip., quæ Mutinensi prælio & consules, & robur, sobolemque militum amiserat.

ASINIUS POLLIO CICERONI S. D. 33

QUO tardius certior fierem de præliis apud Mutinam factis, Lepidus effecit, qui meos tabellarios novem dies retinuit: tamen si tantam calamitatem reip. quam tardissime audire oporandum est; sed illis, qui prodesse nihil possunt, neque mederi. Atque utinam eodem S. C., quo Plancum & Lepidum in Italiam arcessistis; me quoque jussissetis venire: profecto non accepisset resp. hoc vulnus: quo si qui lætantur in præsentia, quia videntur & duces, & veterani Cæsaris partium interiisse: tamen postmodum necesse est doleant, cum vastitatem Italiæ respexerint. Nam & robur & soboles militum interiit: si quidem, quæ nuntiantur, ulla ex parte vera sunt. Neque ego non videbam, quanto usui reipub. essem futurus, si ad Lepidum venissem: omnem enim cunctationem ejus discussissem, præsertim adjutore Planco. Sed scribenti ad me ejusmodi litteras, quas leges, & concionibus, videlicet, quas Narbone habuisse dicitur, similes, palparer necesse erat, si vellem commeatum, per provinciam ejus iter faciens, habere. Præterea verebar, ne, si antequam ego incepta perficerem, prælium confectum esset, pium meum consilium raperent in contrariam partem obtrectatores mei, propter amicitiam, quæ mihi cum Antonio, non major tamen quam Planco, fuit. Itaque a Gadibus mense Aprili binos tabellarios in duas naves imposui; & tibi, & consulis, & Octaviano scripsi, ut me faceretis certior

O

rem,

rem, quonam modo plurimum possem prodesse reipub. Sed, ut rationem in eo, quo die prælium Pansa commisit, eodem a Gadibus naves profectæ sunt. Nulla enim post hiemem fuit ante eam diem navigatio. Et hercule, longe remotus ab omni suspitione futuri civilis tumultus, penitus in Lusitania legiones in hibernis collocaram. Ita porro festinavit uterque conflagrare, tamquam nihil pejus timerent, quam ne sine maximo reipub. detrimento bellum componeretur. Sed, si properandum fuit, nihil non summi ducis consilio gessisse Hirtium video. Nam hæc mihi scribuntur ex Gallia Lepidi, & nuntiantur: Pansæ exercitum concisum esse: Pansam ex vulneribus mortuum: eodem prælio Martiam legionem interiisse, & L. Fabatam, & C. Peducæum, & D. Carfulenum: Hirtiano autem prælio & quartam legionem, & omnes peræque Antonii cæsas: item Hirtii. Quartam vero, cum castra quoque Antonii cepisset, a quinta legione concisam esse. Ibi Hirtium quoque periisse, & Pontium Aquilam: dici etiam Octavianum cecidisse. Quæ si (quod Dii prohibeant) vera sunt, non mediocriter doleo: Antonium turpiter Mutinæ obsessionem reliquisse; sed habere equitatum, ac legiones sub signis armatas tres, & P. Bagien- ni unam, inermes bene multos. Ventidium quoque se cum legione septima, octava, nona com- mixisse; si nihil in Lepido spei sit, descensurum ad extrema, & non modo nationes, sed etiam servi- tia concitaturum: Parmam direptam: L. Anto- nium Alpes occupasse. Quæ si vera sunt, nemini nostrum cessandum est, neque expectandum, quid decernat senatus. Res enim cogit huic tanto in- cendio succurrere omnes, qui aut imperium, aut nomen denique populi Romani salvum esse vo- lunt. Brutum enim xvii. cohortes, & duas non frequentes tironum legiones, quas conscripserat Antonius, habere audio. Neque tamen dubito,

quin

quin omnes, qui supersint de Hirtii exercitu, confluant ad eum. Nam in delectu non multum spei puto esse; præsertim cum nihil sit periculosius, quam spatium confirmandi se se Antonio dari. Anni autem tempus libertatem majorem mihi dat, propterea quia frumenta aut in agris, aut in villis sunt. Itaque proximis litteris consilium meum expedietur. Nam neque deesse, neque superesse reipub. volo. Maxime tamen doleo, adeo & longo & infesto itinere ad me veniri, ut die quadragesimo post, aut ultra etiam, quam facta sunt, omnia nuntientur. Vale.

ARGUMENTUM.

Narrat in Antonii adventu quid egerit; & agit gratias Ciceroni, quod iniquis de se rumoribus non crediderit.

M. LEPIDUS IMP. ITERUM, PONT. MAX.

CICERONI S. D.

34

SI vales, bene est: ego quoque valeo. Cum audissem, Antonium cum suis copiis, præmisso L. Antonio cum parte equitatus, in provinciam meam venire: cum exercitu meo a confluyente Rhodano castra movi, ac contra eos venire institui. Itaque continuis itineribus ad Forum Vocontium veni, & ultra castra ad flumen Argenteum contra Antonios feci. P. Ventidius suas legiones tres conjunxit cum eo, & ultra me castra posuit. Habebat antea legionem secundam, & ex reliquis legionibus magnam multitudinem, sed inermium. Equitatum habet magnum; nam omnis ex prælio integer discessit, ita ut sint amplius equitum xxx. Itaque ad me complures milites, & equites ab eo transierunt, & in dies singulos ejus copię minuuntur. Silanus & Culeo ab eo discesserunt. Nos, etsi graviter ab his læsi eramus, quod contra nostram voluntatem ad Anto-

nium ierant; tamen, nostræ humanitatis & necessitudinis causa, eorum salutis rationem habuimus. Nec tamen eorum opera utimur, neque in castris habemus, neque ulli negotio præfecimus. Quod ad bellum hoc attinet, nec senatui, nec reip. deerimus: quæ postea egerimus, faciam te certiore. Etsi omni tempore summa studia officii mutuo inter nos certatim constiterunt pro nostra inter nos familiaritate, & proinde diligenter ab utroque conservata sunt: tamen non dubito, in tanto & tam repentino motu reip., quin nonnulla de me falsis rumoribus a meis obrectatoribus, me indigna, ad te delata sint, quæ tuum animum magnopere moverent, pro tuo amore in remp. Ea te moderate accepisse, neque temere credendum iudicasse, a meis procuratoribus certior sum factus: quæ mihi, ut debent, gratissima sunt. Memini autem & illa superiora, quæ abs tua voluntate profecta sunt ad meam dignitatem augendam, & ornandam: quæ perpetuo animo meo fixa manebunt. Abs te, mi Cicerô, magnopere peto, si meam vitam & studium, diligentissime superioribus temporibus in rep. administranda, quæ Lepido digna sunt, perspecta habes, ut paria, aut eo ampliora reliquo tempore expectes: & proinde tua auctoritate me tuendum existimes, quo tibi plura tuo merito debeo. Vale, XII. Kalend. Jun. ex castris, ex Ponte Argenteo.

A R G U M E N T U M.

Antonii recepti causam confert in milites suos, dissensionem civium inique ferentes.

M. LEPIDUS IMP. ITERUM, PONT. MAX.

S. P. PL. Q. R. S. D.

35

SI vos, liberique vestri valetis, bene est, ego quidem valeo. Deos, hominesque testor, P. C.,
qua

qua mente, & quo animo semper in rep. fuerim, & quam nihil antiquius communi salute, ac libertate judicarem: quod vobis brevi probassem, nisi mihi fortuna proprium consilium extorisset. Nam exercitus cunctus consuetudinem suam in civibus conservandis, communique pace, seditione facta, retinuit: meque tantæ multitudinis civium Romanorum salutis, atque incolumitatis causam suscipere, ut vere dicam, coegit. In qua re ego vos, P. C., oro atque obsecro, ut privatis offensionibus omissis, summæ reipubl. consulatis, neve misericordiam nostram, exercitusque nostri in civili dissensione sceleris loco ponatis. Quod si salutis omnium, ac dignitatis rationem habueritis, melius & vobis, & reip. consulatis. Data IV. Kal. Jun. a Ponte Argenteo. Valete.

LIBER XI.

ARGUMENTUM.

D. Brutus M. Bruto, & C. Cassio, quibuscum Cæsarem occiderat, sermonem cum Hirtio habitum exponit, postulatamque a se liberam legationem significat.

D. BRUTUS M. BRUTO, ET C. CASSIO S. D. I

QUO in statu simus, cognoscite. Heri vesperi apud me Hirtius fuit: qua mente esset Antonius, demonstravit; pessima scilicet, & infidelissima. Nam se neque mihi provinciam dare posse, ajebat, neque arbitrari tuto in urbe esse quemquam nostrum: adeo esse militum concitatos animos, & plebis. Quod utrumque esse falsum, puto vos animadvertere; atque illud esse verum, quod Hirtius demonstrabat; timere eum, ne si mediocre auxilium dignitatis nostræ habuissimus, nullæ partes iis in rep. relinquerentur. Cum in his an-

gustiis versarer, placitum est mihi, ut postularem legationem liberam mihi, reliquisque nostris, ut aliqua causa proficiscendi honesta quæreretur. Hoc se impetraturum pollicitus est: nec tamen impetraturum confido: tanta est hominum insolentia, & nostri insectatio. Ac si dederint, quod petimus, tamen paullo post futurum puto, ut hostes judicemur, aut aqua & igni nobis interdicatur. Quid ergo est, inquis, tui consilii? Dandus est locus fortunæ: cedendum ex Italia, migrandum Rhodum, aut aliquo terrarum arbitror. Si melior casus fuerit, revertemur Romam; si mediocris, in exilio vivemus; si pessimus, ad novissima auxilia descendemus. Succurret fortasse hoc loco alicui vestrum, cur novissimum tempus exspectemus potius, quam nunc aliquid moliamur? Quia, ubi consistamus, non habemus, præter Sex. Pompejum, & Bassum Cæcilium: qui mihi videntur, hoc nuntio de Cæsare allato, firmiores futuri. Satis in tempore ad eos accedemus, ubi, quid valeant, scierimus. Pro Cassio, & te, si quid velitis me recipere, recipiam. Postulat enim hoc Hirtius, ut faciam. Rogo vos, quamprimum mihi rescribatis: nam non dubito, quin de his rebus ante horam quartam Hirtius me certiore sit facturus: quem in locum convenire possimus, quo me velitis venire, rescribite. Post novissimum Hirtii sermonem, placitum est mihi postulare, ut liceret nobis esse Romæ publico præsidio; quod illos nobis concessuros non puto: magnam enim invidiam iis faceremus. Nihil tamen non postulandum putavi, quod æquum esse statuerem. Valete.

A R G U M E N T U M.

Petunt ab Antonio, an putet ipsos in Urbe, magna veteranorum militum frequentia, tutos fore.

M. BRUTUS, ET C. CASSIUS PRÆT.

M. ANTONIO COS. S. D.

2

DE tua fide & benevolentia in nos, nisi persuasum esset nobis, non conscripsissemus hæc tibi:

tibi : quæ profecto , quando istum animum habes , in optimam partem accipies . Scribitur nobis , magnam veteranorum multitudinem Romam convenisse jam , & ad Kal. Jun. futuram multo majorem . De te si dubitemus , aut vereamur , simus nostri dissimiles . Sed certe , cum ipsi in tua potestate fuerimus , tuoque adducti consilio dimiserimus ex municipiis nostros necessarios ; neque solum edicto , sed etiam litteris id fecerimus : digni sumus , quos habeas tui consilii participes , in ea præsertim re , quæ ad nos pertinet . Quare petimus a te , facias nos certiores tuæ voluntatis in nos ; putetne , nos tutos fore in tanta frequentia veteranorum , quos etiam de reponenda ara cogitare audimus : quod velle te , probare vix quicumquam posse videtur , qui nos salvos & honestos velit . Nos ab initio spectasse otium , nec quidquam aliud a libertate communi quæsisse , exitus declarat . Fallere nemo nos potest , nisi tu : quod certe abest a virtute tua & fide : sed alius nemo facultatem habet decipiendi nos : tibi enim uni credidimus , & credituri sumus . Maximo de nobis timore afficiuntur amici nostri : quibus etsi tua fides explorata est , tamen illud in mentem venit , multitudinem veteranorum facilius impelli ab alio quolibet , quam a te retineri posse . Rescribas nobis ad omnia , rogamus . Nam illud valde leve est , ac nugatorium , eâ re denuntiaturum esse veteranis , quod de commodis eorum mense Junio laturus esses . Quem enim impedimento futurum putas , cum de nobis certum sit , nos quieturos ? Non debemus cuiquam videri nimium vitæ cupidi , cum accidere nobis nihil possit sine pernicie & confusione omnium rerum . Vale .

ARGUMENTUM.

Expostulatio ad contumeliosas, & minaces Antonii litteras.

BRUTUS, ET CASSIUS PRÆT.

ANTONIO COS. S. D.

3

Litteras tuas legimus, simillimas edicti tui, contumeliosas, minaces, minime dignas, quæ a te nobis mitterentur. Nos, Antoni, te nulla laceffivimus injuria: neque miraturum credidimus, si prætores, & ea dignitate homines, aliquid edicto postulassemus a consule. Quod si indignaris, ausos esse id facere, concede nobis, ut doleamus, ne hoc quidem abs te Bruto, & Cassio tribui. Nam de delectibus habitis, & pecuniis imperatis, exercitibus sollicitatis, & nuntiis trans mare missis, quod te questum esse negas, nos quidem tibi credimus, optimo animo te fecisse: sed tamen neque agnoscimus quidquam eorum; & te miramur, cum hæc reticueris, non potuisse continere iracundiam tuam, quin nobis de morte Cæsaris objiceres. Illud vero quemadmodum ferendum sit, tute cogita; non licere prætoribus, concordiae ac libertatis causa per edictum de suo jure decedere, quin consul arma minetur. Quorum fiducia, nihil est, quod nos terreas. Neque enim decet, aut convenit nobis, periculo ulli summittere animum nostrum. Neque est Antonio postulandum, ut iis imperet, quorum opera liber est. Nos si alia hortarentur, ut bellum civile suscitare vellemus, litteræ tuæ nihil proficerent. Nulla enim minantis auctoritas apud liberos est. Sed pulchre intelligis, non posse nos quoquam impelli: & fortassis ea re minaciter agis, ut judicium nostrum metus videatur. Nos in hac sententia sumus, ut te cupiamus etiam in libera repub. magnum atque honestum esse; vocemus te
ad

ad nullas inimicitias; sed tamen pluris nostram libertatem, quam tuam amicitiam æstimemus. Tu etiam atque etiam vide, quid suscipias, quid sustinere possis: neque quam diu vixerit Cæsar, sed quam non diu regnarit, fac cogites. Deos quæsumus, consilia tua reipubl. salutaria sint, ac tibi: sin minus, ut salva atque honesta republica, tibi quamminimum noceant, optamus. Pri-
die Non. Sex.

ARGUMENTUM.

Res a se gestas exponit, pro quibus rogat Ciceronem, ut sibi sua sententia supplicationem decernat.

D. BRUTUS IMP. COS. DES. CICERONI S. D. 4

SI de tua in me voluntate dubitarem, multis a te verbis peterem, ut dignitatem meam tuerere: sed profecto est ita, ut mihi persuasi, me tibi esse curæ. Progressus sum ad Inalpinos cum exercitu, non tam nomen captans imperatorium, quam cupiens militibus satisfacere, firmosque eos, ad tuendas nostras res, efficere: quod mihi videor consecutus. Nam & liberalitatem nostram, & animum sunt experti. Cum omnium bellicosissimis bellum gessi: multa castella cepi, multa vastavi: non sine causa ad senatum litteras misi. Adjuva nos tua sententia: quod cum facies, ex magna parte communi commodo inservieris. Vale.

ARGUMENTUM.

Excusat se, quod Bruti litteris non responderit; hortatur ad libertatem recuperandam: sua studia officiaque pollicetur.

M. T. C. BRUTO IMP. S. D.

5

LUpus, familiaris noster, cum a te venisset, cumque Romæ quosdam dies commoraretur:

O v

ego

ego eram in iis locis, in quibus maxime me tuto esse arbitrabar. Eo factum est, ut ad te Lupus sine meis litteris rediret, cum tamen curasset tuas ad me perferendas. Romam autem veni ad v. Id. Dec., nec habui quidquam antiquius, quam ut Pantam statim convenirem: ex quo ea de te cognovi, quæ maxime optabam. Quare hortatione tu quidem non eges, si ne illa quidem in re, quæ a te gesta est post hominum memoriam maxima, hortatorem desiderasti. Illud tamen breviter significandum videtur, populum Rom. omnia a te exspectare, atque in te aliquando recuperandæ libertatis omnem spem ponere. Tu, si dies noctesque memineris, quod te facere certo scio, quantam rem gesseris, non obliviscere profecto, quantæ tibi etiam nunc gerendæ sint. Si enim iste provinciam nactus erit, cui quidem ego semper amicus fui, antequam illum intellexi non modo aperte, sed etiam libenter cum repub. bellum gerere: spem reliquam nullam video salutis. Quamobrem te obsecro iisdem precibus, quibus senatus, populusque Rom., ut in perpetuum Rempublicam dominatu regio liberes: ut principiis consentiant exitus. Tuum est hoc munus, tuæ partes: a te hoc civitas, vel omnes potius gentes non exspectant solum, sed etiam postulant. Quamquam, cum hortatione non egeas, ut supra scripsi, non utar ea pluribus verbis: faciam illud, quod meum est, ut tibi omnia mea officia, studia, curas, cogitationes pollicear, quæ ad tuam laudem & gloriâ pertinebunt. Quamobrem velim tibi ita persuadeas, me cum reipublicæ causâ, quæ mihi vita mea carior est; tum quod tibi ipsi faveam, tuamque dignitatem amplificari velim, tuis optimis consiliis, amplitudini, gloriæ nullo loco defuturum. Vale.

ARGUMENTUM.

Suam dignitatem Brutus commendaverat : respondet Cicero , sibi eam etiam atque etiam curae fore ; idque jam in Senatu declaratur .

M. T. C. BRUTO IMP. S. D.

6

LUpus noster cum Romam sexto die Mutina venisset, postridie me mane convenit, tuaque mihi mandata diligentissime exposuit, & litteras reddidit. Quod mihi tuam dignitatem commendas, eodem tempore existimo, te mihi meam dignitatem commendare: quam mehercule non habeo tua cariorum. Quare mihi gratissimum facies, si exploratum habebis, tuis laudibus nullo loco nec consilium, nec studium meum defuturum. Cum tribuni pleb. edixissent, senatus adesset ad XIII. Kalend. Jan., haberentque in animo de praesidio consulum des. referre: quamquam statueram in senatum ante Kalend. Jan. non venire; tamen, cum eo die ipso edictum tuum propositum esset, nefas esse duxi, aut ita haberi senatum, ut de tuis divinis in rempublicam meritis sileretur; quod factum esset, nisi ego venissem; aut etiam, si quid honorifice de te diceretur, me non adesse. Itaque in senatum veni mane: quod cum esset animadversum, frequentissimi senatores conveniunt. Quae de te in senatu egerim, quae in concione maxima dixerim, aliorum te litteris malo cognoscere. Illud tibi persuadeas velim, me omnia, quae ad tuam dignitatem augendam pertinebunt, quae est per se amplissima, summo semper studio suscepturum, & defensurum. Quod quamquam intelligo me cum multis esse facturum, tamen appetam hujus rei principatum. Vale.

A R G U M E N T U M .

Hortatur Brutum , ne in salute populi Rom. conservanda Senatus auctoritatem expectet , sed voluntatem Senatus pro auctoritate habeat .

M. T. C. D. BRUTO IMP. S. D. 7

CUM adhibuisset domi meæ Lupus me, & Libonem, & Servium, consobrinum tuum, quæ mea fuerit sententia, cognosse te ex C. Sejo arbitror, qui nostro sermoni interfuit. Reliqua, quamquam statim Sejum Græcejus est subsequutus, tamen ex Græcejo poteris cognoscere. Caput autem est hoc, quod te diligentissime percipere, & meminisse velim, ut ne in libertate & salute pop. Rom. conservanda auctoritatem senatus expectes nondum liberi: ne & tuum factum condemnes (nullo enim publico consilio rempub. liberaſti: quo est etiam res illa major & clarior) & adolescentem, vel puerum potius Cæsarem judices temere fecisse, qui tantam causam publicam privato consilio suscepit: denique homines rusticos, sed fortissimos viros, civesque optimos dementes fuisse judices, primum milites veteranos, commilitones tuos, deinde legionem Martiam, legionem quartam; quæ suum consulem hostem judicaverunt, seque ad salutem reip. defendendam contulerunt. Voluntas senatus pro auctoritate haberi debet, cum auctoritas impeditur meru. Postremo suscepta tibi causa jam bis est, ut non sit integrum: primum Idib. Mart., deinde proxime, exercitu novo, & copiis comparatis. Quamobrem ad omnia ita paratus, atque animatus esse debes, non ut nihil facias, nisi jussus; sed ut ea geras, quæ ab omnibus summa cum admiratione laudentur. Vale.

ARGUMENTUM.

Scribit de legatis ad Antonium de pace missis, quæque sit omnium de Bruto exspectatio, consensioque ad libertatem recuperandam.

M. T. C. D. BRUTO IMP. S. D. 8

EO tempore Polla tua misit, ut ad te, si quid vellem, darem litterarum, cum, quid scriberem, non habebam. Omnia enim erant suspensa propter exspectationem legatorum: qui quid egissent, nihil dum nuntiabatur. Hæc tamen scribenda existimavi: primum senatum populumque Rom. de te laborare, non solum salutis suæ causæ, sed etiam dignitatis tuæ: admirabilis est enim quædam tui nominis caritas, amorque in te singularis omnium civium. Ita enim sperant, atque confidunt, ut antea Rege, sic hoc tempore regno te rempub. liberaturum. Romæ delectus habetur, totaque Italia: si hic delectus appellandus est, cum ultro se offerunt omnes: tantus ardor animos hominum occupavit desiderio libertatis, odioque diutinæ servitutis. De reliquis rebus a te jam exspectare litteras debemus, quid ipse agas, quid noster Hirtius, quid Cæsar meus, quos spero brevi tempore societate victoriæ tecum copulatos fore. Reliquum est, ut de me id scribam, quod te ex tuorum litteris & spero & malo cognoscere; me neque deesse ulla in re, neque umquam defuturum dignitati tuæ. Fac valeas.

ARGUMENTUM.

Rogat Ciceronem, prospiciat, ne atroque Consule ad Mutinam occiso, hostes Reip. convalescant; monetque, quid agendum.

D. BRUTUS CICERONI S. D. 9

Pansa amisso, quantum detrimenti resp. accepit, non te præterit: nunc auctoritate & pru-

prudencia tua prospicias oportet, ne inimici nostri, consulibus sublati, sperent se convalescere posse. Ego, ne consistere possit in Italia Antonius, dabo operam: sequar eum confestim: utrumque me præstaturum spero, ne aut Ventidius elabatur, aut Antonius in Italia moretur. In primis rogo te, ad hominem ventosissimum Lepidum mittas, ne nobis bellum redintegrare possit, Antonio sibi conjuncto. Nam de Pollione Asinio, puto te perspicere, quid sit factururus: multæ, & bonæ, & firmæ sunt legiones Lepidi, & Asinii. Neque hæc idcirco tibi scribo, quod te non eadem animadvertere sciam; sed quod mihi persuasissimum est, Lepidum recte facturum numquam, si forte vobis id de hoc dubium est. Plancum quoque confirmetis, oro: quem spero pulso Antonio, reipub. non defuturum. Si se Alpes Antonius trajecerit, constitui præsidium in Alpibus collocare, & te de omni re facere certiore. iv. Kalend. Maji, ex castris, Rhegii.

A R G U M E N T U M.

Queritur de quorundam malevolentia, & Reip. periculum exponit.

D. BRUTUS. CICERONI S. D. IO

Non mihi rempublicam plus debere arbitror, quam me tibi: gratiorem me esse in te posse, quam isti perversi sint in me, exploratum habes: si tamen hæc temporis videantur dici causa, malle me tuum judicium, quam ex altera parte omnium istorum. Tu enim a certo sensu, & vero judicas de nobis: quod isti ne faciant, summa malevolentia & livore impediuntur. Interpellent me, quominus honoratus sim, dum ne interpellent, quominus respub. a me commodè administrari possit. Quæ quāto sit in periculo, quam potero brevissime exponam. Primum omnium, quan-

quantam perturbationem rerum urbanarum afferat obitus consulum, quantamque cupiditatem hominibus injiciat vacuitas, non te fugit. Satis me multa scripsisse, quæ litteris commendari possint, arbitror. Scio enim cui scribam. Revertor nunc ad Antonium, qui ex fuga cum parvulam manum peditum haberet inermium, ergastula solvendo, omneque genus hominum arripiendo, satis magnū numerum videtur effecisse. Huc accessit manus Ventidii, quæ trans Apenninum itinere facto difficillimo ad Vada pervenit, atque se ibi cum Antonio conjunxit. Est numerus veteranorum, & armatorum satis frequens cum Ventidio. Consilia Antonii hæc sint necesse est: aut ad Lepidum ut se conferat, si recipitur; aut Apennino, Alpibusque se teneat, & decursionibus per equites, quos habet multos, vastet ea loca, in quæ incurrerit; aut rursus se in Etruriam referat; quod ea pars Italiæ sine exercitu est. Quod si me Cæsar audisset, atque Apenninum transisset, in tantas angustias Antonium compulisset, ut inopia potius, quam ferro conficeretur. Sed neque Cæsari imperari potest, nec Cæsar exercitui suo: quod utrumque pessimum est. Cum hæc talia sint, quominus, quod ad me pertinebit, homines interpellent, ut supra scripsi, non impedio. Hæc quemadmodum explicari possint, aut, a te cum explicabuntur, ne impediantur, timeo. Alere jam milites non possum. Cum ad rempublicam liberandam accessi, H-S mihi fuit pecuniæ CD amplius. Tantum abest, ut meæ rei familiaris liberum sit quidquam, ut meos jam omnes amicos ære alieno obstrinxerim. Septenum numerum legionum alo: qua difficultate, tu arbitrare. Non, si Varronis thesauros haberem, sustinere sumptus possem. Cum primum de Antonio exploratum habuero, faciam te certiores. Tu me amabis ita, si hoc idem me in te facere senseris.

III. Non. Maji, ex castris, Dertona. Vale.

A R G U M E N T U M .

Scribit de Antonii profectioe ad Lepidum, & de dubia Planci fide, suoque in Remp. studio, atque constantia.

D. BRUTUS IMP. COS. DES.

CICERONI S. D.

II

Eodem exemplo litteræ tuæ a te mihi redditæ sunt, quo pueri mei attulerunt. Tantum me tibi debere existimo, quantum persolvere difficile est. Scripsi tibi, quæ hic gererentur: in itinere est Antonius: ad Lepidum proficiscitur: ne de Planco quidem spem adhuc abiecit, ut ex libellis ejus animadverti, qui in me inciderunt. In quibus, quos ad Asinium, quos ad Lepidum, quos ad Plancum mitteret, scribebat. Ego tamen non habui ambiguum; & statim ad Plancum misi: & bi-duo ab Allobrogibus, & totius Galliæ legatos expecto, quos confirmatos domum remittam. Tu, quæ istic opus erunt administrari, prospicies, ut ex tua voluntate, rei que publicæ commodo fiant. Malevolentia hominum in me, si poteris, occurre: si non poteris, hoc te consolabere, quod me de statu meo nullis contumeliis deterrire possunt. Pri-die Non. Maji, ex castris, finibus Statiellensium.

A R G U M E N T U M .

Queritur, bellum ab Antonio renovatum: & in eo Bruti culpam videtur agnoscere.

M. T. C. BRUTO IMP. COS. DES. S. D. 12

TRes uno die a te accepi epistolas; unam brevem, quam Flacco Volumnio dederas; duas pleniores: quarum alteram tabellarius T. Vibii attulit; alteram ad me misit Lupus. Ex tuis litteris, & ex Græceji oratione, non modo non restinctum bellum, sed etiam inflammatum videtur. Non du-
bito

bito autem pro tua singulari prudentia, quin perspicias, si aliquid firmitatis nactus sit Antonius, omnia illa tua præclara in rempubl. merita ad nihilum esse ventura. Ita enim Romam erat nuntiatum, ita persuasum omnibus, cum paucis inermibus, perterritis metu, fracto animo fugisse Antonium. Qui si ita se habet, ut, quemadmodum audiebam de Græcejo, configi cum eo sine periculo non possit, non ille mihi fugisse a Mutina videtur, sed locum belli gerendi mutasse. Itaque homines alii facti sunt: nonnulli etiam queruntur, quod persecuti non sitis: opprimi potuisse, si celeritas adhibita esset, existimant. Omnino est hoc populi, maximeque nostri, in eo potissimum abuti libertate, per quem eam consecutus sit. Sed tamen providendum est, ne qua iusta querela esse possit. Res sic se habet. Is bellum confecerit, qui Antonium oppresserit. Hoc quam habeat vim, te existimare malo, quam me apertius scribere. Vale.

A R G U M E N T U M.

Excusat tarditatem suam in Antonio persequendo, & quo res in statu sit, exponit.

BRUTUS IMP. COS. DES. CICERONI S. D. 13

JAm non ago tibi gratias; cui enim re vix referre possum, huic verbis non patitur res satisfieri. Attendere te volo, quæ in manibus sunt. Qua enim prudentia es, nihil te fugiet, si meas litteras diligenter legeris. Sequi confestim Antonium his de causis, Cicero, non potui: eram sine equitibus, sine jumentis: Hirtium periisse nesciebam: Cæsari non credebam prius, quam convenissem, & collocutus essem. Hic dies hoc modo abiit. Postridie mane a Pansa sum arcessitus Bononiam. Cum in itinere essem, nuntiatum mihi est, eum mortuum esse. Recurri ad meas copias: sic enim vere eas appellare possum. Sunt extenuatissimæ,

&

& inopia omnium rerum pessime accepta. Biduo me Antonius antecessit; itinere multo majore fugiens, quam ego sequens. Ille enim iit passim; ego ordinatim. Quacumque ivit, ergastula solvit, homines arripuit: constitit nusquam prius, quam ad Vada venit; quem locum volo tibi esse notum. Jacet inter Apenninum, & Alpes, impeditiſſimus ad iter faciendum. Cum abessem ab eo millia passuum triginta, & se jam Ventidio conjunxisset; concio ejus ad me est allata: in qua petere cœpit a militibus, ut se trans Alpes sequerentur: sibi cum M. Lepido convenire. Succlamatum est, & frequenter a militibus Ventidianis (nam suos valde quam paucos habet) sibi aut in Italia pereundum esse, aut vincendum. Etiam orare cœperunt, ut Pollentiam iter facerent. Cum sustinere eos non posset, in posterum diem iter suum contulit. Hac re mihi nuntiata, statim quinque cohortes Pollentiam præmisi, meumque iter eo contuli. Hora ante præsidium meum Pollentiam venit, quam Trebellius cum equitibus: sane quam sum gavisus: in hoc enim victoriam puto consistere. In spem venerant, quod neque Planci quatuor legiones omnibus suis copiis pares arbitrabantur: neque ex Italia tam celeriter exercitum trajici posse credebant: quos ipsi adhuc satis arroganter Allobroges, equitatusque omnis, qui eo præmissus erat a nobis, sustinebant: nostroque adventu sustineri facilius posse confidimus. Tamen, si quod etiam casu Isaram se trajecerint, ne quid detrimenti reip. injungant, summa a nobis dabitur opera. Vos magnum animum, optimamque spem de summa repub. habere volumus, cum & nos, & exercitus nostros, singulari concordia conjunctos, ad omnia pro vobis videatis paratos. Sed tamen nihil de diligentia remittere debetis, dareque operam, ut quam paratissimi ab exercitu reliquisque rebus pro vestra salute contra sceleratissimam

nam conspirationem hostium configamus : qui quidem eas copias , quas diu simulatione reipub. comparabant , subito ad patriæ periculum converterunt .

ARGUMENTUM .

Ad Bruti litteras respondet de Octaviano ornando , de legionibus ad Brutum perducendis , de pecunia , aliisque rebus .

M. T. C. BRUTO IMP. S. D.

14

Mirabiliter mi Brute , lætor , mea consilia , measque sententias a te probari de Decemviris , de ornando adolescente . Sed quid refert ? mihi crede homini non glorioso : plane jam , Brute , frigeo : ὀψωνος enim erat meum senatus : id jam est dissolutum . Tantam spem attulerat exploratæ victoriæ tua præclara Murina eruptio , fuga Antonii , conciso exercitu , ut omnium animi relaxari sint ; meæque illæ vehementes contentiones , tamquam σιναμαχίαι , esse videantur . Sed , ut ad rem redeam , legionem Martiam & quartam negant , qui illas norunt , ulla conditione ad te posse perducī . Pecuniæ , quam desideras , ratio potest haberi , eaque habebitur . De Bruto arcessendo , Cæsareque ad Italiæ præsidium tenendo , valde tibi assentior . Sed , ut scribis , habes obrectatores ; quos equidem facillime sustineo : sed impediunt tamen . Ex Africa legiones expectantur . Sed bellum istuc renatum homines mirantur . Nihil tam præter spem umquam . Nam , die tuo natali victoriæ nuntiata , in multa sæcula videbamus remp. liberatam . Novi timores retextunt superiora . Scripsisti autem ad me iis , quas Idibus Maji dedisti , modo te accepisse a Planco litteras , non recipi a Lepido Antonium . Id si ita est , omnia faciliora : sin aliter , magnum negotium : : cujus exitum ne extimescam , tuæ

par-

partes sunt. Ego plus, quam feci, facere non possum. Te tamen, id quod spero, omnium maximum & clarissimum videre cupio. Vale.

A R G U M E N T U M.

Laudat officium & diligentiam Bruti: voluptatem letitiamque omnium significat ex Bruti, Planctique conjunctione; eumque hortatur, ut in tuenda Repub. seipsum vincat.

M. T. C. BRUTO IMP. S. D. 15

ET si mihi tuæ litteræ jucundissimæ sunt, tamen jucundius fuit, quod in summa occupatione tua Planco collegæ mandasti, ut te mihi per litteras excusaret; quod fecit ille diligenter: mihi autem nihil amabilius officio tuo, & diligentia. Conjunctio tua cum collega, concordiaque vestra, quæ litteris communibus declarata est, senatui populoque Rom. gratissima accidit. Quod superest, perge, mi Brute: & jam non cum aliis, sed tecum ipse certa. Plura scribere non debeo, præsertim ad te: quo magistro brevitatis uti cogito. Litteras tuas vehementer exspecto, & quidem tales, quales maxime opto.

A R G U M E N T U M.

Commendat L. Ælium Lamiam in petitione Praturæ.

M. T. C. BRUTO IMP. S. D. 16

PERMagni interest, quo tibi hæc tempore epistola reddita sit; utrum, cum sollicitudinis aliquid haberes, an, cum ab omni molestia vacuus esses. Itaque ei præcepi, quem ad te misi, ut, tempus observaret epistolæ tibi reddendæ. Nam quemadmodum coram, qui ad nos intempestive adeunt, molesti sæpe sunt: sic epistolæ offendunt, non loco redditæ. Si autem, ut spero, nihil te perturbat, nihil impedit, & ille, cui

cui mandavi, satis scite, & commode tempus ad te cepit adeundi: confido me, quod velim, a te facile impetraturum. L. Lamia præturam petit: hoc ego utor uno omnium plurimum: Magna vetustas, magna consuetudo intercedit: quodque plurimum valet, nihil mihi ejus est familiaritate jucundius. Magno præterea beneficio ejus, magnoque merito sum obligatus. Nam Clodianis temporibus, cum equestris ordinis princeps esset, proque mea salute acerrime propugnaret, a Gabinio Cos. relegatus est: quod ante id tempus civi Romano Romæ contigit nemini. Hoc cum pop. Rom. meminerit, me ipsum non meminisse, turpissimum est. Quapropter persuade tibi, mi Brute, me petere præturam. Quamquam enim Lamia summo splendore, summa gratia est, usus magnificentissimo munere ædilitio: tamen, quasi ea ita non essent, ego suscepi totum negotium. Nunc, si me tanti facis, quanti certe facis, quando equitum centurias tenes, in quibus regnas, mitte ad Lupum nostrum, ut is nobis eas centurias conficiat. Non tenebo te pluribus: ponam in extremo, quod sentio. Nihil est, Brute, cum omnia a te expectem, quod mihi gratius facere possis. Vale.

ARGUMENTUM.

Commendat eundem Lamiam.

M. T. C. BRUTO IMP. S. D. 17

Lamia uno omnium familiarissime utor. Magna ejus in me, non dico officia, sed merita, eaque sunt populo Rom. notissima. Is, magnificentissimo munere ædilitatis perfunctus, petit præturam: omnesque intelligunt, nec dignitatem ei deesse, nec gratiam. Sed is ambitus exstare videtur, ut ego omnia pertimescam, totamque petitionem Lamiæ mihi sustinendam putem.

tem. In ea re quantum me possis adjuvare, facile perspicio: nec vero, quantum mea causa velis, dubito. Velim igitur, mi Brute, tibi persuadeas, nihil me majore studio a te petere, nihil te mihi gratius facere posse, quam si omnibus tuis opibus, omni studio Lamiam in petitione juveris. Quod ut facias, vehementer te rogo.

ARGUMENTUM.

Reprehendit in Bruto nonnullam timoris significationem.

M. T. C. BRUTO IMP. S. D. 18

ET si ex mandatis, quæ Galbæ, Volumnioque ad senatum dedisti, quid timendum, suspicandumque putares, suspicabamur: tamen timidiora mandata videbantur, quam erat dignum tua populi que Rom. victoria. Senatus autem, mi Brute, fortis est, & habet fortes duces. Itaque moleste ferebat, se a te, quem omnium, quicumque fuissent, fortissimum judicaret, timidum atque ignavum judicari. Etenim cum, te incluso, spem maximam omnes habuissent in tua virtute, florente Antonio; quis erat, qui quidquam timeret, profligato illo, te liberato? Nec vero Lepidum timebamus. Quis enim esset, qui illum tam furiosum arbitraretur, ut, qui in maximo bello pacem velle se dixisset, is in optatissima pace bellum reipub. indiceret? Nec dubito, quin tu plus provideas. Sed tamen, tam recenti gratulatione, quam tuo nomine ad omnia deorum templa fecimus, renovatio timoris magnam molestiam afferebat. Quare velim equidem, id quod spero, ut plane abjectus & fractus sit Antonius. Sin aliquid virium forte collegerit, sentiet nec senatui consilium, nec Pop. Rom. virtutem deesse, nec reipub. te vivo, imperatorem. XIV. Kal. Jun. Vale.

ARGUMENTUM.

Timere se scribit Reip. vicem, & Vicetinos commendat.

D. BRUTUS CICERONI S. D. 19

AD senatum quas litteras misi, velim prius perlegas: & si qua tibi videbuntur, commutes. Necessario me scripsisse, ipse animadvertes: nam cum putarem quartam, & Martiam legiones mecum futuras, ut Druso, Paulloque placuerat, vobis assentientibus, minus de reliquis rebus laborandum existimavi. Nunc vero cum sim cum tironibus egentissimis, valde & meam & vestram vicem timeam, necesse est. Vicetini me, & M. Brutum præcipue observant. His ne quam patiari injuriam fieri in senatu vernarum causa, a te peto. Causam habent optimam, officium in rempub. summum, genus hominum adversariorum seditiosum & inertissimum. XII. Kal. Jun. Vercellis.

ARGUMENTUM.

Timere se ait Ciceronis causa: eumque monet, ut veteranorum animos sibi conciliet.

BRUTUS IMP. CICERONI S. D. 20

QUOD pro me non facio, id pro te facere meus in te amor, tuaque officia cogunt, ut timeam. Sæpe enim mihi cum esset dictum, neque a me contemptum, novissime Labeo Segulius, homo sui simillimus, narravit mihi, apud Cæsarem se fuisse, multumque sermonem de te habitum, esse: ipsum Cæsarem nihil sane de te questum, nisi dictum, quod diceret, te dixisse, laudandum adolescentem, ornandum, tollendum; se non esse commissurum, ut tolli possit. Hoc ego Labeonem credo illi retulisse, aut finxisse dictum, non ab adolescente prolatum. Veteranos

vero

vero pessime loqui, volebat Labeo me credere, & tibi ab iis instare periculum: maximeque indignari, quod in x. viris neque Cæsar, neque ego habitus essemus: atque omnia ad vestrum arbitrium essent collata. Hæc cum audissem, & jam in itinere essem, committendum non putavi, prius ut Alpes transgrederer, quam, quid istuc ageretur, scirem. Nam de tuo periculo, crede mihi, iactatione verborum, & denuntiatione periculi sperare eos, te perterrefacto, adolescente impulso, posse magna consequi præmia: & totam istam cantilenam ex hoc pendere, ut quamplurimum lucri faciant. Neque tamen non te cautum esse volo, & insidias vitantem. Nihil enim tua mihi vita potest esse jucundius, neque carius. Illud vide, ne timendo, magis timere cogare. Et, quibus rebus potest occurrere veteranis, occurras. Primum, quod desiderant de x. viris, facias: deinde, de præmiis, si tibi videtur, agros militum eorum, qui cum Antonio veterani fuerunt, his dandos censeas ab utrisque nobis. De nummis, lente, ac ratione habita pecuniæ: senatum de ea re constituturum: quatuor legionibus iis, quibus agros dandos censuisti, video facultatem fore ex agris Syllanis, & agro Campano. Æqualiter, aut forte agros legionibus assignari puto oportere. Hæc me tibi scribere non prudentia mea hortatur, sed amor in te, & cupiditas otii, quod sine te consistere non potest. Ego, nisi valde necesse fuerit, ex Italia non excedam: legiones armo, paro: spero, me non pessimum exercitum habiturum ad omnes casus, & impetus hominum. De exercitu, quem Panfa habuit, legionem mihi Cæsar non remittit. Ad has litteras statim mihi rescribe, tuorumque aliquem mitte, si quid reconditum magis erit, meque scire opus esse putaris. Vale. viii. Kal. Jun. Eporedia.

ARGUMENTUM.

Respondet proximæ superiori epistolæ.

M. T. C. BRUTO IMP. S. D. 21

DLi isti Segulio male faciant, homini nequissimo omnium, qui sunt, qui fuerunt, qui futuri sunt. Quid? tu illum tecum solum, aut cum Cæsare, qui neminem prætermiserit, quicum loqui potuerit, cui non eadem ista dixerit? Te tamen, mi Brute, sic amo, ut debeo, quod istud, quidquid esset nugarum, me scire voluisti: signum enim magnum amoris dedisti. Nam, quod idem Segulius ait, veteranos queri, quod tu, & Cæsar in decemviris non essetis, utinam ne ego quidem essem! Quid enim molestius? Sed tamen, cum ego sensissem, de iis, qui exercitus haberent, sententiam ferri oportere; iidem illi, qui solent, reclamarunt. Itaque excepti etiam estis, me vehementer repugnante. Quocirca Segulium negligamus, qui res novas quærit: non quod veterem comederit: (nullam enim habuit) sed hanc ipsam recentem novam devoravit. Quod autem scribis, te, quod pro te ipso non facias, id pro me facere, ut de me timeas aliquid: omni te, vir optime, mihi que carissime Brute, de me metu libero. Ego enim, quæ provideri poterunt, non fallar in iis; quæ cautionem non habebunt, de iis non ita valde laboro. Sim etenim impudens, si plus postulem, quam homini a rerum natura tribui potest. Quod mihi præcipis, ut caveam, ne timendo magis timere cogar; & sapienter & amicissime præcipis. Sed velim tibi persuadeas, cum te constet excellere hoc genere virtutis, ut numquam extimescas, numquam perturbare; me huic tuæ virtuti proxime accedere. Quamobrem neque metuum quidquam, & cavebo omnia. Sed vide, ne tua jam, mi Brute, culpa futura sit, si ego quidquam timeam:

P

meam : tuis enim opibus , & consulatu tuo , etiam si timidi essemus , tamen omnem timorem abjiceremus : præsertim cum persuasum omnibus esset , mihiq; maxime , nos a te unice diligi . Consiliis tuis , quæ scribis , de quatuor legionibus , deque agris assignandis ab utrisque vestrum , vehementer assentior . Itaque , cum quidam de collegis nostris agrariam curationem ligurirent , disturbavi rem , totamque vobis integram reservavi . Si quid erit occultius , & ut scribis , reconditum , meorum aliquem mittam , quo fidelius ad te litteræ perferantur . Vale . Prid. Non. Jun.

A R G U M E N T U M .

Petit a Bruto , ut Ap. Claudium , qui Antonii partes secutus erat , in civitate retineat .

M. T. C. BRUTO IMP. S. D. 22

CUM Ap. Claudio C. F. summa mihi necessitudo est , multis ejus officiis , & meis mutuis constituta . Peto a te majorem in modum , vel humanitatis tuæ , vel mea causa , ut eum auctoritate tua , quæ plurimum valet , conservatum velis . Volo te , cum fortissimus vir cognitus sis , etiam clementissimum existimari . Magno tibi erit ornamento , nobilissimum adolescentem beneficio tuo esse salvum . Cujus quidem causa hoc melior debet esse , quod , pietate adductus , propter patris restitutionem , se cum Antonio conjunxit . Quare , etsi minus veram causam habebis , tamen vel probabilem aliquam poteris inducere . Nuntus tuus potest hominem summo loco natum , summo ingenio , summa virtute , officiosissimum præterea & gratissimum , incolumem in civitate retinere . Quod ut facias , ita a te peto , ut majore studio , magisve ex animo petere non possim . Vale .

ARGUMENTUM.

Hortatur Ciceronem ad bene sperandum.

D. BRUTUS CICERONI S. D. 23

NOs hic valemus recte; & quo melius valeamus, operam dabimus. Lepidus commode de nobis sentire videtur. Omni timore deposito, debemus libere reip. consulere. Quod si omnia essent aliena, tamen, tribus tantis exercitibus propriis reip. valentibus, magnum animum habere debebas, quem & semper habuisti, & nunc, fortuna adjuvante, augere potes. Quæ tibi superioribus litteris mea manu scripsi, terrèndi tui causâ homines loquuntur. Si frenum momorderis, peream, si te omnes, quotquot sunt, conantem loqui ferre poterunt. Ego, tibi ut antea scripsi, dum mihi a te litteræ veniant, in Italia morabor. Vale.

VIII. Kal. Jun. Eporedia.

ARGUMENTUM.

Bruti epistola, si quid antea fuerat timoris, ademptum significat. Addit, quid Bruto sit agendum; & de pecunia decreta.

M. T. C. BRUTO S. D. 24

NArro tibi: antea subirascebar brevitati tuarum litterarum: nunc mihi loquax esse videor: te igitur imitabor. Quam multa, quam paucis! Te recte valere, operamque dare, ut quotidie melius: Lepidum commode sentire: tribus exercitibus quidvis nos oportere confidere. Si timidus essem, tamen ista epistola mihi omnem metum absterfisses. Sed, ut mones, frenum momordi: etenim qui, te incluso, omnem spem habuerim in te, quid nunc putas? Cupio jam vigiliam meam, Brute, tibi tradere: sed ita, ut ne desim constantiæ meæ. Quod scribis, in Italia

te moraturum, dum tibi litteræ meæ veniant: si per hostem licet, non erraris: multa enim Romæ: sin adventu tuo bellum confici potest, nihil sit antiquius. Pecunia, expeditissima quæ erat, tibi decreta est. Habes amantissimum Servilium: nos non desumus. Vale. VIII. Id. Jun.

ARGUMENTUM.

Scribit, se brevitatem in scribendo amare, Bruti exemplo: Reip. spem in ipso, & in Planco esse: de M. Bruto nihil certi.

M. T. C. BRUTO IMP. S. D. 25

EXspectanti mihi tuas quotidie litteras, Lupus noster subito denuntiavit, ut ad te scriberem, si quid vellem. Ego autem, etsi, quid scriberem, non habebam (acta enim ad te mitti sciebam: inanem autem sermonem litterarum tibi injucundum esse audiebam) brevitatem secutus sum, te magistro. Scito igitur, in te & in collega spem omnem esse. De Bruto autem nihil adhuc certi: quem ego, quemadmodum præcipis, privatis litteris ad bellum commune vocare non desino: qui utinam jam adesset! intestinum urbis malum, quod est non mediocre, minus timeremus. Sed quid ago? non imitor λακωνισμὸν tuum: altera jam pagella procedit. Vince, & vale. XIV. Kal. Quint.

ARGUMENTUM.

Sollicitus ob Antonii cum Lepido conjunctionem, postulat, ut legiones ad eum mittantur, & stipendium.

BRUTUS IMP. CICERONI S. D. 26

IN maximo meo dolore hoc solatio utor, quod intelligunt homines, non sine causa me timuisse ista, quæ acciderunt. Deliberent, utrum trajiciant legiones ex Africa, nec ne, & ex Sar-

Sardinia: Brutum arceſſant, nec ne: mihi ſtipendium dent, an non, decernant. Ad ſenatum litteras miſi. Crede mihi, niſi iſta omnia ita ſunt, quemadmodum ſcribo, magnum nos omnes adituros periculum. Rogo te, videte, quibus hominibus negotium detis, qui ad me legiones adducant. Et fide opus eſt, & celeritate. Vale
III. Non. Jun. ex caſtris.

A R G U M E N T U M.

Queſtus erat Matius, ſe a Cicerone, ut libertatis inimicum, accuſari. Cicero factum negat.

M. T. C. MATIO S. D. 27

Nondum ſatis conſtitui, moleſtiæne plus, an voluptatis attulerit mihi Trebatius noſter, homo tum plenus officii, tum utriuſque noſtrum amantiffimus. Nam cum in Tuſculanum veſperi veniſſem, poſtridie ille ad me, nondum ſatis firmo corpore cum eſſet, mane venit. Quem cum objurgarem, quod parum valetudini parceret: tum ille, nihil ſibi fuiſſe longius, quam ut me videret. Numquidnam, inquam, novi? Detulit ad me querelam tuam: de qua prius, quam reſpondeo, pauca præponam. Quantum memoria repetere præterita poſſum, nemo eſt mihi te amicus antiquior. Sed vetuſtas habet aliquid commune cum multis, amor non habet. Dilexi te, quo die cognovi: meque a te diligere judicavi. Tuus deinde diſceſſus, iſque diuturnus, ambitio noſtra, & vitæ diſſimilitudo non eſt paſſa, voluntates noſtras conſuetudine conglutinari. Tuum tamen erga me animum agnovi multis annis ante bellum civile, cum Cæſar eſſet in Gallia. Quod enim vehementer mihi utile eſſe putabas, nec inutile ipſi Cæſari, perfeciſti, ut ille me diligere, coleret, haberet in ſuis. Multa prætereo, quæ temporibus illis inter nos familiariffime di-

sta, scripta, communicata sunt; graviora enim sunt consecuta. Et initio belli civilis, cum Brundisium versus ires ad Cæsarem, venisti ad me in Formianum. Primum hoc ipsum quanti, præsertim temporibus illis? Deinde oblitum me putas consilii, sermonis, humanitatis tuæ? quibus rebus interesse memini Trebatium. Nec vero oblitus sum litterarum tuarum, quas ad me misisti, cum Cæsari obviam venissem in agro, ut arbitror, Trebulano. Secutum illud tempus est, cum me ad Pompejum proficisci sive pudor meus coegit, sive officium, sive fortuna. Quod officium tuum, quod studium, vel in absentem me, vel in præsentem meos defuit? quem porro omnes mei & mihi & sibi te amiciorum judicaverunt? Veni Brundisium: oblitum ne me putas, qua celeritate, ut primum audieris, ad me Tarento advolaris? quæ tua fuerit assessio, oratio, confirmatio animi mei, fracti communium miseriarum metu? Tandem aliquando Romæ esse cœpimus: quid defuit nostræ familiaritati? In maximis rebus, quonam modo me gererem adversus Cæsarem, usus tuo consilio sum. In reliquis officiis, cui tu tribuisti, excepto Cæsare, præter me, ut domum ventitares, horasque multas sæpe suavissimo sermone consumeres? tum, cum etiam, si meministi, ut hæc *οἰκονομῶντα* scriberem, tu me impulisti. Post Cæsaris reditum, quid tibi majori curæ fuit, quam ut essem ego illi quam familiarissimus? quod effeceras. Quorsum igitur hæc oratio longior, quam putaram? quia sum admiratus, te, qui hæc nosse deberes, quidquam a me commissum, quod esset alienum nostræ amicitia, credidisse. Nam præter hæc, quæ commemoravi, quæ testata sunt, & illustria, habeo multa occultiora, quæ vix verbis exsequi possum. Omnia me tua delectant, sed maxime maxima cum fides in amicitia, consilium, gravitas, constantia; tum lepos, humanitas, litteræ. Quapropter

pter redeo nunc ad querelam. Ego, te suffragium tulisse in illa lege, primum non credidi: deinde, si credidissem, numquam id sine aliqua iusta causa existimarem te fecisse. Dignitas tua facit, ut animadvertatur, quidquid facias: malevolentia autem hominum, ut nonnulla durius, quam a te facta sint, proferantur. Ea si tu non audis, quid dicam nescio; equidem, si quando audio, tam defendo, quam me scio, a te contra iniquos meos solere defendi. Defensio autem est duplex. Alia sunt, quæ liquido negare soleam, ut de isto ipso suffragio: alia, quæ defendam, a te pie fieri, & humane, ut de curatione ludorum. Sed te, hominem doctissimum, non fugit, si Cæsar Rex fuerit, quod mihi quidem videtur, in utramque partem de tuo officio disputari posse; vel in eam, qua ego uti soleo, laudandam esse fidem & humanitatem tuam, qui amicum etiam mortuum diligas; vel in eam, qua nonnulli utuntur, libertatem patriæ vitæ amici anteponendam. Ex his sermonibus utinam essent delatæ ad te disputationes meæ. Illa vero duo, quæ maxima sunt laudum tuarum, quis aut libentius, quam ego, commemorat, aut sapius; te & non suscipiendi belli civilis gravissimum auctorem fuisse, & moderandæ victoriæ? in quo qui mihi non assentiretur, inveni neminem. Quare habeo gratiam Trebatio, familiari nostro, qui mihi dedit causam harum litterarum: quibus nisi credideris, me omnis officii & humanitatis expertem judicaris: quo nec mihi gravius quidquam potest esse, nec a te alienius. Vale.

A R G U M E N T U M.

Excusatio Matii & pro seipso, & contra calumniatores.

MATIUS CICERONI S. D.

28

Magnam voluptatem ex tuis litteris cepi, quod, quam speraram, atque optaram, ha-

habere te de me opinionem cognovi. De qua
erſi non dubitabam, tamen, quia maximi æſti-
mabam, ut incorrupta maneret, laborabam.
Conſcius autem mihi eram, nihil a me commiſ-
ſum eſſe, quod boni cujuſquam offenderet ani-
mum. Eo minus credebam, plurimis atque opti-
mis artibus ornato tibi temere quidquam per-
ſuaderi potuiſſe: præſertim in quem mea propen-
ſa & perpetua fuiſſet, atque eſſet benevolentia.
Quod quando, ut volui, ſcio eſſe, respondebo
criminibus, quibus tu pro me, ut par erat, tua
ſingulari bonitate, & amicitia noſtra ſæpe reſti-
tiſti. Nota enim mihi ſunt, quæ in me poſt
Cæſaris mortem contulerint. Vitio mihi dant,
quod mortem hominis neceſſarii graviter fero,
atque eum, quem dilexi, periſſe indignor.
Ajunt enim patriam amicitia præponendam eſſe:
perinde ac ſi jam vicerint, obitum ejus reipub.
fuiſſe utilem. Sed non agam aſtute. Fateor,
me ad iſtum gradum ſapientia non perveniſſe.
Neque enim Cæſarem in diſſenſione civili ſum
ſecutus: ſed amicum, quamquam re offendebar,
tamen non deſerui: neque bellum umquam ci-
vile, aut etiam cauſſam diſſenſionis probavi;
quam etiam naſcentem extingui, ſumme ſtudiui.
Itaque in victoria hominis neceſſarii, neque ho-
noris, neque pecuniæ dulcedine ſum captus: qui-
bus præmiis reliqui minus apud eum, quam ego,
cum poſſent, immoderate ſunt abuſi. Atque
etiam res familiaris mea lege Cæſaris diminuta
eſt; cujus beneficio plerique, qui Cæſaris mor-
te lætantur, remaſerunt in civitate. Civibus
victis ut parceretur, æque ac pro mea ſalute,
laboravi. Poſſum igitur, qui omnes voluerim in-
columes, eum, a quo id impetratum eſt, periſſe,
non indignari? cum præſertim iidem homi-
nes illi & invidia & exitio fuerint. Plecteris
ergo, inquiunt, quando factum noſtrum impro-
bare

bare audes. O superbiam inauditam! alios in facinore gloriari, aliis ne dolere quidem impune licere! At hæc etiam fervis semper libera fuerunt, timerent, gauderent, dolerent suo potius, quam alterius arbitrio: quæ nunc, ut quidem isti dictitant; libertatis auctores, metu nobis extorquere conantur. Sed nihil agunt. Nullius umquam periculi terroribus ab officio, aut ab humanitate desciscam: numquam enim honestam mortem fugiendam, sæpe etiam appetendam putavi. Sed quid mihi succensent, si id opto, ut pœniteat eos sui facti? Cupio enim, Cæsaris mortem omnibus esse acerbam. At debeo pro civili parte remp. velle salvam. Id quidem me cupere, nisi & antea acta vita, & reliqua mea spes, tacente me, probat, dicendo vincere non postulo. Quare maiorem in modum te rogo, ut rem potiolem oratione ducas: mihi que, si sentis expedire recte fieri, credas, nullam communionem cum improbis esse posse. An quod adolescens præstiti, cum etiam errare cum excusatione possem, id nunc, ætate præcipitata, commutem, ac me ipse retexam? Non faciam: neque quod displiceat, committam, præterquam quod hominis mihi conjunctissimi, ac viri amplissimi doleo gravem casum. Quod si aliter essem animatus, numquam, quod facerem, negarem: ne & in peccando improbus, & in dissimulando timidus, ac vanus existimarer. At ludos, quos Cæsaris victoriæ Cæsar adolescens fecit, curavi. At id ad privatum officium, non ad statum reipub. pertinebat. Quod tamen munus & hominis amicissimi memoriæ, ac honoribus præstare etiam mortui debui; & optimæ spei adolescenti, ac dignissimo Cæsare, petenti negare non potui. Veni etiam consulis Antonii sæpe domum, salutandi causa: ad quem, qui me parum patriæ amantem esse existimant,

rogandi quidem aliquid, aut auferendi causa frequentes ventitasse, reperies. Sed quæ hæc est arrogancia, quod Cæsar numquam interpellavit, quin, quibus vellem, atque etiam quos ipse non diligebat, tamen iis uterer: eos, qui mihi amicum eripuerunt, carpendo me, efficere conari, ne, quos velim, diligam? Sed non vereor, ne aut meæ vitæ modestia parum valitura sit in posterum contra falsos rumores; aut etiam ii, qui me non amant propter meam in Cæsarem constantiam, non malint mei, quam sui similes amicos habere. Mihi quidem si optata contingent, quod reliquum est vitæ, in otio Rhodi degam: si casus aliquis interpellarit, ita ero Romæ, ut recte fieri semper cupiam. Trebatio nostro magnas gratias ago, quod tuum erga me animum simplicem atque amicum aperuit; & quod eum, quem semper dilexi lubenter, quo magis jure colere, atque observare deberem, fecit. Bene vale, & me dilige.

A R G U M E N T U M.

Profecturus in Græciam, suas res Oppio commendat, commemoratis antea beneficiis ab ipso acceptis.

M. T. C. M. OPPIO S. D.

29.

DUbitanti mihi, quod scit Atticus noster, de hoc toto consilio profectionis, quod in utramque partem in mentem multa veniebant, magnum pondus accessit ad tollendam dubitationem, judicium, & consilium tuum. Nam & scripsisti aperte, quid tibi videretur; & Atticus ad me sermonem tuum pertulit. Semper judicavi, in te & in capiendo consilio prudentiam summam esse, & in dando fidem; maximeque sum expertus, cum initio civilis belli per litteras te consuluissem, quid mihi faciendum esse censes; eundumne ad Pompejum, an manendum in Italia.

lia. Suasisti, ut consulerem dignitati meæ: ex quo, quid sentire, intellexi, & sum admiratus fidem tuam, & in consilio dando religionem: quod cum aliud malle amicissimum tuum putares, antiquius tibi officium meum, quam illius voluntas fuit. Equidem & ante hoc tempus te dilexi, & semper me a te diligi, sensi: & cum abessem, atque in magnis periculis essem, & me absentem, & meos præsentem a te cultos & defensos esse memini: & post meum reditum quam familiariter mecum vixeris, quæque ego de te & senserim & prædicarim, omnes, qui solent hæc animadvertere, testes habemus. Gravissimum vero iudicium de mea fide, & de constantia fecisti, cum post mortem Cæsaris totum te ad amicitiam meam contulisti. Quod tuum iudicium, nisi mea summa benevolentia erga te, omnibusque meritis comprobaro, ipse me hominem non putabo. Tu, mi Oppi, conservabis amorem tuum (etsi more magis hoc quidem scribo, quam quo te admonendum putem) meaque omnia tuebere: quæ, tibi ne ignota essent, Attico mandavi. A me autem, cum paullum otii nacti erimus, uberiores litteras expectato. Da operam, ut valeas: hoc mihi gratius facere nihil potes.

LIBER XII.

ARGUMENTUM.

Queritur, Tyranno occiso, tyrannidem tamen non esse sublatam: Cassiumque hortatur, ut una cum M. Bruto, ejus uxoris fratre, omni perturbatione Remp. liberet.

M. T. C. C. CASSIO S. D.

I

FInem nullum facio, mihi crede, Cassi, de te, & de Bruto nostro, id est de tota rep. cogitandi:

P VI

di: cuius omnis spes in vobis est, & in D. Bruto. Quam quidem jam habeo ipse meliorem, repub. a Dolabella meo præclarissime gesta. Manabat enim illud malum urbanum, & ita corroborabatur quotidie, ut ego quidem & urbi & orio diffiderem urbano. Sed ita compressum est, ut mihi videamur omne jam ad tempus ab illo dumtaxat sordidissimo periculo tuti futuri. Reliqua magna sunt, & multa: sed posita omnia sunt in vobis: quamquam primum quidque explicemus. Nam, ut adhuc quidem actum est, non regno, sed Rege liberati videmur. Interfecto enim Rege, regiones omnes nutus tuemur. Neque vero id solum, sed etiam quæ ipse ille, si viveret, non faceret, ea nos, quasi cogitata ab illo probamus. Nec ejus quidem rei finem video. Tabulæ figuntur: immunitates dantur: pecuniæ maximæ describuntur: exsules reducuntur: S. C. falsa referuntur: ut tantummodo odium illud hominis impuri, & servitutis dolor depulsus esse videatur: respub. jaceat in iis perturbationibus, in quas eam ille coniecit. Hæc omnia vobis sunt expedienda; nec hoc cogitandum, satis jam habere rempub. a vobis. Habet illa quidem tantum, quantum numquam mihi in mentem venit optare: sed contenta non est; & pro magnitudine & animi & beneficii vestri a vobis magna desiderat. Adhuc ultra suas injurias est per vos interitu tyranni: nihil amplius. Ornamenta vero sua quæ recuperavit? an quod ei mortuo paret, quem vivum ferre non poterat? cuius æra refigere debebamus, ejus etiam chirographa defendimus? at enim ita decrevimus. Fecimus id quidem temporibus cedentes, quæ valent in repub. plurimum. Sed immoderate quidam & ingrate nostra facilitate abutuntur. Verum hæc propediem, & multa alia coram. Interim velim sic tibi persuadeas; mihi cum reip. quam

quam semper habui carissimam, tum amoris nostri causa, maximæ curæ esse tuam dignitatem. Da operam, ut valeas.

ARGUMENTUM.

Invectitur in M. Antonii tyrannicam potentiam; & Reip. statum describit.

M. T. C. CASSIO S. D.

2

VEhementer lator, tibi probari sententiam, & orationem meam: qua si sapius uti liceret, nihil esset negotii, libertatem & rempublicam recuperare. Sed homo amens & perditus, multoque nequior, quam ille ipse, quem tu nequissimum occisum esse dixisti, cædis initium quærit: nullamque aliam ob causam, me auctorem fuisse Cæsaris interficiendi, criminatur, nisi ut in me veterani incitentur. Quod ego periculum non extimesco, modo facti vestri gloriam cum mea laude communicet. Ita nec Pisoni, qui in eum primus inVectus est, nullo assentiente; nec mihi, qui idem tricesimo post die feci; nec P. Servilio, qui me est consecutus, tuto in senatum venire licet. Cædem enim gladiator quærit, ejusque initium ad XIII. Kal. Octob. a me se facturum putavit. Ad quam paratus venerat, cum in villa Metelli complures dies commentatus esset. Quæ autem in lustris, & in vino commentatio potuit esse? Itaque omnibus est visus, ut ad te antea scripsi, suo more vomere, non dicere. Quare quod scribis, te confidere, auctoritate & eloquentia nostra aliquid profici posse: nonnihil, ut in tantis malis, est profectum. Intelligit enim populus Rom., tres esse consulares, qui, quia, quæ de rep. bene senserint, libere locuti sunt, tuto in senatum venire non possint. Nec est præterea, quod quidquam exspectes. Tuus enim necessarius affinitate nova delectatur. Itaque jam non est studiosus ludorum, infinitoque
fra-

fratris tui plausu dirumpitur. Alter item affinis novis commentariis Cæsaris delinitus est. Sed hæc tolerabilia : illud non ferendum, quod est, qui vestro anno consulem filium suum futurum putet, ob eamque causam se huic latroni deservire præferat. Nam L. Cotta, familiaris meus, fatali quadam desperatione, ut ait, minus in senatum venit. L. Cæsar, optimus & fortissimus civis, valetudine impeditur. Ser. Sulpicius & summa auctoritate, & optime sentiens, non adest. Reliquos, exceptis designatis, ignosce mihi, si non numero consulares. Habes auctores consilii publici : qui numerus etiam bonis rebus exiguus esset : quid censes, perditis? Quare spes est omnis in vobis : qui si idcirco abestis, ut sitis in tuto, ne in vobis quidem : sin aliquid dignum vestra gloria cogitatis ; velim, salvis nobis : sin id minus, res tamen publica per nos brevi tempore jus suum recuperabit : Ego tuis neque desum, neque deero : qui sive ad me referent, sive non, mea tibi tamen benevolentia fidesque præstabitur. Vale.

A R G U M E N T U M .

Et hic in Antonium, ejusque sectam invehitur.

M. T. C. CASSIO S. D.

3

AUget tuus amicus furorem in dies : primum in statua, quam posuit in rostris, inscripsit : Parenti optime merito : ut non modo sicarii, sed jam etiam parricidæ judicemini : quid dico, judicemini ? judicemur potius. Vestri enim pulcherrimi facti ille furiosus me principem dicit fuisse. Utinam quidem fuisset : molestus nobis non esset. Sed hoc vestrum fuit : quod quando præterit, utinam haberem, quid darem vobis consilii. Sed ne mihi quidem ipsi reperio, quid faciendum sit. Quid enim est, quod contra vim sine vi fieri possit ? Consilium autem omne hoc est illorum, ut
mor-

mortem Cæsaris persequantur . Itaque ante diem vi. Non. Octob. productus in concionem a Canutio , turpissime ille quidem discessit : sed tamen ea dixit de conservatoribus patriæ , quæ dici deberent de proditoribus . De me quidem non dubitanter , quin omnia de meo consilio & vos fecissetis , & Canutius faceret . Cetera cujuscumque sint , ex hoc judica , quod legato tuo viaticum eripuerunt . Quid eos interpretari putas , cum hoc faciunt ? Ad hostem scilicet portari . O rem miseram ! dominum ferre non potuimus , conservo servimus . Et tamen , me quidem favente magis , quam sperante , etiam nunc residet spes in virtute tua . Sed ubi sunt copiæ ? De reliquo , malo teipsum loqui tecum , quam dicta nostra cognoscere . Vale .

ARGUMENTUM .

Varia complectitur hæc epistola : de Antonii nequitia , de Senatu , de populo , de legatis ad Antonium missis , de ipso Cassio .

M. T. C. CASSIO S. D.

4

Vellem Idibus Mart. me ad cœnam invitasses : reliquiarum nihil fuisset . Nunc me reliquiarum vestræ exercent , & quidem præter ceteros me : quamquam egregios consules habemus , sed turpissimos consulares : senatum fortem , sed infimo quemque honore fortissimum . Populo vero nihil fortius , nihil melius , Italiaque universa . Nihil autem foedius Philippo , & Pisone legatis , nihil flagitiosius : qui cum essent missi , ut Antonio ex senatus sententia certas res renuntiarent ; cum ille earum rerum nulli paruiisset , ultro ab illo ad nos intolerabilia postulata retulerunt . Itaque ad nos concurritur : factique jam in re salutari populares sumus . Sed tu quid ageres , quid acturus , ubi denique esses , nesciebam . Fama nuntiabat , te esse in Syria : auctor erat nemo . De Bruto ,
quo

quo propius est, eo firniora videntur esse, quæ nuntiantur. Dolabella valde vituperabatur ab hominibus non insulsis, quod tibi tam cito succederet, cum tu vix dum triginta dies in Syria fuisses. Itaque constabat, eum recipi in Syriam non oportere. Summa laus & tua, & Bruti est, quod exercitum præter spem existimamini comparasse. Scriberem plura, si rem causamque nossem. Nunc quæ scribo, scribo ex opinione hominum atque fama. Tuas litteras avide exspecto. Vale.

A R G U M E N T U M.

M. Brutum laudat, ut ad ejus imitationem Cassium accendat. Addit de bello, quod in Italia contra M. Antonium Resp. gerebat.

M. T. C. CASSIO S. D.

5

Hic mem credo adhuc prohibuisse, quominus de te certum haberemus, quid ageres, maximeque ubi esses. Loquebantur omnes tamen, credo, quod volebant, in Syria te esse, habere copias. Id autem eo facilius credebatur, quia simile vero videbatur. Brutus quidem noster egregiam laudem est consecutus: res enim tantas gessit, tamque inopinatas, ut eæ cum per se gratæ essent, tum gratiores propter celeritatem. Quod si tu ea tenes, quæ putamus, magnis subsidiis fulta respub. est. A prima enim ora Græciæ usque ad Ægyptum, optimorum civium imperiis muniti erimus, & copiis. Quamquam, nisi me fallebat, res sic se habebat, ut totius belli omne discrimen in D. Bruto positum videretur: qui si, ut sperabamus, erupisset Mutina, nihil belli reliquum fore videbatur. Parvis omnino jam copiis obsidebatur, quod magno præsidio Bononiam tenebat Antonius. Erat autem Claternæ noster Hirtius: ad Forum Cornelium Cæsar: uterque cum firmo exercitu: magnasque Romæ Pansa copias

ex

ex delectu Italiæ comparat. Hiems adhuc remgeri prohibuerat. Hirtius nihil nisi considerate, ut mihi crebris litteris significat, acturus videbatur. Præter Bononiam, Regium Lepidi, Parmam, totam Galliam tenebamus studiosissimam reip. Tuos etiam clientes transpadanos mirifice conjunctos cum causa habebamus. Erat firmissimus senatus, exceptis consularibus: ex quibus unus L. Cæsar firmus est, & rectus. Ser. Sulpicii morte magnum præsidium amisimus. Reliqui partim inertes, partim improbi: nonnulli invident eorum laudi, quos in rep. probari vident. Populi vero Rom., totiusque Italiæ mira consensus est. Hæc erant fere, quæ tibi nota esse vellem. Nunc autem opto, ut ab istis Orientis partibus virtutis tuæ lumen eluceat. Vale.

ARGUMENTUM.

Strabonem commendat, quasi aliud agens; & in Cassio, Brutoque spem omnem Reip. sitam esse dicit, si ad Mutinam res male geratur.

M. T. C. CASSIO S. D.

6

Qui status rerum fuerit tum, cum has litteras dedi, scire poteris ex C. Tidio Strabone, viro bono, & optime de rep. sentiente: nam quid dicam, cupidissimo tui, qui, domo & fortunis relictis, ad te potissimum profectus sit? Itaque eum tibi ne commendo quidem: adventus ipsius ad te satis eum commendabit. Tu velim sic existimes, tibi que persuadeas, omne periculum bonorum in te, & Bruto esse positum, si, quod nolim, adversi quid evenerit. Res, cum hæc scribebam, erat in extremum deducta discrimen. Brutus enim Mutinæ vix jam sustinebat. Qui si conservatus erit, vicimus: sin (quod Dii omen avertant) omnis omnium cursus est ad vos. Proinde fac tantum habeas, tantumque apparatus, quanto opus est, ad universam remp. recuperandam. Vale.

AR-

ARGUMENTUM.

Significat sententiam a se in Senatu dictam ex Cassii dignitate, eamque a se etiam in concione defensam.

M. T. C. CASSIO S. D.

7

QUanto studio dignitatem tuam & in senatu, & ad populum defenderim, ex tuis te malo, quam ex me, cognoscere. Quæ mea sententia in senatu facile valuisset, nisi Pansa vehementer obstitisset. Ea sententia dicta, productus sum in concionem a tribuno pleb. M. Servilio. Dixi de te, quæ potui, tanta contentione, quantum forum est; tanto clamore consensuque populi, ut nihil umquam simile viderim. Id velim mihi ignoscas, quod invita socru tua fecerim. Mulier timida verebatur, ne Pansæ animus offenderetur. In concione quidem Pansa dixit, matrem quoque tuam, & fratrem, illam a me sententiam noluisse dici. Sed me hæc non movebant: alia malebam. Favebam & reipublicæ, cui semper favi, & dignitati, ac gloriæ tuæ. Quod autem & in senatu pluribus verbis differui, & dixi in concione, in eo velim fidem meam liberes. Promisi enim, & prope confirmavi, te non exspectasse, nec exspectaturum decreta nostra: sed teipsum tuo more rempublicam defensurum; & quamquam nihil dum audieramus, nec ubi esses, nec quas copias haberes: tamen sic statuebam, omnes, quæ in istis partibus essent, opes, copiasque tuas esse: per teque Asiam provinciam confidebam jam reipublicæ recuperatam. Tu fac in augenda gloria teipsum vincas. Vale.

ARGUMENTUM.

Lepidus victum Antonium receperat: unaque bellum administrabant. Id queritur Cicero; & Cassium ad liberandam Remp. hortatur.

M. T. C. CASSIO S. D.

8

SCelus affinis tui Lepidi, summamque levitatem & inconstantiam, ex actis, quæ ad te mitti

mitti certo scio, cognosse te arbitror. Itaque nos, confecto bello, ut arbitrabamur, renovatum bellum gerimus: spemque omnem in D. Bruto, & Planco habemus: si verum quæris, in te, & in meo Bruto, non solum ad præsens perfugium, si, quod nolim; adversi quid acciderit, sed etiam ad confirmationem perpetuæ libertatis. Nos hic de Dolabella audiebamus, quæ vellemus: sed certos auctores non habebamus. Te quidem magnum hominem & præsentis iudicio, & reliqui temporis expectatione scito esse. Hoc tibi proposito, fac, ut ad summa contendas. Nihil est tantum, quod non populus Rom. a te perfici atque obtineri posse iudicet. Vale.

ARGUMENTUM.

Scribit de bello propter Lepidi perfidiam renovato; Cassium hortatur, ut in Italiam properet.

M. T. C. CASSIO S. D.

9

Brevitas tuarum litterarum me quoque brevior in scribendo facit: &, vere ut dicam, non satis occurrit, quod scribam. Nostras enim res in actis perferri ad te certo scio; tuas autem ignoramus. Tamquam enim clausa sit Asia, sic nihil perfertur ad nos, præter rumores de oppresso Dolabella, satis illos quidem constantes, sed adhuc sine auctore. Nos confectum bellum cum putaremus, repente a Lepido tuo in summam sollicitudinem adducti sumus. Itaque persuade tibi, maximam reipub. spem in te & in tuis copiis esse. Firmos omnino exercitus habemus; sed tamen, ut omnia, ut spero, prospere procedant, multum interest, te venire. Exigua est enim spes reipub., nam nullam non libet dicere: sed, quæcumque est, ea despondetur anno consulatus tui. Vale.

AR-

A R G U M E N T U M.

*Lepidum hostem judicatum scribit: & omnino rem
poscere, ut Cassius cum exercitu in Italiam veniat.*

M. T. C. CASSIO S. D.

IO

Lepidus, tuus affinis, meus familiaris, pridie Kalend. Quint. sententiis omnibus hostis a senatu judicatus est, ceterique, qui una cum illo a repub. defecerunt: quibus tamen ad sanitatem redeundi ante Kalend. Sept. potestas facta est. Fortis sane senatus, sed maxime spe subsidii tui. Bellum quidem, cum hæc scribebam; sane magnū erat scelere & levitate Lepidi. Nos de Dolabella quotidie, quæ volumus, audimus: sed adhuc sine capite, sine auctore, rumore nuntio. Quod cum ita esset, tamen litteris tuis, quas Nonis Maji ex castris datas acceperamus, ita persuasum erat civitati, ut illum jam oppressum omnes arbitrarentur, te autem in Italiam venire cum exercitu: ut, si hæc ex sententiâ confecta essent, consilio atque auctoritate tua; sin quid forte titubatum esset, ut sit in bello, exercitu tuo niteremur. Quem quidem ego exercitum quibuscumque potero rebus ornabo: cuius rei tum tempus erit, cum, quid opis reipublicæ laturus exercitus sit, aut quid jam tulerit, notum esse cœperit. Nam adhuc tantum conatus audiuntur, optimi illi quidem, & præclarissimi; sed gesta res expectatur: quam quidem aut jam esse aliquam, aut appropinquare confido. Tua virtute, & magnitudine animi nihil est nobilius. Itaque optamus, ut quamprimum te in Italia videamus: rempublicam nos habere arbitrabimur, si vos habebimus. Præclare vicemus, nisi spoliatum, inermem, fugientem Lepidus recepisset Antonium. Itaque numquam tanto odio civitati Antonius fuit, quanto est Lepidus,

pidus. Ille enim ex turbulenta repub., hic ex pace & victoria bellum excitavit. Huic oppositos consules designatos habemus; in quibus est magna illa quidem spes, sed anceps cura propter incertos exitus præliorum. Persuade tibi igitur, in te, & in Bruto tuo esse omnia: vos expectari: Brutum quidem jam jamque. Quod si, ut spero, victis hostibus nostris veneritis: tamen auctoritate vestra respublica exsurgat, & in aliquo statu tolerabili consistet. Sunt enim permulta, quibus erit medendum; etiam si resp. satis esse videbitur sceleribus hostium liberata. Vale.

ARGUMENTUM.

BIBLIOTECA NAZIONALE
ROMA
VITTORIO EMANUELE

Scribit, a quibus copias acceperit, seque, & Remp. commendat. Scripta est autem hæc epistola ante prælium Mutinense.

CASSIUS PROCOS. CICERONI S.D. II

SI vales, bene est: ego quidem valeo. In Syriam me profectum esse scito ad L. Murcum, & Q. Crispum Impp. Viri fortes, optimique cives, posteaquam audierunt, quæ Romæ gererentur, exercitus mihi tradiderunt: ipsique mecum una fortissimo animo rempub. administrant. Item legionem, quam Q. Cæcilius Bassus habuit, ad me venisse, scito: quatuorque legiones, quas A. Allienus ex Ægypto eduxit, traditas ab eo mihi esse, scito. Nunc te cohortatione non puto indigere, ut nos absentes, remque publicam, quantum opus est, defendas. Scire te volo, firma præsidia vobis, senatuique non deesse, ut optima spe, & maximo animo remp. defendas. Reliqua tecum aget L. Cartejus, familiaris meus. Vale. Data Non. Mart. ex castris Taricheis.

ARGUMENTUM.

Facta mentione benevolentiae Ciceronis erga se, suam dignitatem, suosque milites commendat; seque, & illos optime de Repub. meritos affirmat.

CASSIUS PROCOS. CICERONI S. D. 12

SI vales, bene est: ego quidem valeo. Legi tuas litteras, in quibus mirificum tuum erga me amorem recognovi. Videbaris enim non solum favere nobis, id quod & nostra, & reipublicae causa semper fecisti; sed etiam gravem curam suscepisse, vehementerque esse de nobis sollicitus. Itaque, quod te primum existimare putabam, nos oppressa repub. quiescere non posse: deinde, cum suspicari, nos moliri, quod te sollicitum esse & de salute nostra, & de rerum eventu putabam: simul ac legiones accepi, quas A. Allienus eduxerat ex Aegypto, scripsi ad te, tabellariosque complures Romam misi. Scripsi etiam ad senatum litteras, quas reddi vetui prius, quam tibi recitatae essent: si forte mei obtemperare mihi voluerunt. Quod si litterae perlatae non sunt, non dubito, quin Dolabella, qui, nefarie Trebonio occiso, Asiam occupavit, tabellarios meosprehenderit, litterasque interceperit. Exercitus omnes, qui in Syria fuere, teneo. Habui paullulum morae, dum promissa militibus persolvo. Nunc jam sum expeditus. A te peto, ut dignitatem meam tibi commendatam habeas, si me intelligis nullum neque periculum, neque laborem patriae denegasse: si contra importunissimos latrones arma cepi, te hortante, & auctore: si non solum exercitus ad rempublicam libertatemque defendendam comparavi, sed etiam crudelissimis tyrannis eripui. Quos si occupasset Dolabella, non solum adventu, sed etiam opinione & expectatione exercitus sui Antonium confirmas-

firmasset. Quas ob res milites tuere, si eos mirifice de republ. meritos esse animadvertis: & effice, ne quem pœniteat, rempub., quam spem prædæ & rapinarum, sequi maluisse. Item Murci, & Crispi Impp. dignitatem, quantum est in te, tuere. Nam Bassus misere noluit mihi legionem tradere: Quod nisi milites, invito eo, legatos ad me misissent; clausam Apameam tenuisset, quoad vi esset expugnata. Hæc a te peto, non solum reipub., quæ tibi semper fuit carissima, sed etiam amicitia nostræ nomine, quam confido apud te plurimum posse. Crede mihi, hunc exercitum, quem habeo, senatus, atque optimi cujusque esse, maximeque tuum. De cujus voluntate assidue audiendo, mirifice te diligit, carumque habet. Qui si intellexerit, commoda sua curæ tibi esse, debere etiam se tibi omnia putabit. Litteris scriptis, audiui, Dolabellam in Ciliciam venisse cum suis copiis: proficiscar in Ciliciam: quid egerim, celeriter ut scias, dabo operam: ac velim, ut mereamur de republ., sic felices simus. Fac valeas, meque ames. Nonis Maji, ex castris.

A R G U M E N T U M.

Gratulatur de victoria Mutinensi, & res a se gestas enumerat.

C. CASSIUS CICERONI S. D.

13

SI vales, bene est: ego quidem valeo. Cum reipublicæ vel salute, vel victoria gaudemus, tum instauratione tuarum laudum: quod maximus consularis maximum consulem te ipse vicisti, & lætamur, & mirari satis non possumus. Fatale nescio quid tuæ virtuti datum; id quod jam sæpe experti sumus. Est enim tua toga omnium armis felicior: quæ nunc quoque nobis pæne victam rempublicam ex manibus hostium eripuit ac reddidit. Nunc ergo vivemus liberi:

nunc

nunc te, omnium maxime civis, & mihi carissime, id quod maxime reipublicæ tenebris comperisti, nunc te habebimus testem nostri & in te, & in conjunctissimam tibi rempublicam amoris: &, quæ sæpe pollicitus es, te & taciturnum, dum serviremus; & dicturum de me tum, cum profutura essent; nunc illa non ego quidem dici tantopere desiderabo, quam sentiri a te ipso. Neque enim omnium judicio malim, me a te commendari, quam ipse tuo judicio digne, ac mereor, commendatus esse: ut hæc novissima nostra facta non subita, nec inconvenientia, sed similia illis cogitationibus, quarum tu testis es, fuisse judices; meque ad optimam spem patriæ non minimum tibi ipsi producendum putes. Sunt tibi, M. Tulli, liberi, propinquire digni quidem te, & merito tibi carissimi: esse etiam debent in reipub. proxime hos cari, qui studiorum tuorum sunt æmulii: quorum esse cupio tibi copiam. Sed tamen non maxima me turba puto excludi, quominus tibi vacet me excipere, & ad omnia, quæ velis & probes, producere. Animum tibi nostrum fortasse probavimus: ingenium certe diutina servitus, qualecumque est, minus tamen, quam erat, passa est videri. Nos ex ora maritima Asiæ provinciæ, & ex insulis, quas potuimus, naves deduximus. Delectum remigum, magna contumacia civitatum, tamen satis celeriter habuimus. Secuti sumus classem Dolabellæ, cui Lucilius præerat: qui, spem sæpe transitionis præbendo, neque umquam non decedendo, novissime Corycū se contulit; & clauso portu se tenere cœpit. Nos, illa relicta, quod & in castra pervenire satius esse putabamus, & sequebatur classis altera, quam anno priore in Bithynia Tullius Cimber compararat, cui Turullius quæstor præerat; Cyprum petivimus. Ibi, quæ cognovimus, scribere ad vos quam celerrime volumus. Dolabellam, ut Tarsenses, pessimi socii,

ita

ita Laodicensi multo amentiores ultro arcessierunt: ex quibus utrisque civitatibus, Græcorum militum numero, speciem exercitus effecit. Castra habet ante oppidum Laodiceam posita; & partem muri demolitus est; & castra oppido conjunxit. Cassius noster cum decem legionibus, & cohortibus viginti auxiliariis, & quatuor millibus equitum, a millibus passuum viginti castra habet posita Παλῆ: & existimat, se sine prælio posse vincere. Nam jam ternis tetradrachmis triticum penes Dolabellam est: nisi quid navibus Laodicenorum supportarit, cito fame pereat, necesse est. Ne supportare possit, & Cassii classis bene magna, cui præest Sextilius Rufus, & tres, quas nos adduximus, ego, Turulius, & Patiscus, facile præstabunt. Volo igitur, vos bene sperare, & remp. ut vos istic expeditis, ita pro nostra parte celeriter a nobis expediri posse, confidere. Vale. Data Id. Jun. Cypro, a Crommyu acride.

ARGUMENTUM.

Exponit res a se gestas; Rhodios accusat: procuratorem Asiæ petit: merita sua in Rempub. commemorat.

LENTULUS CICERONI SUO S. D. 14

CUM Brutum nostrum convenissem, eumque tardius in Asiam venturum animadverterem; in Asiam redii, ut reliquias mei laboris colligerem, & pecuniam quamprimum Romam mitterem. Interim cognovi, in Lycia esse classem Dolabellæ, ampliusque centum naves onerarias, in quas exercitus ejus imponi posset: idque Dolabellam ea mente comparasse, ut, si Syriæ spes eum frustrata esset, conscenderet in naves, & Italiam peteret, seque cum Antonio & reliquis latronibus conjungeret. Cujus rei tanto in timore fui, ut omnibus rebus relictis, cum paucioribus & mi-

noribus navibus ad illas ire conatus sim. Quæ res, si a Rhodiis non essem interpellatus, fortasse tota sublata esset: tamen magna ex parte profligata est: quandoquidem classis dissipata est: adventus nostri timore milites, ducesque effugerunt: onerariæ omnes ad unam a nobis sunt exceptæ. Certe, quod maxime timui, videor esse consecutus, ut non possit classe Dolabella in Italiam pervenire, nec, locis suis firmatis, durius vobis efficere negotium. Rhodii nos, & rempub. quam valde desperaverint, ex litteris, quas publice misi, cognoscas. Equidem multo parcius scripsi, quam re vera furere eos inveni: quod vero aliquid de his scripsi, mirari noli: mira est eorum amentia. Nec me meæ ullæ privatim injuriæ moverunt umquam: malus animus eorum in nostra salute, cupiditas partium aliarum, perseverantia in contemptione optimi cujusque ferenda mihi non fuit: nec tamen omnes perditos esse puto. Sed iidem illi, qui tum fugientem patrem meum, qui L. Lentulum, qui Pompejum, qui ceteros viros clarissimos non receperunt; iidem, tamquam aliquo fato, & nunc aut magistratum gerunt, aut eos, qui sunt in magistratu, in sua habent potestate. Itaque eadem superbia in pravitatem utuntur. Quorum improbitatem aliquando retundi, & non pati impunitate augeri, non solum utile est reip. nostræ, sed etiam necessarium. De nostra dignitate, velim tibi, ut semper curæ sit: & quocumque tempore occasionem habueris, & in senatu, & in ceteris rebus laudi nostræ suffragere. Quoniam consulibus decreta est Asia, & permissum est iis, ut, dum ipsi venirent, darent negotium, qui Asiam obtineant: rogo te, petas ab iis, ut hanc dignitatem potissimum nobis tribuant, & mihi dent negotium, ut Asiam obtineam, dum ipsorum alteruter venit. Nam, quod huc properent in magistratu venire, aut exercitum mittere, causam non habent. Do-

labella

labeila enim in Syria est, & ut tu divina tua mente prospexisti, & prædicasti, dum isti venient, Cassius eum opprimit. Exclusus enim ab Antiochia Dolabella, & in oppugnando male acceptus, nulla alia confusus urbe, Laodiceam, quæ est in Syria ad mare, se contulit: ibi spero celeriter eum pœnas daturum. Nam neque, quo refugiat, habet: neque diutius ibi poterit tantum exercitum Cassii sustinere: spero etiam confectum esse jam & oppressum. Quare non puto, Pansa, & Hirtium in consulatu properaturos in provincias exire, sed Romæ acturos consulatum. Itaque, si ab his petieris, ut interea nobis procurationem Asiæ dent, spero, te posse impetrare: præterea mihi promiserunt Pansa, & Hirtius coram, & absenti mihi scripserunt; Verriusque nostro Pansa affirmavit, se daturum operam, ne in suo consulatu mihi succedatur. Ego porro non, medius fidius, cupiditate provinciæ produci longius spatium mihi volo: nam mihi fuit ista provincia plena laboris, periculi, detrimenti. Quæ ego ne frustra subierim, neve prius, quam reliquias meæ diligentiae consequar, decedere cogar, valde laboro. Nam si potuissem, quam exegeram, pecuniam universam mittere, postularem, ut mihi succederetur. Nunc, quod Cassio dedi, quod Trebonii morte amisimus, quod etiam crudelitate Dolabellæ, aut perfidia eorum, qui mihi fidem, rei que pub. non præstiterunt, id consequi & reficere volo. Quod aliter non potest fieri, nisi spatium habuero: id ut per te consequar, velim, ut solet, tibi curæ sit. Ego me de repub. ita puto esse meritum, ut non provinciæ istius beneficium exspectare debeam, sed tantum, quantum Cassius, & Bruti, non solum illius facti periculique societate, sed etiam hujus temporis studio & virtute. Primus enim ego leges Antonianas fregi: primus equitatum Dolabellæ ad rempubl. transdixi, Cassioque tradidi: pri-

mus delectus habui pro salute omnium contra conjurationem sceleratissimam: solus Cassio, & reip. Syriam exercitusque, qui ibi erant, conjunxi. Nam, nisi ego tantam pecuniam, tantaque præsidia, & tam celeriter Cassio dedissem, ne ausus quidem esset ire in Syriam; & nunc non minora pericula reip. a Dolabella instarent, quam ab Antonio. Atque hæc omnia is feci, qui & sodalis, & familiarissimus Dolabellæ eram; conjunctissimus sanguine Antoniis; provinciam quoque illorum beneficio habebam: sed πατρίδα ἐμὴν μᾶλλον φιλοῶν, omnibus meis bellum primus indixi. Hæc etsi adhuc non magnopere mihi tulisse fructum animadverto, tamen non despero: nec defatigabor permanere non solum in studio libertatis, sed etiam in labore & periculis. Attamen, si etiam aliqua gloria justa, & merita provocabimur, senatus, & optimi cujusque officiis, majore cum auctoritate apud ceteros erimus, & eo plus prodesse reipub. poterimus. Filium tuum, ad Brutum cum veni, videre non potui, ideo quod jam in hiberna cum equitibus erat profectus. Sed medius fidius, ea esse eum opinione, & tua, & ipsius, & in primis mea causa gaudeo. Fratris enim loco mihi est, qui ex te natus, teque dignus est. Vale. Data IV. Kal. Jun. Pergæ.

A R G U M E N T U M.

Hic quoque res a se gestas exponit: invehitur in Rhodios: de Dolabella optabilia nuntiat.

P. LENTULUS P. F. PROQQ. PROPRR. COSS.
PRÆTT. TRIBB. PL. SENATUI, POPULO,
PLEBIQUE ROMANÆ S. P. D. 15

SI valetis, liberique vestri valent, bene est: ego quoque valeo. Scelere Dolabellæ oppressa Asia, in proximam provinciam Macedoniam, præsidiaque reipub., quæ M. Brutus, vir clarissimus,

mus, tenebat; me contuli; & id egi, ut, per quos celerrime posset, Asia provincia, vectigaliaque in vestram potestatem redigerentur. Quod cum pertinuisset Dolabella; & vastata provincia, correptis vectigalibus; præcipue civibus Rom. omnibus crudelissime denudatis, ac divenditis, celerius Asia excessisset, quam eo præsidium adduci potuisset: diutius morari, aut expectare præsidium non necesse habui: & quamprimum ad meum officium revertendum mihi esse existimavi, ut & reliqua vectigalia exigere, & quam deposui, pecuniam colligerem; quidquid ex ea correptum esset, aut quorum id culpa accidisset, cognoscerem quamprimum: & vos de omni re facerem certiores. Interim cum per insulas in Asiam naviganti mihi nuntiatum esset, classem Dolabellæ in Lycia esse, Rhodiosque naves complures instructas, & paratas in aqua habere; cum iis navibus, quas aut mecum adduxeram, aut comparaverat Patiscus Proquæf., homo mihi cum familiaritate, tum etiam sensibus in repub. conjunctissimus, Rhodum reverti, confisus auctoritate vestra, senatusque consulto, quo hostem Dolabellam judicaretis; fœdere quoque, quod cum iis M. Marcello, Ser. Sulpicio cons. renovatum erat, quo juraverant Rhodii, eosdem hostes se habituros, quos senatus, populusque Rom. Quæ res nos vehementer fefellit. Tantum enim absuit, ut illorum præsidio nostram firmaremus classem, ut etiam a Rhodiis urbe, portu, statione, quæ extra urbem est, commeatu, aqua denique prohiberentur nostri milites: nos vix ipsi singulis cum navigiis recipemur. Quam indignitatem diminutionemque majestatis, non solum juris nostri, sed etiam imperii, populi que Rom. idcirco tulimus, quod, interceptis litteris, cognoramus, Dolabellam, si desperasset de Syria, Ægyptoque, quod necesse erat fieri, in naves cum

omnibus suis latronibus, atque omni pecunia conscendere, esse paratum, Italiamque petere: idcirco etiam naves onerarias, quarum minor nulla erat duum millium amphorum, contractas in Lycia a classe ejus obsideri. Hujus rei timore, P. C., percitus, injurias perpeti, & cum contumelia etiam nostra omnia prius experiri malui. Itaque ad illorum voluntatem introductus in urbem, & in senatum eorum, quam diligentissime potui, causam reipub. egi, periculumque omne, quod instaret, si ille latro cum omnibus suis naves conscendisset, exposui. Rhodios autem tanta in pravitate animadverti, ut omnes firmiores putarent, quam bonos; ut hanc concordiam, & conspiracyonem omnium ordinum ad defendendam libertatem propense non crederent esse factam; ut patientiam senatus, & optimi cujusque manere etiam nunc confiderent, nec potuisse audere quemquam Dolabellam hostem judicare: ut denique omnia, quæ improbi fingeant, magis vera existimarent, quam quæ vere facta erant, & a nobis docebantur. Qua mente etiam ante nostrum adventum, post Trebonii indignissimam cædem, ceteraque tot, tamque nefaria facinora, binæ profectæ erant ad Dolabellam legationes eorum, & quidem novo exemplo, contra leges ipsorum, prohibentibus iis, qui tum magistratus gerebant. Hæc sive timore (ut dictitant) de agris, quos in continenti habent, sive furore, sive potentia paucorum (qui & antea pari contumelia viros clarissimos affecerant, & nunc maximos magistratus gerentes) nullo exemplo, neque vestra ex parte, neque nostro præsentium, neque imminenti Italiæ, urbiq; nostræ periculo, si ille parricida cum suis latronibus, navibus ex Asia, Syriaque expulsus, Italiam petiisset, mederi, cum facile possent, voluerunt. Nonnullis etiam ipsi magistratus veniebant in suspicionem, detinuisse nos, &
demo-

demorari esse, dum classis Dolabellæ certior fieret de adventu nostro. Quam suspicionem consecutæ res aliquot auxerunt, maximeque, quod subito ex Lycia Sext. Marius, & C. Titius, legati Dolabellæ, a classe discesserunt, navique longa profugerunt, onerariis relictis, in quibus colligendis non minimum temporis, laborisque consumpserunt. Itaque, cum Rhodo cum iis, quas habueramus, navibus in Lyciam venissemus, naves onerarias recepimus, dominisque restituimus: iidemque, quod maxime verebamus, ne posset Dolabella cum suis latronibus in Italiam venire, timere desimus: classem fugientem persecuti sumus usque Sydam, quæ extrema regio est provinciæ meæ. Ibi cognovi, partem navium Dolabellæ diffugisse, reliquas Syriam Cyprumque petiisse. Quibus disiectis, cum scirem, C. Cassii, singularis civis & ducis, classem maximam fore præsto in Syria, ad meum officium reverti: daboque operam, ut meum studium, & diligentiam vobis, P.C., & reipub. præstem, pecuniamque, quam maximam potero, & quam celerrime, cogam, omnibusque cum rationibus ad vos mittam. Si percurrero provinciam, & cognovero, qui nobis, & reipub. fidem præstiterunt in conservanda pecunia a me deposita; quique scelere, ultro deferentes pecuniam publicam, hoc munere societatem facinorum cum Dolabella inierunt; faciam vos certiores. De quibus, si vobis videbitur, si, ut meriti sunt, graviter constitueritis, nosque vestra auctoritate firmaveritis; facilius & reliqua exigere vectigalia, & exacta servare poterimus. Interea, quo commodius vectigalia tueri, provinciamque ab injuria defendere possim, præsidium necessarium voluntariumque comparavi. His litteris scriptis, milites circiter xxx., quos Dolabella ex Asia conscripserat, e Syria fugientes in Pamphyliam venerunt: hi nuntiaverunt, Dolabellam Antiochiam, quæ in Syria

est, venisse: non receptum, conatum esse aliquoties vi introire: repulsum semper esse cum magno suo detrimento: itaque, centum circiter amissis, ægrisque compluribus relictis, noctu Antiochia profugisse Laodiceam versus: ea nocte omnes fere Asiaticos milites ab eo discessisse: ex his ad octingentos Antiochiam rediisse, & se iis tradidisse, qui, a Cassio relictis, urbi illi præerant: ceteros per Amanum in Ciliciam descendisse, quo ex numero se quoque esse dicebant: Cassium autem cum suis omnibus copiis, nuntiatum esse, quatruidui iter a Laodicea abfuisse, tum, cum Dolabella eo tenderet. Quamobrem opinione celerius confido, sceleratissimum latronein pœnas daturum. IV. Non. Jun. Pergæ.

A R G U M E N T U M.

Gratulatur de Ciceronis filii indole ad virtutem: versus, in malum civem a se conscriptos, mittit: petit, ut includantur in Ciceronis scripta de Cæsaris interitu.

C. TREBONIUS CICERONI S. D. 16

SI vales, bene est. Athenas veni ad XI. Kal. Jun., atque ibi, quod maxime optabam, vidi filium tuum, deditum optimis studiis, summaque modestiæ fama. Qua ex re quantam voluptatem ceperim, scire potes, etiam me tacente. Non enim nescis, quanti te faciam, & quam pro nostro veterrimo verissimoque amore, omnibus tuis etiam minimis commodis, non modo tanto bono, gaudeam. Noli putare, mi Cicero, me hoc auribus tuis dare: nihil adolescente tuo, atque adeo nostro (nihil enim mihi a te potest esse sejunctum) aut amabilius omnibus iis, qui Athenis sunt, est, aut studiosius earum artium, quas tu maxime amas, hoc est, optimarum. Itaque tibi, quod vere facere possum, libenter quoque gratulor, nec minus
etiam

etiam nobis : quod eum , quem necesse erat diligere , qualiscumque esset , talem habemus , ut libenter quoque diligamus . Qui cum mihi in sermone iniecisset , se velle Asiam visere : non modo invitatus , sed etiam rogatus est a me , ut id potissimum , nobis obtinentibus provinciam , faceret . Cui nos & caritate & amore tuum officium præstatu-ros , non debes dubitare . Illud quoque erit nobis curæ , ut Cratippus una cum eo sit , ne putes in Asia feriatum illum ab iis studiis , in quæ tua cohortatione incitatur , futurum . Nam illum paratum , ut video , & ingressum pleno gradu cohortari non intermittemus , quo in dies longius , discendo exercendoque se , procedat . Vos quid ageritis in repub. , cum has litteras dabam , non sciebam . Audiebam quædam turbulenta : quæ scilicet cupio esse falsa , ut aliquando otiosa libertate fruamur , quod vel minime adhuc mihi contigit . Ego tamen nactus in navigatione nostra pusillum laxamenti , concinnavi tibi munusculum ex instituto meo : & dictum , cum magno nostro honore a te dictum , conclusi , & tibi infra subscripsi . In quibus versiculis si tibi quibusdam verbis *διδύπην μὲν ἐπεὶ* videbor , turpitudine personæ ejus , in quam liberius invehimur , nos vindicabit . Ignosces etiam iracundiæ nostræ , quæ justa est in ejusmodi & homines , & cives . Deinde , qui magis hoc Lucilio licuerit assumere libertatis , quam nobis ? cum , etiam si odio par fuerit in eos , quos læsit , tamen certe non magis dignos habuerit , in quos tanta libertate verborum incurreret . Tu , sicut mihi pollicitus es , adjunges me quamprimum ad tuos sermones . Namque illud non dubito , quin , si quid de interitu Cæsaris scribas , non patiaris , me minimam partem & rei , & amoris tui ferre . Vale , & matrem , meosque tibi commendatos habe . D. VIII. Kalend. Jun. Athenis .

ARGUMENTUM.

Varia scribit, de rumoribus e Syria allatis, de Civitatis otio, de Oratore a se scripto, de suo studio in Cornificium; is autem Syriam regebat, ut infra patet.

M. T. C. Q. CORNIFICIO COLLEGÆ S. D. 17

GRata mihi vehementer est memoria nostri tua, quam significasti litteris: quam ut conserves, non quo de tua constantia dubitem, sed quia mos est ita rogandi, rogo. Ex Syria nobis tumultuosiora quædam nuntiata sunt; quæ, quia tibi sunt propria, quam nobis, tua me causa magis movent, quam mea. Romæ summum otium est: sed ita, ut malis salubre aliquod, & honestum negotium, quod spero fore, quia video, id curæ esse Cæsari. Me scito, dum tu absis, quasi occasionem quamdam, & licentiam nactum, scribere audacius, & cetera quidem fortasse, quæ etiam tu concederes: sed proxime scripsi de optimo genere dicendi; in quo sæpe suspicatus sum, te a iudicio nostro, sic scilicet, ut doctum hominem a non indocto, paululum dissidere. Huic tu libro maxime velim ex animo, si minus, gratiæ causa suffragere. Dicam tuis, ut eum, si velint, describant, ad teque mittant. Puto enim, etiamsi rem minus probabis, tamen in ista solitudine, quidquid a me profectum sit, jucundum tibi fore. Quod mihi existimationem tuam dignitatemque commendas, facis tu quidem omnium more: sed velim sic existimes, me cum amori, quem inter nos mutuum esse intelligam, plurimum tribuere, tum de summo ingenio, & de optimis tuis studiis, & de spe amplissimæ dignitatis ita judicare, ut neminem tibi anteponom, comparem paucos. Vale.

ARGUMENTUM.

Purgat se de infrequentia litterarum: prudentiam Cornificii, gravitatemque laudat: presentem Rei-publicæ statum accusat, cum Cæsaris excusatione.

M. T. C. CORNIFICIO COLLEGE S. D. 18

QUOD extremum fuit in epistola, quam a te proxime accepi, ad id primum respondebo. Animadverti enim, hoc vos magnos oratores facere nonnumquam. Epistolas requiris meas: ego autem numquam, cum mihi denuntiatum esset a tuis, ire aliquem, non dedi. Quod mihi videor ex tuis litteris intelligere, te nihil commissurum esse temere, nec ante, quam scisses, quo iste, nescio qui, Cæcilius Bassus erumperet, quidquam certi constituturum, id ego & sperarem, prudentia tua fretus: &, ut considerem, fecerunt tuæ gravissimæ litteræ. Idque ut facias quam sæpissime, ut, & quid tu agas, & quid agatur, scire possim, & etiam quid acturus sis, valde te rogo. Etsi periniquo patiebar animo, te a me digredi, tamen eo tempore me consolabar, quod & in summum otium te ire arbitrabar, & ab impendentibus magnis negotiis discedere. Utrumque contra accidit: istic enim bellum est exortum, hic pax consecuta: sed ejusmodi pax, in qua si adesses, multa te non delectarent: ea tamen, quæ ne ipsum Cæsarem quidem delectent. Bellorum enim civilium ii semper exitus sunt, ut non ea solum fiant, quæ velit victor, sed etiam ut iis mos gerendus sit, quibus adiutoribus parta sit victoria. Equidem sic jam obdurui, ut ludis Cæsaris nostri æquissimo animo viderem T. Plancum, audirem Laberii & Publii poemata. Nihil tam deesse scito, quam quicum hæc familiariter doctæque rideam. Is tu eris, si quamprimum veneris. Quod ut facias, non mea solum, sed etiam tua interesse arbitror. Vale.

ARGUMENTUM.

Gratulatur de Syriæ administratione, eamque optat a bello vacuam: quod si bellum sit, suadet, quid sit agendum.

M. T. C. CORNIFICIO S. D.

19

Libentissime legi tuas litteras, in quibus jucundissimum mihi fuit, quod cognovi, meas tibi redditas esse. Non enim dubitabam, quin eas libenter lecturus esses: verebar, ut redderentur. Bellum, quod est in Syria, Syriamque provinciam tibi tributam esse a Cæsare, ex tuis litteris cognovi. Eamdem rem tibi volo bene & feliciter evenire: Quod ita fore confido, fretus & industria & prudentia tua. Sed de Parthici belli suspicione quod scribis, sane me commovit. Quantum copiarum haberes, cum ipse conjectura consequi poteram, tum ex tuis litteris cognovi. Itaque opto, ne se illa gens moveat hoc tempore, dum ad te legiones eæ perducantur, quas audio duci. Quod si pares copias ad confligendum non habebis, non te fugiet, uti consilio M. Bibuli, qui se oppido munitissimo & copiosissimo tamdiu tenuit, quamdiu in provincia Parthi fuerunt. Sed hæc melius ex re, & ex tempore constitues. Mihi quidem usque curæ erit, quid agas, dum, quid egeris, sciero. Litteras ad te numquam habui cui darem, quin dederim. A te, ut idem facias, peto; in primisque, ut ita ad tuos scribas, ut me tuum sentiant esse. Vale.

ARGUMENTUM.

Jocatur, quia Cornificius Sinuessanæ villæ hospitio uti noluerat, & crebras ab eo litteras petit.

M. T. C. CORNIFICIO COLLEGE S. D. 20

GRatæ mihi tuæ litteræ, nisi quod Sinuessanum diversoriolum contempsisti. Quam quidem

dem contumeliam villa pusilla iniquo animo feret, nisi in Cumano, & Pompejano reddideris *πάντα περὶ πάντων*. Sic igitur facies, meque amabis, & scripto aliquo laceffes. Ego enim respondere facilius possum, quam provocare. Quod si, ut es, cessabis, laceffam, nec tua ignavia etiam inertiam afferet. Plura otiosus. Hæc, cum essem in senatu, exaravi. Vale.

ARGUMENTUM.

Commendat Anicium Senatorem, ejusque negotia & dignitatem.

M. T. C. CORNIFICIO S. D. 21

C. Anicius, familiaris meus, vir omnibus rebus ornatus, negotiorum suorum causa legatus est in Africam legatione libera. Eum, velim, rebus omnibus adjuves, operamque des, ut quam commodissime sua negotia conficiat: in primisque, quod ei carissimum est, dignitatem ejus tibi commendo: idque a te peto, quod ipse in provincia facere solitus sum non rogatus, ut omnibus senatoribus lictores darem: quod idem acceperam & cognoveram a summis viris factitatum. Hoc igitur, mi Cornifici, facies: ceterisque rebus omnibus ejus dignitati reiue, si me amas, consules: id erit mihi gratissimum. Da operam, ut valeas.

ARGUMENTUM.

Narrat de statu Reip. post Caesaris mortem: hortaturque Cornificium, ut Provinciam retineat in potestate Reipub.

M. T. C. CORNIFICIO S. D. 22

NOs hic cum homine gladiatore, omnium nequissimo, collega nostro, Antonio, bellum gerimus, sed non pari conditione, contra arma verbis. At etiam de te concionatur: nec impune:

ne : nam sentiet, quos laceffierit. Ego autem acta ad te omnia arbitror perferri ab aliis : a me futura debes cognoscere : quorum quidem non est difficilis conjectura. Oppressa omnia sunt : nec habent ducem boni : nostrique τυραννοκτόνοι longe gentium absunt. Panfa & sentit bene, & loquitur fortiter : Hirtius noster tardius convalescit. Quid futurum sit, plane nescio. Spes tamen una est, aliquando populum Roman. majorum similem fore. Ego certe reip. non deero : &, quidquid acciderit, a quo mea culpa absit, animo forti feram. Illud profecto, quoad potero, tuam famam & dignitatem tuebor. Ad XIII. Kal. Jan. senatus frequens mihi est assensus, tum de ceteris rebus magnis & necessariis, tum de provinciis ab iis, qui obtinerent, retinendis, neque cuiquam tradendis, nisi qui ex S. C. successisset. Hoc ego cum reip. causa censui, tum mehercule in primis retinendæ dignitatis tuæ. Quamobrem te amoris nostri causa rogo, reip. causa horror, ut ne cui quidquam juris in tua provincia esse patiare : atque ut omnia referas ad dignitatem, qua nihil potest esse præstantius. Vere tecum agam, aut necessitudo nostra postulat. In Sempronio, si meis litteris obtemperasses, maximam ab omnibus laudem adeptus esses. Sed illud & præterit, & levius est. Hæc magna res est. Fac, ut provinciam retineas in potestate reipub. Plura scripsissem, nisi tui festinarent. Itaque Cherippo nostro me velim excuses. Vale.

A R G U M E N T U M.

Primum respondet ad ea, quæ de Provincia Cornificii a Stratorio cognoverat : deinde quasi formam Reipublicæ mittit : & philosophiam laudat.

M. T. C. CORNIFICIO S. D.

23

OMnem conditionem imperii tui, statumque provinciæ mihi demonstravit Stratorius. **O**
unus

multa intolerabilia locis omnibus! Sed, quo tua major dignitas, eo, quæ tibi acciderunt, minus ferenda. Neque enim, quæ tu propter magnitudinem & animi & ingenii moderate fers, a te non ulciscenda sunt, etiam si non sint dolenda. Sed hæc posterius. Rerum urbanarum acta tibi mitti certo scio: quod ni ita putarem, ipse perscriberem, in primisque Cæsaris Octaviani conatum: de quo multitudini fictum ab Antonio crimen videtur, ut in pecuniam adolescentis impetum faceret. Prudentes autem & boni viri & credunt factum, & probant. Quid quæris? magna spes est in eo. Nihil est, quod non existimetur laudis & gloriæ causa facturum. Antonius autem, noster familiaris, tanto se odio esse intelligit, ut cum interfectores suos domi comprehenderit, rem proferre non audeat. Ad VII. Id. Octob. Brundisium venerat, profectus obviam legionibus Macedonicis quatuor: quas sibi conciliare pecunia cogitabat, easque ad urbem adducere, & in cervicibus nostris collocare. Habes formam reipub., si in castris potest esse resp., in qua tuam vicem sæpe doleo, quod nullam partem per ætatem sanæ & salvæ reipub. gustare potuisti. Atque antehac quidem sperare saltem licebat: nunc etiam illud ereptum est. Quæ enim spes est, cum in concione dicere ausus sit Antonius, Canutium apud eos locum sibi quærere, quibus, se salvo, locus in civitate esse non posset? Equidem & hæc, & omnia, quæ homini accidere possunt, sic fero, ut magnam habeam philosophiæ gratiam, quæ me non modo a sollicitudine abducit, sed etiam contra omnes fortunæ impetus armat: tibi que idem censeo faciendum, nec, a quo culpa absit, quidquam in malis numerandum. Sed hæc tu melius. Stratorum nostrum cum semper probassem, tum maxime in tuis rebus summam ejus fidem, diligentiam,

tiam, prudentiamque cognovi. Da operam, ut valeas: hoc mihi gratius facere nihil potes.

A R G U M E N T U M.

Hortatur Cornificium, ut omni cura in Rempub. incumbat. Scribit de legatis ad Antonium a Senatu missis. Pinarium commendat.

M. T. C. CORNIFICIO S. D. 24

EGO nullum locum prætermitto (nec enim debeo) non modo laudandi tui, sed ne ornandi quidem. Sed mea studia erga te, & officia malo tibi ex tuorum litteris, quam ex meis, esse nota. Te tamen hortor, ut omni cura in rempub. incumbas: hoc est animi, hoc est ingenii tui, hoc ejus spei, quam habere debes amplificandæ dignitatis tuæ. Sed hac de re alias ad te pluribus: cum enim hæc scribebam, in expectatione erant omnia: nondum legati redierant, quos senatus non ad pacem deprecandam, sed ad bellum denuntiandum miserat, nisi legatorum nuntio paruisset. Ego tamen, ut primum occasio data est, meo pristino more rempub. defendi: me principem Senatui, populoque Rom. professus sum: nec, posteaquam suscepi causam libertatis, minimum tempus amisi tuendæ salutis libertatisque communis. Sed hæc quoque te ex aliis malo. T. Pinarium, familiarissimum meum, tanto tibi studio commendo, ut majore non possim. Cui cum propter omnes virtutes, tum etiam propter studia communia, sum amicissimus. Is procurat rationes negotiaque Dionysii nostri, quem & tu multum amas, & ego omnium plurimum. Ea tibi ego non debeo commendare, sed commendo tamen. Facies igitur, ut ex Pinarii, gratissimi hominis, litteris, tuum & erga illum, & erga Dionysium studium perspiciamus. Vale.

AR-

ARGUMENTUM.

Scribit, ex litteris Cornificii S. C. esse factum: hortatur, ut Reip. causam amplectatur: Luccejo se nulla re defuturum pollicetur.

M. T. C. CORNIFICIO S. D. 25

Liberalibus litteras accepi tuas, quas mihi Cornificius altero vicesimo die, ut dicebat, reddidit. Eo die non fuit senatus, neque postero. Quinquatribus, frequenti senatu, causam tuam egi, non invita Minerva. Etenim eo ipso die senatus decrevit, ut Minerva nostra, custos urbis, quam turbo dejecerat, restitueretur. Pansa tuas litteras recitavit. Magna senatus approbatio consecuta est cum summo gaudio, & offensione Minotauri, id est Calvisii, & Tauri. Factum de te S. C. honorificum. Postulabatur, ut etiam illi notarentur: sed Pansa clementior. Ego, mi Cornifici, quo die primum in spem libertatis ingressus sum, &, cunctantibus ceteris, ad XIII. Kalend. Januar. fundamenta reip. jeci; eo ipso die providi multum, atque habui rationem dignitatis tuæ. Mihi enim est assensus senatus de obtinendis provinciis. Nec vero postea destitit labefactare eum, qui summa cum tua injuria, contumeliaque reipub. provinciam absens obtinebat. Itaque crebras, vel potius quotidianas compellationes meas non tulit, seque in urbem recepit invitus: neque solum spe, sed certa re jam, & possessione deturbatus est. Meo iustissimo honestissimoque convicio te tuam dignitatem summa tua virtute tenuisse, provinciarumque honoribus amplissimis affectum, vehementer gaudeo. Quod te mihi de Sempronio purgas, accipio excusationem: fuit enim illud quoddam cæcum tempus servitutis. Ego tuorum consiliorum auctor, dignitatisque fautor, iratus temporibus,
in

in Græciam, desperata libertate, rapiebar: cum me Etesia, quasi boni cives, relinquentem reimp. prosequi noluerunt: Austerque adversus maximo flatu me ad tribules tuos Rhegium retulit: atque inde ventis remisque in patriam omni festinatione properavi: postridieque in summa reliquorum servitute liber unus fui. Sic sum in Antonium invehctus, ut ille non ferret, omnemque suum vinolentum furorem in me unum effunderet, meque cum elicere vellet ad cædis causam, tum tentaret insidiis: quem ego ructantem, & nauseantem conieci in Cæsaris Octavianæ plagas. Puer enim egregius præsidium sibi primum, & nobis, deinde summæ reipub. comparavit: qui nisi fuisset, Antonii reditus a Brundisio pestis patriæ fuisset. Quæ deinceps acta sint, scire te arbitror. Sed redeamus ad illud, unde divertimus. Accipio excusationem tuam de Sempronio: neque enim statuti quid in tanta perturbatione habere potuisti. *Nunc hic dies aliam vitam affert, alios mores postulat*, ut ait Terentius. Quamobrem, mi Quinte, conscende nobiscum, & quidem ad puppim. Una navis est jam bonorum omnium: quam quidem, nos damus operam, ut rectam teneamus, utinam prospero cursu. Sed, quicumque venti erunt, ars nostra certe non aberit. Quid enim præstare aliud virtus potest? Tu fac, ut animo magno sis & excelso: cogitesque, omnem dignitatem tuam cum reipub. conjunctam esse debere. P. Luccejum mihi meum commendas, quem quibuscumque rebus potero, diligenter tuebor. Hirtium quidem, & Pansam collegas nostros, homines in consulatu reipub. salutares, alieno sane tempore amisimus, republica Antoniano quidem latrocinio liberata, sed nondum omnino explicata: quam nos, si licebit, more nostro tuebimur: quamquam admodum sumus jam defatigati. Sed nulla lassitudo impe-

impedire officium & fidem debet. Verum hæc hæc hactenus. Ab aliis te de me, quam a me ipso, malo cognoscere. De te audiebamur ea, quæ maxime vellemus. De Cn. Minutio, quem tu quibusdam litteris ad cælum laudibus extulisti, rumores duriores erant. Id quale sit, omninoque quid istic agatur, facias me velim certiorum. Vale.

A R G U M E N T U M.

Hæredes Turii commendat.

M. T. C. CORNIFICIO S. D. 26

Q Turius, qui in Africa negotiatus est, vir bonus & honestus, hæredes fecit similes sui Cn. Saturninum, Sex. Aufidium, C. Annejum, Q. Confidium Gallum, L. Servilium Posthumum, C. Rubellinum. Ex eorum oratione intellexi, gratiarum actione eos magis egere, quam commendatione. Tanta enim liberalitate se tuos prædicabant, ut iis plus a te tributum intelligerem, quam ego auderem te rogare. Audebo tamen; scio enim, quantum ponderis mea commendatio sit habitura. Quare a te peto, ut ad eam liberalitatem, qua sine meis litteris usus es, quam maximus his litteris cumulus accedat. Caput autem est meæ commendationis, ne pariare Erotem Turium, Q. Turii libertum, ut adhuc fecit, hæreditatem Turianam avertere; ceterisque omnibus rebus habeas eos a me commendatissimos. Magnam ex eorum splendore & observantia capies voluptatem. Quod ut velis, te vehementer etiam atque etiam rogo. Vale.

A R G U M E N T U M.

Aufidii equitis Rom. Africana negotia commendat.

M. T. C. CORNIFICIO S. D. 27

S Ex. Aufidius & observantia, qua me colit, accedit ad proximos, & splendore equiri Romano

mano nemini cedit. Est autem ita temperatis moderatisque moribus, ut summa severitas summa cum humanitate jungatur. Cujus tibi negotia, quæ sunt in Africa, ita commendo, ut majore studio, magisve ex animo commendare non possim. Pergratum mihi feceris, si dederis operam, ut is intelligat, meas apud te litteras maximum pondus habuisse. Hoc te vehementer, mi Cornifici, rogo. Vale.

A R G U M E N T U M.

Cornificii factum non probat, quia non animadvertat in quosdam Lilybæo minantes: studium in Rempub. laudat: de omittenda gratiarum actione assentitur: addit de pecunia, & de Rep.

M. T. C. CORNIFICIO S. D. 28

Assentior tibi, eos, quos scribis Lilybæo minari, istic pœnas dare debuisse: sed metuisti, ut ais, ne nimis liber in ulciscendo viderere. Metuisti igitur, ne gravis civis, ne nimis fortis, ne nimis te dignus viderere. Quod societatem reip. conservandæ, tibi mecum a patre acceptam, renovas, gratum est: quæ societas inter nos semper, mi Cornifici, manebit. Gratum etiam illud, quod mihi tuo nomine gratias agendas non putas, nec enim id inter nos facere debemus. Senatus sæpius pro dignitate tua appellaretur, si absentibus consulibus, unquam, nisi ad rem novam, cogeretur. Itaque nec de H. S. XX., nec de H. S. DCC. quidquam agi nunc per senatum potest. Tibi autem ex S. C. imperandum, mutuumque sumendum censeo. In republica quid agatur, credo, te ex eorum litteris cognoscere, qui ad te acta debent perscribere. Ego sum spe bona: consilio, cura, labore non desum: omnibus inimicis reip. esse me acerrimum hostem præ me fero. Res neque nunc difficili loco mihi
vide-

videtur esse : & fuisset facillimo , si culpa a quibusdam abfuisset . Vale .

ARGUMENTUM .

Commendat studiose L. Ælii Lamiae negotia ; eumque suspectum Cornificio , quasi affuisset cuidam S. C. contra dignitatem ejus , excusat .

M. T. C. CORNIFICIO S. D.

29

NON modo tibi , cui omnia nostra notissima sunt , sed neminem in populo Romano arbitrator esse , cui sit ignota ea familiaritas , quæ mihi cum L. Lamia est . Etenim magno theatro spectata est tum , cum est ab A. Gabinio Cos. relegatus , quod libere & fortiter salutem meam defendisset . Nec ex eo amor inter nos natus est : sed , quod erat vetus & magnus , propterea nullum periculum pro me adire dubitavit . Ad hæc officia , vel merita potius , jucundissima consuetudo accedit , ut nullo prorsus plus homine delecter . Non puto , te jam exspectare , quibus eum tibi verbis commendem : causam enim tanti amoris intelligis : quæ verba desideret , iis me omnibus usum putato . Tantum velim existimes , si negotia Lamiae , procuratores , liberos , familiam , quibuscumque rebus opus erit , defenderis , gratius mihi futurum , quam si ea tua liberalitas pertinuisset ad rem familiarem meam . Nec dubito , quin sine mea commendatione , quod tuum est iudicium de hominibus , ipsius Lamiae causa studiose omnia facturus sis : quamquam erat nobis dictum , te existimare , alicui S. C. , quod contra dignitatem tuam fieret , scribendo Lamiam affuisse : qui omnino consulibus illis numquam affuit scribendo : deinde omnia tum falsa S. C. deferebantur . Nisi forte etiam illi Semproniano S. C. me censes affuisse , qui ne Romæ quidem tum fui , ut de eo ad te scripsi , te recenti . Sed hæc hætenus . Te , mi Cornifici , etiam atque

que etiam rogo, ut omnia Lamiæ negotia, mea putes esse; curesque, ut intelligat, hanc commendationem maximo sibi usui fuisse. Hoc mihi gratius facere nihil potes. Cura, ut valeas.

A R G U M E N T U M .

Officium litterarum requirenti Cornificio se purgat; scribit de bello Antoniano renovato, de suo studio in amicitia colenda, aliisque de rebus.

M. T. C. CORNIFICIO S. D.

39

ITa ne? præter litigatores, nemo ad te meas litteras? Multæ istæ quidem: tu enim perfecisti, ut nemo sine litteris meis tibi se commendatum putaret. Sed quis umquam tuorum mihi dixit esse, cui darem, quin dederim? aut quid mihi jucundius, quam, cum coram tecum loqui non possim, aut scribere ad te, aut tuas legere litteras? Illud magis mihi solet esse molestum, tantis me impediri occupationibus, ut ad te scribendi meo arbitratu facultas nulla detur. Non enim te epistolis, sed voluminibus lacefferem; quibus quidem me a te provocari oporteret. Quamvis enim occupatus sis, otii tamen plus habes. Aut, si ne tu quidem vacas, noli impudens esse, nec mihi molestiam exhibere, & a me litteras crebriores, cum tu mihi raras mittas, flagitare. Nam cum antea distinebar maximis occupationibus, propterea quod omnibus curis rempublicam mihi tuendam putabam; tum hoc tempore multo distineor vehementius. Ut enim gravius ægrotant ii, qui, cum levati morbo viderentur, in eum de integro inciderunt, sic vehementius nos laboramus, qui, profligato bello, ac pæne sublato, renovatum bellum gerere conamur. Sed hæc hætenus. Tu tibi, mi Cornifici, fac, ut persuadeas, non esse me tam imbecillo animo, ne dicam inhumano, ut a te vinci possim aut officiis, aut amore. Non dubitabam equidem:

dem : verumtamen multo mihi notiozem amorem tuum effecit Cherippus . O hominem semper illum quidem mihi aptum , nunc vero etiam suavem ! Vultus mehercule tuos mihi expressit omnes ; non solum animum , ac verba pertulit . Itaque noli vereri , ne tibi succensuerim , quod eodem exemplo ad me , quo ad ceteros . Requisivi equidem proprias ad me unum a te litteras , sed neque vehementer , & amanter . De sumptu , quem te in rem militarem facere , & fecisse dicis , nihil sane possum tibi opitulari : propterea quod & orbus est senatus , consulibus amissis ; & incredibiles angustiae pecuniae publicae , quae conquiruntur undique , ut optime meritis militibus promissa solvantur : quod quidem fieri sine tributo posse non arbitror . De Attio Dionysio nihil puto esse , quoniam mihi nihil dixit Stratorius . De P. Luccejo nihil tibi concedo , quo studiosior ejus sis , quam ego sum : est enim nobis necessarius . Sed a magistris cum contenderem de proferendo die , probaverunt mihi , sese , quominus id facerent , & compromissio & jurejurando impediri . Quare veniendum arbitror Luccejo : quamquam , si meis litteris obtemperavit , cum tu hae leges , illum Romae esse oportebit . Ceteris de rebus , maximeque de pecunia , cum Pansa mortem ignorares , scripsisti , quae per nos ab eo consequi te posse arbitrare : quae te non fefellissent , si viveret ; nam te diligebat . Post mortem autem ejus quid fieri posset , non videbamus . De Venulejo , Latino , Horatio , valde laudo . Illud non nimium probo , quod scribis , quo illi animo æquiore ferrent , te tuis etiam legatis lictores ademisse . Honore enim digni cum ignominia dignis non erant comparandi : eosque ex S. C. si non decedunt , cogendos , ut decedant , existimo . Hae fere ad eas litteras , quas eodem exemplo binas accepi . De reliquo , velim tibi persuadeas , non esse mihi meam dignitatem tua carior . Vale .

LIBER XIII.

ARGUMENTUM.

Memmius, lege Pompeja de ambitu, ut Appianus tradit lib. 2. de bel. civ., condemnatus, Athenis exsul habitabat. Ab eo petit Cicero, ut in gratiam redeat cum Patrone Epicureo: eique locum concedat, ubi Epicurus habitaverat. Ibat Cicero in provinciam, cum hæc scripsit, ut in ep. II. l. 5. ad Att.

M. T. C. C. MEMMIO S. D.

I

ET si non satis mihi constiterat, cum aliqua ne animi mei molestia, an potius libenter te Athenis visurus essem; quod injuria, quam accepisti, dolore me afficeret; sapientia tua, qua fers injuriam, lætitia: tamen vidisse te malletm. Nam, quod est molestiæ, non sane multo levius est, cum te non video: quod esse potuit voluptatis, certe, si vidissem te, plus fuisset. Itaque non dubitabo dare operam, ut te videam, cum id satis commode facere potero. Interea quod per litteras, & agi tecum, & ut arbitror, confici potest, agam. Nunc a te illud primum rogabo, ne quid invitus mea causa facias; sed id, quod mea intelliges multum, tua nullam in partem interesse, ita mihi des, si tibi, ut id libenter facias, ante persuaseris. Cum Patrone Epicureo mihi omnia sunt, nisi quod in philosophia vehementer ab eo dissentio. Sed & initio Romæ, cum te quoque & tuos omnes observabat, me coluit in primis: & nuper cum ea, quæ voluit, de suis commodis & præmiis consecutus est, me habuit suorum defensorum & amicorum fere principem: & jam a Phædro, qui nobis, cum pueri essemus, antequam Philonem cognovimus, valde, ut philosophus, postea tamen, ut vir bonus, & suavis, & officiosus probabatur, traditus mihi commendatusque est.

Is

Is igitur Patro, cum ad me Romam litteras misisset, uti te sibi placarem, peteremque, ut nescio quid illud Epicuri parierinarum sibi concederes; nihil scripsi ad te ob eam rem, quod ædificationis tuæ consilium mea commendatione nolebam impediri. Idem, ut veni Athenas, cum idem, ut ad te scriberem, rogasset, ob eam causam impetravit, quod, te abjecisse illam ædificationem, constabat inter omnes amicos tuos. Quod si ita est, & si jam plane tua nihil interest, velim, si qua offensuscula facta est animi tui, perversitate aliquorum, (novi enim gentem illam) des te ad lenitatem, vel propter tuam summam humanitatem, vel etiam honoris mei causa. Equidem, si quid ipse sentiam, quæris; nec cur ille tantopere contendat, video, nec cur tu repugnes: nisi tamen multo minus tibi concedi potest, quam illi, laborare sine causa. Quamquam, Patronis & orationem & causam tibi cognitam esse, certo scio: honorem, officium, testamentorum jus, Epicuri auctoritatem, Phædri obtestationem, sedem, domicilium, vestigia summorum hominum sibi tuenda esse dicit. Totam hominis vitam rationemque, quam sequitur in philosophia, derideamus licet, si hanc ejus contentionem volumus reprehendere. Sed mehercule, quando illi, ceterisque, quos illa delectant, non valde inimici sumus; nescio, an ignoscendum sit huic, si tantopere laborat: in quo etiam si peccat, magis ineptiis, quam improbitate peccat. Sed, ne plura; (dicendum enim aliquando est) Pomponium Atticum sic amo, ut alterum fratrem: nihil est illo mihi nec carius, nec jucundius. Is, non quo sit ex istis, (est enim omni liberali doctrina politissimus: sed valde diligit Patronem, valde Phædrum amavit) sic a me hoc contendit, homo minime ambitiosus, minime in rogitando molestus, ut

nihil umquam magis: nec dubitat, quin ego a te nutu hoc consequi possim, ita etiam, si ædificaturus esses. Nunc vero, si audierit, te ædificationem deposuisse, neque tamen me a te impetrasse, non te in me illiberalem, sed me in se negligentem putabit. Quamobrem peto a te, ut scribas ad tuos, posse tua voluntate decretum illud Areopagitarum, quem ὑπομνηκτισμὸν illi vocant, tolli. Sed redeo ad prima. Prius velim tibi persuadeas, ut hoc mea causa libenter facias, quam ut facias. Sic tamen habeto; si feceris, quod rogo, fore mihi gratissimum. Vale.

A R G U M E N T U M.

Petit, ut Euandro statuario de sacrarii habitatione accommodet.

M. T. C. MEMMIO S. D.

2

C. Aviano Euandro, qui habitat in tuo sacrario, & ipso multum utor, & patrono ejus M. Emilio familiarissime. Peto igitur a te majorem in modum, quod sine tua molestia fiat, ut ei de habitatione accommodes. Nam, propter opera instituta multa multorum, subitum est ei remigrare Kal. Quint. Impedior verecundia, ne te pluribus verbis rogem. Neque tamen dubito, quin, si tua nihil, aut non multum interfit, eo sis animo, quo ego essem, si quid tu me rogares: mihi certe gratissimum feceris. Vale.

A R G U M E N T U M.

Fusium commendat, quem & ante præsens præfenti commendarat.

M. T. C. MEMMIO S. D.

3

A. Fusium, unum ex meis intimis, observantissimum studiosissimumque nostri, erudi-

ditum hominem, & summa humanitate, tuaque amicitia dignissimum, velim ita tractes, ut mihi coram recepisti. Tam mihi gratum id erit, quam quod gratissimum. Ipsum præterea, summo officio, & summa observantia tibi in perpetuum devinxeris. Vale.

ARGUMENTUM.

Volaterranos accurate commendat.

M. T. C. Q. VALERIO, Q. F. ORCÆ,
LEGATO PROPÆT. S. D.

4

CUM municipibus Volaterranis mihi summa necessitudo est: magno enim meo beneficio affecti, cumulatissime mihi gratiam retulerunt: nam nec in honoribus meis, nec in laboribus umquam defuerunt. Cum quibus si mihi nulla causa intercederet, tamen, quod te vehementissime diligo, quodque me a te plurimi fieri sentio, & monerem te, & hortarer, ut eorum fortunis consuleres; præsertim cum prope præcipuam causam haberent ad jus obtinendum. Primum, quod Syllani temporis acerbiter, Deorum immortalium benignitate, subterfugerunt: deinde, quod summo studio pop. Rom. a me in consulatu meo defensi sunt. Cum enim tribuni pl. legem iniquissimam de eorum agris promulgassent, facile senatui, populoque Rom. persuasi, ut eos cives, quibus fortuna pepercisset, salvos esse vellent. Hanc actionem meam C. Cæsar primo suo consulatu in lege Agraria comprobavit, agrumque Volaterranum, & oppidum omni periculo in perpetuum liberavit: ut mihi dubium non sit, quin is, qui novas necessitudines adjungat, vetera sua beneficia conservari velit. Quamobrem est tuæ prudentiæ, aut sequi ejus auctoritatem, ¹¹¹¹¹¹¹¹ cujus sectam atque imperium summa cum tua dignitate secutus es; aut certe illi in-

tegram omnem causam reservare. Illud vero dubitare non debes, quin tam grave, tam firmum, tam honestum municipium tibi tuo summo beneficio in perpetuum obligari velis. Sed hæc, quæ scripta sunt supra, eo spectant, ut te horter & suadeam. Reliqua sunt, quæ pertinent ad rogandum: ut non solum tua causa tibi consilium me dare putes, sed etiam, quod mihi opus sit, me a te petere & rogare. Gratissimum igitur mihi feceris, si Volaterranos omnibus rebus integros, incolumesque esse volueris. Eorum ego domicilia, sedes, rem, fortunas, quæ & a Diis immortalibus, & a præstantissimis in nostra repub. civibus summo senatus, populi que Romani studio conservatæ sunt, tuæ fidei, justitiæ, bonitatisque commendo. Si pro meis pristinis opibus facultatem mihi res hoc tempore daret, ut ita defendere possem Volaterranos, quemadmodum consuevi tueri meos; nullum officium, nullum denique certamen, in quo illis prodesse possem, præmitterem. Sed, quando apud te nihilo minus hoc tempore valere me confido, quam valuerim semper apud omnes; pro nostra summa necessitudine, parique inter nos & mutua benevolentia, abs te peto, ut ita de Volaterranis mereare, ut existiment, eum quasi divino consilio isti negotio præpositum esse, apud quem unum nos, eorum perpetui defensores, plurimum valere possemus. Vale.

A R G U M E N T U M.

Rogat, ne Curtii ager dividatur: idque etiam rationibus conatur persuadere.

M. T. C. Q. VALERIO, Q. F. ORCÆ,
LEGATO PROPÆT. S. D.

5

Non moleste fero, eam necessitudinem, quæ mihi tecum est, notam esse quamplurimis, neque

neque tamen ob eam causam (quod tu optime existimare potes) te impedio, quo minus susceptum negotium pro tua fide & diligentia ex voluntate Cæsaris, qui tibi rem magnam difficilemque commisit, gerere possis. Nam, cum multi a me petant multa, quod de tua erga me voluntate non dubitent; non committo, ut ambitione mea conturbem officium tuum. C. Curtio ab ineunte ætate familiarissime sum usus. Ejus & Syllani temporis injustissima calamitate dolui: &, cum iis, qui similem injuriam acceperant, amissis omnibus fortunis, reditus tamen in patriam voluntate omnium concedi videretur, adiutor incolumitatis fui. Is habet in Volaterrano possessionem, cum in eam tamquam e naufragio reliquias contulisset. Hoc autem tempore eum Cæsar in senatum legit: quem ordinem ille, ista possessione amissa, tueri vix potest. Gravissimum autem est, cum superior factus sit ordine, inferiorem esse fortuna; minimeque convenit, ex eo agro, qui Cæsaris jussu dividatur, eum moveri, qui Cæsaris beneficio senator sit: Sed mihi minus libet multa de æquitate rei scribere, ne causa potius apud te valuisse videar, quam gratia. Quamobrem te majorem in modum rogo, ut C. Curtii rem, meam putes esse; quidquid mea causa faceres, ut id, C. Curtii causa cum feceris, meum existimes, quod ille per me habuerit, id me habere abs te putato. Hoc te vehementer etiam atque etiam rogo. Vale.

A R G U M E N T U M.

Generatim omnes amicos Cuspia commendat, nominatim L. Julium, & P. Cornelium.

M. T. C. Q. VALERIO, Q. F. ORCÆ,
LEGATO PROPRÆT. S. D. 6

SI vales bene est: ego quidem valeo. Credo, te memoria tenere, me & coram P. Cuspio te,

cum locutum esse, cum te prosequeretur paludatum; & item postea plurimis verbis tecum egisse, ut, quoscumque tibi ejus necessarios commendarem, haberes eos in numero meorum necessariorum. Id tu pro tua summa erga me benevolentia, perpetuaque observantia mihi liberalissime, atque humanissime recepisti. Cuspius, homo in omnes suos officiosissimus, mirifice quosdam homines ex ista provincia tuetur, & diligit; propterea quod fuit in Africa bis, cum maximis societatis negotiis præesset. Itaque hoc ejus officium, quod adhibet erga illos, ego mea facultate & gratia soleo, quantum possum, adjuvare. Quare Cuspianorum omnium commendationis causam hac tibi epistola exponendam putavi: reliquis epistolis tantum faciam, ut notam apponam eam, quæ mihi tecum convenit, & simul significem, de numero esse Cuspii amicorum. Sed hanc commendationem, quam his litteris consignare volui, scito esse omnium gravissimam. Nam P. Cuspius singulari studio contendit a me, ut tibi quam diligentissime L. Julium commendarem. Ejus ego studio vix videor mihi satisfacere posse, si utar verbis his, quibus, cum diligentissime quid agimus, uti solemus. Nova quædam postulat; & putat, me ejus generis artificium quoddam tenere. Ei ego pollicitus sum, me ex intima nostra arte deprompturum mirificum genus commendationis. Id quando assequi non possum, tu re velim efficias, ut ille genere mearum litterarum incredibili quodam perfectum arbitretur. Id facies, si omne genus liberalitatis, quod & ab humanitate & potestate tua proficisci poterit; non modo re, sed etiam verbis, vultu denique expresseris: quæ quantum in provincia valeant, vellem expertus esses. Sed tamen suspicor, ipsum hominem, quem tibi commendo, perdignum esse tua amicitia: non solum, quia mihi Cuspius dicit, credo; tamen si id satis esse debebat: sed

sed quia novi ejus judicium in hominibus & amicis deligendis: Harum litterarum vis quanta fuerit, propediem judicabo; tibi que, ut confido, gratias agam. Ego, quæ te velle, quæque ad te pertinere arbitrabor, omnia studiose diligenterque curabo. Cura, ut valeas. P. Cornelius, qui tibi has litteras reddidit, est mihi a P. Cuspio commendatus: cujus causa quantopere cuperem, deberemque, profecto ex me facile cognovisti. Vehementer te rogo, ut cures, ut ex hac commendatione mihi Cuspium quam maximas, quamprimum, quam sæpiissime gratias agat.

ARGUMENTUM.

Petit a Cluvio, ne vectigal Atellano municipio impositum exigat: sed integram causam Cæsari reservet.

M. T. C. C. CLUVIO S. D. 7

CUM in Galliam proficiscens, pro nostra necessitudine, tuaque summa in me observantia, ad me domum venisses, locutus sum tecum de agro vectigali municipii Atellani, qui esset in Gallia; quantoque opere ejus municipii causa laborarem, tibi ostendi. Post tuam autem professionem, cum & maxima res municipii honestissimi, mihi que conjunctissimi, & summum meum officium ageretur, pro tuo animo in me singulari existimavi, me oportere ad te accuratius scribere: etsi non sum nescius, & quæ temporum ratio, & quæ tua potestas sit: tibi que negotium datum esse a C. Cæsare, non judicium, præclare intelligo. Quare a te tantum peto, quantum & te facere posse, & libenter mea causa facturum esse arbitror. Et primum velim existimes, quod res est, municipii fortunas omnes in isto vectigali consistere; his autem temporibus hoc municipium, maximis oneribus pressum, summis affectum esse

difficultatibus . Hoc etsi commune ei videtur esse cum multis , tamen mihi crede , singulares huic municipio calamitates accidisse : quas idcirco non commemoro ; ne , de miseriis meorum necessario- rum conquerens , homines , quos nolo , videar of- fendere . Itaque nisi magnam spem haberem , C. Cæsari nos causam municipii probaturos , non erat causa , cur a te hoc tempore aliquid contenderem : sed , quia confido , mihi que persuasi , il- lum & dignitatis municipii , & æquitatis , & vo- luntatis etiam erga se habiturum esse rationem ; ideo a te non dubitavi contendere , ut hanc causam illi integram conservares . Quod etsi nihilo minus a te peterem , si nihil audivissem te tale fe- cisse ; tamen maiorem spem impetrandi nactus sum , posteaquam mihi dictum est , hoc idem a te Rhegienses impetravisse : qui etsi te aliqua neces- situdine attingunt , tamen tuus amor in me spe- rare me cogit , te , quod tuis necessariis tribueris , idem esse tributurum meis : præsertim cum ego pro his unis petam ; habeam autem , qui simili causa laborent , complures necessarios . Hoc me non sine causa facere , neque aliqua levi ambitio- ne commotum a te contendere , etsi te existimare arbitror , tamen mihi affirmanti credas velim , me huic municipio debere plurimum : nullum um- quam fuisse tempus neque honorum , neque la- borum meorum , in quo non hujus municipii stu- dium in me existerit singulare . Quapropter a te etiam atque etiam pro nostra summa conjunctio- ne , proque tua in me perpetua & maxima bene- volentia maiorem in modum peto , atque contendo , ut cum fortunas agi ejus municipii intelligas , quod sit mihi necessitudine , officiis , benevolentia conjunctissimum , id mihi des . Quod erit hujus- modi , ut , si a Cæsare , quod speramus , impetra- verimus , tuo beneficio nos id consecutos esse judi- cemus : sin minus , pro eo tamen id habeamus , quan-

quando a te data sit opera, ut impetraremus. Hoc cum mihi gratissimum feceris, tum viros optimos, homines honestissimos, eosdemque gratissimos, & tua necessitudine dignissimos, summo beneficio in perpetuum tibi tuisque devinxis. Vale.

ARGUMENTUM.

Rogat Rutilium, ut in agrorum divisione Albini prædia ne attingat.

M. T. C. M. RUTILIO S. D. 8

CUM & mihi conscius essem, quanti te facerem, & tuam erga me benevolentiam expertus essem; non dubitavi a te petere, quod mihi petendum esset. P. Sextium quanti faciam, ipse optime scio; quanti autem facere debeam, & tu, & omnes homines sciunt. Is, cum ex aliis te mei studiosissimum esse cognosceret, petivit a me, ut ad te quam accuratissime scriberem de re C. Albini senatoris: cujus ex filia natus est L. Sextius, optimus adolescens, filius P. Sextii. Hoc idcirco scripsi, ut intelligeres, non solum me pro P. Sextio laborare debere, sed Sextium etiam pro Albino. Res autem hæc est. A M. Laberio C. Albinus prædia in æstimationem accepit, quæ prædia Laberius emerat a Cæsare de bonis Plotianis. Ea si dicam non esse e repub. dividi, docere te videar, non rogare. Sed tamen cum Cæsar Syllanas venditiones, & assignationes ratas esse velit, quo firmiores existimentur suæ: si ea prædia dividuntur, quæ ipse Cæsar vendidit, quæ tandem in ejus venditionibus esse poterit auctoritas? Sed hoc quale sit, tu pro tua prudentia considerabis. Ego te plane rogo, atque ita, ut majore studio, justiore de causa, magis ex animo rogare nihil possim, ut Albino parcas, prædia Laberiana ne attingas. Magna me affeceris non modo lætitia,

R v

sed

fed etiam quodammodo gloria, si P. Sextius homini maxime necessario per me satisfecerit, cum ego illi plurimum debeam. Quod ut facias, te vehementer etiam atque etiam rogo. Majus mihi dare beneficium nullum potes. Id mihi intelliges esse gratissimum. Vale.

A R G U M E N T U M .

Bithynicam publicanorum societatem, nominatimque Cn. Pupium commendat.

M. T. C. CRASSIPEDI S. D.

9

Quamquam tibi præsens commendavi, ut potui diligentissime, socios Bithyniæ; teque cum mea commendatione, tum etiam tua sponte intellexi, cupere ei societati, quibuscumque rebus posses, commodare: tamen cum ii, quorum res agitur, magni sua interesse arbitrarentur, me etiam per litteras declarare tibi, qua essem erga ipsos voluntate, non dubitavi hæc ad te scribere. Volo enim, te existimare, me, cum universo ordini publicanorum multum semper libentissime tribuerim, idque pro magnis ejus ordinis erga me meritis facere debuerim, tum in primis amicum esse huic Bithynicæ societati: quæ societas ordine ipso, & hominum genere pars est maxima civitatis: constat enim ex ceteris societatibus; & casu permulti sunt in ea societate valde mihi familiares; in primisque is, cujus præcipuum officium agitur hoc tempore, P. Rupilius P. F. Men. qui est magister in ea societate. Quæ cum ita sint, majorem in modum a te peto, Cn. Pupium, qui est in operis ejus societatis, omnibus tuis officiis, atque omni liberalitate tue ire: curesque, ut ejus operæ, quod tibi facile factum est, quam gratissimæ sint sociis; remque & utilitatem sociorum (cujus rei quantum potestatem quæstor habeat, non sum ignarus)

rus) per te quam maxime defensam & auctam velis. Id cum mihi gratissimum feceris, tum illud tibi expertus promitto & spondeo, te socios Bithyniæ, si iis commodaris, memores esse & gratos cogniturum. Vale.

ARGUMENTUM.

Terentium Varronem Quæstorem M. Bruto commendat, quem Caesar Gallie citeriori præfecerat, epist. 6. l. 6. & in Oratore.

M. T. C. M. BRUTO S. D. 10

CUM ad te tuus quæstor M. Varro proficisceretur, commendatione egere eum non putabam. Satis enim commendatum tibi eum arbitrabar ab ipso more majorum, qui, ut te non fugit, hanc quæsturæ conjunctionem liberorum necessitudini proximam voluit esse. Sed, cum sibi ita persuasisset ipse, meas de se accurate scriptas litteras maximum apud te pondus habituras; a meque contenderet, ut quam diligentissime scriberem: malui facere, quod meus familiaris tanti sua interesse arbitraretur. Ut igitur debere me facere hoc intelligas, cum primum M. Terentius in forum venit, ad amicitiam se meam contulit. Deinde, ut se corroboravit, duæ causæ accesserunt, quæ meam in illum benevolentiam augerent: una, quod versabatur in hoc studio nostro, quo etiam nunc maxime delectamur, & cum ingenio, ut nosti, nec sine industria: deinde, quod mature se contulit in societates publicanorum, quod quidem nollem: maximis enim damnis affectus est. Sed tamen causa communis ordinis mihi commendatissimi, fecit amicitiam nostram firmiorem. Deinde versatus in utrisque subselliis optima & fide & fama, jam ante hanc commutationem reip. petitioni sese dedit, honoremque honestissimum

R VI

exi-

existimavit fructum laboris. His autem temporibus a me Brundisio cum litteris & mandatis profectus est ad Cæsarem : qua in re & amorem ejus in suscipiendo negotio perspexi, & fidem in conficiendo, ac renuntiando. Videor mihi, cum separatim de probitate ejus, & moribus dicturus fuisset, si prius causam, cur eum tantopere diligerem, tibi exposuisset, in ipsa causa exponenda satis etiam de probitate dixisse. Sed tamen separatim promitto, in meque recipio, fore eum tibi & voluptati & usui. Nam & modestum hominem cognosces, & prudentem, & a cupiditate omni remotissimum; præterea magni laboris, summæque industriæ. Neque ego hæc polliceri debeo, quæ tibi ipsi, cum bene cognoveris, judicanda sunt: sed tamen in omnibus novis conjunctionibus interest, qualis primus aditus sit, & qua commendatione quasi amicitiae fores aperiantur: quod ego his litteris efficere volui: etsi id ipsa per se necessitudo quaesturæ effecisse debet; sed tamen nihilo infirmius illud, hoc addito. Cura igitur, si me tanti facis, quanti & Varro existimat, & ipse sentio, ut quamprimum intelligam, hanc meam commendationem tantum illi utilitatis attulisse, quantum & ipse sperarit, nec ego dubitarim. Vale.

A R G U M E N T U M.

Arpinatis municipii Gallicana vectigalia Bruto, Galliam cisalpinam administranti, commendat.

M. T. C. BRUTO S. D.

II

Quia semper animadverti, studiose te operam dare, ut ne quid meorum tibi esset ignotum: propterea non dubito, quin scias, non solum cujus municipii sim, sed etiam, quam diligenter soleam meos municipales Arpinates tueri. Quorum quidem omnia commoda, omnesque facultates

cultates, quibus & sacra conficere, & sarta re-
cta ædium sacrarum, locorumque communium
tueri possint, consistunt in iis vectigalibus, quæ
habent in provincia Gallia. Ad ea visenda,
pecuniasque, quæ a colonis debentur, exigen-
das, totamque rem & cognoscendam & admi-
nistrandam legatos equites Romanos misimus,
Q. Fufidium Q. F., M. Faucium M. F., Q. Mamer-
cum Q. F. Peto a te maiorem in modum, pro
nostra necessitudine, ut ea res tibi curæ sit:
operamque des, ut per te quam commodissime
negotium municipii administretur, quamprimu-
que conficiatur: ipsosque, quorum nomina scripsi,
ut quam honorificentissime pro tua natura, &
quam liberalissime tractes. Bonos viros ad tuam
necessitudinem adjunxeris, municipiumque gra-
tissimum beneficio tuo devinxeris: mihi vero
etiam eo gratius feceris, quod cum semper tue-
ri municipes meos consuevi, tum hic annus præ-
cipue ad meam curam officiumque pertinet.
Nam, constituendi municipii causa, hoc anno
ædilem filium meum fieri volui, & fratris fi-
lium, & M. Cæsum, hominem mihi maxime ne-
cessarium (is enim magistratus in nostro mu-
nicipio, nec alius ullus creari solet); quos coho-
nestaris, in primisque me, si respub. municipii
tuo studio, & diligentia bene administrata erit.
Quod ut facias, te vehementer etiam atque etiam
rogo. Vale.

A R G U M E N T U M.

*Q. Fufidium, Arpinatis municipii legatum, qui
Tribunus mil. in Cilicia fuerat, diligenter com-
mendat.*

M. T. C. BRUTO S. D. 12

A Lia epistola communiter commendavi tibi
legatos Arpinatum, ut potui diligentissime;
hac

hac separatim Q. Fufidium, quocum mihi omnes necessitudines sunt, diligentius commendo, non ut aliquid de illa commendatione diminuam; sed ut hanc addam. Nam & privignus est M. Cæfii, mei maxime & familiaris, & necessarii, & fuit in Cilicia mecum tribunus mil., quo in munere ita se tractavit, ut accepisse ab eo beneficium viderer, non dedisse. Est præterea, quod apud te valet plurimum, a nostris studiis non abhorrens. Quare velim, eum quam liberalissime complectare; operamque des, ut in ea legatione, quam suscepit contra suum commodum, secutus auctoritatem meam, quam maxime ejus excellat industria. Vult enim, id quod optimo cuique natura tributum est, quam maximam laudem cum a nobis, qui eum impulimus, tum a municipio consequi: quod ei continget, si hac mea commendatione tuum erga se studium erit consecutus. Vale.

A R G U M E N T U M.

L. Castronium ex Lucensi municipio commendat.

M. T. C. BRUTO S. D.

13

L. Castronius Pætus, longe princeps municipii Lucensis, est honestus, gravis, plenus officii, bonus plane vir, & cum virtutibus, tum etiam fortuna, si quid hoc ad rem pertinet, ornatus: meus autem est familiarissimus, sic prorsus, ut nostri ordinis observet neminem diligentius. Quare & ut meum amicum, & ut tua dignum amicitia, tibi commendo. Cui quibuscumque rebus commodaveris, tibi profecto jucundum, mihi certe erit gratum. Vale.

A R G U M E N T U M.

Petit, ut exactionem ejus pecunie, quam Straboni Cornelius debebat, suo studio & diligentia curet.

M. T. C. BRUTO S. D.

14

L. Titio Strabone, equite Romano in primis honesto & ornato, familiarissime utor.

Omnia

Omnia mihi cum eo intercedunt jura summae necessitudinis. Huic in tua provincia pecuniam debet P. Cornelius. Ea res a Volcatio, qui Romae jus dicit, rejecta in Galliam est. Peto a te hoc diligentius, quam si mea res esset, quo est honestius de amicorum pecunia laborare, quam de sua, ut negotium conficiendum cures; ipse suscipias, transigas, operamque des, quod tibi æquum, & rectum videbitur, ut quam commodissima conditione libertus Strabonis, qui ejus rei causa missus est, negotium conficiat, ad nummosque perveniat. Id & mihi gratissimum erit; & tu ipse L. Titium cognosces amicitia tua dignissimum: quod ut tibi curæ sit, ut omnia solent esse, quæ me velle scis, te vehementer etiam atque etiam rogo. Vale.

ARGUMENTUM.

Præcilius adolescentem, patre natum Cæsari amicissimo, commendat.

M. T. C. CÆSARI IMP. S. D. 15

PRæcilius tibi commendo unice, tui necessarii, mei familiarissimi, viri optimi filium: quem cum adolescentem ipsum propter ejus modestiam, humanitatem, animum, & amorem erga me singularem mirifice diligo; tum patrem ejus, re doctus, intellexi & didici, mihi fuisse semper amicissimum. En, hic ille est, de illis maxime, qui irridere, atque objurgare me solitus est, quod me non tecum, præsertim cum abs te honorificentissime invitarer, conjungerem.

ἀλλ' ἐμὸν ἔποτε θυμὸν ἐνὶ στήθεσιν ἔπειθεν.

Audiebam enim nostros proceres clamitantes,

ἀλλήμω ἔσθ', ἵνα τις σε καὶ ἐψιγόνων εὖ ἔπη.

ὡς νεφελὴ ἐκ δ' οὐφ' ἠέλεινα.

Sed tamen idem me consolatur: & jam hominem perustum, etiamnum gloria volunt incendere: atque ita loquuntur.

μη μὲν ἀσπεδιγε καὶ ἀκλειῶς ἀπολοίμην,
ἀλλὰ μέγα ῥέξας τι, καὶ ἰσχυμένοισι πυθέσθαι,
Sed me minus jam movent, ut vides: itaque ab
Homeri magniloquentia confero me ad vera præ-
cepta Εὐριπίδου,

Μισῶ σοφιστῶν ὅσους ἔχ' αὐτᾷ σοφός.

Quem versum senex Præcilius laudat egregie, &
ait posse eundem & ἄμα πρὶς καὶ ὀπίσσω vide-
re, & tamen nihilominus.

αἶν' ἀριστεύειν, καὶ ὑπεύροχον ἔμμεναι ἄλλων.

Sed ut redeam ad id, unde cœpi: vehementer
mihi gratum feceris, si hunc adolescentem huma-
nitate tua, quæ est singularis, comprehenderis, &
ad id, quod ipsorum Præciliorum causa te velle
arbitror, addideris cumulum commendationis
meæ. Genere novo sum litterarum ad te usus, ut
intelligeres, non vulgarem esse commendatio-
nem: Vale.

ARGUMENTUM.

*Apollonium, P. Crassi libertum, Cæsari, bellum
in Hispania contra Pompeji liberos gerenti, com-
mendat.*

M. T. C. CÆSARI IMP. S. D. 16

P Crassum ex omni nobilitate adolescentem
dilexi plurimum: & ex eo cum ab ineunte
ejus ætate bene speravissem, tum optime existi-
mare cœpi ex iis judiciis, quæ de eo feceram, co-
gnitis. Ejus libertum Apollonium jam tum equi-
dem, cum ille viveret, & magni faciebam, &
probabam. Erat enim & studiosus Crassi, & ad
ejus optima studia vehementer aptus: itaque ab eo
admodum diligebatur. Post mortem autem Crassi,
eo mihi etiam dignior visus est, quem in fidem
atque amicitiam meam reciperem, quod eos a se
observandos & colendos putabat, quos ille dilexif-
set, & quibus carus fuisset. Itaque & ad me in Ci-
liciam

liciam venit, multisque in rebus mihi magno usui fuit & fides ejus & prudentia: & ut opinor, tibi Alexandrino bello; quantum studio & fidelitate consequi potuit, non defuit. Quod cum speraret, te quoque ita existimare, in Hispaniam ad te, maxime ille quidem suo consilio, sed etiam me auctore est profectus. Cui ego commendationem non sum pollicitus: non quin eam valituram apud te arbitrarer: sed neque mihi egere commendatione videbatur, qui & in bello tecum fuisset, & propter memoriam Crassi de tuis unus esset: &, si uti commendationibus vellet, etiam per alios eum videbam id consequi posse. Testimonium meum de eo judicii, quod & ipse magni aestimabat, & ego apud te valere eram expertus, ei libenter dedi. Doctum igitur hominem cognovi, & studiis optimis deditum, idque a puero. Nam domi meæ cum Diodoto Stoico, homine, meo judicio, eruditissimo, multum a puero fuit. Nunc autem incensus studio rerum tuarum, eas litteris Græcis mandare cupiebat: posse arbitror: valet ingenio: habet usum: jam pridem in eo genere studii litterarumque versatur: satisfacere immortalitati laudum tuarum mirabiliter cupit. Habes opinionis meæ testimonium: sed tu hoc facilius multo, pro tua singulari prudentia, judicabis. Et tamen, quod negaveram, commendo tibi eum. Quidquid ei commo-
daveris, erit mihi majorem in modum gratum. Vale.

A R G U M E N T U M .

Sulpicio Achaje præfecto Manium Curium commendat. Vide epist. 4. lib. 4. & epist. 6. lib. 6. & 29. lib. 7. & 50. hujus libri; & I. lib. 16.

M. T. C. SER. SULPICIO S. D. 17.

M. Curius, qui Patris negotiatur, multis & magnis de causis a me diligitur. Nam
&

& amicitia pervetus mihi cum eo est, ut primum in forum venit, instituta: & Patris, cum aliquoties antea, tum proxime hoc miserrimo bello, domus ejus tota mihi patuit: qua, si opus fuisset, tam essem usus, quam mea. Maximum autem mihi vinculum cum eo est, quasi sanctioris cujusdam necessitudinis, quod est Attici nostri familiarissimus, eumque unum præter ceteros observat ac diligit. Quem si tu jam forte cognovisti, puto me hoc, quod facio, facere serius. Ea enim est humanitate & observantia, ut eum tibi jam ipsum per se commendatum putem. Quod tamen si ita est, magnopere a te quaeso, ut ad eam voluntatem, si quam in illum ante has meas litteras contulisti, quam maximus postea commendatione cumulus accedat. Sin autem propter verecundiam suam minus se tibi obtulit, aut eum nondum satis habes cognitum, aut quæ causa est, cur majoris commendationis indigeat, sic tibi eum commendando, ut neque majore studio quemquam, neque justioribus de causis commendare possim. Faciamque id, quod debent facere ii, qui religiose, & sine ambitione commendant: spondebo enim tibi, vel potius spondeo, in meque recipio, eos esse M. Curii mores, eamque tum probitatem, tum etiam humanitatem, ut eum & amicitia tua, & tam accurata commendatione, si tibi sit cognitus, dignum sis existimaturus. Mihi certe gratissimum feceris, si intellexero, has litteras tantum, quantum scribens confidebam, apud te pondus habuisse. Vale.

A R G U M E N T U M.

Primum agit gratias de optima in Pomponium Atticum voluntate. Deinde non necessariam commendationem addit, ut neque in Epiroticis negotiis, neque aliis in rebus Attico desit.

M. T. C. S U L P I C I O S. D. 18

Non concedam, ut Attico nostro, quem elatum lætitia vidi, jucundiores tuæ, suavissime

me

me ad eum, & humanissime scriptæ litteræ fuerint, quam mihi. Nam etsi utrique nostrum prope æque gratae erant, tamen ego admirabar magis, te, quasi rogatus, aut certe admonitus liberaliter Attico respondisses (quod tamen dubium nobis, quin ita futurum fuerit, non erat) ultro ad eum scripsisse, eique nec opinanti voluntatem tuam tantam per litteras detulisse. De quo non modo rogare te, ut eo studiosius mea quoque causa facias, non debeo (nihil enim cumulatius fieri potest, quam polliceris); sed ne gratias quidem agere, quod tu & ipsius causa, & tua sponte feceris. Illud tamen dicam, mihi id, quod fecisti, esse gratissimum. Tale enim tuum iudicium de homine eo, quem ego unice diligo, non potest mihi non summe esse jucundum. Quod cum ita sit, esse gratum necesse est. Sed tamen quando mihi, pro conjunctione nostra, vel peccare apud te in scribendo licet; utrumque eorum, quæ negavi mihi facienda esse, faciam. Nam & ad id, quod Attici causa te ostendisti esse facturum, tantum velim addas, quantum ex nostro amore accessionis fieri potest: & quod modo verebar, tibi gratias agere, nunc plane ago: reque ita existimare volo, quibuscumque officiis in Epiroticis, reliquisque rebus Atticum obstrinxeris, iisdem me tibi obligatum fore. Vale.

A R G U M E N T U M.

Rogat, ut Lysonem, jam antea commendatum, in fidem necessitudinemque suam recipiat.

M. T. C. S U L P I C I O S. D. 19

CUM Lyfone Patrensi est mihi quidem hospitium vetus, quam ego necessitudinem sancte colendam puto: sed ea causa etiam cum aliis compluribus: familiaritas tanta nullo cum hospite: & ea cum officiis ejus multis, tum etiam con-

consuetudine quotidiana sic est aucta, ut nihil sit familiaritate nostra conjunctius. Is cum Romæ annum prope ita fuisset, ut mecum viveret: etsi eramus in magna spe, te meis litteris, commendationeque diligentissime facturum id, quod fecisti, ut ejus rem, & fortunas absentis tuerere; tamen, quod in unius potestate erant omnia, & quod Lyso fuerat in nostra causa, nostrisque præsidiiis, quotidie aliquid timebamus. Effectum tamen est & ipsius splendore, & nostro, reliquorumque hospitem studio, ut omnia, quæ vellemus, a Cæsare impetrarentur: quod intelliges ex iis litteris, quas Cæsar ad te dedit. Nunc non modo non remittimus tibi aliquid ex nostra commendatione, quasi adepti jam omnia: sed eo vehementius a te contendimus, ut Lysonem in fidem necessitudinemque tuam recipias. Cujus dubia fortuna timidius tecum agebamus, verentes, ne quid accideret ejusmodi, ut ne tu quidem mederi posses: explorata vero ejus incolumitate, omnia a te studia summa cura peto. Quæ ne singula enumerem, totam tibi domum commendo: In his adolescentem filium ejus, quem C. Memmius Gemellus, cliens meus, cum in calamitate exilii sui Patrensis civis factus esset, Patrensi legibus adoptavit: ut ejus ipsius hæreditatis jus causamque tueare. Caput illud est, ut Lysonem, quem ego virum optimum gratissimumque cognovi, recipias in necessitudinem tuam. Quod si feceris, non dubito, quin in eo diligendo, ceterisque postea commendando, idem, quod ego, sis judicii & voluntatis habiturus. Quod cum fieri vehementer studeo, tum etiam illud vereor, ne, si minus cumulate videberis fecisse aliquid ejus causa, me ille negligenter scripsisse de se putet, non te oblitum mei. Quanti enim me faceres, cum ex sermonibus quotidianis meis, tum ex epistolis etiam tuis, potuit cognoscere. Vale.

AR-

ARGUMENTUM.

Commendat Asclaponem medicum, ut amicum, ut doctum, ut fidelem.

M. T. C. Sulpicio S. D.

20

Asclapone Patrensi, medico, utor valde familiariter; ejusque cum consuetudo mihi jucunda fuit, tum etiam ars, quam sum expertus in valetudine meorum: in qua mihi tum ipsa scientia, tum etiam fidelitate benevolentiaque satisfecit. Hunc igitur tibi commendo, & a te peto, ut des operam, ut intelligat, diligenter me scripsisse de se, meamque commendationem usui magno sibi fuisse. Erit id mihi vehementer gratum. Vale.

ARGUMENTUM.

Domum & rem familiarem M. Æmilii, maximeque C. Ammonium, libertum ejus, commendat.

M. T. C. Sulpicio S. D.

21

M. Æmilius Avianus ab ineunte adolescentia me observavit, semperque dilexit, vir cum bonus, tum perhumanus, & in omni genere officii diligendus. Quem si arbitrarer esse Sicyone, & nisi audirem, ibi eum etiam nunc, ubi ego reliqui, Cybiræ commorari, nihil esset necesse plura me ad te de eo scribere. Perficeret enim ipse profecto suis moribus, suaque humanitate, ut sine cujusquam commendatione diligeretur abs te non minus, quam & a me, & ceteris suis familiaribus. Sed, cum illum abesse putem, commendo tibi majorem in modum domum ejus, quæ est Sicyone, remque familiarem, maxime C. Avianum Ammonium, libertum ejus: quem quidem tibi etiam suo nomine commendo. Nam, cum propterea mihi est probatus, quod est in patronum suum officio & fide singulari, tum etiam, quod

quod in me ipsum magna officia contulit, mihi que molestissimis temporibus ita fideliter benevoleque praeſto fuit, ut ſi a me manumiffus eſſet. Itaque peto a te, ut eum Ammonium, & in patrōni ejus negotio ſic tueare, ut ejus procuratorem, quem tibi commendo, & ipſum ſuo nomine diligas, habeasque in numero tuorum: hominem prudentem, & officioſum cognosces, & dignum, qui a te diligatur. Vale.

A R G U M E N T U M.

T. Manlium ſuo, Varroniſque nomine, commendat.

M. T. C. S U L P I C I O S. D.

22

T. Manlium, qui negotiatur Theſpiis, vehementer diligo. Nam & ſemper me coluit, diligentiffimeque obſervavit, & a ſtudiis noſtris non abhorret. Accedit eo, quod Varro Murena magnopere ejus cauſſa vult omnia: qui ita exiſtimavit, eſſi ſuis litteris, quibus tibi Manlium commendabat, valde conſideret, tamen mea commendatione aliquid acceſſionis fore. Me quidem cum Manlii familiaritas, tum Varronis ſtudium commovit, ut ad te quam accuratiſſime ſcriberem. Gratiffimum igitur mihi feceris, ſi huic commendationi meæ tantum tribueris, quantum cui tribuiſti plurimum; id eſt, ſi T. Manlium quam maxime, quibuſcumque rebus honeſte, ac pro tua dignitate poteris, juveris atque ornaveris. Ex ipſius præterea gratiffimis & humaniſſimis moribus, confirmo tibi, eum te, quem ſoles, fructum, a bonorum virorum officiis exſpectare, eſſe capturum. Vale.

A R G U M E N T U M.

L. Coſſinium libertum commendat.

M. T. C. S U L P I C I O S. D.

23

L. Coſſinio, amico, & tribuli meo, valde familiariter utor. Nam & inter noſmetipſos
vetus

vetus usus intercedit, & Atticus noster maiorem etiam mihi cum Cossinio consuetudinem fecit. Itaque tota Cossinii domus me diligit, in primisque libertus ejus L. Cossinius Anchialus, homo & patrono, & patroni necessariis, quo in numero ego sum, probatissimus. Hunc tibi ita commendo, ut si meus libertus esset, eodemque apud me loco esset, quo & est apud patronum suum, majore studio commendare non possem. Quare pergratum mihi feceris, si eum in amicitiam tuam receperis; atque eum, quod sine molestia tua fiat, si qua in re opus ei fuerit, juveris. Id & mihi vehementer gratum erit, & tibi postea jucundum. Hominem enim summa probitate, humanitate, observantiaque cognosces. Vale.

ARGUMENTUM.

Primum agit gratias Sulpicio, quod se totum Lysoni remisisset. Deinde rogat, ut eundem omnibus officiis, omnique liberalitate complectatur.

M. T. C. SULPICIO S. D.

24

CUM antea capiebam ex officio meo voluptatem, quod memineram, quam tibi diligenter Lysonem, hospitem, & familiarem meum, commendassem: tum vero posteaquam ex litteris ejus cognovi, tibi eum falso suspectum fuisse, vehementissime lætatus sum, me tam diligentem in eo commendando fuisse. Ita enim scripsit ad me, sibi meam commendationem maximo adjuvamento fuisse, quod ad te delatum diceret, se se contra dignitatem tuam Romæ de te loqui solitum esse. De quo etsi pro tua facilitate & humanitate purgatum se tibi scribit esse, tamen primum, ut debeo, tibi maximas gratias ago, cum tantum litteræ meæ potuerunt, ut iis lectis, omnem offensionem suspicionis, quam habueras de Lyfone, deponeres: deinde, credas mihi affirmanti, velim, me hoc, non pro Lyfone magis, quam

quam pro omnibus scribere; hominem esse neminem, qui umquam mentionem tui sine tua summa laude fecerit. Lyso vero cum mecum prope quotidie esset, unaque viveret, non solum, quia me libenter audire arbitrabatur, sed quia libentius ipse loquebatur, omnia mihi tua & facta, & dicta laudabat. Quapropter etsi a te ita tractatur, ut jam non desideret commendationem meam; unisque se litteris meis omnia consecutum putet: tamen a te peto majorem in modum, ut eum etiam atque etiam tuis officiis, liberalitate complectare. Scriberem ad te, qualis vir esset, ut superioribus litteris feceram, nisi eum jam per seipsum tibi satis esse notum arbitrarer. Vale.

A R G U M E N T U M.

Hagesaretum breviter, sed accurate commendat.

M. T. C. SER. SULPICIO S. D. 25

Hagesaretus Larissæus, magnis meis beneficiis ornatus in consulatu meo, memor & gratus fuit, meque postea diligentissime coluit. Eum tibi magnopere commendo, ut & hospitem, & familiarem meum, & gratum hominem, & virum bonum, & principem civitatis suæ, & tua necessitudine dignissimum. Pergratum mihi feceris, si dederis operam, ut is intelligat, hanc meam commendationem magnum apud te pondus habuisse. Vale.

A R G U M E N T U M.

Commendat Messinii Achaica negotia ex fratris hereditate.

M. T. C. SULPICIO S. D. 26

L Messinius ea mecum necessitudine conjunctus est, quod mihi quæstor fuit. Sed hanc
caus-

causam, quam ego, ut a majoribus accepi, semper gravem duxi, fecit virtute & humanitate sua iustior. Itaque eo sic utor, ut nec familiarius ullo, nec libentius. Is quamquam confidere videbatur, te sua causa, quæ honeste posses, libenter esse facturum: magnum tamen esse speravit apud te meas quoque litteras pondus habituras. Id cum ipse ita judicabat, tum pro familiari consuetudine sæpe ex me audierat, quam suavis esset inter nos, & quanta conjunctio. Peto igitur a te, tanto scilicet studio, quanto intelligis debere me petere pro homine tam mihi necessario, & tam familiari, ut ejus negotia, quæ sunt in Achaja, ex eo, quod hæres est M. Mindio, fratri suo, qui Elide negotiatus est, expleres, & expedias tum jure, & potestate, quam habes, tum etiam auctoritate, & consilio tuo. Sic enim præscripsimus iis, quibus ea negotia mandavimus, ut omnibus in rebus, quæ in aliquam controversiam vocarentur, te arbitro, & quod commodum tuo fieri posset, te disceptatore uterentur. Id ut honoris mei causa suscipias, vehementer te etiam atque etiam rogo. Illud præterea, si non alienum a tua dignitate putabis esse, feceris mihi pergratum; si qui difficiliore erunt, ut rem sine controversia confici nolint, si eos, quando cum senatore res est, Romam rejeceris. Quod quo minore dubitatione facere possis, litteras ad te a M. Lepido consule, non quæ te aliquid juberent (neque enim id tuæ dignitatis esse arbitrabamur), sed quodam modo quasi commendatitias sumpsimus. Scriberem, quam id beneficium bene apud Messinium positurus esses, nisi & te scire considerem, & mihi peterem. Sic enim velim existimes, non minus me de illius re laborare, quam ipsum de sua. Sed cum illum studeo quam facillime ad suum pervenire: tum illud laboro, ut non minimum hac mea commendatione se consecutum arbitretur.

ARGUMENTUM.

Gratias agit Sulpicio, quod Æmilium Avianum liberaliter honorificeque tractasset, eundemque denuo commendat: laudat in extremo Servium filium.

M. T. C. Sulpicio S. D.

27

Licet eodem exemplo sapius tibi hujus generis litteras mittam, cum gratias agam, quod meas commendationes tam diligenter observes, quod feci in aliis, & faciam, ut video, sapius: sed tamen non parcam operæ, &, ut vos in vestris formulis, sic ego in epistolis de eadem re alio modo. C. Avianus igitur Ammonius incredibiles mihi gratias per litteras egit, & iuo, & Æmilii Aviani, patroni sui, nomine, nec liberalius, nec honorificentius potuisse tractari, nec se præsentem, nec rem familiarem absentis patroni sui. Id mihi cum jucundum est eorum causa, quos ego tibi, summa necessitudine, & summa conjunctione adductus, commendaveram, quod M. Æmilius unus est ex meis familiarissimis, atque intimis maxime necessarius, homo & magnis meis beneficiis devinctus, & prope omnium, qui mihi aliquid debere videntur, gratissimus: tum multo jucundius, te esse in me tali voluntate, ut plus pro sis amicis meis, quam ego præsens fortasse prodessem: credo, quod magis ego dubitarem, quid illorum causa facerem, quam tu, quid mea. Sed hoc non dubito, quin existimes, mihi esse gratum. Illud te rogo, ut illos quoque gratos homines esse putes: quod ita esse tibi promitto, atque confirmo. Quare velim, quidquid habent negotii, des operam, quod comodo tuo fiat, ut, te obtinente Achajam, conficiant. Ego cum tuo Servio jucundissime conjunctionissimeque vivo; magnamque cum ex ingenio ejus, singularique studio, tum ex virtute & probitate voluptatem capio. Vale.

AR.

ARGUMENTUM.

Agit gratias de Messinio humanissime tractato : rogatque , ut sua in eum beneficia , quibus rebus possit , augeat . Commendat etiam Lacedæmonios .

M. T. C. SÚLPICIO S. D.

28

ET si libenter petere a te soleo , si quid opus est meorum cuiquam , tamen multo libentius gratias tibi ago , cum fecisti aliquid commendatione mea , quod semper facis . Incredibile est enim , quas mihi gratias omnes agant , etiam mediocriter a me tibi commendati . Quæ mihi omnia grata , sed de L. Messinio gratissimum . Sic enim est mecum locutus , te , ut meas litteras legeris , statim procuratoribus suis pollicitum esse omnia : multo vero plura , & maiora fecisse . Id igitur (puto enim etiam atque etiam mihi dicendum esse) velim existimes mihi te fecisse gratissimum . Quod quidem hoc vehementius lætor , quod ex ipso Messinio te video magnam capturum voluptatem . Est enim in eo cum virtus , & probitas , & summum officium , summaque observantia , tum studia illa nostra , quibus antea delectabamur , nunc etiam vivimus . Quod reliquum est , velim augeas tua in eum beneficia omnibus rebus , quæ te erunt dignæ . Sed duo , quæ te nominatim rogo : primum , ut , si quid satisfidandum erit , *amplius eo nomine non peti* , cures , ut satisfidetur fide mea . Deinde , cum fere consistat hæreditas in iis rebus , quas avertit Oppia , quæ uxor Mindii fuit , adjuves , ineasque rationem , quemadmodum ea mulier Romam perducat : quod si putarit illa fore , ut opinio nostra est , negotium conficiemus . Hoc ut assequamur , te vehementer etiam atque etiam rogo . Illud , quod supra scripsi , id tibi confirmo , in meque recipio , te ea , quæ fecisti Messinii causa , quæ-

que feceris, ita bene collocaturum, ut ipse iudices, homini te gratissimo, jucundissimo benigne fecisse. Volo enim ad id, quod mea causa fecisti, hoc etiam accedere. Nec Lacedæmonios dubitare arbitror, quin ipsi sua, majorumque suorum auctoritate satis commendati sint fidei & iustitiæ tuæ: & ego, qui te optime novissem, non dubitavi, quin tibi notissima & jura, & merita populorum essent. Itaque, cum a me peteret Philippus Lacedæmonius, ut tibi civitatem commendarem; etsi memineram, me ei civitati omnia debere; tamen respondi, commendatione Lacedæmonios apud te non egere. Itaque sic velim existimes, me omnes Achajæ civitates arbitrari pro horum temporum perturbatione felices, quod tu iis præsis: eundemque me ita judicare, te, quod unus optime nosset non nostra solum, sed etiam Græciæ monumenta omnia, tua sponte amicis Lacedæmonis & esse, & fore. Quare tantum a te peto, ut, cum ea facies Lacedæmoniorum causa, quæ tua fides, amplitudo, iustitia postulat; his, si tibi videbitur, significes, te non moleste ferre, quod intelligas, ea, quæ facias, mihi quoque grata esse. Pertinet enim ad officium meum, eos existimare, curæ mihi suas res esse. Hoc te vehementer etiam atque etiam rogo. Vale.

A R G U M E N T U M.

Diligentissima commendatio Capitonis pro hereditate Antistii.

M. T. C. L. PLANCO S. D. 29

NON dubito, quin scias, in iis necessariis, qui tibi a patre relictæ sunt, me tibi esse vel conjunctissimum; non iis modo causis, quæ speciem habent magnæ conjunctionis, sed iis etiam, quæ familiaritate & consuetudine tenentur; quam scis mihi jucundissimam cum patre tuo, & summam fuisse.

fuisse. Ab his initiis noster in te amor profectus auxit paternam necessitudinem, & eo magis, quod intellexi, ut primum per ætatem iudicium facere potueris, quanti quisque tibi faciendus esset, me a te in primis cœptum esse observari, coli, diligere. Accedebat non mediocri vinculum cum studiorum, quod ipsum est per se grave, tum eorum studiorum, earumque artium, quæ per se ipsæ eos, qui voluntate eadem sunt, etiam familiaritate devinciunt. Exspectare te arbitror, hæc tam longe repetita principia quo spectent. Id primum ergo habeto, non sine magna iustaque causa hanc a me commemorationem esse factam. C. Atejo Capitone utor familiarissime. Notæ tibi sunt varietates meorum temporum. In omni genere & honorum & laborum meorum & animus, & opera, & auctoritas, & gratia, etiam res familiaris C. Capitonis præsto fuit, & paruit & temporibus & fortunæ meæ. Hujus propinquus fuit T. Antistius: qui cum sorte quæstor Macedoniam obtineret, neque ei successum esset, Pompejus in eam provinciam cum exercitu venit. Facere Antistius nihil potuit. Nam si potuisset, nihil ei fuisset antiquius, quam ad Capitonem, quem ut parentem diligebat, reverti; præsertim cum sciret, quanti is Cæsarem faceret, semperque fecisset. Sed oppressus, tantum attigit negotii, quantum recusare non potuit. Cum signaretur argentum Apolloniæ, non possum dicere, eum præfuisse, neque possum negare eum affuisse; sed non plus duobus, aut tribus mensibus. Deinde abfuit a castris; fugit omne negotium: hoc mihi, ut testi, velim credas: meam enim ille mæstitiam in illo bello videbat: mecum omnia communicabat. Itaque abdedit se in intimam Macedoniam, quo potuit longissime a castris, non modo ut non præesset ulli negotio, sed etiam ut ne interesset quidem. Is post prælium se ad hominem necessarium A. Plancium in Bithyniam con-

tulit. Ibi eum Cæsar cum vidisset, nihil asperere, nihil acerbè dixit; Romam iussit venire. Ille in morbum continuo incidit, ex quo non convaluit. Æger Corcyram venit: ibi est mortuus. Testamento, quod Romæ, Paulo, & Marcello Coss., fecerat, hæres ex parte dimidia, & tertia est Capito: in sextante sunt ii, quorum pars sine ulla cuiusquam querela publica potest esse: ea est ad H. S. xxx. Sed de hoc Cæsar viderit. Te, mi Plance, pro paterna necessitudine, pro nostro amore, pro studiis, & omni cursu nostro totius vitæ simillimo, rogo, & a te ita peto, ut majore cura, majore studio non possim, ut hanc rem suscipias, meam putes; enitare, contendas, efficias, ut mea commendatione, tuo studio, Cæsaris beneficio, hæreditatem propinqui sui C. Capito obtinear. Omnia, quæ potui in hac summa gratia tua ac potentia a te impetrare, si petivissem, ultro te ad me detulisse putabo, si hanc rem impetravero. Illud fore tibi adjumento spero, cujus ipse Cæsar esse optimus iudex potest: semper Cæsarem Capito & dilexit, & coluit. Sed ipse hujus rei testis est: novi hominis memoriam. Itaque te nihil doceo: tantum tibi sumito pro Capitone apud Cæsarem, quantum ipsum meminisse senties. Ego, quod in me ipso experiri potui, ad te deferam. In eo quantum sit ponderis, tu videbis. Quam partem in republ. causamque defenderim; per quos homines, ordinesque steterim, quibusque munitus fuerim, non ignoras. Hoc mihi velim credas: si quid fecerim hoc ipso in bello minus ex Cæsaris voluntate, quod intellexerim scire ipsum Cæsarem, me invitissimum fecisse, id feci aliorum consilio, hortatu, auctoritate; quod fuerim moderatior temperatiorque, quam in ea parte quisquam, id me fecisse maxime auctoritate Capitonis; cujus similes si reliquos necessarios habuissem, reip. fortasse nonnihil, mihi certe plurimum profuissem.

Hanc

Hanc rem, mi Plance, si effeceris, meam de tua erga me benevolentia spem confirmaveris; ipsumque Capitonem, gratissimum, officiosissimum, optimum virum, ad tuam necessitudinem tuo summo beneficio adjunxeris. Vale.

ARGUMENTUM.

L. Manlius in hereditate fraterna, & omnibus in rebus commendat.

M. T. C. ACILIO PROCOS. S. D. 30

L. Manlius est Sosis: is fuit Catinensis, sed est una cum reliquis Neapolitanis civis Romanus factus, decurioque Neapoli: erat enim adscriptus in id municipium ante civitatem sociis, & Latinis datam. Ejus frater Catinæ nuper mortuus est. Nullam omnino arbitramur de ea hereditate controversiam eum habiturum: & est hodie in bonis. Sed, quando habet præterea negotia vetera in Sicilia sua, & hanc hereditatem fraternam, & omnia ejus tibi commendo, in primisque ipsum, virum optimum, mihi que familiarissimum, his studiis litterarum doctrinæque præditum, quibus ego maxime delector. Peto igitur abs te, ut eum siue aderit, siue non venerit in Siciliam, in meis intimis, maximeque necessariis scias esse: itaque tractes, ut intelligat, meam commendationem sibi magno adjumento fuisse. Vale.

ARGUMENTUM.

Flavium Pisonis, generi sui, cum viveret, pernecessarium, commendat.

M. T. C. ACILIO PROCOS. S. D. 31

C. Flavio, honesto & ornato equite Romano, utor valde familiariter. Fuit enim generi mei C. Pisonis pernecessarius; meque diligentissime observat & ipse, & L. Flavius, frater ejus.

Quapropter velim honoris mei causa, quibus rebus honeste, & pro tua dignitate poteris, quam honorificentissime, & quam liberalissime C. Flavium tractes. Id mihi sic erit gratum, ut gratius esse nihil possit. Sed præterea tibi affirmo, neque id ambitione adductus facio, sed tum familiaritate & necessitudine, tum etiam veritate, te ex C. Flavii officio, & observantia, & præterea splendore, atque inter suos gratia, magnam voluptatem esse capturum. Vale.

A R G U M E N T U M.

Commendat duos hospites suos Alefinos.

M. T. C. ACILIO PROCOS. S. D. 32

IN Alefina civitate tam laeta, quam nobili, conjunctissimos habeo & hospitio, & familiaritate M. & C. Clodios, Archagathum, & Philonem: sed vereor, ne, quia complures tibi præcipue commendo, exæquare videar ambitione quadam commendationes meas, quamquam a te quidem cumulate satisfit & mihi, & meis omnibus. Sed velim sic existimes, hanc familiam, & hos mihi maxime esse conjunctos vetustate, officiis, benevolentia. Quamobrem peto a te majorem in modum, ut his omnibus in rebus, quantum tua dignitas fidesque patieretur, commodes. Id si feceris, erit mihi vehementissime gratum. Vale.

A R G U M E N T U M.

Libertos & negotia Nasonis commendat.

M. T. C. ACILIO PROCOS. S. D. 33

CN. Otacilio Nasone utor familiarissime, ita prorsus, ut illius ordinis nullo familiarius. Nam & humanitate ejus, & probitate in consuetudine quotidiana magnopere delector. Nihil jam opus est expectare te, quibus eum verbis tibi com-

commendem, quo sic utar, ut scripsi. Habet is in provincia tua negotia, quæ procurant liberti Hilarius, Antigonus, Demonstratus: quos tibi, negotiaque omnia Nasonis non secus commendo, ac si mea essent. Gratissimum mihi feceris, si intellexero, hanc commendationem magnum apud te pondus habuisse. Vale.

ARGUMENTUM.

Commendat Lysonem, hospitem suum.

M. T. C. ACILIO PROCOS. S. D. 34

A Vitum mihi hospitium est cum Lyfone, Lysonis filio, Lilybætano, valdeque ab eo observor, cognovique dignum & patrè, & avo: est enim nobilissima familia. Quapropter commendo tibi majorem in modum rem domumque ejus, magnoque opere abs te peto, cures, ut is intelligat, meam commendationem maximo sibi apud te & adjumento, & ornamento fuisse. Vale.

ARGUMENTUM.

Commendat hospitem & familiarem suum Philoxenum.

M. T. C. ACILIO PROCOS. S. D. 35

C Avianus Philoxenus antiquus est hospes meus, & propter hospitium valde etiam familiaris: quem Cæsar meo beneficio in Novocomenses retulit. Nomen autem Aviani consecutus est, quod homine nullo plus est usus, quam Flacco Aviano, meo, quemadmodum te scire arbitror, familiarissimo. Quæ ego omnia collegi, ut intelligeres, non vulgarem esse commendationem hanc meam. Peto igitur abs te, ut omnibus rebus, quod sine molestia tua facere possis, ei commodas, habeasque in numero tuorum; perficiasque, ut intelligat, has litteras meas magno

sibi usui fuisse. Erit id mihi majorem in modum gratum. Vale.

A R G U M E N T U M.

Commendat Demetrium Megam in jure civitatis, omnibusque in rebus.

M. T. C. ACILIO PROCOS. S. D. 36

CUM Demetrio Mega mihi vetustum hospitium est, familiaritas autem tanta, quanta cum Siculo nullo. Ei Dolabella, rogatu meo, civitatem a Cæsare impetravit, qua in re ego interfui. Itaque nunc P. Cornelius vocatur. Cumque propter quosdam sordidos homines, qui Cæsaris beneficia vendebant, tabulam, in qua nomina civitate donatorum incisa essent, revelli jussisset; eidem Dolabellæ, me audiente, Cæsar dixit, nihil esse, quod de Mega vereretur: beneficium suum in eo manere. Hoc te scire volui, ut eum in civium Romanorum numero haberes. Ceterisque in rebus tibi eum ita commendo, ut majore studio neminem commendarim. Gratissimum mihi feceris, si eum ita tractaris, ut intelligat, meam commendationem magno sibi ornamento fuisse. Vale.

A R G U M E N T U M.

Commendat Hippiam in liberatione bonorum, & omnibus in rebus.

M. T. C. ACILIO PROCOS. S. D. 37

HIPPIAM Philoxeni filium, Calatinum, hospitem & necessarium meum tibi commendo majorem in modum. Ejus bona, quemadmodum ad me delata res est, publice possidentur alieno nomine, contra leges Calatinorum. Id si ita est, etiam sine mea commendatione ab æquitate tua res ipsa impetrare debet, ut ei subvenias. Quo-
qua

quo modo autem se res habet, peto a te, ut honoris mei causa eum expedias, tantumque ei commodos & in hac re, & in ceteris, quantum tua fides dignitasque parietur. Id mihi vehementer gratum erit. Vale.

ARGUMENTUM.

Bruttii negotia procuratoresque commendat.

M. T. C. ACILIO PROCOS. S. D. 38

L Bruttius, eques Romanus, adolescens omnibus rebus ornatus, in meis familiarissimis est, meque observat diligentissime: cujus cum patre magna mihi fuit amicitia jam inde a quaestura mea Siciliensi. Omnino nunc ipse Bruttius Romae mecum est: sed tamen domum ejus, & rem familiarem, & procuratores tibi sic commendo, ut majore studio commendare non possim. Gratissimum mihi feceris, si curaris, ut intelligat, id quod ei recepi, hanc meam commendationem sibi magno adjumento fuisse. Vale.

ARGUMENTUM.

Commendat Titurnium Rufum.

M. T. C. ACILIO PROCOS. S. D. 39

Cum familia Titurnia necessitudo mihi intercedit vetus, ex qua reliquus est M. Titurnius Rufus, qui mihi omni diligentia atque officio est tuendus. Est igitur in tua potestate, ut ille in me satis sibi praesidii putet esse. Quapropter eum tibi commendo majorem in modum; & abs te peto, efficias, ut is commendationem hanc intelligat sibi magno adjumento fuisse. Erit id mihi vehementer gratum.

ARGUMENTUM.

L. & C. Aurelios commendat.

M. T. C. Q. ANCHARIO, Q. F. PROCOS.

S. D.

40

L & C. Aurelios, L. F. quibus & ipsis, & patre eorum, viro optimo, familiarissime uxor, commendo tibi maiorem in modum, adolescentibus omnibus optimis artibus ornatos, meos pernecessarios, tua amicitia dignissimos. Si ulla mea apud te commendatio valuit, quod scio multas plurimum valuisse, hæc ut valeat, rogo. Quod si eos honorifice liberaliterque tractaris, & tibi gratissimos, optimosque adolescentes adjunxeris, & mihi gratissimum feceris. Vale.

ARGUMENTUM.

Gratias agit & suo & Pompeji nomine de Luccejo benignissime tractato; eundemque denuo commendat.

M. T. C. L. CULLEOLO S. D.

41

QUæ fecisti L. Lucceji causa, scire te plane volo, te homini gratissimo commodasse: & cum ipsi, quæ fecisti, pergrata sunt, tum Pompejus, quotiescumque me vider (videt autem sæpissime) gratias tibi agit singulares. Addo etiam illud, quod tibi jucundissimum esse certo scio, meipsum ex tua erga Luccejum benignitate maxima voluptate affici. Quod superest, quamquam mihi non est dubium, quin cum antea nostra causa, nunc jam etiam tuæ constantiæ gratia mansurus sis in eadem ista liberalitate: tamen abs te vehementer etiam atque etiam peto, ut ea, quæ initio ostendisti, deindeque fecisti, etiam ad exitum augeri & cumulari per te velis. Id & Luccejo & Pompejo valde gratum fore, teque apud eos præclare positurum,

con-

confirmo & spondeo. De rep., deque his negotiis cogitationibusque nostris perscripseram ad te diligenter paucis ante diebus, easque litteras dederam pueris tuis. Vale.

ARGUMENTUM.

Luccejum commendat, jam ante commendatum.

M. T. C. L. CULLEOLO PROCOS. S. D. 42

Luccejus meus familiarissimus, homo omnium gratissimus, mirificas tibi apud me gratias egit, cum diceret, omnia te cumulatissime & liberalissime procuratoribus suis pollicitum esse. Cum oratio tua tam ei grata fuerit, quam gratam rem ipsam existimas fore, cum, ut spero, quæ pollicitus es, feceris? Omnino ostenderunt Bulliones, sese Luccejo Pompeji arbitratu satisfacturos. Sed vehementer opus est nobis & voluntatem, & auctoritatem, & imperium tuum accedere. Quod ut facias, te etiam atque etiam rogo. Illudque mihi gratissimum est, quod ita sciunt Lucceji procuratores, & ita Luccejus ipse ex litteris tuis, quas ad eum misisti, intellexit, hominis nullius apud te auctoritatem, aut gratiam valere plus quam meam. Id ut re experietur, iterum & sæpius te rogo. Vale.

ARGUMENTUM.

Oppium commendat Gallio in Ciliciam proficiscenti.

M. T. C. Q. GALLIO S. D. 43

Etsi plurimis rebus spero fore, ut perspiciam, quod tamen jampridem perspicio, me a te amari: tamen nunc ea causa tibi datur, in qua facile declarare possis tuam erga me benevolentiam. L. Oppius M. F. Philomeli negotiatur, homo mihi familiaris. Eum tibi unice commendo; eoque magis, quod cum ipsum diligo, tum
quod

quod negotia procurat L. Egnatii Rufi, quo ego uno equite Romano familiarissime utor, & qui cum consuetudine quotidiana, tum officiis plurimis maximisque mihi conjunctus est. Oppium igitur præsentem ut diligas, Egnatii absentis rem ut tueare, æque a te peto, ac si mea negotia essent. Velim, memoriæ tuæ causâ, des litterarum aliquid, quæ tibi in provincia reddantur: sed ita conscribas, ut tum, cum eas leges, facile recordari possis hujus meæ commendationis diligentiam. Hoc te vehementer etiam atque etiam rogo. Vale.

ARGUMENTUM.

Eundem Oppium rursus eidem commendat.

M. T. C. GALLIO S. D.

44

ET si ex tuis, & L. Oppii familiarissimi mei litteris cognovi, te memorem commendationis meæ fuisse; idque pro tua summa erga me benevolentia, proque nostra necessitudine minime sum admiratus: tamen etiam atque etiam tibi L. Oppium præsentem, & L. Egnatii mei familiarissimi absentis negotia commendo. Tanta mihi cum eo necessitudo est, familiaritasque, ut, si mea res esset, non magis laborarem. Quapropter mihi gratissimum feceris, si curaris, ut is intelligat, me a te tantum amari, quantum ipse existimo. Hoc mihi gratius facere nihil potes. Idque ut facias, vehementer te rogo. Vale.

ARGUMENTUM.

Egnatii & servum Anchialum, & negotia Appulejo commendat.

M. T. C. APPULEJO PROQUÆS. S. D.

45

L Egnatio uno equite Rom. vel familiarissime utor. Ejus Anchialum servum, negotia-

tiaque, quæ habet in Asia, tibi commendo non minore studio, quam si rem meam commenderem. Sic enim existimes velim, mihi cum eo non modo quotidianam consuetudinem summam intercedere, sed etiam officia magna & mutua nostra inter nos esse. Quamobrem etiam atque etiam a te peto, ut cures, ut is intelligat, me ad te satis diligenter scripsisse: nam de tua erga me voluntate non dubitabat. Id ut facias, te etiam atque etiam rogo. Vale.

ARGUMENTUM.

Nostium cohæredem suum commendat.

M. T. C. APPULEJO PROQUÆS. S. D. 46

L Nostius Zoilus est cohæres meus: hæres autem patroni sui. Ea re utrumque scripsi, ut & mihi cum illo causam amicitiae scires esse, & hominem probum existimares, qui patroni iudicio ornatus esset. Eum tibi igitur sic commendo, ut unum ex nostra domo. Valde mihi gratum erit, si curaris, ut intelligat, hanc commendationem sibi apud te magno adjumento fuisse. Vale.

ARGUMENTUM.

Egnatium, communem amicum, commendat.

M. T. C. SILIO S. D.

47

Quid ego tibi commendem eum, quem tu ipse diligis? Sed tamen, ut scires, eum non a me diligi solum, verum etiam amari, ob eam rem tibi hæc scribo. Omnium tuorum officiorum, quæ & multa & magna sunt, mihi gratissimum fuerit, si ita tractaris Egnatium, ut sentiat, & se a me, & me a te amari. Hoc vehementer etiam atque etiam rogo. Illa nostra scilicet ceciderunt. Utamur igitur vulgari consolatione. Quid, si hoc melius? Sed hæc coram.

Tu

Tu fac, quod facis, ut me ames, teque amari a me scias. Vale.

A R G U M E N T U M.

Omnes Cyprios, maximeque Paphios commendat.

M. T. C. C. SEXTILIO RUFO QUÆS. S. D. 48

OMnes tibi commendo Cyprios, sed magis Paphios: quibus tu quæcumque commodaris, erunt mihi gratissima. Eoque facio libentius, ut eos tibi commendem, quod & tuæ laudi, cujus ego fautor sum, conducere arbitror, cum primus in eam insulam quæstor veneris, ea te instituere, quæ sequantur alii. Quæ, ut spero, facilius consequere, si & P. Lentuli, necessarii tui, legem, & ea, quæ a me constituta sunt, sequi volueris. Quam rem tibi confido magnæ laudi fore. Vale.

A R G U M E N T U M.

Commendat Q. Pompejum.

M. T. C. CURIO PROCOS. S. D. 49

Q Pompejus Sexti F. multis & veteribus causis necessitudinis mihi conjunctus est. Is cum antea meis commendationibus & rem, & gratiam, & auctoritatem suam tueri consueverit; nunc profecto, te provinciam obtinente, meis litteris assequi debet, ut nemini se intelligat commendatiorem umquam fuisse. Quamobrem a te majorem in modum peto, ut cum omnes meos æque, ac tuos observare pro nostra necessitudine debeas, hunc in primis ita in tuam fidem recipias, ut ipse intelligat, nullam rem sibi majori usui, aut ornamento, quam meam commendationem, esse potuisse. Vale.

ARGUMENTUM.

Petit, ut Manium Curium ab omni incommodo, detrimento, molestia integrum conservet. V. ep. 17.

M. T. C. AUCTO PROCOS. S. D. 50

Sumpsi hoc mihi pro tua in me observantia, quam penitus perspexi, quamdiu Brundusii fuimus, ut ad te familiariter, & quasi pro meo jure scriberem, si qua res esset, de qua valde laborarem. M.⁹ Curius, qui Patris negotiatur, ita mihi familiaris est, ut nihil possit esse conjunctius. Multa illius in me officia, multa in illum mea; quodque maximum est, summus inter nos amor & mutuus. Quæ cum ita sint, si ullam in amicitia mea spem habes; si ea, quæ in me officia & studia Brundusii contulisti, vis mihi etiam gratiora efficere, quamquam sunt gratissima; si me a tuis omnibus amari vides: hoc mihi da, atque largire, ut M.⁹ Curium sartum & rectum, ut ajunt, ab omniq[ue] incommodo, detrimento, molestia sincerum integrumque conserves. Et ipse spondeo, & omnes hoc tibi tui pro me recipient, ex mea amicitia, & ex tuo in me officio maximum te fructum, summamque voluptatem esse capturum. Vale.

ARGUMENTUM.

P. Messienum commendat.

M. T. C. P. CÆSIO S. D. 51

P Messienum, equitem Romanum, omnibus rebus ornatum, meumque perfamiliarem tibi commendo, ea commendatione, quæ potest esse diligentissima. Peto a te & pro nostra, & pro paterna amicitia, ut eum in tuam fidem recipias, ejusque rem famamque tueare. Virum bonum, tuaque amicitia dignum tibi adjunxeris, mihiq[ue] gratissimum feceris. Vale.

AR-

A R G U M E N T U M.

Hospitem suum Aristotelem commendat.

M. T. C. REGI S. D.

52

A. Licinius Aristoteles, Melitenſis, antiquiſſimus eſt hoſpes meus, & præterea conjunctus magno uſu familiaritatis. Hæc cum ita ſint, non dubito, quin tibi ſatis commendatus ſit. Et enim ex multis cognoſco, meam commendationem plurimum apud te valere. Hunc ego a Cæſare liberavi. Frequens enim fuerat nobiſcum; atque etiam diutius in cauſſa eſt, quam nos, commoratus. Quo melius te de eo exiſtimaturum arbitror. Fac igitur, mi Rex, ut intelligat, has ſibi litteras plurimum profuiſſe. Vale.

A R G U M E N T U M.

Genucilium Curvum commendat.

M. T. C. Q. THERMO PROPRIÆT. S. D. 53

L. Genucilio Curvo jampridem familiariffime uſor, optimo viro, & homine gratiffimo. Eum tibi penitus commendo, atque trado. Primum, ut omnibus in rebus ei te commodes, quoad fides tua, dignitasque patietur: patietur autem in omnibus. Nihil enim abs te umquam, quod ſit alienum tuis, aut etiam ſuis moribus, poſtulat. Præcipue autem tibi commendo negotia ejus, quæ ſunt in Hellesponto: primum, ut obtineat id juris in agris, quod ei Pariana civitas decrevit & dedit, & quod ſemper obtinuit ſine ulla controverſia: deinde, ſi quid habebit cum aliquo Hellespontio controverſiæ, ut in illam *διόκησιν* rejicias. Sed non mihi videor, cum tibi totum hominem diligentiffime commendarim, ſingulas ad te ejus cauſſas perſcribere debere. Summa illa ſit: quidquid officii, beneficii, honoris

in

in Genucilium contuleris, id te existimabo, in me ipsum, atque in rem meam contulisse. Vale.

ARGUMENTUM.

Primum agit gratias Thermo, quod Marcilium liberalissime tractaverit: deinde petit, operam det, ne focrus Marcilii rea fiat.

M. T. C. Q. THERMO PROPÆT. S. D. 54

CUM mihi multa grata sunt, quæ tu adductus mea commendatione, fecisti, tum in primis, quod M. Marcilium amici atque interpretis mei filium liberalissime tractavisti. Venit enim Laodiceam, & tibi apud me, mihiq; propter te, gratias maximas egit. Quare, quod reliquum est, a te peto, quando apud gratos homines beneficium ponis, ut eo libentius his comodes; operamque des, quoad fides tua patietur, ut focrus adolescentis rea ne fiat. Ego cum antea studiose commendabam Marcilium, tum multo nunc studiosius, quod in longa apparitione singularem & prope incredibilem patris Marcilii fidem, abstinentiam, modestiamque cognovi. Vale.

ARGUMENTUM.

Commendat Annejum, legatum suum, in controversia Sardiana.

M. T. C. THERMO PROPÆT. S. D. 55

ETSI mihi videor intellexisse, cum tecum Ephesi de re M. Anneji, legati mei, locutus sum, te ipsius causa vehementer omnia velle: tamen & M. Annejum tanti facio, ut mihi nihil putem prætermittendum, quod illius intersit: & me a te tanti fieri puto, ut non dubitem, quin ad tuam voluntatem magnus cumulus accedat commendationis meæ. Nam cum jamdiu diligerem M. Annejum, deque eo sic existimarem, ut res declar-

rat,

rat, quod ultro ei detulerim legationem, cum multis petentibus denegassem; tum vero postea quam mecum in bello atque in re militari fuit, tantam in eo virtutem, prudentiam, fidem, tantamque erga me benevolentiam cognovi, ut hominem neminem pluris faciam. Eum cum Sardinis habere controversiam scis: causam tibi exposuimus Ephesi; quam tu tamen coram facilius meliusque cognosces. De reliquo mihi mehercule diu dubium fuit, quid ad te potissimum scriberem. Jus enim quemadmodum dicas, clarum, & magna cum tua laude notum est. Nobis autem in hac causa nihil aliud opus est, nisi te jus instituto tuo dicere. Sed tamen, cum me non fugiat, quanta sit in Præ-tore auctoritas, præsertim ista integritate, gravitate, clementia, qua te esse inter omnes constat: peto abs te pro nostra conjunctissima necessitudine, plurimisque officiis paribus ac mutuis; ut voluntate, auctoritate, studio tuo perficias, ut M. Annejus intelligat, te & sibi amicum esse, quod non dubitat (sæpe enim mecum locutus est): & multo amiciores his meis litteris esse factum. In tuo toto imperio atque provincia nihil est, quod mihi gratius facere possis. Jam apud ipsum, gratissimum hominem, atque optimum virum, quam bene positurus sis studium tuum atque officium, dubitare te non existimo. Vale.

A R G U M E N T U M.

Negotia Cluvii Puteolani commendat.

M. T. C. THERMO PROPÆT. S. D. 56

CLuvius Puteolanus valde me observat, valdeque est mihi familiaris. Is ita sibi persuadet, quod in tua provincia negotiū habet, nisi, te provinciam obtinente, meis commendationibus confecerit, id se in perditis & desperatis habiturum. Nunc, quando mihi ab amico officiosissimo tan-
tum

tum oneris imponitur, ego quoque tibi imponam pro tuis in me summis officiis; ita tamen, ut tibi nolim molestus esse. Mylasii, & Alabandenses pecuniam Cluvio debent. Dixerat mihi Euthydemus, cum Ephesi essem, se curaturum, ut Ecdici Mylasii Romam mitterentur. Id factum non est. Legatos audio missos esse, sed malo Ecdicos, ut aliquid confici possit. Quare peto a te, ut eos, & Alabandenses jubeas Ecdicos Romam mittere. Præterea Philotes Alabandensis *ὑποδράκας* Cluvio dedit: hæ commissæ sunt. Velim cures, ut aut de hypothecis decedat, easque procuratoribus Cluvii tradat, aut pecuniam solvat. Præterea Heracleotæ, & Bargyletæ, qui item debent, aut pecuniam solvant, aut fructibus suis satisfaciant. Caunii præterea debent: sed ajunt, se depositam pecuniam habuisse. Id velim cognoscas: &, si intellexeris, eos neque ex edicto, neque ex decreto depositam habuisse, des operam, ut usuræ Cluvio, instituto tuo, conserventur. His de rebus eo magis laboro, quod agitur res Cn. Pompeji etiam nostri necessarii; & quod is magis etiam mihi laborare videtur, quam ipse Cluvius, cui satisfactum esse a nobis valde volo. His de rebus te vehementer etiam atque etiam rogo. Vale.

ARGUMENTUM.

Petit a Thermo, ut Annejum, legatum suum, remittat: eumque in negotio suo commendat.

M. T. C. THERMO PROPRÆT. S. D. 57

QUO magis quotidie ex litteris nuntiisque, bellum magnum esse in Syria, cognosco, eo vehementius a te pro nostra necessitudine contendo, ut mihi M. Annejum legatum primo quoque tempore remittas. Nam ejus opera, consilio, scientia rei militaris vel maxime intelligo, me, & Remp. adjuvari posse. Quod nisi tanta res ejus
age-

ageretur, nec ipse adduci potuisset, ut a me discederet; neque ego, ut eum a me dimitterem. Ego in Ciliciam proficisci cogito circiter Kal. Majas. Ante eam diem Annejus ad me redeat oportet. Illud, quod tecum & coram & per literas diligentissime egi, id & nunc etiam atque etiam rogo, curæ tibi sit, ut suum negotium, quod habet cum populo Sardonio, pro causæ veritate, & pro sua dignitate, conficiat. Intellexi ex tua oratione, cum tecum Ephesi locutus sum, te ipsius Anneji caussa omnia velle: sed tamen sic velim existimes, te mihi nihil gratius facere posse, quam si intellexero, per te illum ipsum negotium ex sententia confecisse. Idque quamprimum ut efficias, te etiam atque etiam rogo. Vale.

A R G U M E N T U M.

Commendat L. Custidium.

M. T. C. C. TITIO, L. F. RUFO
PRÆT. URB. S. D.

58

L. Custidius est tribulis, & municeps, & familiaris meus. Is causam habet, quam causam ad te deferet. Commendo tibi hominem, sicuti tua fides, & meus pudor postulat, tantum, ut faciles ad te aditus habeat: quæ æqua postulabit, ut, lubente te, impetret: sentiatque, meam sibi amicitiam, etiam cum longissime absim, prodesse in primis apud te. Vale.

A R G U M E N T U M.

Commendat M. Fabium.

M. T. C. CURTIO PÆDUCEANO PRÆT.
S. D.

59

M. Fabium unice diligo, summaque mihi cum eo consuetudo, & familiaritas est perventus. In ejus controversiis quid decernas, a te non pe-

peto (servabis, ut tua fides & dignitas postulat, edictum & institutum tuum); sed ut quam facillimos ad te aditus habeat; quæ erunt æqua, lubente te, impetret: ut meam amicitiam sibi, etiam cum procul absim, prodesse sentiat, præsertim apud te. Hoc vehementer etiam atque etiam te rogo. Vale.

A R G U M E N T U M.

Commendat Livinejum libertum.

M. T. C. C. MUNATIO C. F. S. D. 60

Livinejus Trypho est omnino J. Reguli familiarissimi mei libertus: cujus calamitas etiam officiosorem me facit in illum; nam benevolentior, quam semper fui, esse non possum. Sed ego libertum ejus per seipsum diligo: summa enim ejus erga me officia exstiterunt iis nostris temporibus, quibus facillime bonam benevolentiam hominum, & fidem perspicere potui. Eum tibi ita commendo, ut homines grati & memores benemeritos de se commendare debent. Pergratum mihi feceris, si ille intellexerit, se, quod pro salute mea multa pericula adierit, sæpe hinc summa navigarit, pro tua erga me benevolentia gratum etiam tibi fecisse. Vale.

A R G U M E N T U M.

Commendat Pinnium in exactione pecuniæ, quam ei Nicæenses debent.

M. T. C. P. SILIO PROPÆT. S. D. 61

T Pinnio familiarissime me usum esse, scire te arbitror: quod quidem ille testamento declaravit, qui me tum tutorem, tum etiam secundum hæredem instituerit. Ejus filio, mire studioso, & erudito, & modesto pecuniam Nicæenses grandem debent ad H-S. octogies: &, ut audio,

in.

in primis volunt ei solvere. Pergratum igitur mihi feceris, quando non modo reliqui tutores, qui sciunt, quanti me facias, sed etiam puer ipse sibi persuasit, te omnia mea causa facturum esse, si dederis operam, quoad tua fides dignitasque patietur, ut quamprimum pecunia Pinnio solvatur Nicænsium nomine. Vale.

A R G U M E N T U M.

Primum de Atilio gratias agit, deinde Q. Fratrem commendat.

M. T. C. SILIO PROPRÆT. S. D. 62

ET in Atilii negotio te amavi: cum enim fero venissem, tamen honestum equitem Romanum beneficio tuo conservavi: & mehercule semper sic in animo habui, te in meo ære esse propter Lamiaë nostri conjunctionem, & singularem necessitudinem. Itaque primum tibi ago gratias, quod me omni molestia liberas: deinde impudentia prosequor; sed idem sarciam. Te enim semper sic colam & tuebor, ut quem diligentissime. Q. Fratrem meum, si me diligis, eo numero cura, ut habeas, quo me. Ita magnum beneficium tuum magno cumulo auxeris. Vale.

A R G U M E N T U M.

Commendat M. Lænum studiose admodum.

M. T. C. SILIO PROPRÆT. S. D. 63

NON putavi fieri posse, ut mihi verba deessent; sed tamen in M. Lænio commendando desunt. Itaque rem tibi exponam paucis verbis, sed tamen ut plane perspicere possis voluntatem meam. Incredibile est, quanti faciamus & ego, & frater meus, qui mihi carissimus est, M. Lænum. Id fit cum plurimis ejus officiis, tum summa probitate, & singulari modestia. Eum ego a me invi-

tissi-

tissimus dimisi, tum propter familiaritatem, & consuetudinis suavitatem; tum quod consilio ejus fideli ac bono libenter utebar. Sed vereor, ne jam mihi superesse verba putes, quæ dixeram de futura. Commendo tibi hominem, sicut intelligis, me, de quo ea supra scripserim, debere commendare: a teque vehementer etiam atque etiam peto, ut, quod habet in tua provincia negotii, expedias: quod tibi videbitur rectum esse, ipsi dicas. Hominem facillimum liberalissimumque cognosces. Itaque te rogo, ut eum solutum, liberum, confectis ejus negotiis per te, quamprimum ad me remittas. Id mihi fratrique meo gratissimum feceris. Vale.

A R G U M E N T U M.

Agit gratias de Nerone honorificentissime tractato, eumque in omnibus rebus vehementer commendat.

M. T. C. SILIO PROPRÆT. S. D. 64

NEro meus mirificas apud me tibi gratias egit, prorsus incredibiles, ut nullum honorem sibi haberi potuisse diceret, qui a te prætermissus esset. Magnum fructum ex ipso capies: nihil est enim illo adolescente gratius. Sed mehercule mihi quoque gratissimum fecisti: pluris enim ex omni nobilitate neminem facio. Itaque, si ea feceris, quæ ille per me tecum agi voluit, gratissimum mihi feceris. Primum, de Pausania Alabandensi, sustentes rem, dum Nero veniat. Vehementer enim ejus causa cupere eum intellexi. Itaque hoc valde te rogo. Deinde Nisæos, quos Nero in primis habet necessarios, diligentissimeque tuetur ac defendit, habeas tibi commendatissimos, ut intelligat illa civitas, sibi in Neronis patrocinio summum esse præsidium. Strabonem Servilium tibi sæpe commendavi: nunc eo facio id impensius, quod ejus causam Nero suscepit. Tantum

T

a te

a te petimus, ut agas eam rem, nec relinquo hominem innocentem ad alicujus tui dissimilis quaestum. Id tum gratum mihi erit, tum etiam existimabo, te humanitate tua esse usum. Summa hujus epistolae haec est, ut ornes omnibus rebus Neronem, sicut instituisti, atque fecisti. Magnum theatrum habet ista provincia, non ut haec nostra, adolescentis nobilis, ingeniosi, abstinentis commendationem, atque gloriam. Quare si te fautore usus erit, sicut & utetur profecto, & usus est, amplissimas clientelas acceptas a majoribus confirmare poterit, & beneficiis suis obligare. Hoc in genere si eum adjuveris eo studio, quo ostendisti, apud ipsum praclarissime posueris; sed mihi etiam gratissimum feceris. Vale.

A R G U M E N T U M.

Capit. pactiones per Hispanem cum civitatibus confici; in eoque illum Silio commendat.

M. T. C. SILIO PROPRAET. S. D. 65

Cum P. Terentio Hispano, qui operas in scriptura pro magistro dat, mihi summa familiaritas consuetudoque est; multaque & magna inter nos officia paria & mutua intercedunt. Ejus summa existimatio agitur in eo, ut pactiones cum civitatibus reliquis conficiat. Non me praeterit, nos eam rem Ephesi expertos esse, neque ab Ephesiis ullo modo impetrare potuisse. Sed quando, quemadmodum omnes existimant, & ego intelligo, tua cum summa integritate, tum singulari humanitate & mansuetudine consecutus es, ut libentissimis Graecis, nunc, quod velis, consequare; peto a te majorem in modum, ut honoris mei causa hac laude Hispanem affici velis. Praeterea cum sociis scripturae mihi summa necessitudo est, non solum ob eam causam, quod ea societas uni-

socijs utor familiarissime. Ita & Hispanem meum per me ornaris, & societatem mihi conjunctionem feceris: tuque ipse & ex ejus observantia, gratissimi hominis, & ex sociorum gratia, hominum amplissimorum, maximum fructum capies, & me summo beneficio affeceris. Sic enim velim existimes, ex tota tua provincia, omnique isto imperio nihil esse, quod mihi gratius facere possis. Vale.

A R G U M E N T U M.

Cæcinam in colligendis Asiaticæ negotiationis reliquiis commendat.

M. T. C. P. SERVILIO ISAVRICO PROCOS.

S. D.

66

A. Cæcinam, maxime proprium clientem familiæ vestræ, non commendarem tibi, cum scirem, qua fide in tuos, qua clementia in calamitosos soleres esse; nisi me & patris ejus, quosum familiarissime usus, memoria, & hujus fortuna ita moveret, ut hominis omnibus mecum studiis officiisque conjunctissimi movere debeat. A te hoc omni contentione peto; sic, ut majore cura, majore animi labore petere non possim; ut ad ea, quæ tua sponte sine cujusquam commendatione faceres in hominem tantum, & talem, calamitosum, aliquem afferant cumulum meæ litteræ, quo studiosius eum, quibuscumque rebus possis, juves. Quod si Romæ fuisses, etiam salutem A. Cæcinæ essemus, ut opinio mea fert, per te consecuti. De qua tamen magnam spem habemus, freti clementia collegæ tui. Nunc, quando justitiam tuam secutus, tutissimum sibi portum provinciam istam esse duxit, etiam atque etiam te rogo, atque oro, ut eum & in reliquiis veteris negotiationis colligendis juves, & ceteris rebus tegas atque tueare. Hoc mihi gratius facere nihil potes. Vale.

ARGUMENTUM.

Commendat Andronem, Arthemonis filium, Laodicensem.

M. T. C. SERVILIO S. D.

67

EX provincia mea Ciliciensi, cui scis τρεῖς δόρυ κησείς Asiaticas attributas fuisse, nullo sum familiarius usus, quam Androne, Arthemonis filio, Laodicensi: eumque habui in ea civitate tum hospitem, tum vehementer ad meæ vitæ rationem & consuetudinem accommodatum. Quem quidem multo etiam pluris, posteaquam decessi, facere cœpi, quod multis rebus expertus sum gratum hominem, meique memorem. Itaque eum Romæ libentissime vidi. Non te enim fugit, qui plurimis in ista provincia benigne fecisti, quam multi grati reperiantur. Hæc propterea scripsi, ut me non sine causa laborare intelligeres, & ut tu ipse eum dignum hospitio tuo judicares. Feceris igitur mihi gratissimum, si ei declararis, quanti me facias: id est, si receperis eum in fidem tuam, & quibuscumque rebus honeste, ac sine molestia tua poteris, adjuveris. Hoc mihi vehementer erit gratum: idque ut facias, te etiam atque etiam rogo. Vale.

ARGUMENTUM.

Significat, quam sibi gratum fuerit, cursum illius navigationis cognoscere. Petit, ut de statu provinciae institutisque suis scribat: postremo suum officium ad omnia pollicetur.

M. T. C. P. SERVILIO ISAURICO PROCOS.

COLLEGE S. D.

68

GRatæ mihi vehementer tuæ litteræ fuerunt, ex quibus cognovi cursus navigationum tuarum. Significabas enim memoriam tuam nostræ ne-

necessitudinis, quæ mihi nihil poterat esse jucundius. Quod reliquum est, multo etiam erit gratius, si ad me de rep., id est, de statu provinciæ, de institutis tuis familiariter scribes. Quæ quamquam ex multis pro tua claritate audiam, tamen libentissime ex tuis litteris cognoscam. Ego ad te, de reip. summa quid sentiam, non sæpe scribam, propter periculum ejusmodi litterarum: quid agatur autem, scribam sæpius. Sperare tamen videor, Cæsari collegæ nostro fore curæ, & esse, ut habeamus aliquam reimp., cujus consiliis magni referebat te interesse. Sed, si tibi utilius est, id est gloriosius, Asiæ præesse, & istam partem reipub. male affectam tueri, mihi quoque idem, quod tibi, & laudi tuæ profuturum est, optatius debet esse. Ego, quæ ad tuam dignitatem pertinere arbitrabor, summo studio diligentiaque curabo: in primisque tuebor omni observantia clarissimum virum, patrem tuum, quod & pro vetustate necessitudinis, & pro beneficiis vestris, & pro dignitate ipsius facere debeo. Vale.

ARGUMENTUM.

Petit, ut C. Curtium in fidem recipiat, habeatque in numero suorum.

M. T. C. SERVILIO COLLEGÆ S. D. 69

Curtius Mithres est ille quidem, ut scis, libertus Postumii, familiarissimi mei: sed me colit, & observat æquè, atque illum ipsum patronum suum. Apud eum ego sic Ephesi fui, quotiescumque fui, tamquam domi meæ: multaque acciderunt, in quibus & benevolentiam ejus erga me experirer, & fidem. Itaque, si quid aut mihi, aut meorum cuipiam in Asia opus est, ad hunc scribere consuevi; hujus cum opera & fide, tum domo & re uti, tamquam meâ. Hæc ad te eo pluribus scripsi, ut intelligeres, me non

vulgariter, nec ambitiose, sed ut pro homine intimo, ac mihi pernecessario, scribere. Peto igitur a te, ut in ea controversia, quam habet de fundo cum quodam Colophonio, & in ceteris rebus, quantum fides tua patietur, quantumque tuo commodo poteris, tantum ei honoris mei causa commodes: etsi, ut ejus modestiam cognovi, gravis tibi nulla in re erit. Si & mea commendatione, & sua probitate affectus erit, ut de se bene existimes, omnia se adeptum arbitrabitur. Ut igitur cum recipias in fidem, habeasque in numero tuorum, te vehementer etiam atque etiam rogo. Ego, quæ te velle, quæque ad te pertinere arbitrabor, omnia studiose diligenterque curabo. Vale.

A R G U M E N T U M.

Ampium Menandrum non vulgariter commendat.

M. T. C. SERVILIO COLLEGE S. D. 70

Quia non est obscura tua in me benevolentia, sic fit, ut multi per me tibi velint commendari. Ego autem tribuo nonnumquam in vulgus, sed plerumque necessariis, ut hoc tempore. Nam cum T. Ampio Balbo mihi summa familiaritas necessitudoque est. Ejus libertum T. Ampium Menandrum, hominem frugi, & modestum, & patrono, & nobis vehementer probatum, tibi commendo majorem in modum. Vehementer mihi gratum feceris, si, quibuscumque rebus sine tua molestia poteris, ei commodaris. Quod ut facias, te vehementer etiam atque etiam rogo. Vale.

A R G U M E N T U M.

Commendat T. Agusium, veterem amicum.

M. T. C. SERVILIO COLLEGE S. D. 71

Multos tibi commendem necesse est, quando omnibus nota nostra necessitudo est, tuaque in me benevolentia. Sed tamen si omnium causa, quos commendo, velle debeo, tamen cum omnibus non eadem mihi causa est. T. Agusius & comes meus fuit illo miserrimo tempore, & omnium
iti-

itinerum, navigationum, laborum, periculorum meorum socius: neque hoc tempore discessisset a me, nisi ego ei permisisssem. Quare sic tibi eum commendo, ut unum de meis domesticis, & maxime necessariis. Pergratum mihi feceris, si eum ita tractaris, ut intelligat, hanc commendationem sibi magno usui atque adjumento fuisse. Vale.

ARGUMENTUM.

Petit a Servilio, ut omnibus rebus Cerelliae benigne faciat, quemadmodum receperat.

M. T. C. SERVILIO COLLEGÆ S. D. 72

Cerelliae, necessariae meae, rem, nomina, possessiones Asiaticas commendavi tibi praesens in hortis tuis, quam potui diligentissime: tuque mihi, pro tua consuetudine, proque tuis in me perpetuis maximisque officii, omnia te facturum, liberalissime recepisti. Meminisse te id spero: scio enim solere. Sed tamen Cerelliae procuratores scripserunt, te, propter magnitudinem provinciae, multitudinemque negotiorum etiam atque etiam esse commonefaciendum. Peto igitur, ut memineris, te omnia, quae tua fides pateretur, mihi cumulate recepisse. Equidem existimo, habere te magnam facultatem (sed hoc tui est consilii & iudicii) ex eo S. C. quod in haeredes C. Vennonii factum est, Cerelliae commodandi: id S. C. tu interpretabere pro tua sapientia. Scio enim, ejus ordinis auctoritatem semper apud te magni fuisse. Quod reliquum est, sic velim existimes, quibuscumque rebus Cerelliae benigne feceris, mihi te gratissimum esse facturum. Vale.

ARGUMENTUM.

Gratulatur de reditu incolumi: gratias agit quodammodo de Egnatio, & Oppio: petit, ut Antipatri filios sibi condonet.

M. T. C. PHILIPPO PROCOS. S. D. 73

Gratulor tibi, quod ex provincia saluum te ad tuos recepisti incolumi fama, & repub. Quod si Romae te vidissem, coram gratias egissem, quod

tibi L. Egnatius, familiarissimus meus, absens, L. Oppius præsens curæ fuisset. Cum Antipatro Derbete mihi non solum hospitium, verum etiam summa familiaritas intercedit. Ei te vehementer succensuisse audiui, & moleste tuli. De re nihil possum judicare: nisi illud mihi certe persuadeo, te, talem virum, nihil temere fecisse. A te autem pro veteri nostra necessitudine etiam atque etiam peto, ut ejus filios, qui in tua potestate sunt, mihi potissimum condones; nisi quid existimas in ea re violari existimationem tuam. Quod ego si arbitrarer, nunquam te rogarem, mihiq; tua fama multo antiquior esset, quam illa necessitudo est. Sed mihi ita persuadeo (potest fieri, ut fallar) eam rem laudi tibi potius, quam vituperationi fore. Quid fieri possit, & quid mea causa facere possis (nam, quid velis, non dubito) velim, si tibi grave non erit, certior me facias. Vale.

ARGUMENTUM.
Oppium præsentem, & Egnatii absentis negotia commendat.

M. T. C. Q. PHILIPPO PROCOS. S. D. 74
Etsi non dubito, pro tua in me observantia, proque nostra necessitudine, quin commendationem meam memoria teneas: tamen etiam atque etiam eundem tibi L. Oppium, familiarem meum, præsentem, & L. Egnatium, familiarissimi mei absentis negotia commendo. Tanta mihi cum eo necessitudo est familiaritasque, ut, si mea res esset, non magis laborarem. Quapropter gratissimum mihi feceris, si curaris, ut is intelligat, me a te tantum amari, quantum ipse existimo. Hoc mihi gratius facere nihil potes. Idque ut facias, te vehementer rogo. Vale.

ARGUMENTUM.
Commendat Avianum Flaccum.

M. T. C. T. TITIO, T. F. LEGATO S. D. 75
Et si non dubito, quin apud te mea commendatio prima satis valeat, tamen obsequor homi-
 ni

ni familiarissimo, C. Aviano Flacco, cujus causa omnia tum cupio, tum mehercule etiam debeo. De quo & praesens tecum egi diligenter, cum tu mihi humanissime respondisti; & scripsi ad te accurate antea. Sed putat interesse sua, me ad te quam saepissime scribere. Quare velim mihi ignoscas, si, illius voluntati obtemperans, minus videbor meminisse constantiae tuae. A te idem illud peto, ut de loco, quo deportet frumentum, & de tempore, Aviano commodos: quorum utrumque per eundem me obtinuit triennium, dum Pompejus isti negotio praefuit. Summa est, in quo mihi gratissimum facere possis, si curaris, ut Avianus, quando se a me amari putat, me a te amari sciat. Erit id mihi pergratum. Vale.

A R G U M E N T U M.

Petit, ut C. Valgius emptam possessionem in agro Fregellano, liberam immunemque habeat.

M. T. C. QUATUOR VIRIS, ET DECURIONIBUS
S. D. 76

TAntae mihi cum Q. Hippii causae necessitudinis sunt, ut nihil possit esse conjunctius, quam nos inter nos sumus. Quod nisi ita esset, uterer mea consuetudine, ut vobis nulla in re molestus essem. Etenim vos mihi optimi testes estis, cum mihi persuasum esset, nihil esse, quod a vobis impetrare non possem, numquam me tamen gravem vobis esse voluisse. Vehementer igitur vos etiam atque etiam rogo, ut honoris mei causa liberalissime C. Valgium Hippianum tractetis, remque cum eo conficiatis, ut, quam possessionem habet in agro Fregellano, a vobis emptam, eam liberam & immunem habere possit. Id si a vobis impetraro, summo me beneficio vestro affectum arbitrabor. Valete.

ARGUMENTUM.

Narrat officium suum: commendat M. Bollanum; petit, ut sibi servum suum Dionysium restituum curet.

M. T. C. P. SULPICIO IMP. S. D. 77

CUM his temporibus non sane in senatum ventitarem, tamen ut tuas litteras legi, non existimavi, me salvo jure nostræ veteris amicitiae, multorumque inter nos officiorum, facere posse, ut honori tuo deessem. Itaque affui, supplicationemque tibi lubenter decrevi: nec reliquo tempore ullo aut rei, aut existimationi, aut dignitati tuæ deero. Atque, ut hoc tui necessarii sciant, hoc me animo erga te esse, velim facias eos per litteras certiores, ut si quid tibi opus sit, ne dubitent mihi jure suo denuntiare. M. Bollanum, virum bonum, & fortem, & omnibus rebus ornatum, meumque veterem amicum, tibi magnopere commendo. Pergratum mihi feceris, si curaris, ut is intelligat, hanc commendationem sibi magno adjumento fuisse: ipsumque virum optimum, gratissimumque cognosces. Promitto tibi, te ex ejus amicitia magnam voluptatem esse capturum. Præterea a te peto majorem in modum, pro nostra amicitia, & pro tuo perpetuo in me studio, ut in hac re etiam elaboras. Dionysius servus meus, qui meam bibliothecam multorum nummorum tractavit, cum multos libros surripuisset, nec se impune laturum putaret, aufugit. Is est in provincia tua. Eum & M. Bollanus familiaris meus, & multi alii Narona viderunt. Sed cum se a me manumissum esse diceret, crediderunt. Hunc tu si mihi restituendum curaris, non possum dicere, quam mihi gratum futurum sit. Res ipsa parva, sed animi mei dolor magnus est. Ubi sit, & quid fieri possit, Bollanus te docebit. Ego si hominem per te recuperare, summo me a te beneficio affectum arbitror. Vale.

ARGU-

ARGUMENTUM.

Petit, ut Democritum Sicyonium in suam fidem recipiat.

M. T. C. ALLIENO PROCOS. S. D. 78

Democritus Sicyonius non solum hospes meus est, sed etiam, quod non multis contingit, Græcis præsertim, valde familiaris. Est enim in eo summa probitas, summa virtus, summa in hospites liberalitas & observantia; meque præ ceteris & colit, & observat, & diligit. Eum tu non modo suorum civium, verum etiam prope Achajæ principem cognosces. Huic ego tantummodo adiutum ad tuam cognitionem patefacio & munio. Cognitum per te ipsum, quæ tua natura est, dignum tua amicitia atque hospitio judicabis. Peto igitur a te, ut, his litteris lectis, recipias eum in tuam fidem; pollicere omnia te facturum mea causa. De reliquo, si id, quod confido fore, dignum eum tua amicitia hospitioque cognoveris, peto, ut eum complectare, diligas, in tuis habeas. Erit id mihi majorem in modum gratum. Vale.

ARGUMENTUM.

Cajum, & Marcum Avianos fratres commendat, alterum præsentem, alterum absentem.

M. T. C. ALLIENO PROCOS. S. D. 79

ET te scire arbitror, quanti fecerim C. Avianum Flaccum, & ego ex ipso audieram, optimo, & gratissimo homine, quam a te liberaliter esset tractatus. Ejus filios, dignissimos illo patre, meosque necessarios, quos ego unice diligo, commendo tibi sic, ut majore studio nullos commendare possim. C. Avianus in Sicilia est; Marcus est nobiscum. Ut illius dignitatem præsentis ornes, rem utriusque defendas, te rogo. Hoc mihi gratius in ista provincia facere nihil potes. Idque ut facias, te vehementer etiam atque etiam rogo. Vale.

LIBER XIV.

ARGUMENTUM.

Exsul deflet suam suorumque calamitatem; ejusque culpam confert in amicorum consilia: vici venditionem prorsus improbat: alia quaedam scribit.

M. T. C. TERENTIÆ, ET TULLIOLÆ,
ET CICERONI SUO S. D.

I

ET litteris multorum, & sermone omnium perfertur ad me, incredibilem tuam virtutem & fortitudinem esse; teque nec animi, nec corporis laboribus defatigari. Me miserum! te ista virtute, fide, probitate, humanitate, in tantas ærumnas propter me incidisse! Tulliolamque nostram, ex quo patre tantas voluptates capiebat, ex eo tantos percipere luctus! Nam quid ego de Cicerone dicam? qui cum primum sapere cœpit, acerbissimos dolores miserasque percepit. Quæ si, ut tu scribis, fato facta putarem, ferrem paullo facilius: sed omnia sunt mea culpa commissa, qui ab iis me amari putabam, qui invidebant: eos non sequebar, qui perebant. Quod si nostris consiliis usi essemus, neque apud nos tantum valuisset sermo aut stultorum amicorum, aut improborum, beatissimi viveremus: nunc, quando sperare nos amici jubent, dabo operam, ne mea valetudo tuo labori desit. Res quanta sit, intelligo; quantoque fuerit facilius manere domi, quam redire. Sed tamen, si omnes tribunos pleb. habemus, si Lentulum tam studiosum, quam videtur, si vero etiam Pompejum, & Cæsarem, non est desperandum. De familia, quo modo placuisse amicis scribis, faciemus. De loco, nunc quidem jam abiit pestilentia: sed, quamdiu fuit, me non attigit. Planctius, homo officiosissimus, me cupit esse secum; & adhuc retinet. Ego volebam loco magis deserto esse in Epiro, quo neque Hispo veniret, nec

mi-

milites : sed adhuc Plancius me retinet : sperat posse fieri , ut mecum in Italiam decedat . Quem ego diem si videro , & si in vestrum complexum venero , ac si & vos , & me ipsum recuperaro , satis magnum mihi fructum videbor percepisse & vestræ pietatis & meæ . Pisonis humanitas , virtus , amor in omnes nos tantus est , ut nihil supra possit . Utinam ea res ei voluptati sit : gloriæ quidem video fore . De Q. fratre nihil ego te accusavi : sed vos , cum præsertim tam pauci sitis , volui esse quam conjunctissimos . Quibus me voluisti agere gratias , egi , & me a te certiores factum esse scripsi . Quod ad me , mea Terentia , scribis , te vicum venditurum : quid , obsecro te , (me miserum !) quid futurum est ? Et , si nos premet eadem fortuna , quid puero misero fiet ? Non queo reliqua scribere (tanta vis lacrimarum est) ne te in eundem fletum adducam . Tantum scribo : si erunt in officio amici , pecunia non deerit : si non erunt , tu efficere tua pecunia non poteris . Per fortunas miseras nostras , vide , ne puerum perditum perdamus : cui si aliquid erit , ne egeat ; mediocri virtute opus est , & mediocri fortuna , ut cetera consequatur . Fac valeas , & ad me tabellarios mittas , ut sciam , quid agatur , & vos quid agatis . Mihi omnino jam brevis expectatio est : Tulliolæ , & Ciceroni salutem dic . Valete . D. ante diem vi. Kal. Dec. Dyrrhachium veni , quod & libera civitas est , & in me officiosa , & proxima Italiæ . Sed si offender me loci celebritas , alio me conferam , & ad te scribam .

ARGUMENTUM .

Brevitatem suarum litterarum excusat : Pisonis generi officia in se laudat . Dolet Terentiæ vicem : rogat , ne suam dotem projiciat , & ut valetudini serviat .

M. T. C. TERENTIÆ , TULLIOLÆ ,

ET CICERONI SUIS S. D.

NOli putare , me ad quemquam longiores epistolas scribere , nisi si quis ad me plura scripsit ,

psit, cui puto rescribi oportere. Nec enim habeo, quod scribam: nec hoc tempore quidquam difficilius facio. Ad te vero, & ad nostram Tulliolam non queo sine plurimis lacrimis scribere. Vos enim video esse miserrimas, quas ego beatissimas semper esse volui, idque præstare debui, & nisi tam timidi fuissetis, præstitissem. Pisonem nostrum merito ejus amo plurimum. Eum, ut potui, per litteras cohortatus sum, gratiasque egi, ut debui. In novis tribunis pleb. intelligo spem te habere: id erit firmum, si Pompeji voluntas erit: sed Crassum tamen metuo. A te quidem omnia fieri fortissime & amantissime video: nec miror, sed mæreo casum ejusmodi, ut tantis tuis miseriis meæ miseriæ sublevantur. Nam ad me P. Valerius homo officiosus scripsit, id quod ego maximo cum fletu legi, quemadmodum a Vestæ ad Tabulam Valeriam ducta esses. Hem mea lux, meum desiderium, unde omnes opem petere solebant! te nunc, mea Terentia, sic vexari, sic jacere in lacrimis & sordibus! idque fieri mea culpa, qui ceteros servavi, ut nos periremus! Quod de domo scribis, hoc est, de area: ego vero tum denique mihi videbor restitutus, si illa nobis erit restituta. Verum hæc non sunt in nostra manu. Illud doleo, quæ impensa facienda est, in ejus partem te miseram & despoliatam venire. Quod si conficitur negotium, omnia consequemur; sin eadem nos fortuna premet, etiamne reliquias tuas misera projicies? Obsecro te, mea vita, quod ad sumptum attinet, sine alios, qui possunt, si modo volunt, sustinere: & valetudinem istam infirmam, si me amas, noli vexare. Nam mihi ante oculos dies noctesque versaris. Omnes labores te excipere video, timeo, ut sustineas: sed video in te esse omnia. Quare, ut id, quod speras, & quod agis, consequamur, servi valetudini. Ego, ad quos scribam, nescio, nisi

nisi aut ad eos, qui ad me scribunt; aut ad eos, de quibus ad me vos aliquid scribitis. Longius, quoniam vobis ita placet, non discedam: sed velim quam sapissime litteras mittatis, præsertim si quid est firmitus, quod speremus. Valete, mea desideria, valete. Dat. ad III. Non. Octob. Thesalonicae.

ARGUMENTUM.

Queritur, quod sua culpa & ipse & omnes sui maximas in miseras inciderint: deinde ad varia capita respondet: sed ita dolenter, ut ideo a nonnullis, jure fortasse, tamquam mollis reprehendatur.

M. T. C. TERENTIÆ, TULLIOLÆ,
ET CICERONI SUIS S. D.

3

Accepi ab Aristocrito tres epistolas, quas ego lacrimis prope delevi. Conficior enim mærore, mea Terentia: nec me mæx miseriæ magis excruciant, quam tuæ vestræque. Ego autem hoc miserior sum, quam tu, quæ es miserrima, quod ipsa calamitas communis est utriusque nostrum: sed culpa mea propria est. Meum fuit officium, vel legatione vitare periculum, vel diligentia, & copiis resistere, vel cadere fortiter: hoc miserius, turpius, indignius nobis nihil fuit. Quare cum dolore conficior, tum etiam pudore. Pudet enim me uxori mæx optimæ, suavissimis liberis, virtutem & diligentiam non præstitisse. Nam mihi ante oculos dies noctesque versatur squalor vester, & mæror, & infirmitas valetudinis tuæ: spes autem salutis pertenuis ostenditur. Inimici sunt multi, invidi pæne omnes. Ejicere nos magnum fuit, excludere facile est. Sed tamen quamdiu vos eritis in spe, non deficiam, ne omnia mea culpa cecidisse videantur. Ut tuto sim, quod laboras: id mihi nunc facillimum est; quem etiam inimici volunt vivere in tantis miseriis. Ego tamen faciam, quæ præcipis. Amicis, quibus voluisti,

luisi, egi gratias: & eas litteras Dexippo dedi: meque de eorum officio scripsi a te certiorē esse factum. Pisonem nostrum mirifico esse studio in nos & officio, & ego perspicio & omnes prædicant. Dii faxint, ut tali genero mihi præsentirecum simul, ac cum liberis nostris frui liceat! Nunc spes reliqua est in novis tribunis pleb. & in primis quidem diebus: nam, si inveterarit, actum est. Ea re ad te statim Aristocritum misi, ut ad me continuo initia rerum, & rationem totius negotii posses scribere: etsi Dexippo quoque ita imperavi, statim ut recurreret: & ad fratrem misi, ut crebro tabellarios mitteret: nam ego eo nomine sum Dyrrhachii hoc tempore, ut quam celerime; quid agatur, audiam; & sim tuto. Civitas enim hæc semper a me defensa est. Cum inimici nostri venire dicentur, tum in Epirum ibo. Quod scribis, te, si velim, ad me venturam: ego vero, cum sciam, magnam partem istius oneris abs te sustineri, te istuc esse volo. Si perficitis, quod agitis, me ad vos venire oportet: sin autem: sed nihil est opus reliqua scribere. Ex primis, aut ad summum secundis litteris tuis constituere poterimus, quid nobis faciendum sit. Tu modo ad me velim omnia diligentissime perscribas: etsi magis jam rem, quam litteras debeo expectare. Cura, ut valeas: & ita tibi persuadeas, mihi te carius nihil esse, nec unquam fuisse. Vale mea Terentia, quam ego videre video: itaque debilitor lacrimis. Vale. Pridie Kal. Dec. Dyrrhachii.

A R G U M E N T U M.

Scripta est hæc epistola non solum dolenter, sed etiam molliter. Argumentum est multiplex, quod respondet ad varia capita litterarum Terentia.

M. T. C. TERENTIAE, TULLIOLE,

ET CICERONI SUI S. D. 4

EGO minus sæpe ad vos do litteras, quam possum: propterea quod cum omnia mihi tempora sunt misera; tum vero, cum aut scribo ad vos,

vos ; aut vestras lego , conficior lacrimis sic , ut
ferre non possim . Quod utinam minus vitæ cupi-
dus fuisset ! certe nihil , aut non multum in vitâ
mali vidissemus . Quod si nos ad aliquam alicujus
commodi aliquando recuperandi spem fortuna re-
servavit , minus est erratum a nobis : sin hæc mala
fixa sunt ; ego vero te quamprimum , mea vita ,
cupio videre , & in tuo complexu emori : quando
neque Dii , quos tu castissime coluisti ; neque ho-
mines , quos ego servavi semper , nobis gratiam
retulerunt . Nos Brundusii apud M. Lenium Flac-
cum dies XIII. fuimus , virum optimum , qui pe-
riculum fortunarum & capitis sui pro mea salute
neglexit : neque legis improbissimæ pœna dedu-
ctus est , quominus hospitii & amicitiaæ jus , offi-
ciumque præstaret . Huic utinam aliquando gra-
tiam referre possimus ! habebimus quidem semper .
Brundusio profecti sumus ad II. Kal. Majas : per
Macedoniam Cyzicum petebamus . O me perdi-
tum ! o me afflictum ! quid nunc rogem te , ut ve-
nias , mulierem ægram , & corpore & animo
confectam ? non rogem ? sine te igitur sim ? Opi-
nor , sic agam : si est spes nostri reditus , eam con-
firmes , & re adjuves : sin , ut ego metuo , trans-
actum est , quoquo modo potes , ad me fac venias .
Unum hoc scito : si te habebo , non mihi videbor
plane periisse . Sed quid de Tulliola mea fiet ? jam
id vos videte : mihi deest consilium . Sed certe
quoquo modo se res habebit , illius misellæ & ma-
trimonio & famæ serviendum est . Quid ? Cicero
meus , quid aget ? Iste vero sit in sinu semper
& complexu meo . Non queo jam plura scribere :
impedit mæror . Tu quid egeris , nescio : utrum
aliquid teneas , an , quod metuo , plane sis spolia-
ta . Pisonem , ut scribis , spero fore semper no-
strum . De familia liberata nihil est , quod te mo-
veat . Primum tuis ita promissum est , te factu-
ram esse , ut quisque esset meritis . Est autem in
offi-

officio adhuc Orpheus : præterea magnopere nemo . Ceterorum fervorum ea causa est , ut , si res a nobis abesset , liberti nostri essent , si obtinere potuissent ; sin ad nos pertinerent , fervirent , præterquam oppido pauci . Sed hæc minora sunt . Tu quod me hortaris , ut animo sim magno , & spem habeam recuperandæ salutis ; id velim sit ejusmodi , ut recte sperare possimus . Nunc , miser , quando tuas jam litteras accipiam ? quis ad me perferet ? quas ego expectassem Brundusii , si esset licitum per nautas , qui tempestatem prætermittere noluerunt . Quod reliquum est , sustenta te , mea Terentia , ut potes : honestissime viximus , floruimus : non vitium nostrum , sed virtus nostra nos afflixit . Peccatum est nullum , nisi quod non una animam cum ornamentis amisimus . Sed , si hoc fuit liberis nostris gratius , nos vivere ; cetera , quamquam ferenda non sunt , feramus . Atque ego , qui te confirmo , ipse me non possum . Clodium Philetærum , quod valetudine oculorum impediabatur , hominem fidelem , remisi . Sallustius officio vincet omnes spes . Cennius est perbenevolus nobis : quem semper spero tui fore observantem . Sicca dixerat , se mecum fore : sed Brundusio discessit . Cura , quoad potes , ut valeas : & sic existimes , vehementius me tua miseria , quam mea commoveri . Mea Terentia fidissima , atque optima uxor , & mea carissima Tulliola , & spes reliqua nostra Cicero , valete . Pridie Kal. Maji . Brundusio .

A R G U M E N T U M .

Scripsit hanc aliquot annis post superiores , L. Paullo , C. Marcello Coss. cum ex Provincia Romam rediret . Significat de navigatione sua , de litteris acceptis , de hereditate Præiana .

M. T. C. TERENTIÆ , TULLIOLÆ SUIS

S. D.

SI tu , & Tullia , lux nostra , valetis , ego , & suavissimus Cicero valemus . Prid. Id. Octob. Athenas venimus , cum sane adversis ventis usi esse-

essemus, tardeque & incommode navigassemus. De navi exeuntibus nobis Acastus cum litteris præsto fuit, uno & vigesimo die, sane strenue. Accepi tuas litteras, quibus intellexi, te vereri, ne superiores mihi redditæ non essent. Omnes sunt redditæ: diligentissimeque a te perscripta sunt omnia: idque mihi gratissimum fuit. Neque sum admiratus, hanc epistolam, quam Acastus attulit, brevem fuisse: jam enim me ipsum expectas, sive nos ipsos: qui quidem quamprimum ad vos venire cupimus: etsi in quam rempub. venimus, intelligo: cognovi enim ex multorum amicorum litteris, quas attulit Acastus, ad arma rem spectare: ut mihi, cum venero, dissimulare non liceat, quid sentiam. Sed, quando subeunda fortuna est, eo citius dabimus operam, ut veniamus, quo facilius de tota re deliberemus. Tu velim, quod comodo valetudinis tuæ fiat, quam longissime poteris, obviam nobis prodeas. De hæreditate Prætriana, quæ quidem mihi magno dolori est, (valde enim illum amavi) hoc velim cures; si auctio ante meum adventum fiet, ut Pomponius, aut, si is minus poterit, Camillus nostrum negotium curet. Nos, cum venerimus, reliquæ per nos agemus. Sin tu jam Romæ profecta eris, tamen curabis, ut hoc ita fiat. Nos, si Dii adjuvabunt, circiter Id. Nov. in Italia speramus fore. Vos, mea suavissima & optatissima Terentia, & Tulliola, si nos amatis, curate ut valeatis. Athenis ad xv. Kal. Nov.

A R G U M E N T U M .

Excusat infrequentiam litterarum: mandat, ut creditoribus satisfiat: adjungit de Terentiæ meritis in Tulliola: Pollicem mitti postulat.

M. T. C. TERENTIÆ SUÆ S. D. 6

NEc sæpe est, cui litteras demus: nec rem habemus ullam, quam scribere velimus. Ex
tuis

tuis litteris, quas proxime accepi, cognovi prædium nullum venire potuisse. Quare videatis velim, quomodo satisfiat ei, cui scitis me satisfieri velle. Quod nostra tibi gratias agit, id ego non miror te mereri, ut ea tibi merito tuo gratias agere possit. Pollicem, si adhuc non est profectus, quamprimum fac extrudas. Cura, ut valeas. Id. Quir.

A R G U M E N T U M.

Exponit, quæ fuerit molestiarum causa, quo modo liberatus sit: deinde scribit de sua ad Pompejum navigatione.

M. T. C. TERENTIÆ SUÆ S. D.

7

OMnes molestias, & sollicitudines, quibus & te miserrimam habui, id quod mihi molestissimum est, Tulliolamque, quæ nobis nostra vita dulcior est, deposui, & ejeci. Quid causæ autem fuerit, postridie intellexi, quam a vobis discessi: *χολω ἀνπατον* noctu ejeci: statim ita sum levatus, ut mihi Deus aliquis medicinam fecisse videatur. Cui quidem tu Deo, quemadmodum soles, pie & caste satisfacias, idest, Apollini & Æsculapio. Navem spero nos valde bonam habere: in eam simulatque conscendi, hæc scripsi. Deinde conscribam ad nostros familiares multas epistolas, quibus te, & Tulliolam nostram diligentissime commendabo. Cohortaret vos, quo animo fortiore essetis, nisi vos fortiores cognoscerem, quam quemquam virum: & tamen ejusmodi spero negotia esse, ut & vos istic commodissime sperem esse, & me aliquando cum similibus nostri rempub. defensurum. Tu primum valetudinem tuam velim cures: deinde, tibi si videbitur, villis iis utare; quæ longissime aberunt a militibus. Fundo Arpinati bene poteris uti cum familia urbana, si annonæ carior fuerit. Cicero bellissimus tibi salutem plurimam dicit. Etiam atque etiam vale. Dat. xvii. Id. Jun.

AR-

ARGUMENTUM.

Rogat uxorem, ut valetudinem curet: laudat ejus diligentiam; eaque ut deinceps utatur, mandat.

M. T. C. TERENTIÆ SUÆ S. D. 8

SI vales, bene est: ego quidem valeo. Valetudinem tuam velim cures diligentissime. Nam mihi & scriptum, & nuntiatum est, te in febri subito incidisse. Quod celeriter me fecisti de Cæsaris litteris certiores, fecisti mihi gratum. Item post hac, si quid opus erit, si quid acciderit novi, facies ut sciam. Cura, ut valeas. Vale. Datum IV. Non. Jun.

ARGUMENTUM.

Significat dolorem suum ex Dolabellæ generi sui, Tulliolæque filie valetudine.

M. T. C. TERENTIÆ SUÆ S. D. 9

AD ceteras meas miseras accessit dolor e Dolabellæ valetudine, & Tulliæ: omnino de omnibus rebus, nec quid consilii capiam, nec quid faciam, scio. Tu velim tuam, & Tulliæ valetudinem cures. Vale.

ARGUMENTUM.

Mandat ut cum Attico colloquatur, & litteras mittat.

M. T. C. TERENTIÆ SUÆ S. D. 10

QUID fieri placeret, scripsi ad Pomponium ferius, quam oportuit. Cum eo si locuta eris, intelliges, quid fieri velim. Apertius scribi, quando ad illum scripseram, necesse non fuit. De ea re, & de ceteris rebus quamprimum velim nobis litteras mittas. Valetudinem tuam cura diligenter. Vale. VII. Id. Quint.

ARGUMENTUM.

Tulliam ad se venisse dicit: sibi autem in animo esse, Ciceronem filium ad Cæsarem mittere.

M. T. C. TERENTIÆ SUÆ S. D. 11

SI vales, bene est: ego valeo. Tullia nostra venit ad me prid. Id. Jun.: cujus summa virtute & singulari humanitate, graviore etiam sum dolore affectus, nostra factum esse negligentia, ut longe alia in fortuna esset, atque ejus pietas ac dignitas postulabat. Nobis erat in animo Ciceronem ad Cæsarem mittere, & cum eo Cn. Sallustium. Si profectus erit, faciam te certiolem. Valetudinem tuam cura diligenter. Vale. xvii. Kal. Quint.

ARGUMENTUM.

Fere suum consilium reprehendit, quod, victo in Pharsalia Pompejo, in Italiam redierit: monet uxorem, ne ad ipsum eat.

M. T. C. TERENTIÆ SUÆ S. D. 12

QUOD nos in Italiam salvos venisse gaudes, perpetuo gaudeas velim. Sed perturbati dolore animi, magnisque injuriis, metuo, ne id consilii ceperimus, quod non facile explicare possimus. Quare, quantum potes, adjuva. Quid autem possis, mihi in mentem non venit. In viam quod te des hoc tempore, nihil est: & longum est iter, & non tutum: & non video, quid prodesse possis, si veneris. Vale. Datum prid. Non. Novembr. Brundisio.

ARGUMENTUM.

Permittit uxori, ut de nuntio remittendo consilium capiat ex tempore.

M. T. C. TERENTIÆ SUÆ S. D. 13

QUOD scripsi ad te proximis litteris de nuntio remittendo, quæ sit istius vis hoc tempore, &

& quæ concitatio multitudinis, ignoro. Si metuendus iratus est, quies tamen ab illo fortasse nascetur. Totum judicabis quale sit, &, quod in miserrimis rebus minime miserum putabis, id facies. Vale. VI. Idus Quint.

ARGUMENTUM.

Rogat uxorem & filiam, considerent & ipsæ, an cum amicis ab Urbe discedant, necne, adventu Caesaris.

TULLIUS TERENTIÆ, ET PATER TULLIOLÆ,
DUABUS ANIMIS SUIS, ET CICERO MATRI
OPTIMÆ, SUAVISSIMÆ SORORI S. D. 14

SI vos valetis, nos valemus. Vestrum jam consilium est, non solum meum, quid sit vobis faciendum. Si ille Romam modeste venturus est, recte in præsentia domi esse potestis: sin homo amens diripiendam urbem daturus est, vereor, ut Dolabella ipse satis vobis prodesse possit. Etiam illud metuo, ne jam intercludamini, ut, cum velitis, exire non liceat. Reliquum est, quod ipsæ optime considerabitis, vestri similes feminæ sint ne Romæ. Si enim non sunt, videndum est, ut honeste vos esse possitis. Quomodocumque nunc res habet, modo ut hæc nobis loca tenere liceat, bellissime vel mecum, vel in nostris prædiis esse poteritis. Etiam illud verendum est, ne brevi tempore fames in urbe sit. His de rebus velim cum Pomponio, cum Camillo, cum quibus vobis videbitur, consideretis: ad summam, animo forti sitis. Labienus rem meliorem fecit. Adjuvat etiam Piso, quod ab urbe discedit, & sceleris condemnat generum suum. Vos meæ carissimæ animæ quam sæpissime ad me scribite, & vos quid agatis, & quid istic agatur. Quintus pater, & filius, & Rufus vobis salutem dicunt. Valete. VIII. Kal. Quint. Minturnis.

A R G U M E N T U M.

Dicit se mutasse consilium de mittendo ad Cæsarem Cicerone filio. Hæc autem epistola videtur scripta post eam, quæ XI. loco impressa est.

M. T. C. TERENTIÆ SUÆ S. D. 15

SI vales, bene est: ego valeo. Constitueramus, ut ad te antea scripseram, obviam Ciceronem Cæsari mittere: sed mutavimus consilium, quia de illius adventu nihil audiebamus. De ceteris rebus, etsi nihil erat novi, tamen, quid velimus, & quid hoc tempore putemus opus esse, ex Sicca poteris cognoscere. Tulliam adhuc mecum teneo. Valetudinem tuam cura diligenter. Vale. XII. Kal. Quint.

Argumentum est de litteris, & de Volumnia.

M. T. C. TERENTIÆ SUÆ S. D. 16

SI vales, bene est: ego valeo. Etsi hujusmodi tempora nostra sunt, ut nihil habeam, quod aut a te litterarum expectem; aut ipse ad te scribam: tamen nescio quomodo & ipse vestras litteras expecto; & scribo ad vos, cum habeo, qui ferat. Volumnia debuit in te officiosior esse, quam fuit; & id ipsum, quod fecit, potuit diligentius facere & cautius. Quamquam alia sunt, quæ magis curemus, magisque doleamus: quæ me ita conficiunt, ut ii voluerunt, qui me de mea sententia detruserunt. Cura, ut valeas: pridie Non. Jan.

A R G U M E N T U M.

Doloris index epistola.

M. T. C. TERENTIÆ SUÆ S. D. 17

SI quid haberem, quod ad te scriberem, facerem id & pluribus verbis & sæpius. Nunc quæ sunt negotia, vides. Ego autem quomodo sim affectus, ex Lepta & Trebatio poteris cognoscere. Fac, ut tuam & Tulliæ valetudinem cures. Vale.

AR-

ARGUMENTUM.

Monet uxorem & filiam, ut mature considerent, num Romæ tuto esse possint, & cum dignitate.

M. T. C. TERENTIÆ, ET PATER SUAVISSIMÆ
FILIÆ, CICERO MATRI ET SORORI S. D. 18

CONSIDERANDUM vobis etiam atque etiam, animæ meæ, diligenter puto, quid faciatis: Romæ ne sitis, an mecum in aliquo tuto loco. Id non solum meum consilium est, sed etiam vestrum. Mihi veniunt in mentem hæc: Romæ vos esse tuto posse per Dolabellam, eamque rem posse nobis adiumento esse, si qua vis, aut si quæ rapinæ fieri cœperint. Sed rursus illud me movet, quod video omnes bonos abesse Roma, & eos mulieres suas secum habere. Hæc autem regio, in qua ego sum, nostrorum est tum oppidorum, tum etiam prædiorum: ut & multum esse mecum, &, cum abieritis, commode & in nostris prædiis esse possitis. Mihi plane non satis constat adhuc, utrum sit melius. Vos videte, quid aliæ faciant isto loco feminae, & ne, cum velitis, exire non liceat: id velim diligenter etiam atque etiam vobiscum & cum amicis consideretis. Domus ut propugnacula & præsidium habeat, Philotimo dicetis. Et velim tabellarios instituatis certos, ut quotidie aliquas a vobis litteras accipiam. Maxime autem date operam, ut valeatis, si nos vultis valere. VIII. Kal. Febr. Formiis.

ARGUMENTUM.

Dolorem significat ex filiæ valetudine, & difficultatem, quominus possit propius accedere.

M. T. C. TERENTIÆ SUÆ S. D. 19

IN maximis meis doloribus excruciat me valetudo Tullia nostræ. De qua nihil est, quod ad te plura scribam: tibi enim æque magnæ curæ esse

certo scio. Quod me propius vultis accedere, video ita esse faciendum: etiam ante fecissem; sed me multa impediunt, quæ ne nunc quidem expedita sunt. Sed a Pomponio exspecto litteras, quas ad me quamprimum perferendas cures velim. Da operam, ut valeas.

A R G U M E N T U M.

Mandat, ut in Tusculano omnia sint parata ad hospites accipiendos.

M. T. C. TERENTIÆ SUÆ S. D. 20

IN Tusculanum nos venturos putamus aut Nonis, aut postridie: ibi fac ut sint omnia parata. Plures enim fortasse nobiscum erunt: &, ut arbitror, diutius ibi commorabimur. Labrum si in balneo non est, fac ut sit: item cetera, quæ sunt ad victum & ad valetudinem necessaria. Vale. Kal. Octob. de Venusino.

A R G U M E N T U M.

Scribit, ut, quæ tempus postulabit, provideat, si-bique absenti administret, litterasque mittat.

M. T. C. TERENTIÆ SUÆ S. D. 21

SI vales, bene est: ego valeo. Da operam, ut convalescas: quod opus erit, ut res tempusque postulat, provideas atque administres: & ad me de omnibus rebus quam sæpissime litteras mitas. Vale.

A R G U M E N T U M.

Dicit se tabellarios exspectare, ut consilium capere possit.

M. T. C. TERENTIÆ SUÆ S. D. 22

SI vales, bene est: ego valeo. Nos quotidie tabellarios vestros exspectamus: qui si venerint, fortasse erimus certiores, quid nobis faciendum sit, faciemusque te statim certiores. Valetudinem tuam cura diligenter. Vale. Kal. Sept.

AR-

ARGUMENTUM.

Nondum se neque de Cæsaris adventu, neque de ejus litteris quidquam scire dicit.

M. T. C. TERENTIÆ SUÆ S. D. 23

SI vales, bene est: ego valeo. Nos neque de Cæsaris adventu, neque de litteris, quas Philotimus habere dicitur, quidquam adhuc certi habemus. Si quid erit certi, faciam te statim certiozem. Valetudinem tuam fac ut cures. Vale. iv. Id. Sext.

ARGUMENTUM.

Scribit de litteris a Cæsare acceptis, de ejus adventu: addit nondum sibi deliberatum esse, utrum illi obviam procedere, an Brundusii eum expectare debeat.

M. T. C. TERENTIÆ SUÆ S. D. 24

SI vales, bene est: ego valeo. Redditæ mihi jam tandem sunt a Cæsare litteræ satis liberales: & ipse opinione celerius venturus esse dicitur. Cui utrum obviam procedam, an hic eum expectem, cum constituerò, faciam te certiozem. Tabellarios mihi velim quamprimum remittas. Valetudinem tuam cura diligenter. Vale. Prid. Id. Sext.

LIBER XV.

ARGUMENTUM.

Cum Parthi maximis copiis Euphratem, qui terminus erat imperii Romani, transissent, sollicitus Cicero de sua Provincia, item de reliquis, quæ ab impetu belli non longe abessent, monet, ut majores exercitus submittantur.

M. T. C. PROCOS. S. D. COSS. PRÆTT. TRIBB.
PL. S. P. Q. R. I

SI vos bene valetis, bene est: ego quidem valeo. Et si non dubie mihi nuntiabatur, Parthos transisse Euphratem cum omnibus fere suis copiis: tamen, quod arbitrabar a M. Bibulo Procof. certiora

de his rebus ad vos scribi posse, statuebam mihi non necesse esse publice scribere ea, quæ de alterius provincia nuntiarentur. Postea vero quam certissimis auctoribus, legatis, nuntiis, litteris sum certior factus, vel quod tanta res erat, vel quod nondum audieramus, Bibulum in Syriam venisse, vel quia administratio hujus belli mihi cum Bibulo pæne est communis; quæ ad me delata essent, scribenda ad vos putavi. Regis Antiochi Commageni legati primi mihi nuntiarunt, Parthorum magnas copias Euphratem transire cœpisse. Quo nuntio allato, cum essent nonnulli, qui ei regi minorem fidem habendam putarent, statui expectandum esse, si quid certius afferretur. Ad xiii. Kal. Octob. cum exercitum in Ciliciam ducerem, in finibus Lycaoniæ & Cappadociæ mihi litteræ redditæ sunt a Tarcondimoro, qui fidelissimus socius trans Taurum, amicissimusque populi Romani existimatur: Pacorum Orodis regis Parthorum filium, cum permagno equitatu Parthico transisse Euphratem, & castra posuisse Tybæ, magnumque tumultum esse in provincia Syria excitatum. Eodem die ab Jamblico Phylarcho Arabum, quem homines opinantur bene sentire, amicumque esse reip. nostræ, litteræ de iisdem rebus mihi redditæ sunt. His rebus allatis, etsi intelligebam, socios infirme animatos esse, & novarum rerum expectatione suspensos: sperabam tamen, eos, ad quos jam accesseram, quique nostram mansuetudinem integritatemque perspexerant, amiciores pop. Rom. esse factos; Ciliciam autem firmiorem fore, si æquitatis nostræ particeps facta esset. Et ob eam causam, & ut opprimerentur ii, qui ex Cilicum gente in armis essent, & ut hostis is, qui esset in Syria, sciret, exercitum populi Rom. non modo non cedere his nuntiis allatis, sed etiam propius accedere; exercitum ad Taurum institui ducere. Sed, si quid apud vos au-

ctori-

Fortitas mea ponderis habet, in iis præsertim rebus, quas vos audistis, ego pæne cerno; magnopere vos & hortor & moneo, ut his provinciis serius vos quidem, quam decuit, sed aliquando tamen consulatis. Nos quemadmodum instructos, & quibus præsidiiis munitos ad tanti belli opinionem miseritis, non estis ignari. Quod ego negotium non stultitia obcæcatus, sed verecundia deterritus non recusavi. Neque enim umquam ullum periculum tantum putavi, quod subterfugere mallet, quam vestræ auctoritati obtemperare. Hoc autem tempore res se se sic habet, ut, nisi exercitum tantum, quantum ad maximum bellum mittere soletis, mature in has provincias miseritis, summum periculum sit, ne amittendæ sint omnes hæ provinciæ, quibus vectigalia populi R. continentur. Quamobrem autem in hoc provinciali delectu spem habeatis aliquam, causa nulla est: neque multi sunt; & diffugiunt qui sunt, metu oblato: &, quod genus hoc militum sit, iudicavit vir fortissimus M. Bibulus in Asia; qui, cum ei permisissetis, delectum habere noluerit. Nam sociorum auxilia, propter acerbiter atque injurias imperii nostri, aut ita imbecilla sunt, ut non multum nos juvare possint; aut ita alienata a nobis, ut neque expectandum ab iis, neque committendum iis quidquam esse videatur. Regis Dejotari & voluntatem, & copias, quantæcumque sunt, nostras esse duco. Cappadocia est inanis. Reliqui reges, tyrannique neque opibus satis firmi, nec voluntate sunt. Mihi in hac paucitate militum animus certe non deerit; spero ne consilium quidem. Quid casurum sit, incertum est. Utinam salutis nostræ consulere possimus: dignitati certe consulemus. Valere.

A R G U M E N T U M.

Exponit, quid in provincia, audito Parthorum adventu, egerit ad tuendam Provinciam, & socios in fide continendos: addit de Ariobarzane Rege ab insidiis liberato.

M. T. C. PROCOS. S. D. COSS. PRÆT. TRIBB.
 PL. S. P. Q. R. 2

SI vos bene valetis, bene est: ego quidem valeo. Cum pridie Kalend. Sext. in provinciam venissem, neque maturius propter itinerum & navigationum difficultatem venire potuissem, maxime convenire officio meo, reique pub. conducere putavi, parare ea, quæ ad exercitum, quæque ad rem militarem pertinerent. Quæ cum essent a me cura magis & diligentia, quam facultate & copia constituta; nuntiique & litteræ de bello a Parthis in provinciam Syriam illato, quotidie fere afferrentur: iter mihi faciendum per Lycaoniam, & per Ilauros, & per Cappadociam arbitratus sum: erat enim magna suspicio, Parthos, si ex Syria egredi, atque irrumpere in meam provinciam conarentur, iter eos per Cappadociam, quod ea maxime pateret, esse facturos. Itaque cum exercitu per Cappadociæ partem eam, quæ cum Cilicia continens est, iter feci: castraque ad Cybistra, quod oppidum est ad montem Taurum, locavi, ut Artuafdes, rex Armenius, quocumque animo esset, sciret, non procul a suis finibus exercitum P. Rom. esse: & Dejotarum fidelissimum regem, atque amicissimum reipub. nostræ, maxime conjunctum haberem, cujus & consilio & opibus adjuvari posset resp. Quocum in loco castra haberem; equitatumque in Ciliciam misissem, ut & meus adventus iis civitatibus, quæ in ea parte essent, nuntiatus, firmiores animos hominum faceret, & ego mature, quid ageretur in Syria, scire possem,

tem-

tempus ejus tridui, quod in iis castris morabar, in magno officio, & necessario mihi ponendum putavi. Cum enim vestra auctoritas intercessisset, ut ego regem Ariobarzanem, Euseben, & Philoromæum tuerer, ejusque regis salutem & incolumitatem regni defenderem, regi regnoque præsidio essem: adjunxissetisque, salutem ejus regis, populo senatuique magnæ curæ esse, quod nullo umquam de rege decretum esset a nostro ordine; existimavi me judicium vestrum ad regem deferre debere, eique præsidium meum, & fidem, & diligentiam polliceri: ut, quando salus ipsius & incolumitas regni mihi commendata esset a vobis, diceret, si quid vellet. Quæ cum essem in consilio meo cum rege locutus, initio ille orationis suæ vobis maximas, ut debuit, deinde etiam mihi gratias egit: quod ei permagnum & perhonorificum videbatur, senatui populoque Rom. tantæ curæ esse salutem suam: meque tantam diligentiam adhibere, ut & mea fides, & commendationis vestræ auctoritas perspicui posset. Atque ille primo, quod mihi maximæ lætitiæ fuit, ita mecum locutus est, ut nullas insidias neque vitæ suæ, neque regno diceret se aut intelligere fieri, aut etiam suspicari. Cum ego ei gratulatus essem, idque me gaudere dixissem, cohortatus, ut recordaretur casum illum interitus paterni, & vigilanter se tueretur, atque admonitu senatus consuleret salutem suam; tum a me discessit in oppidum Cybistra. Postero autem die cum Ariarathe, fratre suo, & cum paternis amicis, majoribus natu, ad me in castra venit: perturbatusque & flens, cum idem & frater faceret, & amici, meam fidem, vestram commendationem implorare cœpit. Cum admirarer, quid accidisset novi, dixit, ad se indicia manifestarum insidiarum esse delata, quæ essent ante adventum meum occultata, quod ii, qui ea patefacere possent, propter metum reticuisissent: eo autem tempore, spe

mei præsidii complures ea, quæ scirent, audacter ad se detulisse: in his amantissimum sui, summa pietate præditum, fratrem, dicere ea, quæ is me quoque audiente dicebat, se sollicitatum esse, ut regnare vellet: id vivo fratre suo accidere non potuisse: se tamen ante illud tempus eam rem numquam in medium, propter periculi metum, protulisse. Quæ cum esset locutus: monui regem, ut omnem diligentiam ad se conservandum adhiberet; amicosque patris ejus, atque avi judicio probatos hortatus sum, regis sui vitam, docti casu acerbissimo patris ejus, omni cura custodiaque defenderent. Cum rex a me equitatum cohortesque de exercitu meo postularet; etsi intelligebam vestro S. C. non modo posse me id facere, sed etiam debere: tamen, cum respub. postularet, propter quotidianos ex Syria nuntios, ut quamprimum exercitum ad Ciliciæ fines adducerem; cumque mihi rex, patefactis jam insidiis, non egere exercitu populi Rom., sed posse se suis opibus defendere videretur, illum cohortatus sum, ut in sua vita conservanda primum regnare disceret: a quibus perspexisset sibi insidias paratas, in eos uteretur jure regio: pœna afficeret eos, quos necesse esset, reliquos metu liberaret: præsidio exercitus mei ad eorum, qui in culpa essent, timorem potius, quam ad contentionem uteretur: fore autem, ut omnes, quando S. C. nossent, intelligerent, me regi, si opus esset, ex auctoritate vestra præsidio futurum. Ita confirmato illo, ex eo loco castra movi, & iter in Ciliciam facere institui: cum hac opinione e Cappadocia discederem, ut consilio vestro, casu incredibili ac pæne divino, regem, quem vos honorificentissime appellassetis, nullo postulante, quemque meæ fidei commendassetis, & cujus salutem magnæ vobis curæ esse decrevissetis, meus adventus præsentibus insidiis liberasset. Quod ad vos a me scribi non alienum putavi, ut intelligeretis

ex iis, quæ pæne acciderunt, vos multo ante, ne ea acciderent, providisse: eoque vos studiosius feci certiores, quod in rege Ariobarzane ea mihi signa videor virtutis, ingenii, fidei, benevolentiaque erga vos perspexisse, ut non sine causa tantam curam diligentiamque in ejus vos salutem videamini contulisse. Valete.

ARGUMENTUM.

Scribit de rumore Parthici belli, & affert excusationem, cur publice non scripserit.

M. T. C. IMP. M. CATONI S. D. 3

CUM ad me legati, missi ab Antiocho Commageno, venissent in castra ad Iconium ante diem III. Non. Sept., iique mihi nuntiaissent, regis Parthorum filium, quocum esset nupta regis Armeniorum soror, ad Euphratem cum maximis Parthorum copiis, multarumque præterea gentium magna manu venisse, Euphratenque jam transire cœpisse: dicique Armenium regem in Cappadociam impetum esse facturum: putavi pro nostra necessitudine me hoc ad te scribere oportere. Publice propter duas causas nihil scripsi; quod & ipsum Commagenum legati dicebant ad senatum statim nuntios litterasque misisse; & existimabam, M. Bibulum procos., qui circiter Id. Sex. ab Epheso in Syriam navibus profectus erat, quod secundos ventos habuisset, jam in provinciam suam pervenisse: cujus litteris omnia certiora perlatum iri ad senatum putabam. Mihi, ut in ejusmodi re, tantoque bello, maximæ curæ est, ut quæ copiis & opibus tenere vix possumus, ea mansuetudine & continentia nostra, sociorum fidelitate teneamus. Tu velim, ut consuesti, nos absentes diligas & defendas. Vale.

A R G U M E N T U M .

Narrat quæ in Provincia gesserit : pro quibus rebus a Catone petit, ut in Senatu supplicationes sibi decernat .

M. T. C. IMP. M. CATONI S. D.

4

SUMMA tua auctoritas fecit, meumque perpetuum de tua singulari virtute iudicium, ut magni mea interesse putarem, & res eas, quæ gessissem, tibi notas esse, & non ignorari a te, quæ æquitate & continentia tuerer socios, provinciamque administrarem. His enim a te cognitis, arbitrabar, facilius me tibi, quæ vellem, probaturum. Cum in provinciam pridie Kal. Sext. venissem, & propter anni tempus ad exercitum mihi confestim esse eundum viderem; biduum Laodiceæ fui, deinde Apameæ quatrimum, triduum Synnadis, totidem dies Philomeli. Quibus in oppidis cum magni conventus fuissent, multas civitates acerbissimis tributis, & gravissimis usuris, & falso ære alieno liberavi. Cumque ante adventum meum seditione quadam exercitus esset dissipatus, quinque cohortes sine legato, sine tribuno mil., denique etiam sine centurione ullo apud Philomelum confedissem, reliquus exercitus esset in Lycaonia, M. Annejo legato imperavi, ut eas quinque cohortes ad reliquum exercitum duceret, coactoque in unum locum exercitu, castra in Lycaonia apud Iconium faceret. Quod cum ab illo diligenter esset actum, ego in castra ad VII. Kal. Sept. veni: cum interea superioribus diebus ex S. C. & evocatorum firmam manum, & equitatum satis idoneum, & populorum liberorum, regumque sociorum auxilia voluntaria comparavissem. Interim cum exercitu lustrato, iter in Ciliciam facere cœpissem; Kal. Sept. legati a rege Commageno ad me missi, pertumultuose, neque tamen non vere, Parthos

in

in Syriam transisse nuntiaverunt. Quo audito, vehementer sum commotus cum de Syria, tum de mea provincia, de reliqua denique Asia. Itaque exercitum mihi ducendum per Cappadociæ regionem eam, quæ Ciliciam attingeret, putavi. Nam si me in Ciliciam demissem, Ciliciam quidem ipsam propter montis Amani naturam facile tenuissem: (duo sunt enim aditus in Ciliciam ex Syria; quorum uterque parvis præsiidiis propter angustias intercludi potest: nec est quidquam Cilicia contra Syriam munitius) sed me Cappadocia movebat, quæ patet a Syria, regesque habet finitimos, qui etiam si sunt amici nobis, tamen aperte Parthis inimici esse non audent. Itaque in Cappadocia extrema, non longe a Tauro, apud oppidum Cybistra, castra feci, ut & Ciliciam tuerer, & Cappadociam tenens, nova finitimorum consilia impedirem. Interea in hoc tanto motu, tantæque expectatione maximi belli, rex Dejotarus, cui non sine causa plurimum semper & meo & tuo, & senatus iudicio tributum est, vir cum benevolentia, & fide erga populum Rom. singulari, tum præsentia magnitudine & animi, & consilii, legatos ad me misit, se cum omnibus suis copiis in mea castra esse venturum. Cujus ego studio officioque commotus, egi ei per litteras gratias: idque ut maturaret, hortatus sum. Cum autem ad Cybistra propter rationem belli quinque dies essem commoratus, regem Ariobarzanem, cuius salutem a senatu, te auctore, commendatam habebam, præsentibus insidiis nec opinantem liberavi; neque solum ei saluti suæ, sed etiam curavi, ut cum auctoritate regnaret. Metram, & eum, quem tu diligenter mihi commendaras, Athenæum, importunitate Athenaidis exsilio multatos, maxima apud regem auctoritate gratiaque constitui. Cumque magnum bellum in Cappadocia concitaretur, si sacerdos armis se, quod facturus putabatur, de-

fenderet , adolescens & equitatu , & peditatu , & pecunia paratus , & toto iis , qui novari aliquid volebant ; perfecti , ut e regno ille discederet , rexque sine tumultu , ac sine armis , omni auctoritate aulae communita , regnum cum dignitate obtineret . Interea cognovi multorum litteris atque nuntiis , magnas Parthorum copias & Arabum ad oppidum Antiochiam accessisse ; magnumque eorum equitatum , qui in Ciliciam transisset , ab equitum meorum turmis , & a cohorte praetoria , quae erat Epiphaneae praesidii causa , occisione occisum . Quare cum viderem a Cappadocia Parthorum copias aversas non longe a finibus esse Ciliciae : quam potui maximis itineribus ad Amanum exercitum duxi . Quo ut veni , hostem ab Antiochia recessisse , Bibulum Antiochiae esse cognovi , Dejotarumque confestim jam ad me venientem cum magno & firmo equitatu , & peditatu , & cum omnibus suis copiis , certioremi feci , non videri esse causam , cur abesset a regno ; meque ad eum , si quid forte novi accidisset , statim litteras nuntiosque missurum esse . Cumque eo animo venissem , ut utrique provinciae , si ita tempus ferret , subvenirem : tamen id , quod jam ante statueram vehementer interesse utriusque provinciae , pacare Amanum , & perpetuum hostem ex eo monte tollere , agere perrexī . Cumque me discedere ab eo monte simulassem , & alias partes Ciliciae petere , abessemque ab Amano iter unius diei , & castra apud Epiphaneam fecissem ; ad iv. Id. Oct. cum advesperasceret , expedito exercitu ita noctu iter feci , ut ad iii. Id. Oct. cum lucefceret , in Amanum ascenderem : distributisque cohortibus & auxiliis , cum aliis Quintus frater legatus , mecum simul , aliis C. Pontinius legatus , reliquis M. Annejus , & L. Tullius legati praesent , plerosque nec opinantes oppressimus , qui occisi captique sunt interclusi fuga . Eranam autem , quae fuit non vici instar , sed urbis , quod erat

erat Amani caput, itemque Sepyram, & Com-
morim, acriter & diu repugnantibus, Pontinio
illam partem Amani tenente, ex antelucano tem-
pore usque ad horam diei decimam, magna multi-
tudine hostium occisa, cepimus; castellaque sex
capta; complura incendimus. His rebus ita gestis,
castra in radicibus Amani habuimus apud Aras
Alexandri quatrimum: & in reliquiis Amani de-
lendis, agrisque vastandis, quæ pars ejus montis
meæ provinciæ est, id tempus omne consumpsimus.
Confectis his rebus, ad oppidum Eleuthero-
citicum Pindenissum exercitum adduxi: quod cum
esset altissimo & munitissimo loco, ab iisque in-
coleretur, qui ne regibus quidem umquam paruis-
sent, cum & fugitivos reciperent, & Parthorum
adventum acerrime exspectarent; ad existimatio-
nem imperii pertinere arbitratus sum, comprime-
re eorum audaciam, quo facilius etiam ceterorum
animi, qui alieni essent ab imperio nostro, fran-
gerentur. Vallo & fossa circumdedi: sex castel-
lis, castrisque maximis sepsi: aggere, vineis,
turribus oppugnavi: ususque tormentis multis,
multis sagittariis, magno labore meo, sine ulla
molestia sumptuve sociorum, septimo quinquage-
simo die rem confeci: ut, omnibus partibus ur-
bis disturbatis aut incensis, compulsi in potesta-
tem meam pervenirent. His erant finitimi pari
scelere & audacia Tibarani: ab his, Pindenisso
capto, obsides accepi: exercitum in hiberna di-
misi. Quintum fratrem negotio præposui, ut in
vicis aut captis, aut male pacatis exercitus collo-
caretur. Nunc velim tibi sic persuadeas, si de his
rebus ad senatum relatum sit, me existimaturum
summam mihi laudem tributam, si tu honorem
meum sententia tua comprobaris. Idque, etsi ta-
libus de rebus gravissimos homines & rogare sole-
re, & rogari scio, tamen admonendum potius te
a me, quam rogandum puto. Tu es enim is,
qui

qui me tuis sententiis sæpiissime ornasti, qui oratione, qui prædicatione, qui summis laudibus in senatu, in concionibus ad cælum extrulisti; cujus ego semper tanta esse verborum pondera putavi, ut, uno verbo tuo cum mea laude conjuncto, omnia consequi me arbitrarer. Te denique meminisse, cum cuidam clarissimo atque optimo viro supplicationem non decerneres, dicere, te decreturum, si referretur ob eas res, quas is consul in urbe gessisset. Tu idem mihi supplicationem decrevisti togato, non ut multis, republica bene gesta, sed ut nemini, republica conservata. Mitto, quod invidiam, quod pericula, quod omnes meas tempestates & subieris, & multo etiam magis, si per me licuisset, subire paratissimus fueris: quod denique inimicum meum, tuum inimicum putaris: cujus etiam interitum, ut facile intelligerem, mihi quantum tribueres, Milonis causa in senatu defendenda approbaris. A me autem hæc sunt profecta, quæ ego in beneficii loco non pono, sed in veri testimonii atque judicii: non ut præstantissimas tuas virtutes tacitus admirarer, (quis enim id non facit?) sed in omnibus orationibus, sententiis dicendis, causis agendis, omnibus scriptis, Græcis, Latinis, omni denique varietate litterarum mearum, te non modo iis, quos vidissemus, sed iis, de quibus audissemus, omnibus anteferebam. Quæres fortasse, quid sit, quod ego hoc nescio. quid gratulationis & honoris a senatu tanti æstimem. Agam jam tecum familiariter, ut est & studiis, & officiis nostris mutuis, & summa amicitia dignum, & necessitudine etiam paternæ. Si quisquam fuit umquam remotus & natura, & magis etiam ut mihi quidem sentire videor ratione atque doctrina, ab inani laude & sermonibus vulgi, ego profecto is sum. Testis est consulatus meus; in quo, sicut in reliqua vita, fateor ea me studiose secutum, ex quibus vera gloria

ria nasci posset : ipsam quidem gloriam per se numquam putavi expetendam . Itaque & provinciam ornatam , & spem non dubiam triumphi neglexi . Sacerdotium denique , cum (quemadmodum te existimare arbitror) non difficillime consequi possem , non appetivi . Idem post injuriam acceptam , quam tu reip. calamitatem semper appellas , meam non modo non calamitatem , sed etiam gloriam , studui quam ornatissima senatus populique Romani de me judicia intercedere . Itaque & augur postea fieri volui , quod antea neglexeram : & eum honorem , qui a senatu tribui rebus bellicis solet , neglectum a me olim , nunc mihi expetendum puto . Huic meæ voluntati , in qua inest aliqua vis desiderii ad sanandum vulnus injuriæ , ut faveas , adjutorque sis , quod paullo ante me negaram rogaturum , vehementer te rogo : sed ita , si non jejunum hoc nescio quid , quod ego gessi , & contemnendum videbitur , sed tale atque tantum , ut multi nequaquam paribus rebus honores summos a senatu consecuti sint . Equidem etiam mihi illud animadvertisse videor , (scis enim quam attente te audire soleam) te non tam res gestas , quam mores , instituta , atque vitam imperatorum spectare solere in habendis , aut non habendis honoribus . Quod si in mea causa considerabis , reperies me exercitu imbecillo , contra metum maximi belli , firmissimum præsidium habuisse æquitatem & continentiam . His ego subsidiis ea sum consecutus , quæ nullis legionibus consequi potuissem : ut ex alienissimis sociis amicissimos , ex infidelissimis firmissimos redderem ; animosque novarum rerum expectatione suspensos , ad veteris imperii benevolentiam traducerem . Sed nimis hæc multa de me , præsertim ad te , a quo uno omnium sociorum querelæ audiuntur : cognosces ex iis , qui meis institutis se recreatos putant . Cumque omnes uno prope consensu de
me

me apud te ea, quæ mihi optatissima sunt, prædicabunt: tum duæ maxime clientelæ tuæ, Cyprus insula & Cappadociæ regnum, tecum de me loquentur: puto etiam regem Dejotarum, qui uni tibi est maxime necessarius. Quæ si etiam majora sunt, & in omnibus sæculis pauciores viri reperti sunt, qui suas cupiditates, quam qui hostium copias vincerent; est profecto tuum, cum ad res bellicas hæc, quæ rariora & difficiliora sunt, genera virtutis adjunxeris, ipsas etiam illas res gestas justiores esse, & majores putare. Extremum illud est, ut, quasi diffidens rogationi meæ, philosophiam ad te allegem: qua nec mihi carior ulla umquam res in vita fuit, nec hominum generi majus a Diis munus ullum est datum. Hæc igitur, quæ mihi tecum communis est, societas studiorum atque artium nostrarum, quibus a pueritia dediti, ac devincti, soli propemodum nos philosophiam illam veram & antiquam, quæ quibusdam otii esse ac desidii videtur, in forum atque in rempub. atque in ipsam aciem pæne deduximus, tecum agit de mea laude: cui negari a Catone fas esse non puto. Quamobrem sic tibi persuadeas, velim: si mihi tua sententia tributus honos ex meis litteris fuerit, me existimaturum, cum auctoritate tua, tum benevolentia erga me, mihi, quod maxime cupierim, contigisse. Vale.

A R G U M E N T U M.

Excusat se, quod Ciceroni supplicationem non decreverit, & tamen decretam gaudet; seque de illo honorificentius dicit sensisse, quam eos, qui supplicationem decreverunt.

M. CATO M. CICERONI IMP. S. D. 5

QUOD & respub. me, & nostra amicitia hortatur, libenter facio, ut tuam virtutem, innocentiam, diligentiam cognitam in maximis rebus, domi

domi togati, armati foris, pari industria administrare gaudeam. Itaque, quod pro meo iudicio facere potui, ut innocentia consilioque tuo defensam provinciam, servatum Ariobarzanis cum ipso rege regnum, sociorum revocatam ad studium imperii nostri voluntatem, sententia mea & decreto laudarem, feci. Supplicationem decretam, si tu, qua in re nihil fortuito, sed summa tua ratione & continentia reipub. provisum est, diis immortalibus gratulari nos, quam tibi referre acceptum mavis, gaudeo. Quod si triumphi prærogativam putas supplicationem, & idcirco casum potius, quam te laudari vis: neque supplicationem sequitur semper triumphus, & triumpho multo clarius est, senatum judicare, potius mansuetudine & innocentia imperatoris provinciam, quam vi militum aut benignitate Deorum retentam, atque conservatam esse: quod ego mea sententia censebam. Atque hæc ego idcirco ad te contra consuetudinem meam pluribus scripsi, ut, quod maxime volo, existimes, me laborare, ut tibi persuadeam, me & voluisse de tua maiestate, quod amplissimum sum arbitratus; &, quod tu maluisti, factum esse gaudere. Vale, & nos dilige, & instituto itinere severitatem diligentiamque sociis, & reipublicæ præsta.

ARGUMENTUM.

Exponit, eximia cum Catonis laude, quantam voluptatem ceperit ex ejus sententia, & ex gratulatione litterarum: petitque, ut, si in adipiscendo triumpho favere noluerit, saltem, si adipiscatur, gaudeat.

M. T. C. CATONI S. D.

6

Lætus sum laudari me (inquit Hector, opinor apud Nævium) abs te, pater, laudato viro. Ea est enim profecto jucunda laus, quæ ab iis profici-

fificitur, qui ipsi in laude vixerunt. Ego vero, vel gratulatione litterarum tuarum, vel testimoniis sententiæ dictæ, nihil est, quod me non affectum putem. Idque mihi tum amplissimum, tum gratissimum est, te libenter amicitiae dedisse, quod liquido veritati dares. Et si, non modo unus, verum etiam multi Catones essent in civitate nostra, in qua unum existitisse mirabile est, quem ego currum, aut quam lauream cum tua laudatione conferrem? Nam ad meum sensum, & ad illud sincerum ac subtile iudicium nihil potest esse laudabilius, quam ea tua oratio, quæ est ad me perscripta a meis necessariis. Sed causam meæ voluntatis (non enim dicam cupiditatis) exposui tibi superioribus litteris: quæ etiam si parum iusta tibi visa est, hanc tamen habet rationem, ut non nimis concupiscendus honos: sed tamen, si deferatur a senatu, minime aspernandus esse videatur. Spero autem, illum ordinem pro meis ob rempub. susceptis laboribus, me non indignum honore, usitato præsertim, existimaturum. Quod si ita erit, tantum ex te peto, quod amicissime scribis, ut, cum tuo iudicio, quod amplissimum esse arbitraris, mihi tribueris; si id, quod maluerò, acciderit, gaudeas. Sic enim fecisse te, & sensisse, & scripsisse video: resque ipsa declarat, tibi illum honorem nostrum supplicationis fuisse iucundum, quod scribendo affuisti. Hæc enim S. C. non ignoro ab amicissimis ejus, cujus de honore agitur, scribi solere. Ego, ut spero, te propediem videbo; atque utinam repub. meliore, quam timeo. Vale.

A R G U M E N T U M.

Gratulatur Marcello de fratre patruele consule designato; petitque ab eo, ut sibi quam primum, annuo imperio finito, successor mittatur.

M. T. C. PROCOS. M. MARCELLO COS. S. D. 7

TE & pietatis in tuos, & animi in rempublicam, & clarissimi atque optimi consulatus, C. Marcello consule facto, fructum cepisse, vehementer

ter gaudeo. Non dubito, quid præsentēs sentiant : nos quidem longinquī, & a te ipso missi in ultimas gentes, ad cælum mehercule te tollimus verissimis ac justissimis laudibus. Nam cum te a pueritia tua unice dilexerim ; tuque me in omni genere semper amplissimum esse & volueris, & judicaris : tum hoc vel tuo facto, vel populi Romani de te iudicio, multo acrius vehementiusque diligo : maximaque lætitia afficior, cum ab hominibus prudentissimis, virisque optimis, omnibus dictis, factis, studiis, institutis vel me tui similem esse audio, vel te mei. Unum vero si addis ad præclarissimas res consulatus tui, ut aut mihi succedat quamprimum aliquis, aut ne quid accedat temporis ad id, quod tu mihi & S. C., & lege finisti ; omnia me per te consecutum putabo. Cura, ut valeas, & me absentem diligas atque defendas. Quæ mihi de Parthis nuntiata sunt, quia non putabam a me etiam nunc scribenda esse publice ; propterea ne pro familiaritate quidem nostra volui ad te scribere : ne, cum ad consulem scripsissem, publice viderer scripsisse. Vale.

ARGUMENTUM.

C. Marcello de Consulatu gratulatur, suamque illi dignitatem commendat.

M. T. C. PROCOS. C. MARCELLO
COS. DES. S. D.

8

Maxima sum lætitia affectus, cum audiui, te consulem factum esse : eumque honorem tibi Deos fortunare volo, atque a te pro tua, parentisque tui dignitate administrari. Nam cum te semper dilexi amavique, quod mei amantissimum cognovi in omni varietate rerum mearum : tum patris tui pluribus beneficiis, vel defensus tristibus temporibus, vel ornatus secundis : & sum totus vester, & esse debeo : cum præsertim matris
tuæ,

tuæ, gravissimæ atque optimæ feminæ majora erga salutem dignitatemque meam studia, quam erant a muliere postulanda, perspexerim. Quapropter a te peto majorem in modum, ut me absentem diligas atque defendas. Vale.

A R G U M E N T U M.

Gratulatur C. Marcello de filio Consule facto; erat autem collega Ciceronis in auguratu, ac. libros quoque de jure augurali composuit lib. 2. de Divin.

M. T. C. PROCOS. C. MARCELLO
COLLEGÆ S. D.

9

MArcellum tuum consulem factum, teque ea lætitia affectum esse, quam maxime optasti, mirum in modum gaudeo; idque cum ipsius causa, tum quod te omnibus secundissimis rebus dignissimum judico: cujus erga me singularem benevolentiam vel in labore meo, vel in honore perspexi: totam denique domum vestram vel salutis vel dignitatis meæ studiosissimam cupidissimamque cognovi. Quare gratum mihi feceris, si uxori tuæ Junia, gravissimæ atque optimæ feminæ, meis verbis eris gratulatus. A te id, quod consueisti, peto, me absentem diligas atque defendas. Vale.

A R G U M E N T U M.

Commendat studiose suam existimationem Consuli Marcello in supplicatione decernenda.

M. T. C. IMP. C. MARCELLO
C. F. Cos. S. D.

10

QUando id accidit, quod mihi maxime fuit optatum, ut omnium Marcellorum, Marcellinorum etiam (mirificus enim generis ac nominis vestri fuit erga me semper animus) quando ergo ita accidit, ut omnium vestrum studio tuus con-

consulatus satisfacere posset, in quem meæ res gestæ, lausque, & honor earum potissimum incidere, peto a te id, quod facillimum factu sit, non aspernante, ut confido, senatu, ut quam honorificentissimum S. C. litteris meis recitatis, faciendum cures. Si mihi tecum minus esset, quam est cum tuis omnibus, allegarem ad te illos, a quibus intelligis, me præcipue diligi. Patris tui beneficia in me sunt amplissima: neque enim salutis meæ, neque honori amicior quisquam dici potest. Frater tuus quanti me faciat, semperque fecerit, esse hominem, qui ignoret, arbitror neminem. Domus tua denique tota me semper omnibus summis officiis prosecuta est. Neque vero tu in me diligendo cuiquam concessisti tuorum. Quare a te peto maiorem in modum, ut me per te quam ornatissimum velis esse: meamque & in supplicatione decernenda, & in ceteris rebus existimationem satis tibi esse commendatam putes. Vale.

ARGUMENTUM.

Agit gratias Consuli Marcello, quod supplicationem sibi decreverit.

M. T. C. IMP. C. MARCELLO COS. S. D. II

Quantæ curæ tibi meus honos fuerit, & quam idem exstiteris consul in me ornando & amplificando, qui fueras semper cum parentibus tuis, & cum tota domo, etsi res ipsa loquebatur, cognovi tamen ex meorum omnium litteris. Itaque nihil est tantum, quod ego non tua causa debeam; facturisque sim cum studiose tum libenter. Nam magni interest, cui debeas: debere autem nemini malui, quam tibi; cui me cum studia communia, beneficia paterna, tuaque jam ante conjunxerant: tum accedit, mea quidem sententia, maximum vinculum, quod ita remp. geris atque gessisti, qua mihi carius nihil est, ut quantum tibi omnes boni debeant, quominus tantumdem ego
unus

unus debeam, non recusem. Quamobrem tibi velim ii sint exitus, quos mereris, & quos fore confido. Ego, si me navigatio non morabitur (quæ incurrebat in ipsos Etesias) propediem te, ut spero, videbo. Vale.

A R G U M E N T U M.

Gratulatur de Consulatu; petitque, ut operam det, ne quid sibi temporis ad annum provinciale munus addatur.

M. T. C. IMP. PAULO COS. DES. S. D. 12

ET si mihi numquam fuit dubium, quin te populus Rom. tuis summis in rep. meritis, & pro amplissima familiæ dignitate, summo studio, cunctis suffragiis consulem facturus esset: tamen incredibili lætitia sum affectus, cum id mihi nuntiatum est: eumque honorem tibi Deos fortunare volo, a teque ex tua majorumque tuorum dignitate administrari. Atque utinam præsens illum diem mihi optatissimum videre potuissem, proque tuis amplissimis erga me studiis atque beneficiis tibi operam meam studiumque navare. Quam mihi facultatem quando hic nec opinatus & improvisus provinciæ casus eripuit: tamen, ut te consulem rep. pro tua dignitate gerentem videre possim, magnopere a te peto, ut operam des, efficias, ne quid mihi fiat injuriæ, neve quid temporis ad meum annum munus accedat. Quod si feceris, magnus ad tua pristina erga me studia cumulus accedet. Vale.

A R G U M E N T U M.

Petit, ut de suis rebus gestis quam honorificentissime decernendum curet, suamque illi etiam ceteris in rebus existimationem commendat.

M. T. C. IMP. PAULO S. D. 13

MAxime mihi fuit optatum Romæ esse tecum, multas ob causas, sed præcipue, ut & in
pe-

petendo, & gerendo consulatu meum tibi debitum studium perspicere posses. Ac petitionis quidem tuæ ratio mihi semper fuit explorata: sed tamen navare operam volebam. In consulatu vero cupio equidem te minus habere negotii: sed moleste fero, me consulem tuum studium adolescentis perspexisse; te meum, cum id ætatis sim, perspicere non posse. Sed ita fato nescio quo contigisse arbitror, ut tibi ad me ornandum semper detur facultas; mihi ad remunerandum nihil suppetat præter voluntatem. Ornasti consulatum, ornasti redditum meum. Incidit meum tempus rerum gerendarum in ipsum consulatum tuum. Itaque cum & tua summa amplitudo, & dignitas, & meus magnus honos, magnaue existimatio postulare videatur, ut a te pluribus verbis contendam ac petam, ut quam honorificentissimum S. C. de meis rebus gestis faciendum cures: non audeo vehementer a te contendere, ne aut ipse tuæ perpetuæ consuetudinis erga me oblitus esse videar, aut te oblitum putem. Quare, ut te velle arbitror, ita faciam: atque ab eo, quem omnes gentes sciunt de me optime meritum, breviter petam. Si alii consules essent, ad te potissimum, Paulle, mitterem, ut eos mihi quam amicissimos redderes: nunc cum tua summa potestas, summaque auctoritas, notaque omnibus nostra necessitudo sit, vehementer te rogo, ut & quam honorificentissime cures decernendum de meis rebus gestis, & quam celerrime. Dignas res esse & honore & gratulatione, cognosces ex iis litteris, quas ad te, & ad collegam, & senatum publice misi: omniumque mearum reliquarum rerum, maximeque existimationis meæ procurationem susceptam velim habeas: in primisque tibi curæ sit, quod abs te superioribus quoque litteris petivi, ne mihi tempus prorogetur. Cupio te consulem videre, omniaque, quæ spero, cum absens tum etiam præsens, te consule, assequi. Vale.

ARGUMENTUM.

Significat, se ea facturum Fabii causa, quæ Cassius rogaret: dolet, se Cassium non videri ad urbem ex provincia redeuntem: rogat, operam det, ne quid sibi ad annuam Provinciam temporis prorogetur.

M. T. C. C. CASSIO PROQUÆST. S. D. 14

M. Fabium quod mihi amicum tua commendatione das, nullum in eo facio quæstum. Multi enim anni sunt, cum ille in ære meo est, & a me diligitur propter summam suam humanitatem & observantiam. Sed tamen, quod te ab eo egregie diligi sensi, multo amicior ei sum factus. Itaque quamquam profecerunt litteræ tuæ; tamen aliquanto plus commendationis apud me habuit animus ipsius erga te mihi perspectus & cognitus. Sed de Fabio faciemus studiose, quæ rogas. Tu multis de causis vellem me convenire potuisses: primum, ut te, quem jamdiu plurimi facio, tanto intervallo viderem: deinde ut tibi, quod feci per litteras, possem præsens gratulari: tum, ut quibus de rebus vellemus, tu tuis, ego meis, inter nos communicaremus: postremo, ut amicitia nostra, quæ summis officiis ab utroque culta est, sed longis intervallis temporum interruptam consuetudinem habuit, confirmaretur vehementius. Id quando non accidit, utemur bono litterarum, & eadem fere absentes, quæ, si coram essemus, consequemur. Unus scilicet ille fructus, qui in te videndo est, percipi litteris non potest: alter gratulationis est, is quidem exilior, quam si tibi te ipsum intuens gratularer. Sed tamen & feci ante, & facio nunc, tibi quæ cum pro rerum magnitudine, quas gessisti, tum pro opportunitate temporis gratulor, quod te de provincia decedentem summa laus & summa gratia provinciæ prosecuta est.

Ter-

Tertium est, ut id, quod de nostris rebus coram communicassemus inter nos, conficiamus idem litteris. Ego ceterarum rerum causa tibi Romam properandum magnopere censeo. Nam & ea, quæ reliqui, tranquilla de te erant; & hac tua recenti victoria tanta, clarum adventum tuum fore intelligo. Sed si qua sunt onera tuorum, si tanta sunt, ut ea sustinere possis, propera: nihil tibi erit lautius, nihil gloriosius: sin majora, considera, ne in alienissimum tempus cadat adventus tuus. Huius rei totum consilium tuum est: tu enim scis, quid sustinere possis. Si potes, laudabile atque populare est: sin plane non potes, absens hominum sermones facilius sustinebis. De me autem idem tecum his ago litteris, quod superioribus egi, ut omnes tuos nervos in eo contendas, ne quid mihi ad hanc provinciam, quam & senatus & populus annuam esse voluit, temporis prorogetur. Hoc a te ita contendo, ut in eo fortunas meas positas putem. Habes Paullum nostrum nostri cupidissimum: est Curio: est Furnius. Sic velim enitare, quasi in eo sint mihi omnia. Extremum illud est de iis, quæ proposueram, confirmatio nostræ amicitiae: de qua pluribus verbis nihil opus est. Tu puer me appetisti: ego autem semper ornamento te mihi fore duxi. Fuisti etiam præsidio tristissimis meis temporibus: accessit post tuum discessum familiaritas mihi cum Bruto tuo maxima. Itaque in vestro ingenio, & industria mihi plurimum & suavitatis & dignitatis constitutum puto. Id tu ut tuo studio confirmes, te vehementer rogo: litterasque ad me & continuo mittas, & cum Romam veneris, quam sæpissime. Vale.

ARGUMENTUM.

Probat suum consilium de bello civili non renovando.

M. T. C. C. CASSIO S. D.

15

ET si uterque nostrum spe pacis & odio civilis sanguinis abesse a belli pertinacia voluit: tamen, quando ejus consilii princeps ego fuisse vi-

deor, plus fortasse tibi præstare ipse debeo, quam a te expectare. Etsi, ut sæpe soleo mecum recordari, sermo familiaris meus tecum, & item mecum tuus adduxit utrumque nostrum ad id consilium, ut uno prælio putarem, si non totam causam, at certe nostrum iudicium definiri convenire. Neque quisquam hanc nostram sententiam vere umquam reprehendit, præter eos, qui arbitrantur melius esse, deleri omnino rempub. quam imminutam & debilitatam manere. Ego autem ex interitu ejus nullam spem scilicet mihi proponebam, ex reliquiis magnam. Sed ea sunt consecuta, ut magis mirum sit, accidere illa potuisse, quam nos non vidisse ea futura, nec, cum homines essemus, divinare potuisse. Equidem fateor meam conjecturam hanc fuisse, ut illo quasi quodam fatali prælio facto, & victores communi saluti consulere vellent, & victi suæ: utrumque autem positum esse arbitrabar in celeritate victoris. Quæ si fuisset, eandem clementiam experta esset Africa, quam cognovit Asia, quam etiam Achaja, & ut opinor, ipso legato ac deprecatore. Amisissis autem temporibus, quæ plurimum valent, præsertim bellis civilibus, interpositus annus alios induxit, ut victoriam sperarent, alios, ut ipsum vinci contemnerent. Atque horum malorum omnium culpam fortuna sustinet. Quis enim aut Alexandrini belli tantam moram huic bello adjunctum iri, aut nescio quem istum Pharnacem Asiæ terrorem illaturum putaret? Nos tamen in consilio pari, casu dissimili usi sumus: tu enim eam partem petisti, ut & consiliis interesses, & quod maxime curam levat, futura animo prospicere posses: ego, qui festinavi, ut Cæsarem in Italia viderem, (sic enim arbitrabamur) eumque, multis honestissimis viris conservatis redeuntem, ad pacem currentem, ut ajunt, incitarem: ab illo longissime & absun, & absui. Versor autem in gemitu

mitu Italiæ, & in urbis miserrimis querelis: quibus aliquid opis fortasse ego pro mea, tu pro tua, pro sua quisque parte ferre potuisset; si auctor affuisset. Quare velim pro tua erga me perpetua benevolentia, scribas ad me, quid videas, quid sentias, quid expectandum, quid agendum nobis existimes. Magni erunt mihi tuæ litteræ: atque utinam primis illis, quas Luceria miseras, paruissem! sine ulla enim molestia dignitatem meam retinuissem. Vale.

ARGUMENTUM.

Jocatur in opiniones Epicureorum, idest in ipsum Cassium, qui Epicuri sectam sequi cœperat.

M. T. C. PROCOS. C. CASSIO S. D. 16

Puto te jam suppuere, cum hæc te tertia jam epistola ante operis sit, quam tu schedulam aut litteram: sed non urgeo: longiores enim expectabo, vel potius exigam. Ego, si semper haberem, cui darem, vel ternas in hora darem. Fit enim nescio quid, ut quasi coram adesse videre, cum scribo aliquid ad te: neque id κατ' εἰδῶλον φαντασίας, ut dicunt tui amici novi, qui putant etiam διανοητικὰς φαντασίας spectris Catianis excitari. Nam, ne te fugiat, Catius Infuber, Epicureus, qui nuper est mortuus, quæ ille Gargetius, & jam ante Democritus, εἰδῶλα, hic spectra nominat. His autem spectris etiamsi oculi possent feriri, quod vel iis ipsa occurrunt; animus qui possit, ego non video. Doceas tu me oportebit, cum salvus veneris, in mea ne potestate sit spectrum tuum, ut, simul ac mihi collibitum sit de te cogitare, illud occurrat; neque solum de te, qui mihi hæres in medullis; sed, si insulam Britanniam cœpero cogitare, ejus εἰδῶλον mihi advolabit ad pectus. Sed hæc posterius: tento enim te, quo animo accipias. Si enim stomachabere, & mole-

ste feres, plura dicemus: postulabimusque, ex qua hæresi, vi, hominibus armatis dejectus sis, in eam restituare. In hoc interdicto non solet addi, in hoc anno. Quare si jam biennium, aut triennium est, cum virtuti nuntium remisisti, delinitus illecebris voluptatis, in integro res nobis erit. Quamquam quicum loquor? cum uno fortissimo viro: qui, posteaquam forum attigisti, nihil fecisti, nisi plenissimum amplissimæ dignitatis. In ista ipsa αἵρεσι metuo, ne plus nervorum sit, quam ego putarim, si modo eam tu probas. Quid tibi in mentem venit? inquires: quia nihil habebam aliud, quod scriberem. De rep. enim nihil scribere possum: neque enim quod sentio, libet scribere. Vale.

A R G U M E N T U M.

Queritur de tabellariorum importunitate: scribit de Syllæ morte, de rumoribus Hispanici belli, de Panfæ, de Cassii commoratione Brundisina.

M. T. C. C. CASSIO S. D.

17

PRæposteros habes tabellarios: etsi me quidem non offendunt; sed tamen, cum a me discedunt, flagitant litteras; cum ad me veniunt, nullas afferunt: atque id ipsum facerent commodius, si mihi aliquid spatii ad scribendum darent: sed petasati veniunt: comites ad portum expectare dicunt. Ergo ignosces; alteras habebis, has breves: sed expecta πάντα περὶ πάντων. Etsi quid ego me tibi purgo, cum tui ad me inanes veniant; ad te cum epistolis revertantur? Nos hic (tamen ad te scribam aliquid) P. Syllam patrem mortuum habebamus: alii a latronibus, alii cruditate dicebant: populus non curabat: combustum enim esse constabat: hoc tu pro sapientia tua feres æquo animo: quamquam πρότερον πόλεως amisimus. Cæsarem putabant moleste latitum,

turum, verentem, ne hasta refrixisset. Mindius, Marcellus, & Attius pigmentarius valde gaudebant se adversarium perdidisse. De Hispania novi nihil: sed expectatio valde magna: rumores tristiores, sed ἀδίσποτοι. Pansa noster paludatus ad III. Kalend. Januar. profectus est, ut quivis intelligere posset, id, quod tu nuper dubitare cœpisti, τὸ καλὸν δὲ αὐτὸ αἰρετὸν esse. Nam quod multos miseriis levavit, & quod se in his malis hominem præbuit, mirabilis eum virorum bonorum benevolentia, prosecuta est. Tu quod adhuc Brundisii moratus es, valde probo & gaudeo: & mehercule puto, te sapienter facturum, si ἀνεύσπεδος fueris. Nobis quidem, qui te amamus, erit gratum: & amabo te, cum dabis posthac aliquid domum litterarum, mei memineris. Ego numquam quemquam ad te, cum sciam, sine meis litteris ire patiar. Vale.

ARGUMENTUM.

Excusat brevitate epistolæ festinatione tabellarii; scribit de statu Reipub., de Hispania, de Cassii absentia.

M. T. C. C. CASSIO S. D. 18

Longior epistola fuisset, nisi eo ipso tempore petita esset a me, cum jam iretur ad te: longior etiam, si σλύαρον aliquem habuisset: nam σπεύδῃν sine periculo vix possumus. Ridere igitur, inquires, possumus. Non mehercule facillime: verumtamen aliam aberrationem a molestiis nullam habemus. Ubi igitur, inquires, philosophia? tua quidem in culina, mea molesta est: pudet enim fervire. Itaque facio me alias res agere, ne convicium Platonis audiam. De Hispania nihil adhuc certi, nihil omnino novi. Te abesse, mea causa moleste fero; tua gaudeo. Sed flagitat tabellarius. Valebis igitur, meque, ut a puero fecisti, amabis.

ARGUMENTUM.

*Respondet ad duas epistolas, quæ ante proximam
superiorem leguntur; maxime autem Epicurum,
& Epicureos, quorum ipse in numero erat, a stu-
dio virtutis & justitiæ laudat.*

CASSIUS CICERONI S. D.

19

Non mehercule in hac mea peregrinatione
quidquam libentius facio, quam scribo ad
te: videor enim cum præsentē loqui & jocari.
Nec tamen hoc usu venit propter spectra Catia-
na: pro quo tibi proxima epistola tot rusticos Stoi-
cos regeram, ut Carium Athenis natum esse di-
cas. Pansa nostrum secunda voluntate homi-
num paludatum ex urbe exisse, cum ipsius causa
gaudeo, tum mehercule etiam omnium nostrum.
Spero enim, homines intellecturos, quanto sit
omnibus odio crudelitas, & quanto amorī probi-
tas & clementia; atque ea, quæ maxime mali
petant, & concupiscant, ad bonos pervenire. Dif-
ficile est enim hominibus persuadere, τὸ καλὸν δι-
αυτὸ αἰρετὸν esse: ἡδονὴν vero, & ἀταραξίαν vir-
tute, justitiā, τῷ καλῷ parari, & verum & pro-
babile est. Ipse enim Epicurus, a quo omnes Ca-
tii, & Amafinii, mali verborum interpretes, pro-
ficiscuntur, dicit: ἐκ ἑστίν ἡδὺς, ἀνὰ τὴν καλῶς
καὶ δικαίως ζῆν. Itaque & Pansa, qui ἡδονὴν se-
quitur, virtutem retinet: & ii, qui a nobis φιλή-
δονοι vocantur, sunt φιλόναλοι, καὶ φιλοδίκαιοι, om-
nesque virtutes & colunt, & retinent. Itaque Syl-
la, cujus judicium probare debemus, cum dissen-
tire philosophos videret, non quæsit, quid bo-
num esset, & omnia bona coemit: cujus ego mor-
tem forti mehercule animo tuli. Nec tamen Cæ-
sar diutius nos eum desiderare parietur: nam ha-
bet damnatos, quos pro illo nobis restituat: nec
ipse sectorem desiderabit, cum filium viderit.

Nunc,

Nunc, ut ad rempublicam redeam, quid in Hispaniis geratur, rescribe. Peream, nisi sollicitus sum, ac malo veterem & clementem dominum habere, quam novum & crudelem experi-ri. Scis, Cnæus quam sit fatuus: scis, quomodo crudelitatem, virtutem putet: scis, quam se semper a nobis derisum putet. Vereor, ne nos rustice gladio velit ἀτιμωκτερίσαι. Quid fiat, si me diligis, rescribe. Hui, quam velim scire, utrum ista sollicito animo, an soluto legas! sciam enim eodem tempore, quid me facere oporteat. Ne longior sim, vale: & me, ut facis, ama. Si Cæsar vicat, celeriter me exspecta.

ARGUMENTUM.

Scribit, se ad illum mittere librum suum de perfecto Oratore: laudat in Sabina gente fidem & probitatem: petit ab eo creberrimas litteras.

M. T. C. C. TREBONIO S. D. 20

ORatorem meum (sic enim inscripsi) Sabino tuo commendavi. Natio me hominis impulit, ut ei recte putarem: nisi sorte candidatorum licentia hic quoque usus, hoc subito cognomen arripuit: etsi modestus ejus vultus, sermoque constans habere quiddam a Curibus videbatur. Sed de Sabino satis. Tu, mi Treboni, quando ad amorem meum aliquantulum discedens addidisti; quo tolerabilius feramus igniculum desiderii tui, crebris nos litteris appellato: atque ita, si idem fiet a nobis: quamquam duæ causæ sunt, cur tu frequentior in isto officio esse debeas, quam nos. Primum, quod olim solebant, qui Romæ erant, ad provinciales amicos de repub. scribere, nunc tu nobis scribas oportet: res enim publica istic est: deinde, quod nos aliis officiis tibi absenti satisfacere possumus; tu nobis, nisi litteris, non video, quâ re alia satisfacere possis. Sed cetera scribes ad nos postea. Nunc hæc primo cupio cognosce-

re ; iter tuum cujusmodi sit ; ubi Brutum nostrum videris ; quamdiu simul fueris : deinde , cum processeris longius , de bellicis rebus , de toto negotio , ut existimare possimus , quo statu simus . Ego tantum me scire putabo , quantum ex tuis litteris habebō cognitum . Cura , ut valeas , meque ames amore illo tuo singulari . Vale .

A R G U M E N T U M .

Rogat , ut sui absentis desiderium crebris , & longis epistolis leniat : enumerat Trebonii erga se officia : exponit de Calvo jam mortuo quid sentiat .

M. T. C. TREBONIO S. D.

21

ET epistolam tuam legi libenter , & librum libentissime : sed tamen in ea voluptate hunc accepi dolorem , quod , cum incendisses cupiditatem meam consuetudinis augendæ nostræ , (nam ad amorem quidem nihil poterat accedere) tum discedis a nobis , meque tanto desiderio afficis , ut unam mihi consolationem relinquas , fore , ut utriusque nostrum absentis desiderium crebris & longis epistolis leniatur . Quod ego non modo de me tibi spondere possum , sed de te etiam mihi . Nullam enim apud me reliquisti dubitationem , quantum me amares . Nam , ut illa omittam , quæ civitate teste , fecisti , cum mecum inimicitias communicasti , cum me concionibus tuis defendisti , cum quæstor in mea atque in publica causa consulum partes suscepisti , cum tribuno pl. quæstor non paruisti , cui tuus præsertim collega pareret : ut hæc recentia , quæ meminero semper , obliviscar : quæ tua sollicitudo de me in armis , quæ lætitia in reditu , quæ cura , qui dolor , cum ad te curæ , & dolores mei perferrentur ? Brundisium denique te ad me venturum fuisse , nisi subito in Hispaniam missus esses ? Ut hæc igitur omittam , quæ mihi tanti æstimanda sunt , quanti vitam æstimo , & salutem meam : liber iste , quem mihi misisti ,

fisti, quantam habet declarationem amoris tui? primum, quod tibi facetum videtur, quidquid ego dixi, quod aliis fortasse non item: deinde, quod illa sive faceta sunt, sive secus, fiunt, narrante te, venustissima: quin etiam antequam ad me veniatur, risus omnis pæne consumitur. Quod si in his scribendis nihil aliud, nisi, quod necesse fuit, de uno me tamdiu cogitavisses, ferreus essem, si te non amarem. Cum vero ea, quæ scriptura persecutus es, sine summo amore cogitare non potueris, non possum existimare, plus quemquam a se ipso, quam me a te amari. Cui quidem ego amori, utinam ceteris rebus possem, amore certe respondebo: quo tamen ipso tibi confido facturum satis. Nunc ad epistolam venio, cui copiose & suaviter scriptæ, nihil est quod multa respondeam. Primum enim ego illas Calvo litteras misi, non plus, quam has, quas nunc legis, existimans exituras: aliter enim scribimus, quod eos solos, quibus mittimus; aliter, quod multos lecturos putamus. Deinde, ingenium ejus melioribus extuli laudibus, quam tu id vere potuisse fieri putas. Primum, quod ita judicabam, acute movebatur: genus quoddam sequebatur, in quo judicio lapsus, quo valebat, tamen assequebatur, quod probaret. Multæ erant & reconditæ litteræ: vis non erat. Ad eam igitur adhortabar. In excitando autem, & in acuendo plurimum valet, si laudes eum, quem cohortere. Habes de Calvo judicium & consilium meum: consilium, quod hortandi causa laudavi: judicium, quod de ingenio ejus valde existimavi bene. Reliquum est, ut tuam profectio-nem amore prosequar, reditum spe expectem, absentem memoria colam: omne desiderium litteris mittendis accipiendisque leniam. Tu velim tua in me studia & officia multum tecum recordere: quæ cum tibi liceat, mihi nefas sit oblivisci, non modo virum bonum me existimabis, verum etiam te a me amari plurimum judicabis. Vale.

LIBER XVI.

ARGUMENTUM.

Cum rediret Romam Cicero ex Cilicia, egrum Tironem Libertum Patris reliquit: quem his fere omnibus epistolis rogat, ut valetudinem curet.

TULLIUS, ET CICERO F. ET Q. TIRONI
HUMANISSIMO, ET OPTIMO S. D.

Vide, quanta in te sit suavitas: duas horas Thyrei fuimus. Xenomenes hospes tam te diligit, quam si vixerit tecum. Is omnia pollicitus est, quæ tibi essent opus: facturum puto. Mihi placebat, si firmior esses, ut te Leucadem deportares, ut ibi te plane confirmares. Videbis, quid Curio, quid Lysoni, quid medico placeat. Volebam ad te Marionem remittere, quem, cum meliuscule tibi esset, ad me mitteres: sed cogitavi, unas litteras Marionem afferre posse, me autem crebras exspectare. Poteris igitur, & facies, si me diligis, ut quotidie sit Acastus in portu. Multi erunt, quibus recte litteras dare possis, qui ad me libenter perferant. Equidem Patras euntem neminem prætermittam. Ego omnem spem tui diligenter curandi in Curio habeo. Nihil potest illo fieri humanius, nihil nostri amantius. Ei te totum trade: malo te paullo post valentem, quam statim imbecillum videre. Cura igitur nihil aliud, nisi ut tu valeas: cetera ego curabo. Etiam atque etiam vale. Leucade proficiscens, VII. Id. Nov.

ARGUMENTUM.

Scribit se adversis ventis Corcyra teneri: hortaturque Tironem, ut se curet, nec nisi confirmatus naviget.

TULLIUS TIRONI SUO S. D.

SEptimum jam diem Corcyra tenebamur; Quintus autem pater & filius Buthroti. Solliciti
era-

eramus de tua valetudine mirum in modum: nec mirabamur nihil a te litterarum. Iis enim ventis istinc navigatur, qui si essent, nos Corcyrae non federemus. Cura igitur te, & confirma: & cum commode & per valetudinem, & per anni tempus navigare poteris, ad nos amantissimos tui veni. Nemo nos amat, qui te non diligat: carus omnibus expectatusque venies. Cura, ut valeas etiam atque etiam, Tiro noster vale. xv. Kal. Nov. Corcyrae.

ARGUMENTUM.

Suum Tironis desiderium significat.

TULLIUS, ET CICERO MEUS, ET FRATER,
ET FRATRIS F. TIRONI SUO S. D. 3

PAullo facilius putavi posse me ferre desiderium tui: sed plane non fero: & quamquam magni ad honorem nostrum interest, quamprimum ad urbem me venire, tamen peccasse mihi videor, qui a te discefferim. Sed quia tua voluntas ea videbatur esse, ut prorsus, nisi confirmato corpore, nolles navigare, approbavi tuum consilium; neque nunc muto, si tu in eadem es sententia. Sin, posteaquam cibum cepisti, videris tibi me posse consequi, tuum consilium est. Marionem ad te eo misi, ut aut tecum ad me quamprimum veniret; aut, si tu morarere, statim ad me rediret. Tu autem hoc tibi persuade, si commodo valetudinis tuae fieri possit, nihil me malle, quam te esse mecum: sin intelliges opus esse, te Patris, convalescendi causa, paullum commorari, nihil me malle, quam te valere. Si statim navigas, nos Leucade consequere: sin te confirmare vis; & comites, & tempestates, & navem idoneam ut habeas, diligenter videbis. Unum illud, mi Tiro, videto, si me amas, ne te Marionis adventus, & haec litterae moveant. Quod valetudini tuae

maxime conducet, si feceris, maxime obtemperaris voluntati meæ. Hæc pro tuo ingenio considera. Nos ita te desideramus, ut amemus: amor, ut valentem videamus, hortatur: desiderium, ut quamprimum. Illud igitur potius. Cura ergo potissimum, ut valeas: de tuis innumerabilibus in me officiis erit hoc gratissimum. III. Non. Novemb.

A R G U M E N T U M.

Scribit de sua sollicitudine, suoque ad Alyziam accessu: rogat, ut valetudinem diligenter curet.

TULLIUS TIRONI SUO S. D.

4

NON queo ad te, nec lubet scribere; quo animo sim affectus: tantum scribo, & tibi & mihi maxime voluptati fore, si te firmum quamprimum videro. Tertio die abs te ad Alyziam accesseram. Is locus est citra Leucadem stadia cxx. Leucade aut teipsum, aut tuas litteras a Marione putabam me accepturum. Quantum me diligis, tantum fac, ut valeas, vel quantum te a meis diligis. Nonis Nov. Alyzia.

A R G U M E N T U M.

Rogat, ut omni cura valetudini serviat.

TULLIUS, ET CICERO, ET Q. PATER,
ET Q. FILIUS TIRONI SUO S. D.

5

NOS apud Alyziam, ex quo loco tibi litteras ante dederamus, unum diem commorati sumus, quod Quintus nos consecutus non erat. Is dies fuit Non. Nov. Inde ante lucem proficiscentes, ante diem VIII. Id. Nov. has litteras dedimus. Tu, si nos omnes amas, & præcipue me, magistrum tuum, confirma te. Ego valde suspensio animo exspecto, primum te scilicet, deinde Marionem cum tuis litteris. Omnes cupimus,
ego

ego in primis, quamprimum te videre: sed, mi Tiro, valentem. Quare nihil properaris: satis quotidie videro, si valebis. Utilitatibus tuis possum carere; te valere tua causa primum volo, tum mea, mi Tiro. Vale.

ARGUMENTUM.

Fere tota est hortatio ad curandam valetudinem.

TULLIUS TIRONI SUO, ET CICERO,

ET Q. PATER, ET Q. F. S. D.

6

Varie sum affectus tuis litteris: valde priore pagina perturbatus, paulum altera recreatus. Quare nunc quidem non dubito, quin, quoad plane valeas, te neque navigationi, neque viæ committas: satis te mature videro, si plane confirmatum videro. De medico & tu bene existimari scribis, & ego sic audio: sed plane curationes ejus non probo. Jus enim dandum tibi non fuit, cum *κακός βμαχός* esses: sed tamen & ad illum scripsi accurate, & ad Lysonem. Ad Curium vero, suavissimum hominem, & summi officii, summæque humanitatis multa scripsi: in his etiam, ut, si tibi videretur, te ad se transferret. Lyso enim noster, vereor, ne negligentior sit: primum, quia omnes Græci: deinde, quod, cum a me litteras accepisset, mihi nullas remisit: sed eum tu laudas. Tu igitur, quid faciendum sit, judicabis. Illud, mi Tiro, te rogo, sumptui ne parcas ulla in re, quod ad valetudinem opus sit. Scripsi ad Curium, quod dixisses, daret medico: ipsi puto aliquid dandum esse, quo sit studiosior. Innumerabilia tua sunt in me officia, domestica, forensia, urbana, provincialia, in re privata, in publica, in studiis, in litteris nostris. Omnia viceris, si, ut spero, te validum videro. Ego puto te bellissime, si recte erit, cum quaestore Messinio decursurum: non inhumanus est: teque, ut mihi visus est, diligit:

ligit : & cum valetudini tuæ diligentissime confu-
lueris , tum , mi Tiro , consulto navigationi . Nul-
la in re jam te festinare volo : nihil laboro , nisi
ut salvus sis . Sic habeto , mi Tiro , neminem esse,
qui me amet , quin idem te amet : & cum tua , &
mea maxime interest te valere , tum multis est
curæ . Adhuc , dum mihi nullo loco deesse vis ,
numquam te confirmare potuisti : nunc te nihil
impedit : omnia depone : corpori servi : quantam
diligentiam in valetudinem tuam contuleris , tan-
ti me fieri judicabo . Vale , mi Tiro , vale ,
vale , & salve . Lepta tibi salutem dicit , & om-
nes . Vale . VII. Id. Nov. Leucade .

Idem argumentum , ut Tiro valetudinem curet .

TULLIUS , ET CICERO , ET Q. Q.

TIRONI S. D.

7

TERTIAM ad te hanc epistolam scripsi eadem
die ; magis instituti mei tenendi causa , quia
nactus eram , cui darem , quam quod haberem ,
quod scriberem . Igitur illa : quantum me diligis ,
tantum adhibe in te diligentia . Ad tua innume-
rabilia in me officia adde hoc , quod mihi erit gra-
tissimum omnium : cum valetudinis rationem , ut
spero , habueris , habeto etiam navigationis . In
Italiam euntibus omnibus ad me litteras dabis , ut
ego euntem Patras neminem prætermitto . Cura ,
cura te , mi Tiro : quando non contigit , ut simul
navigares ; nihil est quod festines : nec quidquam
cures , nisi ut valeas . Etiam atque etiam vale .
VII. Id. Nov. Actio , vesperi .

ARGUMENTUM .

*Etiam Q. Cicero significat , quanta cura sibi Tiro-
nis valetudo sit .*

Q. CICERO TIRONI S. D.

8

MAGNÆ nobis est sollicitudini valetudo tua :
nam tametsi qui veniunt , ἀνθρώπων μὲν ,
Χρονιά τερα δὲ nuntiant ; tamen in magna consola-
tione

tione ingens inest sollicitudo, si diutius a nobis abfuturus es, is, cujus usum & suavitatem desiderando sentimus. Attamen quamquam videre te tota cogitatione cupio; tamen te penitus rogo, ne te tam longæ navigationi & viæ per hiemem, nisi bene firmum, committas: neve naviges, nisi explore. Vix in ipsis testis & oppidis frigus infirma valetudine vitatur: nedum in mari & via, sit facile abesse ab injuria temporis.

Ἰὺχα δὲ λεπτῷ χρωτὶ πολεμιώτατον,
inquit Euripides. Cui tu quantum credas, nescio: ego certe singulos ejus versus singula testimonia puto. Effice, si me diligis, ut valeas, & ut ad nos firmus ac valens quamprimum venias. Ama nos, & vale. Q. F. tibi salutem plurimam dicit.

ARGUMENTUM.

Navigationis descriptio, & ad curandam valetudinem benevolentiae plena cohortatio.

TULLIUS, ET CICERO TIRONI S. D. 9

NOs a te, ut scis, discessimus ad iv. Non. Nov. Leucadem venimus ad viii. Id. Nov. ad vii. Actium: ibi propter tempestatem ad vi. Id. morati sumus. Inde ad v. Id. Corcyram bellissime navigavimus. Coreyræ fuimus usque ad xvi. Kal. Dec. tempestatibus retenti: ad xv. Kal. a portu Corcyraeorum ad Cassiopem stadia cxx. processimus. Ibi retenti ventis sumus usque ad ix. Kal. Interea, qui cupide profecti sunt, multi naufragia fecerunt. Nos eo die cœnati solvimus. Inde Austro lenissimo, cælo sereno, nocte illa, & die postero in Italiam ad Hydruntem ludibundi pervenimus: eodemque vento postridie (id erat ad vii. Kalend. Decembr.) hora quarta Brundisium venimus: eodemque tempore simul nobiscum in oppidum introiit Terentia, quæ te facit plurimi. Ad v. Kalend. Decemb. servus Cn. Plancii Brundisii
tan-

tandem aliquando mihi a te expectatissimas litteras reddidit, datas Id. Novemb. quæ me molestia valde levarunt: utinam omnino liberassent. Sed tamen Asclapo. medicus plane confirmat, propediem te valentem fore. Nunc quidem ego te hortor, ut omnem diligentiam adhibeas ad convalescendum. Tuam prudentiam, temperantiam, amorem erga me novi: scio te omnia facturum, ut nobiscum quamprimum sis. Sed tamen ita velim, ut ne quid properes. Symphoniam Lysonis velim vitasses, ne in quartam hebdomadam incideres. Sed quando pudori tuo maluisti obsequi, quam valetudini, reliqua cura. Curio nisi, ut medico honos haberetur, & tibi daret, quod opus esset; me, cui jussisset, curaturum. Equum & mulum Brundisii tibi reliqui. Romæ vereor, ne ex Kalend. Januar. magni tumultus sint. Nos agemus omnia modice. Reliquum est, ut te hoc rogem, & a te petam, ne temere naviges. Solent nautæ festinare quæstus sui causa. Cautus sis, mi Tiro. Mare magnum & difficile tibi restat. Si poteris, cum Messinio: caute is solet navigare: sin minus, cum honesto aliquo homine, cujus auctoritate navicularius moveatur. In hoc omnem diligentiam si adhibueris, teque nobis incolumem præstiteris, omnia a te habebo. Etiam atque etiam, noster Tiro, vale. Medico, Curio, Lysoni de te scripsi diligentissime. Vale, salve.

A R G U M E N T U M.

Rogat, ut præter valetudinem nihil curet: addit de adventu suo ad Urbem, de statu Reip. civilibus discordiis, perturbato, de triumpho suo, de præfectura Campana.

TULLIUS, ET CICERO, TERENTIA, TULLIA,
Q. Q. TIRONI S. D. IO

ET si opportunitatem operæ tuæ omnibus locis desidero; tamen non tam mea, quam tua
caussa

caussa doleo, te non valere. Sed quando in quartanam conversa vis est morbi (sic enim scribit Curius) spero, te, diligentia adhibita, etiam firmiorem fore. Modo fac, id quod humanitatis tuæ est, ne quid aliud cures hoc tempore, nisi ut quam commodissime convalescas. Non ignoro, quantum ex desiderio labores: sed erunt omnia facilia, si valebis: festinare te nolo, ne nausæ molestiam suscipias æger, & periculose hieme naviges. Ego ad urbem accessi pridie Non. Jan. obviam mihi sic est proditum, ut nihil fieri potuerit honoratius. Sed incidi in ipsam flammam civilis discordiæ, vel potius belli: cui cum cuperem mederi, &, ut arbitror, possem, cupiditates certorum hominum (nam ex utraque parte sunt, qui pugnare cupiant) impedimento mihi fuerunt omnino: & ipse Cæsar, amicus noster, minaces ad senatum & acerbis litteras miserat: & erat adhuc impudens, qui exercitum & provinciam, invito senatu teneret: & Curio meus illum incitabat. Antonius quidem noster, & Q. Cassius, nulla vi expulsi, ad Cæsarem cum Curione profecti erant. Posteaquam senatus consulibus, prætoribus, tribunis plebis, & nobis, qui proconsules sumus, negotium dederat, ut curaremus, ne quid publica detrimenti caperet, numquam maiore in periculo civitas fuit, numquam improbi cives habuerunt paratiorem ducem: omnino ex hac quoque parte diligentissime comparatur. Id sit auctoritate & studio Pompeji nostri, qui Cæsarem sero cœpit timere. Nobis inter has turbas senatus tamen frequens flagitavit triumphum: sed Lentulus eos, quo majus suum beneficium faceret, simul atque expedisset, quæ essent necessaria, de republica dixit se relaturum. Nos agimus nihil cupide, eoque est nostra pluris auctoritas. Italiæ regiones descriptæ sunt, quam quisque partem tueretur. Nos Capuam sumpsimus. Hæc te scire volui.

lui. Tu etiam atque etiam cura, ut valeas, litterasque ad me mittas, quotiescumque habebis, cuides. Etiam atque etiam vale. Datum pridie Id. Jan.

A R G U M E N T U M.

Deplorat statum Reipub. & initia bellorum civilium exponit: tum suam in Tironem benevolentiam significat.

TULLIUS TIRONI SUO S. D.

II

QUO in discrimine versetur salus mea, & bonorum omnium, atque universæ reipublicæ, ex eo scire potes, quod domos nostras, & patriam ipsam vel diripiendam, vel inflammandam reliquimus. In eum locum res deducta est, ut, nisi quis Deus vel casus aliquis subvenerit, salvi esse nequeamus. Equidem, ut veni ad urbem, non destiti omnia & sentire, & dicere, & facere quæ ad concordiam pertinerent: sed mirus invaserat furor non solum improbos, sed etiam eos, qui boni habentur, ut pugnare cuperent, me clamante, nihil esse bello civili miserius. Itaque cum Cæsar amentia quadam raperetur, & oblitus nominis atque honorum suorum, Ariminum, Pisaurum, Anconam, Arretium occupasset, urbem reliquimus: quam sapienter, aut quam fortiter, nihil attinet disputare. Quo quidem in casu simus, vides. Feruntur omnino conditiones ab illo, ut Pompejus eat in Hispaniam: delectus qui sunt habitus, & præsidia nostra dimittantur: se ulteriorem Galliam Domitio, citeriorem Considio Noniano (his enim obtigerunt) traditurum: ad consulatus petitionem se venturum, neque se jam velle, absente se, rationem haberi sui: se præsentem trinundinum petiturum. Accepimus conditiones: sed ita, ut removeat præsidia ex iis locis, quæ occupavit, ut sine metu de his ipsis conditionibus Romæ senatus haberi possit. Id ille si fecerit, spes est pa-

cis

cis non honestæ: leges enim imponuntur: sed quidvis est melius, quam sic esse, ut sumus. Sin autem ille suis conditionibus stare noluerit; bellum paratum est; ejusmodi tamen, quod ille sustinere non possit, præsertim cum a suis conditionibus ipse fugerit: tantummodo ut eum intercludamus, ne ad urbem possit accedere: quod sperabamus fieri posse. Delectus enim magnos habebamus, putabamusque illum metuere, si ad urbem ire cœpisset, ne Gallias amitteret: quas ambas habet inimicissimas, præter Transpadanos: ex Hispaniaque sex legiones, & magna auxilia, Afranio & Petrejo ducibus, habet a tergo. Videtur, si insaniet, posse opprimi, modo ut urbe salva. Maximam autem plagam accepit, quod is, qui summam auctoritatem in illius exercitu habebat, T. Labientis, socius sceleris esse noluit: reliquit illum, & nobiscum est: multique idem facturi esse dicuntur. Ego adhuc oræ maritimæ præsum a Formiis. Nullum majus negotium suscipere volui, quo plus apud illum meæ litteræ cohortationesque ad pacem valerent. Sin autem erit bellum, video, me castris, & certis legionibus præfuturum. Habeo etiam illam molestiam, quod Dolabella noster apud Cæsarem est. Hæc tibi nota esse volui: quæ, cave, te perturbent & impediant valetudinem tuam. Ego A. Varroni, quem cum amantissimum mei cognovi, tum etiam tui studiosum, diligentissime te commendavi, ut & valetudinis tuæ rationem haberet, & navigationis, & totum te susciperet ac tueretur: quem omnia facturum confido: recepit enim, & mecum locutus est suavissime. Tu quando eo tempore mecum esse non potuisti, quo ego maxime operam & fidelitatem desideravi tuam, cave festines, aut committas, ut aut æger aut hieme naviges. Nunquam ego fero te venisse putabo, si salvus veneris. Adhuc neminem videram, qui te postea vidisset, quam

quam M. Volusius, a quo tuas litteras accepi : quod non mirabar : neque enim meas puto ad te litteras tanta hieme perferri. Sed da operam, ut valeas : & , si valebis, cum recte navigari poterit, tum naviges. Cicero meus in Formiano erat : Terentia, & Tullia Romæ. Cura, ut valeas. IV. Kal. Febr. Capua.

A R G U M E N T U M.

Narrat, quam periculosum sit Tironi post morbum in viam se dare, exigitque solitam ejus operam in studiis.

CICERO TIRONI S. D.

12

EGO vero cupio te ad me venire : sed viam timo : gravissime ægrotasti : inedia & purgationibus, & vi ipsius morbi consumptus es. Graves solent offensiones esse ex gravibus morbis, siqua culpa commissa est. Jam ad id biduum, quod fueris in via, dum in Cumanum venis, accedent continuo ad reditum dies quinque. Ego in Formiano ad III. Kalen. esse volo. Ibi te ut firmum offendam, mi Tiro, effice. Litterulæ meæ, siue nostræ tui desiderio oblanguerunt : Hac tamen epistola, quam Acastus attulit, oculos paullum sustulerunt. Pompejus erat apud me, cum hæc scribebam, hilare & libenter ei cupienti audire nostra, dixi, sine te omnia mea muta esse. Tu, multis nostris, para, ut operas reddas : nostra ad diem dictam fient. Docui enim te, fides εὔμου quod haberet. Fac plane ut valeas : nos ad summum. Vale. XIV. Kal. Jan.

A R G U M E N T U M.

Suam de Tironis valetudine sollicitudinem significat.

TULLIUS TIRONI S. D.

13

ÆGypta ad me venit pridie Id. Aprilis. Is est mihi nuntiavit te plane febri carere, & belle

belle habere : tamen , quod negavit , te potuisse ad me scribere , curam mihi attulit : & eo magis , quod Hermia , quem eodem die venire oportuerat , non venerat . Incredibili sum sollicitudine de tua valetudine : qua si me liberaris , ego te omni cura liberabo . Plura scriberem , si jam putarem , libenter te legere posse . Ingenium tuum , quod ego maximi facio , confer ad te mihi tibiue conservandum . Cura te etiam atque etiam diligenter . Vale .

Scripta jam epistola , Hermia venit . Accepi tuam epistolam vacillantibus litterulis : nec mirum , tam gravi morbo . Ego ad te Ægyptam misi quod nec inhumanus est , & te visus est mihi diligere) ut is tecum esset : & cum eo coquum , quo uterere . Iterum vale .

ARGUMENTUM .

Tirone ægrotante , litterarum suavitate & fructu se carere dicit : eumque rogat , ut omnem curam ad convalescendum adhibeat .

TULLIUS TIRONI S. D.

14

MEnandrus postridie ad me venit , quam expectaram . Itaque habui noctem plenam timoribus ac miseriis . Tuis litteris nihilo sum factus certior , quomodo te haberes : sed tamen sum recreatus . Ego omni delectatione litterisque omnibus careo : quas ante , quam te videro , attingere non possum . Medico mercedis quantum poscet , promitti iubeto : id scripsi ad Mummiū . Audio , te animo angī , & medicum dicere , ex eo te laborare . Si me diligis , excita ex somno tuas litteras , humanitatemque , propter quam mihi es carissimus : nunc opus est te animo valere , ut corpore possis . Id cum tua , tum mea causa facias , a te peto . Acastum retine , quo commodius tibi ministretur . Conserva te mihi , dies
pro-

promissorum adest; quem etiam repræsentabo, si ad-
veneris. Etiam atque etiam vale. III. Id. hora III.

ARGUMENTUM.

Hortatio ad morbum depellendum.

TULLIUS TIRONI S. D. 15

OMnia a te data mihi putabo, si te valentem
videro: summa cura exspectabam adventum
Menandri, quem ad te miseram. Cura, si me
diligis, ut valeas: &, cum te bene confirmaris,
ad nos venias. Vale. IV. Id. Aprilis.

ARGUMENTUM.

Gratias agit, & gratulatur de Tirone manumisso.

QUINTUS MARCO FRATRI S. D. 16

DE Tirone, mi Marce, ita te meumque Ci-
ceronem, & meam Tulliolam, tuumque fi-
lium videam, ut mihi gratissimum fecisti, cum
eum indignum illa fortuna, nobis amicum, quam
servum esse maluisti. Mihi crede, tuis & illius
litteris perlectis, exsilui gaudio: & tibi ago
gratias & gratulor. Si enim mihi Statii fideli-
tas est tantæ voluptati; quanti esse in isto hæc ea-
dem bona debent, additis litteris, sermonibus,
humanitate, quæ sunt his commodis potiora? Amo
te omnibus equidem maximis de causis, verum
etiam propter hanc, vel quod mihi sic, ut de-
buiſti, nuntiaſti. Te totum in litteris vidi. Sa-
bini pueris & promisi omnia, & faciam. Vale.

ARGUMENTUM.

*Reprehendit Tironem, quia scripserat, Valetudini
fideliter inserviando; eumque rogat, ut omnino
valetudini inserviat.*

TULLIUS TIRONI S. D. 17

VIdeo quid agas: tuas quoque epistolas vis re-
ferri in volumina. Sed heus tu, qui *καὶ*
esse

esse meorum scriptorum soles, unde illud tam *ἄκρως*, *Valetudini fideliter inserviendo*? Unde in istum locum, *Fideliter*, venit? cui verbo domicilium est proprium in officio, migrationes in alienum multæ. Nam & doctrina, & domus, & ars, & ager etiam fidelis dici potest: ut sit, quomodo Theophrasto placet, verecunda translatio. Sed hæc coram. Demetrius venit ad me: quo quidem comitatu *ἀφωμίλησα*: satis scis. Tu eum videlicet non potuisti videre: cras aderit: videbis igitur. Nam ego hinc perendie mane cogito. Valetudo tua me valde sollicitat: sed inservi, & fac omnia: tum te mecum esse, tum mihi cumulatissime satisfacere putato. Cuspicio quod operam dedisti, mihi gratum est. Valde enim ejus causa volo. Vale.

ARGUMENTUM.

Scripserat Cicero in titulo epistolæ, Tullius Tullio Tironi: Quod Tiro omittendum rescripsit ad invidiam vitandam. De hoc aliisque de rebus scripta est hæc epistola.

TULLIUS TIRONI S. D. 18

Quid igitur? non sic oportet? Equidem censeo sic, addendum etiam, suo. Sed, si placet, invidia vitetur; quam quidem ego sæpe contempsi. Tibi *διαφέρεσθιν* gaudeo profuisse: si vero etiam Tusculanum, Dii boni, quanto mihi illud erit amabilius! Sed, si me amas, quod quidem aut facis, aut perbelle simulas; quod tamen in modum procedit: sed, ut est, indulge valetudini tuæ: cui quidem tu adhuc, dum mihi deservis, servisti non satis: ea quid postulet, non ignoras: *τέλειν, ἀλυπτιαν, περίπατον σύμμετρον, τέλειν, ἀλυσίαν κοιτίας*. Fac bellus revertare: non modo te, sed etiam Tusculanum nostrum plus amem. Paredrum excita, ut hortum ipse

ipse conducat. Sic olitorem ipsum commovebis. Helluo nequissimus H. S. clo. dabat, nullo aprico horto, nullo emissario, nulla maceria, nulla casa. Iste nos tanta impensa derideat? calface hominem, ut ego M. Othonem. Itaque abutor coronis. De Crabra quid agatur, etsi nunc quidem etiam nimium est aquæ, tamen velim scire. Horologium mittam & libros, si erit sudum. Sed tu nullos ne tecum libellos? an pangis aliquid Sophocleum? fac opus appareat. A. Ligu-rius, Cæsaris familiaris, mortuus est, bonus homo, & nobis amicus. Te quando expectemus, fac ut sciam. Cura te diligenter. Vale.

A R G U M E N T U M.

De litteris, de Demetrio, de Aufidiano nomine.

TULLIUS TIRONI S. D.

19

EXspecto tuas litteras de multis rebus, te ipsum multo magis. Demetrium redde nostrum, & aliud, si quid potes boni. De Aufidiano nomine nihil te hortor: scio tibi curæ esse: sed confice. Et si ob eam rem moraris, accipio causam: si te id non tenet, advola. Litteras tuas valde exspecto. Vale.

A R G U M E N T U M.

De valetudine curanda, de libris componendis, de olitore, de reditu Tironis.

TULLIUS TIRONI S. D.

20

Sollicitat, ita vivam, me tua, mi Tiro, valetudo: sed confido, si diligentiam, quam instituisti, adhibueris, cito te firmum fore. Libros compone, indicem cum Metrodoro lubebit: quando ejus arbitrato vivendum est: cum olitore, ut videtur. Tu potes Kalendis spectare gladiatores, postridie redire: & ita censeo. Verum, ut videbitur. Cura te, si me amas, diligenter. Vale.

AR-

ARGUMENTUM.

Propensionem animi studiumque ad virtutem significat, & de prædio empto gratulatur.

CICERO F. TIRONI SUO DULCISS. S. D. 21

CUM vehementer tabellarios expectarem quotidie, aliquando venerunt, post diem XL. & VI. quam a vobis discesserant: quorum mihi fuit adventus optatissimus. Nam cum maximam cepissem lætitiā ex humanissimi & carissimi patris epistola: tum vero jucundissimæ tuæ litteræ cumulum mihi gaudii attulerunt. Itaque me jam non pœnitebat, intercapedinem scribendi fecisse, sed potius lætabar: fructum enim magnum humanitatis tuæ capiebam ex silentio mearum litterarum. Vehementer igitur gaudeo, te meam sine dubitatione accepisse excusationem. Gratos tibi optatosque esse, qui de me rumores afferuntur, non dubito, mi dulcissime Tiro: præstaboque, & enitar, ut in dies magis magisque hæc nascens de me duplicetur opinio: Quare, quod polliceris, te buccinatorem fore existimationis meæ, firmo id constantique animo facias licet. Tantum enim mihi dolorem cruciatumque attulerunt errata ætatis meæ, ut non solum animus a factis, sed aures quoque a commemoratione abhorreant. Cujus te sollicitudinis & doloris participem fuisse, notum exploratumque est mihi: nec id mirum. Nam cum omnia mea causā velles mihi successa, tum etiam tua: socium enim te meorum commodorum semper esse volui. Quando igitur tum ex me doluisti, nunc, ut duplicetur tuum ex me gaudium, præstabo. Cratippo me scito non ut discipulum, sed ut filium esse conjunctissimum: nam cum audio illum libenter, tum etiam ejus propriam suavitatem vehementer amplector. Sum totos dies cum eo, noctisque sæpenumero partem: exoro enim, ut

me-

mecum quam sapissime cœnet. Hac introducta consuetudine, sæpe inscientibus nobis, & cœnantibus, obrepit; sublataque severitate philosophiæ, humanissime nobiscum jocatur. Quare da operam, ut hunc talem, tam jucundum, tam excellentem virum videas quamprimum. Nam quid ego de Bruttio dicam? quem nullo tempore a me patior discedere: cujus cum frugi severaque est vita, tum etiam jucundissima convictio: non est enim sejunctus jocus a philologia, & quotidiana συζητησις. Huic ego locum in proximo conduxi, &, ut possum, ex meis angustiis illius sustento tenuitatem. Præterea declamitare Græce apud Cassium institui: latine autem apud Bruttium exerceri volo. Utor familiaribus & quotidianis convictoribus, quos secum Mitylenis Cratippus adduxit, hominibus & doctis & illi probatissimis. Multum etiam mecum est Epicrates, princeps Atheniensium, & Leonides, & horum ceteri similes. τα μὲν εἰς ἡμᾶς ἵπμας τὰδε. De Gorgia autem quod mihi scribis, erat quidem ille in quotidiana declamatione utilis, sed omnia postposui, dummodo præceptis patris parerem. Διαρρηδύω enim scripserat, ut eum dimitterem statim: tergiversari nolui, ne mea nimia σπερδὴ suspicionem ei aliquam importaret. Deinde illud etiam mihi succurrebant, grave esse, me de iudicio patris judicare. Tuum tamen studium & consilium gratum acceptumque est mihi. Excusationem angustiarum tui temporis accipio: scio enim quam soleas esse occupatus. Emisse te prædium, vehementer gaudeo: feliciterque tibi rem istam evenire cupio. Hoc loco me tibi gratulari, noli mirari: eodem enim fere loco tu quoque emisse, fecisti me certior. Habes ubi deponendæ tibi sint urbanitates: rusticus Romanus factus es. Cum ego mihi nunc ante oculos tuum jucundissimum conspectum propono, videor videre ementem te
rusti-

rusticas res, cum villico loquentem, in lacinia servantem ex mensa secunda semina: Sed, quod ad rem pertinet, me tum tibi defuisse, æque actu, doleo. Sed noli dubitare; mi Tiro, quin te sublevaturus sim, si, modo fortuna me; præsertim cum sciam, communem nobis emptum esse istum fundum. De mandatis quod tibi curæ fuit, est mihi gratum. Sed peto a te, ut quam celerrime mihi librarius mittatur, maxime quidem Græcus: multum enim mihi eripitur operæ in exscribendis hypomnematis. Tu velim in primis cures, ut valeas, ut una *συμφορολογῆν* possimus. Anterum tibi commendo. Vale.

A R G U M E N T U M.

Prima pars hujus epistolæ est de valetudine curanda, reliquæ variis de rebus.

TULLIUS TIRONI SUO S. D.

22

SPero ex tuis litteris tibi melius esse: cupio quidem certe. Cui quidem rei omni ratione cura ut intersias: & cave suspiceris, contra voluntatem meam te facere, quod non sis mecum: mecum es, si te curas. Quare malo te valetudini tuæ deservire, quam meis oculis & auribus. Etsi enim & audio te, & video libenter: tamen hoc multo erit, si valebis, jucundius. Ego hic cesso, quia ipse nihil scribo: lego autem libentissime. Tu istic, si quid librarii mea manu non intelligent, monstrabis. Una omnino interpositio difficilior est, quam ne ipse quidem facile legere soleo, de quadrimo Catone. De triclinio cura, ut facis. Tertia aderit; modo ne Publius rogatus sit. Demetrius iste numquam omnino Phalereus fuit: sed nunc plane Bilienus est. Itaque te do vicarium: tu eum observabis. Etsi: verumtamen, de illis: nosti cetera. Sed tamen, si quem cum eo sermonem habueris, scribes ad me, ut mihi

nascatur epistolæ argumentum, & ut tuas longissimas litteras legam. Cura, mi Tiro, ut valeas: hoc mihi gratius facere nihil potes. Vale.

ARGUMENTUM.

Hortatur, ut professionem conficiat: scribitque sibi esse in animo amicitiam Antonii conservare.

TULLIUS TIRONI S. D.

23

TU vero confice professionem, si potes: etsi hæc pecunia ex eo genere est, ut professione non egeat. Verumtamen Balbus ad me scripsit, tanta se epiphora oppressum, ut loqui non possit, Antonius de lege quid egerit: liceat modo rusticari. Ad Bithynicum scripsi. De Servilio tu videris, qui senectutem non contemnis. Etsi Atticus noster, quia quondam me commoveri *παυκός* intellexit, idem semper putat, nec videt, quibus præfidiis philosophiæ septus sim: & hercule, quod timidus ipse est, *σοφὸς καὶ ταῖς*. Ego tamen Antonii inveteratam sine ulla offensione amicitiam retinere sane volo; scribamque ad eum: sed non ante, quam te videro: nec tamen te avoco a syngrapha: *γὰρ ὁ χρόνος*. Cras expecto Leptam: etenim ad ejus rutam pulegio mihi tui sermonis utendum est. Vale.

ARGUMENTUM.

Agit de domesticis, & publicis rebus.

TULLIUS TIRONI S. D.

24

Etsi mane Harpalum miseram; tamen, cum haberem, cui recte darem litteras, etsi novi nihil erat, iisdem de rebus volui ad te sapius scribere: non quin considerem diligentiam tuam; sed rei me magnitudo movebat. Mihi prora & puppis (ut Græcorum proverbium est) fuit a me tui dimittendi, ut rationes nostras explicares. Offi-

lio

lio & Aurelio utique satisfiat. A Flamma, si non potes omnem, partem aliquam velim extorqueas; in primisque, ut expedita sit pensio Kal. Jan. De attributione conficies. De repræsentatione videbis. De domesticis rebus hæcenus. De publicis omnia mihi certa, quid Octavius, quid Antonius, quæ hominum opinio, quid futurum putes. Ego vix teneor, quin accurram. Sed scilicet litteras tuas exspecto: & scito, Balbum tuum fuisse Aquini, cum tibi est dictum, & postridie Hirtium. Puto utrumque ad aquas. Sed quod egerint Dolabellæ procuratores, fac, ut admoncantur. Appellabis etiam Papiam. Vale.

ARGUMENTUM.

Litteras a Tirone quam creberrimas requirit.

CICERO F. TIRONI SUO S. D. 25

ET si iusta & idonea usus es excusatione intermissionis litterarum tuarum: tamen, id ne sæpius facias, rogo: nam, etsi de reipublicæ rumoribus & nuntiis certior fio, & de sua in me voluntate semper ad me perscribit pater: tamen de quavis minima re scripta a te ad me epistola semper fuit gratissima. Quare, cum in primis tuas desiderem litteras, noli committere, ut excusatione potius expleas officium scribendi, quam assiduitate litterarum. Vale.

ARGUMENTUM.

Suaviter Tironem accusat, quia litteras non miserat: rogatque, ut omnino etiam sine argumento scribat.

Q. CICERO TIRONI SUO S. D. 26

Verberavi te cogitationis tacito dumtaxat convicio, quod fasciculus alter ad me jam sine tuis litteris perlatus est. Non potes effugere huius

culpæ pœnam, te patrono. Marcus est adhibendus: isque diu & multis lucubrationibus commentata oratione vide, ut probare possit, te non peccasse. Plane te rogo, sicut olim matrem nostram facere memini, quæ lagenas etiam inanes obsignabat, ne dicerentur inanes aliquæ fuisse, quæ furtim essent exsiccata: sic tu, etiam si, quod scribas, non habebis, scribito tamen, ne furtum cessationis quæsiuisse videaris. Valde enim mihi semper & vera & dulcia tuis epistolis nuntiantur. Ama nos, & vale.

ARGUMENTUM.

Invehitur in Consules designatos, Hirtnium & Pansam: benevolentiam suam in Tironem significat.

Q. CICERO TIRONI SUO S. D. 27

Mirificam mihi verberationem cessationis epistola dedisti. Nam quæ parcius frater perscripserat, verecundia videlicet & properatione, ea tu sine assentatione, ut erant, ad me scripsisti, & maxime de consulibus designatis: quos ego penitus novi libidinum & languoris effeminatissimi animi plenos: qui nisi a gubernaculis recesserint, maximum ab universo naufragio periculum est. Incredibile est, quæ ego illos scio, oppositis Gallorum castris, in æstivis fecisse: quos ille latro, nisi aliquid firmitus fuerit, societate vitiorum deliniet. Res est aut tribunitiis aut privatis consiliis munienda. Nam isti duo vix sunt digni, quibus alteri Cæsenam, alteri Cossutianarum tabernarum fundamenta credas. Te, ut dixi, fero in oculis. Ego vos III. Kal. videbo; tuosque oculos, etiam si te veniens in medio foro videro, dissuaviabor. Me ama. Vale.

F I N I S.

GRÆ-



GRÆCARUM VOCUM,

Quæ in his Epistolis inter legendum
lectorem linguæ Græcæ imperitum
morari possent,

Interpretatio latina.

Π ΟΛΙΤΙΚΩΤΕΡΟΝ, reip. peritiorem.	pag. 40
κωμικός μάρτυς, comicus testis, idest, non verus: ut aurum comicum.	46
ἰξοχῆ, excellentia.	67
συγγίγνεια, generis præstantia, seu bonitas.	ib.
παρ' ἐμοί γε ἄλλοι. Οὐκ με τιμίσκσι, μάλιστα δὲ μιτίετα Ζεύς, apud me sane & alii sunt, qui me honorabunt, maxime autem consiliarius Jupi- ter, seu consilio valens.	68
φιλαίτιως, accusandi, seu criminandi cupidus.	ib.
Ἐπικύρειον, Epicureum.	73
εἰρωνεῖσθαι, dissimulare, dissimulanter loqui.	90
εἰρωνεύόμενος, dissimulans, dissimulanter loquens.	ib.
γλαῦκ' εἰς Ἀθήνας, Noctuam Athenas, scilicet portans.	150
τῆς δ' ἀρετῆς ἰδῶτα, ante virtutem, sudorem posuerunt Dii immortales.	173
πολιτεῦεσθαι, administrare rempublicam.	191
φιλοδῖωρον, spectandi cupidum.	193
Νίκωνος περὶ πολυφαγίας, Niconis de edacitate.	198
γέλωτα σαρδάνιον, risum fardonicum.	202
δυσσερικά, καὶ δυσεντερικά πάθη, urinæ, & in- testinorum difficultates.	203
δυσεντερίαν, intestinorum difficultatem, seu inte- stinorum morbum.	ib.
λιτότητα, frugalitatem, vel tenuitatem victus.	ib.
διάρροια, ventris profluvium.	ib.
χρήσει μιν, usu quidem.	206
κτήσει δέ, possessione vero.	ib.
ἑτραπελία, urbanitas, vel comitas.	208

ἄκυρον, ineptum.	209
ἀμφιβολία, ambiguitas.	ib.
ὑπερβολή, sermonis exsuperantia, seu superlatio.	ib.
παράγραμμα, inversio litterarum.	ib.
παρά ἀπροσδοκίαν, præter expectationem.	ib.
ἐντεχνα, artificialia.	ib.
σύνταγμα, opus.	215
διδασκαλίαν, doctrinam.	ib.
ἑωλες, obsoleta.	239
λεπθότος, latenter, vel obscure.	240
πολιτείας, civitatum gubernandarum rationes.	241
γλαῦκ' εἰς Ἀθήνας, noctuam Athenas.	ib.
περὶ δωματῶν, de iis, quæ fieri possunt.	242
κατὰ Διόδωρον κρίειν, secundum Diodorum judicare.	ib.
ἢ δ' ἀδωάτων, de numero earum rerum, quæ fieri non possunt.	ib.
κρίσις, judicium.	ib.
Χρύσιππος, Crysippeum.	ib.
κατὰ Χρύσιππον δωματόν, quod secundum Chrysippum fieri potest.	ib.
σωτέ δι' ἐρχομένῳ, simulque duo euntes.	245
ἀποπροηγμένον, rejectum.	ib.
πολλοὶ μαθηταὶ κρείττορες διδασκάλων, multi discipuli præstantiores magistris.	ib.
ὀβελίζει, veru notat, ac jugulat, vel delet.	249
τῶ ποιητῇ, poetæ.	ib.
παρεμβεβλημένοι, inserti, seu subdititii, vel inculcari.	ib.
συμβιωτῶν, convivam, vel convictorem.	ib.
ἀποσθεγμάτων, sententiarum brevium, & acutiarum.	258
προλεγόμενας, quæ proponi solent, antequam quis disputationem aliquam explicandam suscipiat.	262
δψιμαδεῖ, qui discunt jam grandes natu, seu qui sero discunt.	263
ἀπόφθεγμα, quod non successit.	264

ὁ σοφὸς δ' αὐτῶν ἔσῃ , sapiens , rectiloquus eris :	
ideſt, ſuo quamque rem nomine appellabis .	267
ſυμπόσια , computationes .	269
ſυνδειπνα , concœnationes .	ib.
Κύριε παιδείαν , Cyri institutionem .	270
ζήτημα , quæſtionem .	271
πτολίπορθον , urbium everſorem , ſeu expugnato-	
rem .	288
ὄργανον , instrumentum .	331
ſκιαμαχίαι , pugnæ umbratiles , ſive ſimulacra pu-	
gnæ .	ib.
λακωνισμόν , brevitatem ſermonis .	340
φιλοſοφίαι , quæ a philoſophis tractantur , ac	
diſputantur .	342
Παλῶ , proprium loci nomen .	361
πατρίδα ἐμὴν μᾶλλον φιλῶν , patriam meam ma-	
gis amans .	364
δ' αὐτῶν ἐνέερε , liberior in loquendo , & nimis	
libere ſuo quamque rem nomine appellans .	369
πάντα περὶ πάντων , omnia de omnibus .	373
τυραννοκτόνοι , tyrannicidæ .	374
ὑπομνηματισμόν , decretum , vel monumentum .	386
ἀλλ' ἐμὸν ἔποτε θυμὸν ἐνὶ στήθεσιν ἔπειθεν , ſed meum	
numquam animum in pectore inflexit .	399
ἄλκιμος ἔσῃ , ἵνα τις σε καὶ ὀφιογόνων εὖ εἴπῃ , ſtre-	
nuus eſto , quo te & poſteriorum , qui ſero na-	
ſcentur , aliquis laudet .	ib.
ὡς νεφέλη κάλυψε μέλαινα , ſic nebula occultavit	
atra .	ib.
μὴ μὲν ἀσπεδί γε καὶ ἀκλειῶς ἀπολοίμην ,	
ἀλλὰ μέγα ῥέξας τι , καὶ ἱερόμένοις πυθέσθαι .	
Ne vero ſine ſtudio , & ſine gloria peream , ſed	
magnum quid cum fecero , quod vel a poſteris	
audiatur .	400
Εὐριπίδε , Euripidis .	ib.
Μισῶ ſοφιστὰς ὅς τις ἐχ' αὐτῷ ſοφός . Sapieniem odi ,	
qui ſibi non eſt ſapiens .	ib.
ἅμα πρόσω καὶ ὀπίσσω , ſimul a fronte , & a ter-	
go .	ib.

- αἰὲν ἀριστεύειν, καὶ ὑπεύροχον ἔμμεναι ἄλλων, semper strenue se gerere, & præstantem esse aliis, seu principem aliorum. ib.
- διοίκησιν, provinciæ administrationem. 426
- ὑποθήκας, hypothecas, pignora, quæ in rebus immotis consistunt. 429
- τρῆς διοικήσεις, tres provinciales administrationes, diœceses. 436
- χολῶ ἀκρατον, bilem puram. 452
- Εὐσεβῆν, & philoromæum & σεβῆ, & φιλορομαῖον, pium, & amicum Romanorum. 463
- κατ' εἰδώλων φαντασίας, secundum spectrorum visiones, seu simulacrorum. 483
- διανεκτικὰς φαντασίας, in intelligentia positas visiones. ib.
- εἰδῶλα, simulacra, vel spectra. ib.
- εἰδῶλον, spectrum, vel simulacrum. ib.
- αἵρεσι, secta. 484
- πάντα περὶ πάντων, omnia de omnibus, seu pro omnibus. ib.
- πρόσωπον πόλεως, personam civitatis. ib.
- ἀδισποτοι, sine auctore, vel sine domino, id est incerti. 485
- τὸ καλὸν δι' αὐτὸ αἰρετὸν, honestum propter seipsum eligendum, seu expetendum. ib.
- ἀκένόσπεδος, non studens rebus inanibus, sive abhorrens a studio rerum inanium. ib.
- φλύαρον, garrulum. ib.
- σπεύδειν, seria scribere, vel res serias agere. ib.
- τὸ καλὸν δι' αὐτὸ αἰρετὸν, honestum per se expetendum. 486
- ἡδονῶ, voluptatem. ib.
- ἀταραξίαν, perturbationis vacuitatem, id est, animi tranquillitatem. ib.
- τῷ καλῷ, bono, & honesto. ib.
- ἐκ ἔστιν ἡδέως, ἀνδρὲς καλῶς, καὶ δικαίως ζῆν, non potest jucunde vivi, nisi honeste, ac juste vivatur. ib.
- φιλήδονοι, voluptatis studiosi, seu cupidi. ib.

φιλόκαλοι, καὶ φιλοδίκαιοι, honesti amantes, & iustitiæ studiosi.	ib.
ἀντιμυτηρίσαι, vicissim irridere, & subfannare.	487
κακοστόμαχος, malo stomacho, & imbecillo.	493
ἀκίνδυνα μιν, χρονιώτερα δὲ, periculi quidem expertia, sed diuturniora.	494
ψυχὸς δὲ λεπτῷ χρωτὶ πολεμιώτατον, frigus autem tenui, & macilento corpori inimicissimum, seu infestissimum.	495
ἔτυμον, veram nominis originem.	500
κανὼν, regula.	502
ἄκυρον, ineptum.	503
ἀφωμίλησα, me a colloquio segregavi.	ib.
διαθόρησιν, gestationem.	ib.
πίψιν, ἀλυσίαν, περίπατον σύμμετρον, τέρψιν, ἀλυσίαν κυλίας, concoctionem, quietem, seu laboris, ac lassitudinis vacuitatem, deambulationem convenientem, frictionem, solutionem alvi.	ib.
συζητήσῃ, conquestione.	506
τὰ μιν ἐν καθ' ἡμᾶς τὰδε, quæ igitur ad nos pertinent, hæc sunt.	ib.
διάρρηδυν, aperte, diserte.	ib.
σπουδή, studium, contentio.	ib.
συμφιλολογεῖν, una commentari; vel una in literis versari.	507
πανικοῖς, repentinis, & inanibus terroribus.	508
δορυκοποιεῖ, tumultum ciet, tumultum excitat.	ib.
γόνυ κνήμης, genu tibia, subintell. ἰγγύτερον, id est propius.	ib.

INDEX

Eorum, ad quos Epistolæ, quæ hoc volumine continentur, sunt scriptæ.

A
Cilio, pag. 415. 416.
417. 418. 419.

Allieno 443.

Ampio Balbo 166. 306.

Q. Anchario 420.

Antonio 116. 318. 320.

Appio Pulchro 56. 58. 59.

60. 61. 63. 65. 68. 73. 75.

80. 82. 84.

Appulejo 422. 423.

Aristo, *vide* Aucto.

Aucto 425.

B

Basilio 170.

Bithynico 171.

Bruto, & Cassio 317.

Bruto 321. 323. 324. 325.

328. 331. 332. 333. 334.

337. 338. 339. 340. 395.

396. 397. 398.

C
Calio Caldo Imp. 55.

A. Cacinæ 153. 154. 161.

C. Cafari 184. 399. 400.

P. Cælio 425.

Caninio Sallustio 52.

C. Cassio 347. 349. 350. 351.

352. 353. 354. 355. 356.

480. 481. 483. 484. 485.

M. Catoni 465. 466. 473.

M. Curio 205. 206. 208. 424.

Ciceroni 92. 103. 104. 110.

115. 122. 123. 131. 158.

171. 206. 211. 213. 214.

215. 217. 218. 220. 224.

226. 228. 230. 231. 232.

234. 235. 237. 247. 275.

279. 282. 284. 291. 292.

295. 298. 300. 307. 308.

311. 313. 315. 316. 321.

325. 326. 328. 329. 335.

339. 340. 343. 357. 358.

359. 361. 368. 472. 486.

Cluvio 391.

M. Coelio Rufo 40. 41. 42.

43. 44. 45. 47. 49.

Consulibus, Prætoribus,

Tribb. pleb. Sen. populo-

que Rom. 364. 459. 462.

Q. Cornificio 370. 371. 372.

373. 374. 376. 377. 379.

380. 381. 382.

Crassipedi 394.

L. Culleolo 420. 421.

C. Curioni 32. 33. 34. 35.

36. 38.

C. Curtio Paduceano 430.

D

Dolabella 248. 249. 250. 251.

252.

Domitio 176.

F

T. Fabio 137.

M. Fabio Gallo 199.

T. Furfano 162.

C. Furnio 302. 303.

G

Q. Gallio 421. 422.

Gallo 201. 202. 203. 204.

L

P. Lentulo 1. 3. 5. 7. 9. 10.

15. 17.

M. Lepido 304.

Leptæ 172. 173.

Q. Ligario 168. 169.

M. Licinio 119.

L. Luacejo 125. 129. 132.

M. Mar-

M

M. Marcello 97. 99. 100.

102. 474.

C. Marcello 475. 476. 477.

M. Mario 177. 180. 181. 184.

Matio 341.

Memmio 384. 386.

L. Mescinio 143.

Q. Metello 111.

Q. Metello Nepoti 115.

C. Munatio 431.

L. Munatio Planco 272. 273.

274. 276. 277. 283. 285.

287. 288. 290. 293. 294.

297. 412.

N

P. Nigidio 105.

O

M. Oppio 346.

P

Papirio Pato 254. 256. 260.

261. 262. 263. 264. 265.

267. 268. 269. 270.

L. Paulo 478.

Q. Philippo 439. 440.

Cn. Plancio 108. 110.

L. Planco, *vide* Munatio

Planco.

Cn. Pompejo 118.

Q

Quatuor viris, & Decurio-

nibus Fregellanis 441.

R

Regi 426.

Rufo 138. 139.

M. Rutilio 393.

S

P. Servilio Isaurico 435. 436.

437. 438. 439.

Servio Sulpicio 85. 86. 88.

90. 95. 401. 402. 403.

405. 406. 407. 408. 410.

411.

C. Sextilio Rufo 424.

P. Sextio 117. 135.

Silio 423. 431. 432. 433. 434.

P. Sulpicio 442.

T

Terentia suæ 451. 452. 453.

454. 455. 456. 457. 458.

459.

Terentia, & Tulliola, &

Ciceroni suo 444. 445.

447. 448. 450.

M. Terentio Varroni 238.

239. 241. 242. 243. 245.

246.

Q. Thermo 54. 426. 427.

428. 429.

Toratio 174. 175.

C. Trebatio 185. 186. 187.

188. 189. 190. 191. 192.

193. 194. 195. 197. 198.

199.

Trebianio 163. 164. 165.

C. Trebonio 305. 487. 488.

Tironi 490. 491. 492. &c.

T. Titio 133. 440.

C. Titio Rufo 430.

A. Torquato 145. 148. 149.

150.

V

L. Valerio Jurisconsulto 31.

Q. Valerio Orca 387. 388.

389.


Varroni, *vide* Terentio.

Vatinio Imp. 124.

Volumnio 208. 210.

MAG 2022203





mecum quam sapissime cœnet. Hac introducta consuetudine, sæpe inscientibus nobis, & cœnantibus, obrepit; sublataque severitate philosophiæ, humanissime nobiscum jocatur. Quare da operam, ut hunc talem, tam jucundum, tam excellentem virum videas quamprimum. Nam quid ego de Bruttio dicam? quem nullo tempore a me patior discedere: cujus cum frugi severaque est vita, tum etiam jucundissima convictio: non est enim sejunctus jocus a philologia, & quotidiana συζητῆσαι. Huic ego locum in proximo conduxì, &, ut possum, ex meis angustiis illius sustento tenuitatem. Præterea declamitare Græce apud Cassium institui: latine autem apud Bruttium exerceri volo. Utor familiaribus & quotidianis victoribus, quos secum Mitylenis Cratippus adduxit, hominibus & doctis & illi probatissimis. Multum etiam mecum est Epicrates, princeps Atheniensium, & Leonides, & horum ceteri similes. τα μὲν ἔτι καὶ ἡμᾶς τὰδε. De Gorgia autem quod mihi scribis, erat quidem ille in quotidiana declamatione utilis, sed omnia postposui, dummodo præceptis patris parerem. Διαρρήδην enim scripserat, ut eum dimitterem statim: tergiversari nolui, ne mea nimia σπεδὸν suspicionem ei aliquam importaret. Deinde illud etiam mihi succurrebant, grave esse, me de judicio patris judicare. Tuum tamen studium & consilium gratum acceptumque est mihi. Excusationem angustiarum tui temporis accipio: scio enim quam soleas esse occupatus. Emisse te prædium, vehementer gaudeo: feliciterque tibi rem istam evenire cupio. Hoc loco me tibi gratulari, noli mirari: eodem enim fere loco tu quoque emisse, fecisti me certior. Habes ubi deponendæ tibi sint urbanitates: rusticus Romanus factus es. Cum ego mihi nunc ante oculos tuum jucundissimum conspectum propono, videor videre ementem te
rusti-

rusticas res, cum villico loquentem, in lacinia servantem ex mensa secunda semina. Sed, quod ad rem pertinet, me tum tibi defuisse, æque actu, doleo. Sed noli dubitare, mi Tiro, quin te sublevaturus sim, si, modo fortuna me; præsertim cum sciam, communem nobis emptum esse istum fundum. De mandatis quod tibi curæ fuit, est mihi gratum. Sed peto a te, ut quam celerrime mihi librarius mittatur, maxime quidem Græcus: multum enim mihi eripitur operæ in exscribendis hypomnematis. Tu velim in primis cures, ut valeas, ut una *συμφοραλογῆν* possimus. Anterum tibi commendo. Vale.

A R G U M E N T U M.

Prima pars hujus epistolæ est de valetudine curanda, reliquæ variis de rebus.

TULLIUS TIRONI SUO S. D.

22

SPero ex tuis litteris tibi melius esse: cupio quidem certe. Cui quidem rei omni ratione cura ut infervias: & cave suspiceris, contra voluntatem meam te facere, quod non sis mecum: mecum es, si te curas. Quare malo te valetudini tuæ deservire, quam meis oculis & auribus. Etsi enim & audio te, & video libenter: tamen hoc multo erit, si valebis, jucundius. Ego hic cesso, quia ipse nihil scribo: lego autem libentissime. Tu istic, si quid librarii mea manu non intelligent, monstrabis. Una omnino interpositio difficilior est, quam ne ipse quidem facile legere soleo, de quadrimo Catone. De triclinio cura, ut facis. Tertia aderit; modo ne Publius rogatus sit. Demetrius iste numquam omnino Phalereus fuit: sed nunc plane Bilienus est. Itaque te do vicarium: tu eum observabis. Etsi: verumtamen, de illis: nosti cetera. Sed tamen, si quem cum eo sermonem habueris, scribes ad me, ut mihi

nascatur epistolæ argumentum, & ut tuas longissimas litteras legam. Cura, mi Tiro, ut valeas: hoc mihi gratius facere nihil potes. Vale.

ARGUMENTUM.

Hortatur, ut professionem conficiat: scribitque sibi esse in animo amicitiam Antonii conservare.

TULLIUS TIRONI S. D.

23

TU vero confice professionem, si potes: etsi hæc pecunia ex eo genere est, ut professione non egeat. Verumtamen Balbus ad me scripsit, tanta se epiphora oppressum, ut loqui non possit, Antonius de lege quid egerit: liceat modo rusticiari. Ad Bithynicum scripsi. De Servilio tu videris, qui senectutem non contemnis. Etsi Atticus noster, quia quondam me commoveri *παρρησια* intellexit, idem semper putat, nec videt, quibus præfidiis philosophiæ septus sim: & hercule, quod timidus ipse est, *σοφὸς καὶ ταῖς*. Ego tamen Antonii inveteratam sine ulla offensione amicitiam retinere sane volo; scribamque ad eum: sed non ante, quam te videro: nec tamen te avoco a syngrapha: *γὰρ οὐκ ἀντιμύνομαι*. Cras expecto Leptam: etenim ad ejus ruram pulegio mihi tui sermonis utendum est. Vale.

ARGUMENTUM.

Agit de domesticis, & publicis rebus.

TULLIUS TIRONI S. D.

24

Etsi mane Harpalum miseram; tamen, cum haberem, cui recte darem litteras, etsi novi nihil erat, iisdem de rebus volui ad te sapius scribere: non quin considerem diligentia tua; sed rei me magnitudo movebat. Mihi prora & puppis (ut Græcorum proverbium est) fuit a me tui dimittendi; ut rationes nostras explicares. Offi-

lio

lio. & Aurelio utique satisfiat. A Flamma, si non potes omnem, partem aliquam velim extorqueas; in primisque, ut expedita sit pensio Kal. Jan. De attributione conficies. De repræsentatione videbis. De domesticis rebus hætenus. De publicis omnia mihi certa, quid Octavius, quid Antonius, quæ hominum opinio, quid futurum putes. Ego vix teneor, quin accurram. Sed scilicet litteras tuas exspecto: & scito, Balbum tuum fuisse Aquini, cum tibi est dictum, & postridie Hirtium. Puto utrumque ad aquas. Sed quod egerint Dolabellæ procuratores, fac, ut admo-
neantur. Appellabis etiam Papiam. Vale.

A R G U M E N T U M.

Litteras a Tirone quam creberrimas requirit.

CICERO F. TIRONI SUO S. D. 25

ET si iusta & idonea usus es excusatione intermissionis litterarum tuarum: tamen, id ne sæpius facias, rogo: nam, etsi de reipublicæ rumoribus & nuntiis certior fio, & de sua in me voluntate semper ad me perscribit pater: tamen de quavis minima re scripta a te ad me epistola semper fuit gratissima. Quare, cum in primis tuas desiderem litteras, noli committere, ut excusatione potius expleas officium scribendi, quam assiduitate litterarum. Vale.

A R G U M E N T U M.

Suaviter Tironem accusat, quia litteras non miserat: rogatque, ut omnino etiam sine argumento scribat.

Q. CICERO TIRONI SUO S. D. 26

Verberavi te cogitationis tacito dumtaxat convicio, quod fasciculus alter ad me jam sine tuis litteris perlatus est. Non potes effugere huius
Y III culpæ

culpæ pœnam, te patrono. Marcus est adhibendus: isque diu & multis lucubrationibus commentata oratione vide, ut probare possit, te non peccasse. Plane te rogo, sicut olim matrem nostram facere memini, quæ lagenas etiam inanes obsignabat, ne dicerentur inanes aliquæ fuisse, quæ furtim essent exsiccata: sic tu, etiam si, quod scribas, non habebis, scribito tamen, ne furtum cessationis quæsiuisse videaris. Valde enim mihi semper & vera & dulcia tuis epistolis nuntiantur. Ama nos, & vale.

ARGUMENTUM.

Invehitur in Consules designatos, Hirtium & Pansam: benevolentiam suam in Tironem significat.

Q. CICERO TIRONI SUO S. D. 27

Mirificam mihi verberationem cessationis epistola dedisti. Nam quæ parcius frater perscripserat, verecundia videlicet & properatione, ea tu sine assentatione, ut erant, ad me scripsisti, & maxime de consulibus designatis: quos ego penitus novi libidinum & languoris effeminatissimi animi plenos: qui nisi a gubernaculis recesserint, maximum ab universo naufragio periculum est. Incredibile est, quæ ego illos scio, oppositis Gallorum castris, in æstivis fecisse: quos ille latro, nisi aliquid firmitus fuerit, societate vitiorum deliniet. Res est aut tribunitiis aut privatis consiliis munienda. Nam isti duo vix sunt digni, quibus alteri Cæsenam, alteri Cossutianarum tabernarum fundamenta credas. Te, ut dixi, fero in oculis. Ego vos III. Kal. videbo; tuosque oculos, etiam si te veniens in medio foro videro, dissuaviabor. Me ama. Vale.

F I N I S.

GRÆ.



GRÆCARUM VOCUM,

Quæ in his Epistolis inter legendum
lectorem linguæ Græcæ imperitum
morari possent,

Interpretatio latina.

Π ΟΛΙΤΙΚΩΤΕΡΟΝ, reip. peritiorem.	pag. 40
ΚΩΜΙΚΟΣ ΜΑΡΤΥΣ, comicus testis, idest; non verus: ut aurum comicum.	46
ἸΞΟΧῆ, excellentia.	67
ΣΥΓΓΙΝΕΙΑ, generis præstantia, seu bonitas.	ib.
ΠΑΡ' ΕΜΟΙ ΓΕΝ' ἄλλοι. Οὐκ μετρίσκοι, μάλιστα δὲ μιτίετα ζεὺς, apud me sane & alii sunt, qui me honorabunt, maxime autem consiliarius Jupi- ter, seu consilio valens.	68
ΦΙΛΑΪΤΙΩΣ, accusandi, seu criminandi cupidus.	ib.
ἘΠΙΚΥΡΕΙΟΝ, Epicureum.	73
Εἰρωνεῖσθαι, dissimulare, dissimulanter loqui.	90
Εἰρωνεύόμενος, dissimulans, dissimulanter loquens.	ib.
ΓΛΑΥΚ' Εἰς Ἀθήνας, Noctuam Athenas, scilicet portans.	150
Τῆς δ' ἀρετῆς ἰδρῶτα, ante virtutem, sudorem posuerunt Dii immortales.	173
ΠΟΛΙΤΕΥΕΣΘΑΙ, administrare rempublicam.	191
ΦΙΛΟΔΙΩΡΟΝ, spectandi cupidum.	193
ΝΙΚΩΝΟΣ ΠΕΡΙ ΠΟΛΥΦΑΓΙΑΣ, Niconis de edacitate.	198
ΓΕΛΩΤΑ ΣΑΡΔΑΝΙΟΝ, risum sardonicum.	202
ΔΥΣΚΡΙΚΑ, καὶ ΔΥΣΕΝΤΕΡΙΚΑ ΠΑΘΗ, urinæ, & in- testinorum difficultates.	203
ΔΥΣΕΝΤΕΡΙΑΝ, intestinorum difficultatem, seu inte- stinorum morbum.	ib.
ΛΙΤΟΤΗΤΑ, frugalitatem, vel tenuitatem victus.	ib.
ΔΙΑΡΡΟΙΑ, ventris profluvium.	ib.
ΧΡΗΣΕΙ ΜΙΝ, usu quidem.	206
ΚΤΗΣΕΙ ΔΕ, possessione vero.	ib.
ἈΤΡΑΠΕΛΙΑ, urbanitas, vel comitas.	208

ἀκυρον, ineptum.	209
ἀμφιβολία, ambiguitas.	ib.
ὑπερβολή, sermonis exsuperantia, seu superlatio.	ib.
παράγραμμα, inversio litterarum.	ib.
παρά ἀπροσδοκίαν, præter expectationem.	ib.
ἔντεχνα, artificialia.	ib.
σύνταγμα, opus.	215
διδασκαλίαν, doctrinam.	ib.
ἑωλός, obsoleta.	239
ἀεὶ καὶ ὅσως, latenter, vel obscure.	240
πολιτείας, civitatum gubernandarum rationes.	241
γλαῦκ' εἰς Ἀθήνας, noctuam Athenas.	ib.
περὶ δωματῶν, de iis, quæ fieri possunt.	242
κατὰ Διόδωρον κρίνειν, secundum Diodorum judicare.	ib.
ἢ δωματῶν, de numero earum rerum, quæ fieri non possunt.	ib.
κρίσις, iudicium.	ib.
Χρυσίππεια, Crysippeum.	ib.
κατὰ Χρυσίππον δωματόν, quod secundum Chrysippum fieri potest.	ib.
σώτε δὺ ἐρχομένοι, simulque duo euntes.	245
ἀποπροηγμένον, rejectum.	ib.
πολλοὶ μαθηταὶ κρείττονες διδασκαλῶν, multi discipuli præstantiores magistris.	ib.
ὀβελίζει, veru notat, ac jugulat, vel delet.	249
τῶ ποιητῶ, poetæ.	ib.
παρεμβεβλημένοι, inserti, seu subdititii, vel inculcari.	ib.
συμβιωτῶν, convivam, vel convivorem.	ib.
ἀποσθεγμάτων, sententiarum brevium, & acutiarum.	258
προλεγόμενας, quæ proponi solent, antequam quis disputationem aliquam explicandam suscipiat.	262
δψιμαδεῖ, qui discunt jam grandes natu, seu qui sero discunt.	263
ἀπόφθεγμα, quod non successit.	264

ὁ σοφὸς δ' ὑρῶν ἔσῃ, sapiens, rectiloquus eris : ideſt, ſuo quāque rem nomine appellabis .	267
ſυμπόσα, computationes .	269
ſυνδειπνα, concœnationes .	ib.
Κύριε παιδείαν, Cyri institutionem .	270
Ζήτημα, quæſtionem .	271
Πτολίπορδον, urbium everſorem, ſeu expugnato- rem .	288
ὄργανον, inſtrumentum .	331
ſκιαμαχίαι, pugnae umbratiles, ſive ſimulacra pu- gnæ .	ib.
λακωνισμόν, brevitatem ſermonis .	340
φιλοſοφῆμα, quæ a philoſophis tractantur, ac diſputantur .	342
Παλῶ, proprium loci nomen .	361
πατρίδα ἐμὴν μᾶλλον φιλῶν, patriam meam ma- gis amans .	364
δ' ὑρῶν ἑσέρῳ, liberior in loquendo, & nimis libere ſuo quāque rem nomine appellans .	369
πάντα περὶ πάντων, omnia de omnibus .	373
τυραννοκτόνοι, tyrannicidæ .	374
ὑπομνηματισμόν, decretum, vel monumentum .	386
ἀλλ' ἐμὸν ἔποτε θυμὸν ἐνὶ στήθεσιν ἔπειθεν, ſed meum numquam animum in peſtore inflexit .	399
ἄλκιμῳ ἔας', ἵνα τις σε καὶ ὀφιδόνων εὖ εἴπῃ, ſtre- nuus eſto, quo te & poſteriorum, qui ſero na- ſcentur, aliquis laudet .	ib.
ὥς νεφέλη ἐκάλυψε μέλαινα, ſic nebula occultavit atra .	ib.
μὴ μὰν ἀσπεδεῖγε καὶ ἀκλειῶς ἀπολοίμην, ἀλλὰ μέγα ῥέξας τι, καὶ ἑσομένοιſι πυθέſθαι .	
Ne vero ſine ſtudio, & ſine gloria peream, ſed magnum quid cum fecero, quod vel a poſteris audiatur .	400
Εὐριπίδῃ, Euripidis .	ib.
Μισῶ ſοφιστῶν ὅς τις ἔχῃ αὐτῷ ſοφός . Sapiētem odi, qui ſibi non eſt ſapiens .	ib.
ἅμα πρόσω καὶ ὀπίſσω, ſimul a fronte, & a ter- go .	ib.

αἰὲν ἀριστεύειν, καὶ ὑπεύροχον ἔμμεναι ἄλλων, semper strenue se gerere, & præstantem esse aliis, seu principem aliorum. ib.

διοίκησιν, provinciæ administrationem. 426

ὑποθήκας, hypothecas, pignora, quæ in rebus immotis consistunt. 429

τρῆς διοικήσεις, tres provinciales administrationes, diœceses. 436

χολῶ ἄκρατον, bilem puram. 452

Εὐσεβὲς, & philoromæum Δοσιβῆ, & φιλορομαῖον, primum, & amicum Romanorum. 463

κατ' εἰδώλων φαντασίας, secundum spectrorum visiones, seu simulacrorum. 483

διανοητικὰς φαντασίας, in intelligentia positas visiones. ib.

εἰδωλα, simulacra, vel spectra. ib.

εἰδωλον, spectrum, vel simulacrum. ib.

αἵρεσι, secta. 484

πάντα περὶ πάντων, omnia de omnibus, seu pro omnibus. ib.

πρόσωπον πόλως, personam civitatis. ib.

ἀδίσποτοι, sine auctore, vel sine domino, id est incerti. 485

τὸ καλὸν δι' αὐτό αἰρετὸν, honestum propter seipsum eligendum, seu expetendum. ib.

ἀκηνόσπεδος, non studens rebus inanibus, sive abhorrens a studio rerum inanium. ib.

φλύαρον, garrulum. ib.

σπεύδειν, seria scribere, vel res serias agere. ib.

τὸ καλὸν δι' αὐτό αἰρετὸν, honestum per se expetendum. 486

ἡδονῶν, voluptatem. ib.

ἀταραξίαν, perturbationis vacuitatem, id est, animi tranquillitatem. ib.

τῷ καλῷ, bono, & honesto. ib.

ἔκ ἐστιν ἡδέως, ἀνδρεῖ καλῶς, καὶ δικαίως ζῆν, non potest jucunde vivi, nisi honeste, ac juste vivatur. ib.

φιλήδονοι, voluptatis studiosi, seu cupidi. ib.

φιλό-

φιλόκαλοι, καὶ φιλοδίκαιοι, honesti amantes, & iustitiæ studiosi. ib.

ἀντιμυθηρίσαι, vicissim irridere, & subannare. 487

κακοστόμαχος, malo stomacho, & imbecillo. 493

ἀκίνδυνα μιν, χρονιώτερα δὲ, periculi quidem expertia, sed diuturniora. 494

ψυχὴ δὲ λεπτῷ χρωτὶ πολεμιώτατον, frigus autem tenui, & macilento corpori inimicissimum, seu infestissimum. 495

ἔτυμον, veram nominis originem. 500

κανὼν, regula. 502

ἄκυρον, ineptum. 503

ἀφωμίλησα, me a colloquio segregavi. ib.

διαφόρῃσιν, gestationem. ib.

πέψιν, ἀλυσίαν, περίπατον σύμμετρον, τέρψιν, δύσειαν κηλίας, concoctionem, quietem, seu laboris, ac lassitudinis vacuitatem, deambulationem convenientem, frictionem, solutionem alvi. ib.

συζητήσῃ, conquisitione. 506

τὰ μὲν ἐν κατ' ἡμᾶς τάδε, quæ igitur ad nos pertinent, hæc sunt. ib.

διάρρηδυν, aperte, diserte. ib.

σπαδῇ, studium, contentio. ib.

συμφιλογεῖν, una commentari; vel una in literis versari. 507

πανικοῖς, repentinis, & inanibus terroribus. 508

θορυβοποιεῖ, tumultum ciēt, tumultum excitat. ib.

γόνυ κνήμης, genu tibia, subintell. ἰγγύτερον, id est propius. ib.

INDEX

Eorum, ad quos Epistolæ, quæ hoc volumine continentur, sunt scriptæ.

- A**
A Cilio, pag. 415. 416. 417. 418. 419.
 Alieno 443.
 Ampio Balbo 166. 306.
 Q. Anchario 420.
 Antonio 116. 318. 320.
 Appio Pulchro 56. 58. 59. 60. 61. 63. 65. 68. 73. 75. 80. 82. 84.
 Appulejo 422. 423.
 Aristo, vide Aucto.
 Aucto 425.
- B**
 Basilio 170.
 Bithynico 171.
 Bruto, & Cassio 317.
 Bruto 321. 323. 324. 325. 328. 331. 332. 333. 334. 337. 338. 339. 340. 395. 396. 397. 398.
- C**
 Calio Caldo Imp. 55.
 A. Cacinæ 153. 154. 161.
 C. Cafari 184. 399. 400.
 P. Cælio 425.
 Caninio Sallustio 52.
 C. Cassio 347. 349. 350. 351. 352. 353. 354. 355. 356. 480. 481. 483. 484. 485.
 M. Catoni 465. 466. 473.
 M. Curio 205. 206. 208. 424.
 Ciceroni 92. 103. 104. 110. 115. 122. 123. 131. 158. 171. 206. 211. 213. 214. 215. 217. 218. 220. 224. 226. 228. 230. 231. 232. 234. 235. 237. 247. 275. 279. 282. 284. 291. 294.
- D**
 295. 298. 300. 307. 308. 311. 313. 315. 316. 321. 325. 326. 328. 329. 335. 339. 340. 343. 357. 358. 359. 361. 368. 472. 486.
 Cluvio 391.
 M. Cælio Rufo 40. 41. 42. 43. 44. 45. 47. 49.
 Consulibus, Prætoribus, Tribb. pleb. Sen. populo- que Rom. 364. 459. 462.
 Q. Cornificio 370. 371. 372. 373. 374. 376. 377. 379. 380. 381. 382.
 Crassipedi 394.
 L. Culleolo 420. 421.
 C. Curioni 32. 33. 34. 35. 36. 38.
 C. Curtio Paduceano 430.
- E**
 Dolabellæ 248. 249. 250. 251. 252.
- F**
 Domitio 176.
 T. Fabio 137.
 M. Fabio Gallo 199.
 T. Furfano 162.
 C. Furnio 302. 303.
- G**
 Q. Gallio 421. 422.
 Gallo 201. 202. 203. 204.
- L**
 P. Lentulo 1. 3. 5. 7. 9. 10. 15. 817.
 M. Lepido 304.
 Leptæ 172. 173.
 Q. Ligario 168. 169.
 M. Licinio 119.
 L. Luacejo 125. 129. 132.
 M. Mar-

M

M. Marcello 97. 99. 100.
102. 474.

C. Marcello 475. 476. 477.

M. Mario 177. 180. 181. 184.

Matio 341.

Memmio 384. 386.

L. Mescinio 143.

Q. Metello 111.

Q. Metello Nepoti 115.

C. Munatio 431.

L. Munatio Planco 272. 273.

274. 276. 277. 283. 285.

287. 288. 290. 293. 294.

297. 412.

N

P. Nigidio 105.

O

M. Oppio 346.

P

Papirio Pato 254. 256. 260.

261. 262. 263. 264. 265.

267. 268. 269. 270.

L. Paullo 478.

Q. Philippo 439. 440.

Cn. Plancio 108. 110.

L. Planco, *vide* Munatio

Planco.

Cn. Pompejo 118.

Q

Quatuor viris, & Decurio-
nibus Fregellanis 441.

R

Regi 426.

Rufo 138. 139.

M. Rutilio 393.

S

P. Servilio Isaurico 435. 436.

437. 438. 439.

Servio Sulpicio 85. 86. 88.

90. 95. 401. 402. 403.

405. 406. 407. 408. 410.

411.

C. Sextilio Rufo 424.

P. Sextio 117. 135.

Silio 423. 431. 432. 433. 434.

P. Sulpicio 442.

T

Terentia suæ 451. 452. 453.

454. 455. 456. 457. 458.

459.

Terentia, & Tulliola, &c.

Ciceroni suo 444. 445.

447. 448. 450.

M. Terentio Varroni 238.

239. 241. 242. 243. 245.

246.

Q. Thermo 54. 426. 427.

428. 429.

Toratio 174. 175.

C. Trebatio 185. 186. 187.

188. 189. 190. 191. 192.

193. 194. 195. 197. 198.

199.

Trebianio 163. 164. 165.

C. Trebonio 305. 487. 488.

Tironi 490. 491. 492. &c.

T. Titio 133. 440.

C. Titio Rufo 430.

A. Torquato 145. 148. 149.

150.

V

L. Valerio Jurisconsulto 31.

Q. Valerio Orca 387. 388.

389.


Varroni, *vide* Terentio.

Vatinio Imp. 124.

Volumnio 208. 210.

MAG 2022203





The first of these is the fact that the

 government has been unable to

 maintain a consistent policy

 in regard to the treatment of

 the Chinese in the Philippines.

 The second is the fact that the

 Chinese have been able to

 maintain a strong and

 organized resistance to

 the government's policy.

 The third is the fact that

 the Chinese have been able

 to maintain a strong and

 organized resistance to

 the government's policy.





